


國學基
本叢書
徐騎省集



書叢本基學國

集 省 騎 徐


撰 鉉 徐

上海图书馆藏书



A541 212 0006 15878

行發館書印務商



1650151

序

余獲舊鈔本徐騎省集。寶愛甚至。鏤板既成。吮毫作序。悼南唐末造之衰。思東海躬逢之厄。愜然有感。唏矣其言。夫其效命偏隅。歷踐清要。攀龍一鱗。吐鳳五采。濰州夫子。聯李杜之名。集賢學士。馳機雲之譽。可謂弁冕英雋。黼黻巖廊者矣。泊乎國步旣訖。大命有歸。走青蓋於江東。侍白衣於樓下。身蒙特宥。迹寄中朝。則又麥秀之詠。無以喻其哀思。竹素之詞。不能寫其隱痛者焉。或謂禽喜受命。遂卻敵師。珉雋捐軀。實因主辱。以斯二者。疑愧前賢。不知南都播越之餘。開寶式微之際。緘衣僧帽。叢姦濫於佛門。春水小樓。效都俞於詞律。軍驅白甲。水縮黃花。已失佑於天人。冀圖存於旦夕。秦宓文辨。任專對而有餘。張儼高才。緣通好以相屈。渾濬之師已偪。儀秦之舌奚裨。而公聞命慷慨。秉義堅貞。勿顧一介之使。而止上江之援。乞緩無名之師。以全一邦之命。喙奮風雨。心甘雪旄。蓋不爲馮謐之得歸。直將繼孫晟而抗節矣。天威方震。卒貸行人。運祚俄移。仍隨國主。句踐入吳。則范蠡從侍。安樂降晉。則郤正拜官。然而免爲俘虜之悲。恨不與楚金同死。江南大臣之對。未聞向藝祖求生。公之心。豈爲開國千戶侯。而負永陵一培土乎。或又謂藥賜牽機。禍階私謁。一將朝命。遂洩狂言。背曹髦而馳語。何異王沈。察昌邑而奏言。不如張敞。此尤事乖實錄。語涉不經。夫以重光之屏昏。遇太宗之英武。勢非建德就擒之比。時無唐莊內亂之憂。亦旣名改侯封。錢增月奉。似劉張執挺。已長降王。擬叔寶工文。祇堪學士。本不關其後慮。亦安用其雄猜。況乎悔已殺之。諫臣吟東流之江水。關君常態。詞客遙情。公縱不壅於上聞。帝豈肯援爲罪案。是以文寶拾遺之記。但述

悽傷。李燾通鑑之編。全刪疑誤。有悼史爲左證。杜後人之詆誣。觀於隴西撰碑。便殿請對。楊武陽昭烈之贊。竝述休風。魏文貞李密之銘。義存故主。歎息動夫九陛。忠義章於一時。益可知文字之禁。早與蠲除。明聖之君。必無忌克已。方其浮湛僞朝。遠避榮利。朋黨不入於韓宋。衡軸無競於張陳。抵觸內臣。識元節之壯志。專誅賊首。有廣漢之嚴威。緬厥廉貞。允爲卓絕。暨歸皇宋。終作詞臣。王仲宣之侍華轂。擬其賢勞。蔡中郎之趣飲章。同其傷陷。半臂弗御。嬰子京之寒疾。華髮滿領。嗟樂天之無兒。命途永乖。時論所喟。而冰斯之筆。空爛於當年。燕許之文。獲編於身後。流傳未廣。揮發有待。幸拂拭於千古。得揚摧以片言。思鏡湖賀監之答。猶慨慕其風標。披南閣祭酒之書。竝垂光於天壤。

光緒十六年歲次庚寅冬十一月黟縣李宗媚謹序

四庫全書總目提要

騎省集三十卷

宋徐鉉撰。鉉有稽神錄，已著錄。晁公武讀書志、陳振孫書錄解題，並載鉉集三十卷，與今本同。陳氏稱其前二十卷，仕南唐時作，後十卷，皆歸宋後作。今勘集中所載年月事蹟，亦皆相符。蓋猶舊本也。集爲其壻吳淑所編。天禧中，都官員外郎胡克順得其本於陳彭年，刊刻表進，始行於世。鉉精於小學，所校許慎說文，至今爲六書矩矱，而文章淹雅，亦冠一時。讀書志稱其文思敏速，凡有撰述，常不喜預作，有欲從其求文者，必戒臨事卽來請，往往執筆立就。未嘗沈思，常曰：文速則意思敏壯，緩則體勢疎慢。故其詩流易有餘，而深警不足。然如臨漢隱居詩話所稱，喜李少保卜鄰詩，井泉分地脈，砧杵共秋聲之句，亦未嘗不具有思致。蓋其才高而學博，故振筆而成。時出名雋也。當五季之末，古文未興，故其文沿溯燕許，不能嗣韓柳之音，而就一時體格言之，則亦迴然孤秀。翟耆年稽史曰：太平興國中，李煜薨，詔侍臣撰神道碑，有欲中傷鉉者，奏曰：吳王事，莫若徐鉉爲詳。遂詔鉉撰。鉉請存故主之義，太宗許之。鉉但推言歷數有盡，天命有歸而已。其警句曰：東鄰構禍，南箕扇疑，投杼致慈，親之惑，乞火無里婦之詞，始勞因墨之師，終後塗山之會。太宗覽之，稱歎不已。云云。後呂祖謙編文鑑，多不取儻偶之詞，而特錄此碑。蓋亦賞其立言有體，以視楊維禎作明鼓吹曲，反顏而詆故主者，其心術相去遠矣。然則鉉之見重於世，又不徒以詞章也。

進徐騎省文集表

臣克順言。伏以德必有言。見稱於君子。文之行遠。用示於方來。矧逢熙盛之期。茂闡欽明之化。臣克順誠惶誠懼。頓首頓首。伏念臣本惟寒族。偶襲緒風。幼服佩於義方。長陶烝於孝治。築室百堵。介處於下鄉。教子一經。敢墮於素業。旌閭雖慙於往事。賜書寧謝於古人。家藏稍多。耳剽亦久。竊見故散騎常侍徐鉉。傑出江表。夙負重名。逮事天朝。荐升近列。特受先皇之顧遇。頗爲後進之宗師。文律高深。學術精博。辭惟尚要。思在無邪。克著一家之言。蓋處諸公之右。淳化之歲。被病考終。生嗟伯道之孤。歿慮若敖之餒。而臣頃在場屋。獲造門牆。情篤鄉關。禮鈞甥姪。永惟感舊。適值送終。臣家乃具扁舟。載其靈柩。直抵豫章之郡。卜葬西山之阿。一掩佳城。久荒宿草。雖歲時靡輟。爲修黃石之祠。而翰墨罕存。難訪茂陵之札。每思編輯。尤懼舛譌。數年前。故參知政事陳彭年。因臣屢言。成臣夙志。假以全本。并茲冠篇。乃募工人。肇形鏤板。竹簡更寫。無媿於前修。緜几迴觀。願留於睿覽。伏望崇文廣武。感天尊道。應眞佑德。上聖欽明。仁孝皇帝陛下。清衷軫念。鴻霈延慈。稍迴虞舜之聰。暫乙東方之牘。淪恩至厚。俾朽骨以重榮。垂範長新。耀遺編而增煥。豈惟疎賤。獨荷照臨。其新印徐鉉文集兩部。計六十卷。共一十二冊。謹隨表上進。干冒宸嚴。臣無任戰汗。激切屏營之至。臣克順誠惶誠懼。頓首頓首。謹言。

天禧元年十一月日。三司戶部判官。朝散大夫。行尙書都官員外郎。上護軍。臣胡克順上表。

批答

勅胡克順省所上表進新印徐鉉文集兩部計六十卷共一十二冊事具悉徐鉉生於江介早著時名歷事祖宗之朝常居文翰之任發揮誥命有溫雅之風備預咨詢見該通之學矧惟素履無謝古人汝克慕前修盡編遺札俾之摹印庶廣流傳覩奏御之爰來諒恪勤之斯至覽觀之際嘉歎良深故茲獎諭想宜知悉

五日

故散騎常侍東海徐公文集序

祕書郎陳彭年撰

昔姬昌既歿。文不在於茲乎。韓起有言。禮盡見於魯矣。故尼丘降異。以產民宗。闕里垂言。用爲人極。自哲人一往。作者多歧。則有孟子制其橫流。荀卿平其亂轍。戰國之際。百氏沸騰。嬴秦之餘。六經煨燼。菁華欲竭。俎豆無歸。故賈生談仁義於前。揚子宗詩書於後。魏晉名士。咸重玄言。梁隋諸公。始興宮體。茲風一扇。踰數百年。唐氏儁乂爲多。比百王而雖盛。文章所向。方三古而終殊。於是韓吏部獨正其非。柳柳州輔成其事。千齡旦暮。斯豈誣哉。俾大道之將行。故由天意。幸斯文之未喪。亦繫人謀。其有道冠人倫。才爲世表。令名不泯。百代攸宗。今復見之徐公矣。公諱鉉。字鼎臣。其先會稽人也。鄰幾之姿。生民之秀。滄溟沃日。流作言泉。建木干星。植爲行囿。英才茂德。光映於前修。懿範清規。儀刑於來者。弄璋之始。屬唐室之多虞。佩觿之初。直揚都之建號。公文辭濬發。不類幼童。識量淹通。已成大器。彈冠入仕。方居終賈之年。佩玉登朝。卽就嚴徐之列。泊江東內禪。文物初興。廊廟之珍。獨當其任。搢紳之望。無出其先。漢之賢臣。蔡邕歷三臺之選。魏之俊士。索靖馳二妙之名。若乃毛玠之公清。汲黯之正直。王倫之知禮。張華之博物。鄭當時之下士。山巨源之薦賢。以公方之。綽有餘裕。故得觀孔光之樹。久奉樞機。寓荀勗之池。常參獻替。雖具瞻之重。猶未正名。而乃眷之殊。已同彼相。及樓船南伐。青蓋東來。遂於艱虞之辰。克盡始終之節。夫章臺之壁。早屬秦求。方城之材。果爲晉用。太祖讀豫州之檄。不責其非。今上聽上林之文。屢言其美。由是甘泉柏殿。重

奉宸遊。瑣闥貂冠。更膺天獎。王公慕義。如見古人。名德在時。目爲耆老。李膺交友。不異神仙。許劭言談。是名月旦。雖來江左。魯公於是贈詩。寓彼漢中。武侯以之下拜。無以踰也。及運逢消長。道或盈虛。辭通籍之簪纓。陪外藩之樽俎。語鬼神之事。歸宣室而未期。留封禪之書。臥茂陵而長往。嗚呼。惟公稟中和之氣。挺傑出之才。風雨而不迷。霜雪而不變。瞻其絜白。如珪如璋。聽其風聲。如蘭如蕙。自成人之始。至從心之年。險阻艱難。所經多矣。功名富貴。皆自致之。至若平仲事君。一心無改。展禽秉直。三黜彌光。百行立身。世談其盡善。片言違道。人知其不爲。豈但王佐之才。獲稱於士季。公卿之量。見賞於林宗乎。其有立言之旨。學古之功。究乎天人。窮乎性理。文房逸勢。楚國之三休。筆陣雄風。宋人之九拒。昔者洞簫之賦。誦之者後宮。劍閣之銘。刊之者明詔。賈誼過秦之作。史臣置於篇中。王融曲水之辭。鄰使求於座上。蔡中郎之所自許。則有太丘之碑。潘黃門之所用工。獨是荊州之誄。公並窮其淵藪。仍在上游。掇其英華。更多餘力。雖絲篁金石。無以均其雅。黼黻玄黃。不足方其麗。草太玄之客。徒欲載金。述十意之人。自將焚藁。豈獨語其篇什。宜升洙泗之堂。畫彼形容。當在靈均之廟者哉。矧復六書之藝。少而留心。二篆之蹤。老而盡妙。研精不捨。常惜寸陰。尺牘所傳。有同珍寶。聖上方欲恢千年之洪業。答上帝之耿光。朝諸侯而東巡。祀介丘而降禪。若乃以秦丞相之健筆。兼漢郎將之雄文。銘此成功。垂之不朽。求之輿論。公卽其人。斯志未終。大年行盡。殲良之痛。其可已乎。公江南文藁。撰集未終。一經亂離。所存無幾。公自勒成二十卷。及歸中國。入直禁林。制詔表章。多不留草。其餘存者。子塔尚書水部員外郎吳君淑。編爲十卷。通成三十卷。所撰質論。稽神錄。奉詔撰江南錄。修許慎說文。並別爲一家。不列於此。彭年越在幼年。卽承訓導。通家之舊。與文舉以攸同。

入室之知。方子淵而豈異。感生平而永歎。報德無階。痛音問之長違。殞身莫贖。聊存撫實。用以冠篇。時淳化四年七月序。

宋故金紫光祿大夫左散騎常侍上柱國東海縣開國伯食邑七百戶責授靜難軍節度行軍司馬徐公年七十六行狀

公諱鉉字鼎臣其先東海郟人也周德之衰僖王以仁義所歸者七十餘國乃遜於江淮之南會稽太末里有廟存焉積慶所鍾令嗣蕃衍故自烈考已上皆生於會稽公所撰改卜合葬烈考太夫人於洪州西山墓誌詳矣公與弟錯屬烈考卽世年皆幼稚太夫人撫育教導資以生而知之咸以雄文奧學克振令譽公未弱冠以蔭釋褐爲校書郎直宣徽北院機命文翰實專司之以名密稱先主卽位以本官直門下省賜緋試知制誥辭達典雅智效勤恪嗣主初拜祠部員外郎知制誥後親受命草詔者無所經據不根事實繇是駁議忤旨左遷秦州幕職途中詩云浮名浮利悠悠四海干戈痛主憂三諫不從爲逐客一身無累似虛舟滿朝權貴皆忤遠郭林泉已遍遊唯有戀恩心不改半程猶自望城樓謫居三年嗣主知其無罪徵復本官仍知制誥公餘力攻篆書度越陽冰而與李斯爲等夷著質論十四篇極刑政之要盡君臣之際並傳於世斯爲不朽矣文章論議與故贈揆相韓公同志齊名時人謂之韓徐及江淮之平建州也而福州與越人拒命不服使陳覺馮延魯招撫之未報遂擅興兵攻取時軍帥不一聽而無上又出不以律衆敗績而退乃歸罪二使將誅之時陳覺之使國老宋公之所舉也於是上表待罪蓋欲解救之遂械二使以歸聽命公與韓公議赦此二人則萬姓謗讟之怨歸于上二使首領之惠在於齊丘辱國容奸斯爲巨蠹遂同上疏極言其罪追正刑書克協衆心式沮狂計嗣主親批答疏略曰昨陳覺之行實太傅舉之矣及師敗之後事下有司太傅無救拔之詞有自訟之表以是之故得不再思何者先朝舊臣

國家元老。不惟舉人偶失。可得輿言。直是謀之不臧。亦未有加罪之理。昔魏武帝乘降劉琮之勢。將兼并吳國。張昭時居朝右。爲吳老臣。一旦勸請其君。臣妾於魏。此謀不以爲拙。曷以爲拙乎。賴周瑜輩力爭而止之。及魏師之敗。昭亦晏然自處。吳大帝亦不之見責。彼二子。孤若懷憤悱之意。戮之久矣。此際長流遠郡。斥爲庶人。五木被身。一家狼籍。永從流放。與死何殊。卿等憂國情深。除奸意切。諸所徵引。批答未殫。公與韓公同表謝。略曰。伏讀批答。曰。卿等憂國情深。除奸意切。是陛下知其奸也。又曰。永從流放。與死何殊。知陛下必不用也。旣知而棄。雖在何爲。公事君匪躬。嫉惡好直。危言危行。始終不變。率此類焉。尋徵拜中書舍人。公嘗誘掖後進。苟有一善。必延譽之。潔已請益者。亦誨導之不懈。壬子歲。翰林學士江公知貢舉。始以進士王克貞等三人及第。盡復舉場之故事。獨由公左右贊成之。江公卽長興三年。盧華下及第。嗣主因問北朝取人。何如卿此來。江公對以北朝公薦私囑相半。若此來。唯以公道選材。實無有此事。嗣主甚善之。中書舍人張緯聞之。以爲皆大朝及第。不本江公之意。甚銜之。時宰執皆非名第。同力欲罷此科。遂下制。輟應舉焉。明年。公兼判文理院。遂首言此事。纒復不可遽止。乃以進士張□□□□□□□□□□。鳳賦。朱觀老子猶龍賦。郭賁無聲樂賦。印葵石城虎踞賦。寫之以進。遂下制云。去歲所司。上言。曾罷貢舉。本難久廢。況以經年。其諸色舉人。並宜依舊解送。自此不復廢矣。公之爲文。長於典雅。直而不迂。以理勝爲貴。其武成王廟碑序。末云。微臣學愧常師。用慙兼備。承明再入。故無經國之材。宣室徵還。幸對受釐之間。將使延州聽樂。長聞雅正之聲。圯上受書。世出帝王之佐。蔣莊武帝廟碑序。末云。微臣潤色無功。討論奚取。思問神於先聖。始欲事君。苟獲罪於玄穹。曷容媚竈。唯於舊史。想見英風。適當罷役之初。爰奉屬

辭之詔。西州作頌。誠慙邑子見稱。南國刊銘。或望至尊所改。又銘末云。謝傅長逝。王公不作。獨我莊武。先
迂。睿略。斯皆披文相質。立言邁俗。豈爲情見乎詞而已矣。時江南久興。建屯田。楚州常州尤甚。聚斂掎克
之輩。侵奪射利。民不聊生。言事者累諫弗聽。洎國老宋公上疏。主者堅執不易。於是命公往察訪。一如親
行。可興可廢。悉以便宜從事。後奏公既行。而羣黨已切齒矣。楚州應非理遷入屯田之產業。盡還本戶。百
姓謹譁感泣。如釋犴狴。次至常州。亦如楚州處置。協比衆惡之徒。太上御名以擅作威福。徵還私第待罪。蒼蠅
貝錦。膠固組織。詰難問狀。不容自理。鍛鍊深刻。將置大辟。其貶制乃張緯所草。末云。尙以年齡方壯。文學
甚優。特屈彝章。宜從流放。於是長流舒州。時弟錯任右拾遺。集賢殿直學士。亦貶秘書郎。分司東都。公前
左遷秦州。弟亦貶烏江尉。及流舒州。親友臨江相送。韓相有詩云。昔年淒斷此江湄。風滿征帆淚滿衣。今
日重憐鶴鶴羽。不堪波上又分飛。在同城三年。唯游覽勝境。披翫典籍。尤攻吟詠。情性未嘗以得喪。蠶芥
於方寸。撰周將軍廟碑銘。文宣王廟碑序。喬公亭記。九疊松讚。皆足志之文。刻於貞石。及疊移饒州。未登
途。而周世宗之師過淮。取舒。斬公。遽攜家。榜小舟。由皖口歸昇州。公賦詩末云。一夜黃星照官渡。本初何
面見田豐。其情發於中。不顧言之太直如此。明年授太子左諭德。未幾復知制誥。拜中書舍人。通署中書
省事。時周世宗弭兵修好。待嗣君以優禮。異數。凡表章往復。討論潤色。多公所爲。及世宗崩。祭文實公視
草。嗣主嘉賞。時人傳寫。爲之紙貴。侍嗣主殂於豫章。護喪歸建業。後主卽位。官職如故。而訪問詢謀。無改
嗣主之道。其知舉也。不獨考其文章。必先察其德行。故難於得人。出羣拔萃者。最稱吳淑。復以子妻之。其
所問策五道。盡時務政理之要。後主並親答焉。仍俾詞臣悉對之。後主以尙書省綱條弛紊。官司怠棄。積

習已久。思公正之人。以糾劾提振之。徙公爲尙書左丞。逾月而罷。以尙書右僕射游公。判六司。拜公爲工部侍郎。知制誥。翰林學士。尋以憲署曠職。法吏侮文。非委直清。不能嚴肅。拜公御史大夫。而佞用讒勝。吾道不行。於是奉身而退。拜兵部尙書。知制誥。翰林學士。以先奉命修嗣主實錄。乃專以屬辭比事爲務。後主每有著述。必令公兄弟視草。而後編錄。故雜說。公爲之序。文集。弟集賢舍人爲之序。彼昔之二龍兩驥。烏足以方茲令名焉。王師之弔伐金陵也。公急病讓夷。請使於天朝。以釋後主之前事。辯疑分謗。且服罪降名。以鄙入爲請。庶不墮奔世之國祀。已行。遂拜右僕射。同參左右內史事。及覲太祖。敷奏忠愨。執議誠信。雖不得請。太祖亦甚嘉歎。美其秉節無撓。旣復命。自以不能副後主之望。雪泣固讓。不受其新命焉。尋從後主歸朝。授太子率更令。皇上登極。素知公之文學優贍。久司教令。特授直翰林學士院。拜給事中。侍從鑾輿。下并汾。襲僞之地。巡狩魏博。逐入寇之虜。申威耀德。因壘懷來。告至策勳。詔示填委。雖翰林諸公。盡熙帝之載。而公亦與有力焉。數年。拜右散騎常侍。慶恩升左散騎常侍。末年。公著靜齋自箴。篆書刊石。寘於座右曰。爰有愚叟。棲此陋室。風雨可蔽。戶庭不出。知足爲富。娛老以逸。貂冠蟬冕。虎皮羊質。處之勿疑。永爾終吉。後之君子。觀之。有以見公。名重益謙。德成藏密。與其一無所鑿。而窺冀所不休者。是天之戮民。不可同年而語矣。惟公未冠筮仕。名稱藉甚。日彰夙習。非聚學辨問之所克也。稟心忠正。治身儉約。公家之事。知無不爲。自幼至老。惡其聚斂貪冒。未嘗微寘於懷。俸祿所入。不問多少。隨時供億而已。居處求安。不務顯敞。但聊以蔽其風雨。量家所受。餘分貸親。故舊知寓止焉。與人交。有始有卒。必誠必信。久要不替。雖中或不善。人無閒然。初與禮部尙書常夢錫。給事中蕭儼之爲莫逆。蓋以二公常忿宋國老。狃於緇

太上之業。包藏凶慝。每章言其罪。公亦同力嫉惡。先主嗣主。因審度爲虞。故不任之以政。及宋國老暮年。御名因陳覺。李徵古。協謀不軌。貫盈事發。同時殛死。嗣主追念常。蕭與公疇昔敢言。果今日之速禍也。時常公已卒。因言曰。夢錫常欲殺齊。恨其誅戮不見。於是贈右僕射焉。適後主從容言及此事。公且曰。夢錫先卒。不見齊之敗。嗣主已追贈矣。唯臣與蕭儼之。目覩朝典。況臣塵忝。官列八座矣。獨蕭儼之往爲理官。以赦前失入。貶黜吉州。以老告退。願以臣今所居官。授儼之。旌其先見。後主由是召蕭儼之。至建業。以公所陳。列慰勞。特授工部尚書。以年過懸車。致仕居吉州。給奉祿終身焉。公於內外族。視無疎密待之如一。其有孤嫠無告者。皆糾合收養。稱家之有無。隨事拯濟。婚嫁視之如家人子。雖讒口謗議。紛紜盈耳。公自信不疑。唯恤念舊是急。不知其他。及左遷邠。岐亦坐此獲譴矣。有子曰夷直。朗州桃源令。先公疾卒。女三人。長適左贊善大夫高御名。次女適國子博士吳淑。先公卒。次女幼有才淑。未笄而卒。公享年七十六。某年月日。以疾終於邠州官舍。恬然神氣不亂。唯禁家人勿哭。以爲怛化。但囑以殯歸於洪州西山。祔葬於烈考太夫人之墓。卽以某年月日。洪州胡某。以舟至京。護載公之柩歸西山。從理命也。公業隆儒行。奉五常而不墮。志嚮道風。稟三寶而無玷。故其立言蘊德。久而彌芳。繕性觀妙。老而益壯。實古之人。與克播遺風。允資鴻筆。謹狀。

大宋故靜難軍節度行軍司馬檢校工部尚書東海徐公墓誌銘

金紫光祿大夫尚書右僕射兼中書侍郎平章事監修國史上柱國隴西郡開國公李 昉撰

上卽位之元年冬以學士李昉獨直翰林詔太子率更令徐鉉入院分直視草是時昉與公以同道相知論交契之始也越四年春天子帥六師親征太原并壘旣平遂北幸塞垣耀兵盧龍秋七月凱歌歸於京師軍衛之中書詔填委公援筆馬上應答如流以扈蹕勞遷給事中直學士院如故又四年授右散騎常侍始罷文翰之職端拱元年帝親耕籍田改左散騎常侍積階至金紫光祿大夫敍勳至上柱國累封至東海郡開國侯食邑一千戶以淳化二年秋九月檢校工部尚書出爲靜難軍節度行軍司馬明年八月二十六日晨時起方冠帶遽命筆硯語左右曰吾疾作矣手疏一幅約束後事又別署一幅道者天地之母書訖而終年七十六陝西道轉運副使鄭適來邠州遂出家財竭力襄事卽以其年十月奉遷靈柩還京師權厝於板橋東南之佛舍愛塔國子博士吳淑門生殿中丞杜鎬時皆典治中祕書遂以公凶訃聞上覽表軫悼詔出內府錢二十萬賜其家明年七月洪州奉新縣義門胡仲堯自豫章具舟楫迎公之喪葬於洪州新建縣西山之鸞岡原奉遺令從先塋也公字鼎臣其先會稽人自言生於揚州曾祖諱源祖諱徽皆隱德不仕父諱延休衛尉卿贈左僕射才高道直有名於時公幼孤與弟錡俱苦節自立未弱冠以文行稱於時仕江南李氏周旋三世歷校書郎直宣徽北院尋直門下省三知制誥一遷司封郎中兩拜中書舍人再入翰林爲學士自貶官起爲太子右諭德由尚書左丞爲兵部侍郎爲御史大夫由大夫爲吏部尚書由尚書爲右僕射同參左右內史事堅讓不就王師下金陵隨後主歸朝以太子率更令奉

朝請。今諫議大夫張公。必說在江南時。奉太夫人慈訓。不妄游。下帷著書。雖親族罕見其面。年十六。遇李氏先主。霸有南土。辟命累至。釋褐連任書府。繇是經史百家。爛然于胸中矣。其典誥命也。落筆灑翰。應用無窮。皆混然而成。有雅正之體。當時名士。如韓熙載者。無敵。尤長於制誥。公與之齊名。其豫機密也。居中守正。無所附會。雖在家宴居。如對君父。其恭慎也如此。當時用事臣。有陳覺。魏岑者。樂禍好權。多撓時政。公嫉之如讎。其掌貢舉也。至公取人。不受私謁。先策問。而後詞賦。進德行而黜浮華。當時舉場。號爲得士。公弟內史舍人錯。每主文柄。亦以直道自持。故江表後進。力學未至者。聞二徐爲春官。多望風引退。其精鑒無私也如此。其持憲也。當官執法。無所屈撓。姦邪爲之側目。權貴因之斂手。當時言風憲者。惟公與故御史中丞江文蔚。王師之渡江也。公將本君之命。使於朝廷。且乞緩師。以奉祭祀。太祖引見。謂公曰。汝主託疾不朝。乖事大之禮。況吾兵業已行。無中輟之理。歸報汝主。善爲之謀。公因慷慨鋪陳。自古成敗之道。表明後主忠孝之節。太祖亦爲之動容。厚禮之遣歸。初大軍已圍建業。後主思命於交兵之間。左右咸有難色。公欣然請行。後主謂之曰。爾旣往。卽當止。上江救兵。勿令東下。公曰。是行非全策。今城中所恃者。救兵。奈何以臣此行止之。後主曰。比以和解爲請。復用決戰。卽是自相矛盾。於爾得不危乎。公曰。今豈以一介之微。而忘社稷之重。但置臣於度外耳。後主撫之泣下。曰。時危見節。汝有之矣。及歸朝。太祖盛怒責之。曰。吾向與汝言。何爲弗達於汝主。且拒抗之罪。皆汝所爲。公頓首謝曰。臣爲江南大臣。而其國滅亡。抵此死有餘罪。餘復何言。太祖於是歎息曰。忠於所事者乎。汝當事我如事李氏。命坐。存撫甚厚。故相太子太師王公溥。一見如舊相識。每有經史異義。多質疑於公。繇是琴樽嘯歌。筆硯酬唱。無有虛日。相得甚歡。故

工部尙書李公穆有清識。嘗語人曰。吾觀江表冠蓋。若中立有道之士。惟徐公近之耳。兵部侍郎王公祐。負才尙氣。未嘗輕許人。及見公。常言於朝曰。文質彬彬。學問無窮。惟徐公耳。公亦曰。王公詞如江海。心無城府。真奇士也。今吏部侍郎李公至。翰林學士承旨蘇公易簡。皆當世英俊。奉公以師友之禮。公仕朝廷。將二十年。前後錫賜所得。俸祿所入。備伏臘外。未嘗蓄聚一金。所居之地。僅庇風雨。惟古木數株。每夏秋之際。霖潦爲患。頽垣壞宇。人不堪其憂。而公處之晏如也。江南故人子弟。暨親族之孤遺者。來投於公。歲無虛月。公分廩祿以卹之。虛館舍以安之。殆於終年。未有倦色。有布衣蒯亮者。老而多誕。游公之門。僅五十稔。年九十。猶矍鑠不衰。每從江南來。詣公公置之道院。日與之碁。未嘗語及他事。而待之如初。公嘗言江南有處士朱貞白。嘗語人曰。今人或言不欺神明也。吾嘗佩服斯言。不敢爲欺心之事。有故人謝岳。嘗爲虢州盧氏令。刺史與之有隙。凡選舉之制。過七十卽罷去。遂奏謝年過不堪其任。時江東初下。仕人有可疑者。咸質於公。謝因私請曰。某之齒。公實知之。苟朝廷問公。不敢望公言。未七十。但言不知其年。卽幸矣。公曰。君之甲子。某具知之。而云不知。是欺天也。苟或見問。必以實對。其至行無誑。又如此。公爲文。智思敏速。或求其文。不樂豫作。令其臨事見白。立爲草之。云速則意思壯敏。緩則體勢疎慢。公愛壻吳淑。言江南宰相馮延巳。常語人曰。凡人爲文。皆事奇語。不爾則不足觀。惟徐公不然。率意而成。自造精極。時人以爲知言。所著文多遺落。今其存者。編成三十卷。又擬徐幹中論。作質論數十編。集耳目聞見之異。作稽神錄二十卷。並行於世。公文學之外。長於篆隸。其書札之妙。自成一家。當世士大夫。有得其書者。無不寶之。以爲楷法。任常侍日。奉詔與直史館句中正等。重修許慎說文。自撰韻譜一十卷。學者伏其精博。公嘗慕

老子清淨之教。莊周齊物之理。故內不能以得喪動。外不能以榮辱干。然而爲學之心。老而彌篤。在邠州日。以時俗文字僞謬。乃親以隸字寫說文。字體纖細。正如蠅頭。過數萬言。年高目明。洞見毫末。其精力不怠如此。夫人太原王氏。子朗州桃源令夷直。並先公而卒。長女適吳氏。早亡。次女適左贊善大夫高慎交。幼女十七娘。才淑過人。未及笄年而夭。自爲誌文。詞甚悽楚。噫。孔門四科。德行文學。洪範五福。壽考康寧。在於古人。鮮有兼美。惟公高才懿行。善始令終。所謂登孔門之二科。居洪範之三福也。語曰。善人吾不得而見之矣。惜哉。銘曰。

祖巨軻兮宗老莊。奉三寶兮師五常。生維揚兮仕建康。歸皇宋兮老大梁。歿幽土兮葬豫章。儒林丈人兮。今也則亡。嗚呼。

祭文

維淳化三年歲次壬辰。十月辛酉朔十八日戊寅。銀青光祿大夫。行尚書吏部侍郎。兼祕書監上柱國李至。朝奉大夫。左諫議大夫。充史館修撰。判館事。上柱國。賜紫金魚袋。楊徽之。張洎等。謹以清酌之奠。致祭於故左騎省常侍徐公之靈。惟公博識宏才。懿文茂學。如金之渾。如玉之璞。天然渾成。不加雕琢。頃在江左。已聞素履。及來天庭。孰不仰止。周旋清顯。殆將二紀。相如視草。隰朋近侍。篆籀稱絕。典謨得體。其馨如蘭。其直如矢。令聞令望之才之美。今也儒宗古之君子。五百年來一人而已。道屈於位。遇休明之世。未盡伸才。困於命。當衰晚之年。不得志。嗟乎。天地之間。人生如寄。自古迄今。其誰不死。矧素髮之垂領。復何悲乎已矣。可惜者。淪於遠郡。契闊千里。鷗鳥之賦未成。二豎之災奄至。淳于意兮止一女。鄧伯道兮終無子。

此素友清交。門生故吏。可以失聲而長號。洑瀾而屠涕。以爲天道難忱。善人如是。至受教文字。執弟子之禮。徽之泊。有舊瀟湘。敦故人之契。迎旅櫬於西郊。風切切兮。雨蕭蕭。靈筵慘兮。素帷動。疑肝鑿於寂寥。嗚呼。臨喪一奠。庶英魂之可招。尙享。

東海徐公輓歌詞

李 至

吾道亡宗匠。明時喪大儒。傳家無嗣子。封岳有遺書。命劣長沙賈。名齊鄴下徐。不知千古後。文行復誰如。執友韓夫子。傳家弟楚金。人稱聯璧重。世慕二龍深。鮑謝須慙德。機雲亦醉心。可憐黃壤下。埋沒此瑤琳。海內才名重。儒中學問高。病猶不釋卷。老亦自揮毫。蠹簡披皆識。亡書誦豈勞。如能百身贖。爭惜一鴻毛。說文修古篆。質論著新詞。尙父鷹揚頌。周瑜水戰碑。家藏爲世寶。手寫作人師。惜不歸宣室。吾皇問受釐。薄暮邠郊遠。何人不慘顏。無兒見星往。有妾護喪還。舊宅猶臨水。空車卻度關。平生衣上淚。今日爲君斑。

左散騎常侍東海徐公此五君詠中之一

徐公眞丈夫。不獨文章伯。江南兵未解。主憂臣慘戚。公願紓其難。苦求使上國。庶獲一言伸。少息苞茅責。其君驚且歎。執手涕沾臆。謂言知爾晚。何此忠義激。天子叱在庭。誚讓雷霆赫。公亦從容對。曾不渝神色。仁者必有勇。斯亦古遺直。書大略其小。我有春秋癖。所以此詩中。不言公翰墨。庶警事君心。勉旃希令德。

後序

徐公旣沒。門人等論次其文。爲三十卷。龔祕閣吳正儀。今翰林穎川公。並爲之序。論之詳矣。都官員外郎胡君克順。通才博雅。樂善好賢。早游騎省之門。深蒙鄉里之眷。寶茲遺集。積有歲時。鏤板流行。庶傳悠永。

因以丞相趙郡文貞公鄧帥隴西公所作墓誌輓詠等列於左次用垂茂實俾題於後以記厥由大中祥符九年八月太常丞集賢校理晏殊序

明州重刊徐騎省文集後序

騎省徐公文集三十卷天禧閒尙書都官員外郎胡君克順編錄刊行且奉表上進章聖皇帝降詔獎諭參知政事陳公彭年爲之序引丞相晏元獻公復爲後序騎省在江南有重名仕天朝爲近侍以文翰忠直在當時諸公先旣歿丞相趙郡李文正公實誌其墓所以稱述推尊之者甚至距今且二百年其英名偉節得以不泯而爲後學法者繫文集是賴年世愈遠兵火中厄鮮有存者偶得善本使公庫鏤板以傳紹興十九年十一月十日右朝議大夫充敷文閣待制知明州軍州事提舉學事賜紫金魚袋徐琛跋

徐騎省集目錄

第一卷

文賦三首

詩三十首

第二卷

詩六十九首

歌一首

第三卷

詩七十五首

第四卷

詩七十二首

第五卷

詩七十一首

第六卷

制誥一十九首

第七卷

制誥二十六首

第八卷

制誥三十六首

祭告文二首

第九卷

册九首

謚議一首

第十卷

碑銘五首

第十一卷

碑銘三首

第十二卷

碑銘五首

第十三卷

記七首

第十四卷

記三首

哀册文二首

第十五卷

頌一首并序

贊四首

銘二首

墓誌七首

第十六卷

墓誌八首

第十七卷

墓誌七首

第十八卷

序八首

第十九卷

序六首

第二十卷

表四首

第二十一卷

應制詩一十九首

第二十二卷

雜詩五十九首

第二十三卷

書五首

狀二首

文九首

寄送詩四十八首

文賦二首

序九首

第二十四卷

序五首

論三首

第二十五卷

碑銘五首

第二十六卷

碑銘五首

第二十七卷

碑銘五首

第二十八卷

記十首

第二十九卷

墓誌六首

第三十卷

墓誌七首

連珠五首

贊四首

銘三首

徐騎省集卷第一 賦詩一

頌德賦

木蘭賦

新月賦

宋 東海徐 鉉撰

頌德賦 東宮生日獻

惟先王之建國。體皇極而垂制。仰則觀於辰象。俯則察於地義。前星爲帝座之輔。蒼震乃少陽之位。非明德與茂親。不足膺茲主器。故萬邦以貞。而本支百世。是必天錫嘉祉。神輸百祥。山河資其正氣。日月分其融光。應期運以載誕。配乾坤而永昌者也。惟我儲后。昭明俊德。黃裳元吉。沈潛剛克。鈞深致遠。曾莫挹其津涯。問安視膳。每或形於顏色。在昔沖讓。高追太伯。乃剖麟符。保釐東宅。受道師傅。稽疑典冊。化自誠心。風行邦國。乃擁干旌。南徐之城。左撫句吳。前對敬亭。京師河潤。盛德日新。其畏如夏。其惠如春。謝傳圍棋。靜一方之沴氣。條侯高臥。息萬里之驚塵。令問孔昭。元功莫二。人情不可以久鬱。皇統不可以終避。乃畏天命。允茲儲貳。鳴玉軼以徐來。與春郊而總至。龍樓霧廓。雞戟風生。珍符疊委。和氣交迎。百度以之。而式序多壘。以之而載清。史書有年。衢傳頌聲。豈人事之協贊。信宗祊之降靈。于是玄圃凝陰。瑤山密雪。宣猷之緹幕。半下濛汜之曾冰。乍結爰書。慶誕之日。始過嘉平之節。麗正晨啓。重明夙設。調護之客。娛侍之臣。峨冠煒燁。佩玉璘玢。咸稽首而再拜。獻多福于萬春。有宮坊之下吏。乃捧觴而進。稱曰。自古聖賢。率由輔導。伊狗名與課實。故成敗之異效。粵若成王。史佚周召。左右前後。惟仁與孝。靡過不舉。無善不告。茲君臣

之一體。故風聲之克劭。降及後代。亦慎厥初。實聘四老。復延二疏。咸由古道。以佑皇儲。若乃征和戾園。有思臺博望之盛。貞觀承乾。有玄齡魏徵之重。或有其禮而無人。或有其人而不用。何擇禍之忘輕。信非賢而罔共。英英副君。鑒古知今。百揆在乎手。萬務經其心。朝廷之所寄者重。蒼生之所望者深。既賞與王之諫。亦訪百官之箴。故曰。生民在勤。好問則裕。不躬不親。人將孰信。一游一豫。樂有常度。節八音以導其和。平調五味。以適其喜怒。情義兼于家國。故知無不爲。愛敬極於君親。故惟道是論。儉以足用。而施舍不可不行。仁以接物。而刑罰不可不具。冗官宜省。而才不可遺。疆事漸寧。而備不可去。居安思危。覩災而懼。上分一人之憂。以成天下之務。俾中外之禔福。與宗祧而永固。伊下臣之不佞。蒙國士之殊遇。實含和而吐頌。豈登高之能賦。願降鑒於芻蕘。庶效誠於塵露。

木蘭賦并序

頃歲茲左宦江陵。官舍數畝。委之而去。庭木蘭。因移植於宗兄之家。及鉉徵還。席不遑暖。又竄於舒庸。吾兄感春物之載華。擬古詩而見寄。吟翫感歎。謹賦以和焉。雖不足繼體物之作。庶幾申騷客之情爾。仙人有伊庭中之奇樹。木蘭之可悅。外爛爛以凝紫。內英英而積雪。芬芳兮謝客之囊。旖旎兮仙童之節。紫旆節許蒲茸之竊比。聽蘭牙之並列。於是辭下土之卑溼。歷上京之繁華。恥銜價於豪門。乃託根於貧家。此樹本自歷陽移植。於庭中伊資幽人之賞豫。有好事之稱嗟。一旦逐客程遠。君門路賒。削閨籍與印綬。豈獨留乎此花。噫。人屢遐棄。花猶得地。分兔苑之餘蔭。向藩房而吐媚。授簡多暇。攀條屬思。持香草以予比。效騷辭而我寄。感此生之百憂。何斯物之足貴。悲夫。客館長吟。山城夕陰。想馨香之不改。歎歡宴之難尋。憑歸夢於飛翼。寫

商歌於素琴。歌曰。光景兮愁暮。別離兮易久。眞宰兮無黨。貞心兮不朽。誠知異日。重滋田氏之荆。但恐相逢。共歎桓公之柳。

新月賦庚午歲宿直作

五月五日。繁陰乍晴。倬彼新月。麗於太清。映玉繩而絢彩。掄銀漢以騰精。對鳩鵲西南之影。步明光東北之楹。歷歷遲漏。悠悠我情。雖萬古之不易。感一年而始生。乃有駮女癡男。朱顏稚齒。欣春物之駘蕩。登春臺之靡迤。雜佩璀璨。輕裾颯纒。紛乎拜祝。怡然宴喜。人歲歲以潛換。景年年而若此。昔我當年。胡云不然。世路多故。流光暗遷。易壯心於大觀。變玄髮於華顛。顧一毛之無濟。媿兩綬之徒懸。況乎萬象虛明。九門奧秘。對宣室以方罷。閱通宵而不寐。憂心似醉。旣慷慨於君恩。急景如馳。更淒涼於往事。想翹月以長歌。遂抽毫而見意。

詩

早春左省寓直

旭景鸞臺上。微雲象闕閒。時清政事少。日永直官閑。遠籟飛簫管。零冰響珮環。終軍年二十。默坐叩玄關。

寒食宿陳公塘上

垂楊界官道。茅屋倚高坡。月下春塘水。風中牧豎歌。折花閑立久。對酒遠情多。今夜孤亭夢。悠揚奈爾何。

將去廣陵別史員外南齋

家聲曾與金張輩。官署今居何宋閒。起得高齋臨靜曲。種成奇樹學他山。鴛鸞終日同醒醉。蘿薜常時共

往還賤子今朝獨南去。不堪迴首望清闕。

將過江題白沙館

少長在維揚。依然認故鄉。金陵佳麗地。不道少風光。稍望吳臺遠。行登楚塞長。殷勤語江嶺。歸夢莫相妨。

登甘露寺北望

京口潮來曲岸平。海門風起浪花生。人行沙上見日影。舟過江中聞櫓聲。芳草遠迷揚子渡。宿煙深映廣陵城。游人鄉思應如橘。相望須含兩地情。

山路花

不共垂楊映綺寮。倚山臨路自嬌嬈。游人過去知香遠。谷鳥飛來見影搖。半隔煙嵐遙隱隱。可堪風雨暮蕭蕭。城中春色還如此。幾處笙歌案舞腰。

京口江際弄水

退公求靜獨臨川。揚子江南二月天。百尺翠屏甘露閣。數帆晴日海門船。波澄瀨石寒如玉。草接汀蘋綠似煙。安得乘槎更東去。十洲風外弄潺湲。

早春旬假獨直寄江舍人

省署皆歸沐。西垣公事稀。詠詩前砌立。聽漏向申歸。遠思風醒酒。餘寒雨濕衣。春光已堪採。芝蓋共誰飛。

從駕東幸呈諸公

吳公臺下舊京城。曾揜衡門過十春。別後不知新景象。信來空問故交親。宦游京口無高興。習隱鍾山限

俗塵今日喜爲華表鶴。況陪鷓鷯免迷津。

重游木蘭亭

繚繞長隄帶碧潯。昔年游此尙青衿。蘭橈破浪城陰直。玉勒穿花苑樹深。宦路塵埃成久別。仙家風景有誰尋。那知年長多情後。重凭欄干一獨吟。

賦得綵鸞

縷綵成飛鸞。迎和啓蟄時。翠翹生玉指。繡羽拂文楣。詎費銜泥力。無勞剪爪期。化工今在此。醜怪社來遲。

送魏舍人仲甫爲蘄州判官

從事蘄春興自長。蘄人應識紫薇郎。山資足後拋名路。蕝菜秋來憶故鄉。以道卷舒猶自適。臨戎談笑固無妨。如聞郡閣吹橫笛。時望青谿憶野王。

題殷舍人宅木芙蓉

憐君庭下木芙蓉。嫋嫋纖枝淡淡紅。曉吐芳心零宿露。晚搖嬌影媚清風。似含情態愁秋雨。暗減馨香借菊叢。默飲數杯應未稱。不知歌管與誰同。

送史館高員外使嶺南

東觀時閑暇。還修諭蜀書。雙旌馳縣道。百越從軺車。桂蠹晨殮罷。貪泉訪古初。春江多好景。莫使醉吟疎。春日紫巖山。期客不至。

郊外春華好。人家帶碧谿。淺莎藏鴨戲。輕鷺隔雞啼。掩映紅桃谷。蜚緣翠柳堤。王孫竟不至。芳草自萋萋。

宿蔣帝廟明日遊山南諸寺

便返城闔尚未甘。更從山北到山南。花枝似雪春雖半。桂魄如眉月始三。松蓋遮門寒黯黯。柳絲妨路翠粼粼。登臨莫怪偏留戀。游宦多年事事諳。

賦得有所思

所思何在杳難尋。路遠山長水復深。衰草滿庭空佇立。清風吹袂更長吟。忘情好醉青田酒。寄恨宜調綠綺琴。落日鮮雲偏聚散。可能知我獨傷心。

贈王貞素先生

先生嘗已佩真形。紺髮朱顏骨氣清。道祕未傳鴻寶術。院深時聽步虛聲。遼東幾度悲城郭。吳市終應變姓名。三十六天皆有籍。他年何處問歸程。

春夜月

幽人春望本多情。況是花繁月正明。竟夕無言亦無寐。繞階芳草影隨行。

愛敬寺有老僧嘗遊長安言秦雍閒事歷歷可聽因贈此詩兼示同行客

白首棲禪者。嘗談灞滻游。能令過江客。偏起失鄉愁。室倚桃花崦。門臨杜若洲。城中無此景。將子剩淹留。

游蔣山題辛夷花寄陳奉禮本約陳同游不至

今歲游山已恨遲。山中仍喜見辛夷。簪纓且免全爲累。桃李猶堪別作期。晴後日高偏照灼。晚來風急漸離披。山郎不作同行伴。折得何由寄所思。

徐騎省集卷第二 詩二

和殷舍人蕭員外春雪

萬里春陰乍履端。廣庭風起玉塵乾。梅花嶺上連天白。蕙草塔前特地寒。晴去便爲經歲別。興來何惜徹宵看。此時鴛侶皆閑暇。贈答詩成禁漏殘。

寄蘄州高郎中

賈傅棲遲楚澤東。蘭皋三度換秋風。紛紛世事來無盡。黯黯離魂去不通。直道未能勝社鼠。孤飛徒自歎冥鴻。知君多少思鄉恨。併在山城一笛中。

寄和州韓舍人

急景駸駸度。遙懷處處生。風頭乍寒暖。天色半陰晴。久別魂空斷。終年道不行。殷勤雲上鴈。爲過歷陽城。從兄龍武將軍沒於邊戍過舊營宅作

前年都尉沒邊城。帳下何人領舊兵。徼外瘴煙沈鼓角。山前秋日照銘旌。笙歌卻返烏衣巷。部曲皆歸細柳營。今日園林過寒食。馬蹄猶擬入門行。

景陽臺懷古六言

後主亡家不悔。江南異代長春。今日景陽臺上。閉人何用傷神。

春分日

仲春初四日。春色正中分。綠野裴回月。晴天斷續雲。鸞飛猶箇箇。花落已紛紛。思婦高樓晚。歌聲不可聞。

寄駕部郎中瞻

賤子乖慵性。頻爲省直牽。交親每相見。多在相門前。君獨疎名路。爲郎過十年。炎風久成別。南望思悠然。

和王庶子寄題兄長建州廉使新亭

謝守高齋結御名新。一方風景萬家情。羣賢詎減山陰會。遠俗初聞正始聲。水檻片雲長不去。訟庭纖草轉應生。阿連詩句偏多思。遙想池塘畫夢成。

謝文靜墓下作時閩嶺用師契丹陷梁宋

越徼稽天討。周京亂虜塵。蒼生何可奈。江表更無人。豈憚尋荒壟。猶思認後身。春風白楊裏。獨步淚霑巾。

觀人讀春秋

日覺儒風薄。誰將霸道差。亂臣無所懼。何用讀春秋。

秋日雨中與蕭贊善訪殷舍人於翰林座中作

野出西垣步步遲。秋光如水雨如絲。銅龍樓下逢閑客。紅藥堦前訪舊知。亂點乍滋承露處。碎聲因想滴蓬時。銀臺鑰入須歸去。不惜餘歡盡酒卮。

送和州張員外爲江都令

經年相望隔重湖。一旦相逢在上都。塞詔官班聊慰否。埋輪意氣尙存無。由來聖代憐才子。始覺清風激懦夫。若向西岡尋勝賞。舊題名處爲躊躇。

和明道人宿山寺

聞道經行處。山前與水陽。磬聲深小院。燈影迴高房。落宿依樓角。歸雲擁殿廊。羨師閑未得。早起逐班行。

晚歸

暑服道情出。煙街薄暮還。風清飄短袂。馬健弄連環。水靜聞歸櫓。霞明見遠山。過從本無事。從此涉旬閒。

月真歌廣陵妓人翰林殷舍人所錄攜之垂訪筵上贈此

揚州勝地多麗人。其閒麗者名月真。月真初年十四五。能彈琵琶善歌舞。風前弱柳一枝春。花裏嬌鸞百般語。揚州帝京多名賢。其閒賢者殷德川。德川初乘綸闈筆。職近名高常罕出。花前月下或遊從。一見月真如舊識。閑庭深院資賢宅。宅門嚴峻無凡客。垂簾偶坐惟月真。調弄琵琶郎爲拍。殷郎一旦過江去。鏡中嬾作孤鸞舞。朝雲暮雨鎖相隨。石頭城下還相遇。二月三月江南春。滿城濛濛起香塵。隔牆試聽歌一曲。乃是資賢宅裏人。綠窗繡幌天將曉。殘燭依依香裏裏。離腸卻恨苦多情。輦障熏籠空悄悄。殷郎去冬入翰林。九霄官署轉深沈。人閒想望不可見。唯向月真存舊心。我慙闕茸何爲者。長感餘光每相假。陋巷蕭條正揜扉。相攜訪我衡茅下。我本山人愚且貞。歌筵飲席常無情。自從一見月真後。至今贏得顛狂名。殷郎月真聽我語。少壯光陰能幾許。良辰美景數追隨。莫教長說相思苦。

走筆送義興令趙宣輔

聞君孤棹汎荆谿。隴首雲隨別恨飛。杜牧舊居憑買取。他年藜杖願同歸。

天闕山絕句

散誕愛山客。淒涼懷古心。寒風天闕晚。盡日倚軒吟。

除夜

寒燈耿耿漏遲遲。送故迎新了不欺。往事併隨殘曆日。春風寧識舊容儀。預慙歲酒難先飲。更對鄉儺羨小兒。吟罷明朝贈知己。便須題作去年詩。

寄鍾謨

看看潘鬢二毛生。昨日林梢又轉鶯。欲對春風忘世慮。敢言罇酒召時英。假中西閣應無事。筵上南威幸有情。不得車公終不樂。已教紅袖出門迎。

正初答鍾郎中見招

高齋遲景雪初晴。風拂喬枝待早鶯。南省郎官名籍籍。東隣妓女字英英。流年倏忽成陳事。春物依稀存舊情。新歲相思自過訪。不煩虛左遠相迎。

聞鴈寄故人

久作他鄉客。深慙薄宦非。不知雲上鴈。何得每年歸。夜靜聲彌怨。天空影更微。往年離別淚。今夕重霑衣。

江舍人宅筵上有妓唱和州韓舍人歌辭因以寄之

良宵絲竹偶成歡。中有佳人俯翠鬢。白雪飄飄傳樂府。阮郎憔悴在人閒。清風朗月長相憶。佩蕙紉蘭早晚還。深夜酒空筵欲散。向隅惆悵鬢堪班。

寒食日作

麝冷煙初禁。門閉日更斜。東風不好事。吹落滿庭花。過社紛紛鷺。新晴淡淡霞。京都盛遊觀。誰訪子雲家。
賀般游二舍人入翰林江給事拜中丞

清晨待漏獨徘徊。霄漢懸心不易裁。閣老深嚴歸翰苑。夕郎威望拜霜臺。青綾對覆蓬壺晚。赤棒前驅道路開。猶有西垣廳記在。莫忘同草紫泥來。

歐陽大監雨中視決堤因墮水明日見於省中因戲之

聞道張晨蓋。徘徊石首東。濬川非伯禹。落水異三公。衣濕仍愁雨。冠欹更怯風。今朝復相見。疑是葛仙翁。
送吳郎中爲宣州推官知涇縣

征虜亭邊月。雞鳴伴客行。可憐何水部。今事謝宣城。風物聊供賞。班資莫繫情。同心不同載。留滯爲浮名。
寄舒州杜員外

信到得君書。知君已下車。粉闌情在否。蓮幕興何如。人望徵賢入。余思從子居。灊山眞隱地。憑爲卜茅廬。
九月十一日寄陳郎中

我多吏事君多病。寂絕過從又幾旬。前日龍山煙景好。風前落帽是何人。
和司門郎中陳彥

衡門寂寂逢迎少。不見仙郎向五旬。莫問龍山前日事。菊花開卻爲閑人。
賦得擣衣

江上多離別。居人夜擣衣。拂砧知露滴。促杵恐霜飛。漏轉聲頻斷。愁多力自微。裁縫依夢見。腰帶定應非。

九月三十夜雨寄故人

獨聽空塔雨。方知秋事悲。寂寥旬假日。蕭颯夜長時。別念紛紛起。寒更故故遲。情人如不醉。定是兩相思。

寄撫州鍾郎中時王師敗績於閩中謫在建州

去載分襟後。尋聞在建安。封疆正多事。罇俎若爲歡。都護空遺鏃。明君欲舞干。繞朝時不用。非是殺身難。

送歐陽大監遊廬山

家家門外廬山路。唯有夫君乞假遊。按牘乍拋公署晚。林泉已近暑天秋。海潮盡處逢陶石。江月圓時上庾樓。此去蕭然好長往。人間何事不悠悠。

立秋後一日與朱舍人同直

一宿秋風未覺涼。數聲宮漏日猶長。林泉無計消殘暑。虛向華池費稻粱。

賦得霍將軍辭第

漢將承恩久。圖勳肯顧私。匈奴猶未滅。安用以家爲。郢匠雖聞詔。衡門竟不移。寧煩張老頌。無待晏嬰辭。甲乙人徒費。親鄰我自持。悠悠千載下。長作帥臣師。

和元帥書記蕭郎中觀習水師

元帥樓船出治兵。落星山外火旗明。千帆日助江陵勢。萬里風馳下瀨聲。殺氣曉嚴波上鷁。凱歌遙駭海邊鯨。仲宣一作從軍詠。迴顧儒衣自不平。

秋日廬龍邨舍

置卻人閒事。閑從野老游。樹聲村店晚。草色古城秋。獨鳥飛天外。閑雲度隴頭。姓名君莫問。山木與虛舟。
和蕭郎中小雪日作

征西府裏日西斜。獨試新爐自煮茶。籬菊盡來低覆水。塞鴻飛去遠連霞。寂寥小雪閑中過。班駁輕霜鬢
上加。算得流年無奈處。莫將詩句祝蒼華。

中書相公谿亭閑宴依韻

李建勳

雨霽秋光晚。亭虛野興迴。沙鷗掠岸去。谿水上塔來。客傲風欹帽。筵香菊在盃。東山長許醉。何事憶天台。
寄饒州王郎中效李白禮

珍重王光嗣。交情尙在不。蕪城連宅住。楚塞並車游。別後官三改。年來歲六周。銀鈎無一字。何以緩離愁。

寄歙州呂判官

任公郡占好山川。谿水縈迴路屈盤。南國自來推勝境。故人此地作郎官。風光適意須留戀。祿秩資貧且
喜歡。莫憶班行重迴首。是非多處是長安。

宣威苗將軍貶官後重經故宅

蔣山南望近西坊。亭館依然鏤院牆。天子未嘗過細柳。將軍尋已戍燉煌。史萬歲嘗譴戍燉煌欽傾怪石山無色。
零落圓荷水不香。爲將爲儒皆寂寞。門前愁殺馬中郎。

附池州薛郎中書因寄歙州張員外

新安從事舊臺郎。直氣多才不可忘。一旦江山馳別夢。幾年簪紱共周行。岐分出處何方是。情共窮通此

義長。因附鄰州寄消息。接與今日信爲狂。

寄江都路員外

吾兄失意。在東都。聞說襟懷任所如。已縱乖慵爲傲吏。有何關鍵制豪胥。縣齋曉閉多移病。南畝秋荒憶
遂初。知道故人相憶否。嵇康不得嬾修書。

張員外好茅山風景。求爲句容令。作此送之。

句曲山前縣。依依數舍程。還同適勾漏。非是厭承明。柳谷供詩景。華陽契道情。金門容傲吏。官滿且還城。
送應之道人歸江西

曾騎竹馬傍洪涯。二十餘年變物華。客夢等閑過驛閣。歸帆遙羨指龍沙。名題小篆矜垂露。詩作吳吟對
綺霞。歲暮定知迴未得。信來憑爲寄梅花。

送元帥書記高郎中出爲婺源建威軍使

寒風蕭瑟楚江南。記室戎裝挂錦帆。倚馬未曾妨笑傲。斬牲先要厲威嚴。危言昔日嘗無隱。壯節今來信
不凡。唯有盃盤思上國。酒醪甜淡菜蔬甘。

游方山宿李道士房

從來未面李先生。借我西廳臥月明。二十三家同願識。素驛何日暫還城。

題畫石山

彼美嶠巖石。誰施黼藻功。回巖明照地。絕壁爛臨空。錦段鮮須濯。羅屏展易窮。不因秋薜綠。非假晚霞紅。

羽客藏書洞樵人取箭風靈蹤理難問仙路去何通返駕歸塵裏留情向此中迴瞻畫圖畔遙羨面山翁
臨石步港

病題二首

碣岸隳縈帶微風起細漣綠陰三月後倒影亂峯前吹浪游鱗小黏苔碎石圓會將腰下組換取釣魚船
性靈慵懶百無能唯被朝參遣夙興聖主優容恩未答丹經疎闊病相陵脾傷對客偏愁酒眼暗看書每
媿燈進與時乖不知退可憐身計漫騰騰
人間多事本難論況是人閒懶慢人不解養生何怪病已能知命敢辭貧向空咄咄煩書字與世滔滔莫
問津金馬門前君識否東方曼倩是前身

寄江州蕭給事

夕郎愛國不憂身今向天涯作逐臣魂夢暗馳龍闕曙嘯吟閑繞虎谿春朝車載酒過山寺諫紙題詩寄
野人惆悵懦夫何足道自離羣後已同塵

和江州江中丞見寄

賈傅南遷久江關道路遙北來空見鴈西去不如潮鼠穴依城社鴻飛在沅寥高低各有處不擬吏相招
和鍾郎中送朱先輩還京垂寄

分司洗馬無人問辭客殷勤輟棹過蒼蘚滿庭行徑小高梧臨檻雨聲多春愁盡付千盃酒鄉思遙聞一
曲歌且共勝遊消永日西岡風物近如何

送郝郎中爲浙西判官

大藩從事本優賢。幕府仍當北固前。花繞樓臺山倚郭。寺臨江海水連天。恐君到卽忘歸日。憶我遊曾歷二年。若許他時作閑伴。殷勤爲買釣魚船。

翰林游舍人清明日入院中塗見過余明日亦入西省上直因寄游君

榆柳開新焰。梨花發故枝。輜輶隘城市。圭組坐曹司。獨對芝泥檢。遙憐白馬兒。禁林遠視草。氣味兩相知。

陪王庶子游後湖涵虛閣東宮園

懸圃清虛乍過秋。看山尋水上茲樓。輕鷗的的飛難沒。紅葉紛紛晚更稠。風卷微雲分遠岫。浪搖晴日照中州。躋攀況有承華客。如在南皮奉勝遊。

柳枝辭十二首

把酒憑君唱柳枝。也從絲管遞相隨。逢春只合朝朝醉。記取秋風落葉時。南園日暮起春風。吹散楊花雪滿空。不惜楊花飛也得。愁君老盡臉邊紅。陌上朱門柳映花。簾鉤半捲綠陰斜。憑郎暫駐青驄馬。此是錢塘小小家。夾岸朱欄柳映樓。綠波平漫帶花流。歌聲不出長條密。忽地風迴見綵舟。老大逢春總恨春。綠楊陰裏最愁人。舊游一別無因見。嫩葉如眉處處新。濃濃堤畔柳含煙。疑是陽和二月天。醉裏不知時節改。漫隨兒女打鞦韆。水閣春來乍減寒。曉妝初罷倚闌干。長條亂拂春波動。不許佳人照影看。

柳岸煙昏醉裏歸。不知深處有芳菲。重來已見花飄盡。惟有黃鸝囀樹飛。
此去仙源不是遙。垂楊深處有朱橋。共君同過朱橋去。密映垂楊聽洞簫。
暫別揚州十度春。不知光景屬何人。一帆歸客千條柳。腸斷東風楊子津。
仙樂春來案舞腰。清聲偏似傍嬌嬈。應緣鸞舌多情賴。長向雙成說翠條。
鳳笙臨檻不能吹。舞袖當筵亦自疑。惟有多人多意緒。解衣芳態畫雙眉。

此
页
空
白

徐騎省集卷第二詩三

貶官秦州出城作

浮名浮利信悠悠。四海干戈痛主憂。三諫不從爲逐客。一身無累似虛舟。滿朝權貴皆曾忤。繞郭林泉已徧游。唯有戀恩終不改。半程猶自望城樓。

過江

別路知何極。離腸有所思。登艫望城遠。搖櫓過江遲。斷岸煙中失。長天水際垂。此心非橘柚。不爲兩鄉移。

經東都太子橋

綸闈放逐知何道。桂苑風流且暫歸。莫問升遷橋上客。身謀疎拙舊心違。

贈維揚故人

東京少長認維桑。書劍誰教入帝鄉。一事無成空放逐。故人相見重淒涼。樓臺寂寞官河晚。人物稀疎驛路長。莫怪臨風惆悵久。十年春色憶維揚。

秦州道中卻寄東京故人

風緊雨淒淒。川迴岸漸低。吳州林外近。隋苑霧中迷。聚散紛如此。悲歡豈易齊。料君殘酒醒。還聽子規啼。

得浙西郝判官書未及報聞燕王移鎮京口因寄此詩問方判官田書記消息

秋風海上久離居。曾得劉公一紙書。淡水心情長若此。銀鈎蹤迹更無如。嘗憂座側飛鷄鳥。未暇江中覓

鯉魚。今日京吳建朱邸。問君誰共曳長裾。

贈陶使君求梨

昨宵宴罷醉如泥。惟憶張公大谷梨。白玉花繁曾綴處。黃金色嫩乍成時。冷侵肺腑醒偏早。香惹衣襟歇倍遲。今日中山方酒渴。唯應此物最相宜。

陳覺放還至秦州以詩見寄作此答之

朱雲曾爲漢家憂。不怕交親作世仇。壯氣未平空咄咄。狂言無驗信悠悠。今朝我作傷弓鳥。卻羨君爲不繫舟。勞寄新詩平宿憾。此生心氣貫清秋。

王三十七自京垂訪作此送之

失鄉遷客在天涯。門揜苔垣向水斜。只就鱗鴻求遠信。敢言車馬訪貧家。煙生柳岸將垂縷。雪壓梅園半是花。惆悵明朝尊酒散。夢魂相送到京華。

陶使君挽歌二首

太守今何在。行春去不歸。筵空收管吹。郊迴儼驂駢。營外星纔落。園中露已晞。傷心梁上鷺。猶解向人飛。始憶花前宴。笙歌醉夕陽。那堪城外送。哀挽逐歸艎。鈴閣朝猶閉。風亭日已荒。唯餘遷客淚。霑灑後池旁。

雪中作

賦分多情客。經年去國心。踈鐘寒郭晚。密雪水亭深。影迴鴻投渚。聲愁雀噪林。他鄉一尊酒。獨坐不成斟。

賦得風光草際浮

宿露依芳草。春郊古陌旁。風輕不盡偃。日早未暘陽。耿耿依平遠。離離入望長。映空無定彩。飄逕有餘光。颺若荷珠亂。紛如燭火颺。詩人多感物。凝思繞池塘。

寒食成判官垂訪因贈

常年寒食在京華。今歲清明在海涯。遠巷蹋歌深夜月。隔牆吹管數枝花。鴛鴦得路音塵闊。鴻鴈分飛道里賒。不是多情成二十。斷無人解訪貧家。

送客至城西望圖山因寄浙西府中

枚叟鄒生笑語同。莫嗟江上聽秋風。君看逐客思鄉處。猶在圖山更向東。

送寫真成處士入京

傳神踪跡本來高。澤畔形容媿彩毫。京邑功臣多佇望。凌煙閣上莫辭勞。

九日雨中

茱萸房重雨霏微。去國逢秋此恨稀。目極暫登臺上望。心遙長向夢中歸。荃蘼路遠愁霜早。兄弟鄉遙羨鴈飛。唯有多情一枝菊。滿盃顏色自依依。

寄外甥苗武仲

放逐今來漲海邊。親情多在鳳臺前。且將聚散爲閒事。須信榮枯是偶然。蟬噪疎林村倚郭。鳥飛殘照水連天。此中惟欠韓康伯。共對秋風詠數篇。

寄從兄憲兼示二弟

別路吳將楚，離憂弟與兄。斷雲驚晚吹，秋色滿孤城。信遠鴻初下，鄉遙月共明。一枝棲未穩，迴首望三京。

附書與鍾郎中因寄京妓越賓

暮春橋下手封書，海陵橋名寄向南江問越姑。不道諸郎少歡笑，經年相別憶儂無。

鍾代答

一幅輕綃寄海濱，越姑長感昔時恩。欲知別後情多少，點點憑君看淚痕。

亞元舍人不替深知猥貽佳作三篇清絕不敢輕謝因爲長歌聊以爲報未竟復得子喬校書示問故兼寄陳君庶資一笑耳

海陵城裏春正月，海畔朝陽照殘雪。城中有客獨登樓，遙望天邊白銀闕。天帝以黃金白銀爲宮闕白銀闕下何英雄，雕鞍繡轂趨承明。闔門曉闕旌旗影，玉墀風細佩環聲。此處追飛皆俊彥，當年何事容疵賤。懷鉛晝坐紫薇宮，焚香夜直明光殿。王言簡靜官司閒，朋好殷勤多往還。新亭風景如東洛，邛嶺林泉似北山。光陰暗度盃盂裏，職業未妨談笑閒。有時邀賓復攜妓，造門不問都非是。酣歌叫笑驚四鄰，賦筆縱橫動千字。任他銀箭轉更籌，不怕金吾司夜吏。可憐諸貴賢且才，時情物望兩無猜。伊余獨稟狂狷性，漏量多言仍薄命。吞舟可漏豈無恩，負乘自貽非不幸。一朝削跡爲遷客，旦暮青雲千里隔。離鴻別鴈各分飛，折柳攀花兩無色。盧龍渡口問迷津，瓜步山前送暮春。去年三月三十日瓜步阻風白沙江上會行路，青林花落何紛紛。漢皇昔幸回中道，昇元中恩駕東遊之路極目牛羊臥芳草。舊宅重遊盡隙荒，故人相見多衰老。禪智寺山光橋風瑟瑟兮，兩蕭蕭行盃已醒殘夢斷。征途未極離魂消，海陵郡中陶太守。相逢本是隨行舊，乍申拜起已開眉。卻問

辛勤還執手。精廬水榭最清幽。一稅征車聊駐留。閉門思過謝來客。知恩省分寬離憂。郡齋勝境有後池。山亭茵閣互參差。有時虛左來相召。舉白飛觴任所爲。多才太守能搥鼓。醉送金船閒歌舞。酒酣耳熱眼生花。暫似京華歡會處。歸來旅館還端居。清風朗月夜牕虛。髮鬢流景歲云暮。天涯望斷故人書。春來憑檻方歎息。仰頭忽見南來翼。足繫紅牋墮我前。引頸長鳴如有言。開緘試讀相思字。乃是多情喬亞元。短韻三篇皆麗絕。小梅寄意情偏切。亞元詩云借問小梅應得信。春風新自海邊來。此篇尤嘉。金蘭投分一可堅。銀鈎置袖終難滅。醉後狂言何足奇。感君知己不相遺。長卿曾作美人賦。玄成今有責躬詩。茲去春醉中贈醉妓長歌。酷爲欲託還京信。筆拙窮情未盡。珍重芸香陳子喬。亦解貽書遠相問。寧須買藥療羈愁。只恨無書消鄙吝。子喬問藥物所要。又問置新書。故有此句。游處當時靡不同。歡娛今日兩成空。天子尙應憐賈誼。時人未要嘲揚雄。曲終筆閣緘封已。翩翩驛騎行塵起。寄向中朝謝故人。爲說相思意如此。

送蒯司錄歸京

早年聞有蒯先生。二十餘年道不行。抵掌曾論天下事。折腰猶悟俗人情。老還上國歡娛少。貧聚歸資結束輕。遷客臨流倍惆悵。冷風黃葉滿山城。

聞查建州陷賊寄鍾郎中諛卽查從事也

聞道將軍輕壯圖。螺江城下委犀渠。旌旗零落沈荒服。簪履蕭條返故居。皓首應全蘇武節。故人誰得李陵書。自憐放逐無長策。空使盧譙淚滿裾。
還過東都留守周公筵上贈座客

賈生三載在長沙。故友相思道路賒。已分終年甘寂寞。豈知今日返京華。麟符上相恩偏厚。隋苑留歡日欲斜。明旦江頭倍惆悵。遠山芳草映殘霞。

送楊郎中唐員外奉使湖南

江邊微雨柳條新。握節含香二使臣。兩綬對懸雲夢日。方舟齊汎洞庭春。今朝草木逢新律。昨日山川滿戰塵。同是多情懷古客。不妨爲賦弔靈均。

表弟包穎見寄此子侍親在饒州累年臥病

常思帝里奉交親。別後光陰屈指頻。蘭佩卻歸綸閣下。荆枝猶寄楚江濱。十程山水勞幽夢。滿院煙花醉別人。料得此生強健在。會須重賞昔年春。

和

平生中表最情親。浮世那堪聚散頻。謝朓卻吟歸省閣。劉楨猶自臥漳濱。舊游半似前生事。要路多逢後進人。且喜新吟報強健。明年相望杏園春。

寄蕭給事蕭江西致仕

危言危行古時人。歸向西山臥白雲。買宅尙尋徐處士。餐霞終訪許真君。容顏別後應如故。詩詠年來更不聞。今日城中春又至。落梅愁緒共紛紛。

送鍾員外詩序

歲辛亥冬十月。天子命吾友德林爲東府亞尹。太弟諭德蕭君泊諸客餞於石頭城。雲日蒼茫。園林搖落。

尊酒將竭。征帆欲飛。處者眷眷而不能迴。行者遲遲而不忍去。煙生景夕。風靜江平。君子曰。公足以滅私。子當促棹。詩所以言志。我當分題。故以風月松竹山石寄情於贈別云爾。兵部員外郎。知制誥徐鉉序。

賦石奉送德林少尹員外 鉉上

我愛他山石。中含絕代珍。煙披寒落落。沙淺靜磷磷。翠色辭文陛。清聲出泗濱。扁舟載歸去。知是汎槎人。

賦月 蕭叟上

麗漢金波滿。當筵玉笋傾。因思頻聚散。幾復換虧盈。光徹離襟冷。聲符別管清。那堪還目此。兩地倚樓情。

賦竹 孫峴上

萬物中蕭灑。修篁獨逸羣。貞姿曾冒雪。高節欲凌雲。細韻風初發。濃煙日正曛。因題偏惜別。不可暫無君。

賦松 謝仲宣上

送人多折柳。唯我獨吟松。若保歲寒在。何妨霜雪重。森梢逢靜境。廓落見孤峯。還似君高節。亭亭豈繼蹤。

賦風 王沂上

靜追蘋末興。況復值蕭條。猛勢資新鴈。寒聲伴暮潮。過山雲散亂。經樹葉飄飄。今日煙江上。征帆望望遙。

賦山別諸知己 鍾蒨上

暮景江亭上。雲山日望多。只愁辭輦轂。長恨隔嵯峨。有意圖功業。無心憶薜蘿。親朋將遠別。且共醉笙歌。

贈泰州掾令狐克己 文公曾孫

念子才多命且奇。亂中拋擲少年時。深藏七澤衣如雪。卻見中朝鬢似絲。舊德在人終遠大。扁舟爲吏莫

推辭孤芳自愛凌霸處。詠取文公白菊詩。

送荻栽與秀才朱觀

羨子清吟處。茅齋面碧流。解憎蓮豔俗。唯欠荻花幽。鷺立低枝晚。風驚折葉秋。贈君須種取。不必樹忘憂。

使浙西先寄獻燕王侍中

京江風靜喜乘流。極目遙瞻萬歲樓。喜氣龍葱甘露晚。水煙波淡海門秋。五年不見鸞臺長。明日將陪兔苑遊。欲問平臺門下吏。相君還許吐茵不。

常州驛中喜雨

颯颯旱天雨。涼風一夕廻。遠尋南畝去。細入驛亭來。蓑唱牛初牧。漁歌棹正開。盈庭頓無事。歸思酌金壘。

驛中七夕

七夕雨初霽。行人正憶家。江天望河漢。水館折蓮花。獨坐涼何甚。微吟月易斜。今年不乞巧。鈍拙轉堪嗟。

贈浙西顧推官

盛府賓寮八十餘。閉門高臥興無如。梁王苑裏相逢早。潤浦城中得信疎。狼籍盃盤重會面。風流才調一如初。願君百歲猶強健。他日相尋隱士廬。

贈浙西妓亞仙筵上作

翠黛嚙如怨。朱顏醉更春。占將南國貌。惱殺別家人。粉汗沾巡盞。花鈿逐舞茵。明朝綺牕下。離恨兩般勤。

迴至瓜洲獻侍中

紫微垣裏舊賓從。來向吳門謁府公。奉使謬持嚴助節。登門初識魯王宮。笙歌隱隱違離後。煙水茫茫悵望中。日暮瓜洲江北岸。兩行清淚滴西風。

邵伯埭下寄高郵陳郎中

故人相別動經年。候館相逢倍慘然。顧我飲冰難輟棹。感君扶病爲開筵。河灣水淺翹愁鷺。柳岸風微噪暮蟬。欲識酒醒魂斷處。謝公祠畔客亭前。

謫居舒州累得韓高二舍人書作此寄之

三峯煙靄碧臨谿。中有騷人理釣絲。會友少于分袂日。謫居多卻在朝時。丹心歷歷吾終信。俗慮悠悠爾不知。珍重韓君與高子。殷勤書札寄相思。舒人以潛皖天柱爲三峯。

和張先輩見寄二首

去國離羣擲歲華。病容憔悴媿丹沙。谿連舍下衣長潤。山帶城邊日易斜。幾處垂鉤依野岸。有時披褐到鄰家。故人書札頻相慰。誰道西京道路賒。清時淪放在山州。筇杖紗巾處處游。野日蒼茫悲鷓舍。水風陰溼弊貂裘。雞鳴候旦寧辭晦。松節凌霜幾換秋。兩首新詩千里道。感君情分獨知邱。

印秀才至舒州見尋別後寄詩依韻和之

羈游白社身雖屈。高步辭場道不卑。投分共爲知我者。相尋多媿謫居時。離懷耿耿年來夢。厚意勤勤別後詩。今日谿邊正相憶。雪晴山秀柳絲垂。

行園樹

松節凌霜久。蓬根逐吹頻。羣生各有性。桃李但爭春。

題雷公井

揜竊愚公谷。蕭寥羽客家。俗人知處所。應爲有桃花。

送彭秀才

賈生去國已三年。短褐閑行皖水邊。盡日野雲生舍下。有時京信到門前。無人與和投湘賦。媿子來浮訪戴船。滿袖新詩好迴去。莫隨騷客醉林泉。

移饒州別周使君

正憐東道感賢侯。何幸南冠脫楚囚。皖伯臺前收別宴。喬公亭下艤行舟。四年去國身將老。百郡徵兵主尙憂。更向鄱陽湖上去。青衫憔悴淚交流。

避難東歸依韻和黄秀才見寄

感感逢人問所之。東流相送向京畿。自甘逐客紉蘭佩。不料平民著戰衣。樹帶荒村春冷落。江澄霽色霧霏微。時危道喪無才術。空手徘徊不忍歸。

酬郭先輩

太原郭夫子。行高文炳蔚。弱齡負世譽。一舉游月窟。及我竄羣舒。向風心鬱鬱。歸來暮江上。雲霧一披拂。雷雨不下施。猶作池中物。念君介然氣。感時思奮發。示我數篇文。與古爭馳突。綵繹粲英華。理深刮肌骨。

古詩尤精奧。史論皆宏拔。舉此措諸民。何憂民不活。吁嗟吾道薄。與世長迂闊。顧我徒有心。數奇身正拙。論兵屬少年。經國須儒術。夫子無自輕。蒼生正愁疾。

和集賢鍾郎中

石渠冊府神仙署。當用明朝第一人。腰下別懸新印綬。座中皆是故交親。龍池樹色供清景。浴殿香風接近鄰。從此翻飛應更遠。徧尋三十六天春。

送劉山陽

舊族知名士。朱衣宰楚城。所嗟吾道薄。是豈主恩輕。戰鼓何時息。儒冠獨自行。此心多感激。相送若爲情。

題伏龜山北隅

茲山信岑寂。陰崖積蒼翠。水石何必多。宛有千巖意。孰知近人境。旦暮含佳氣。池影搖輕風。林光澹新霽。支頤藉芳草。自足忘世事。未得歸去來。聊爲宴居地。

送黃梅江明府江前爲江夏令有善政今更宰小邑賦詩留別作此和之

封疆多難正經綸。臺閣如何不用君。江上又勞爲小邑。篋中徒自有雄文。書生膽氣人誰信。遠俗歌謠主不聞。一首新詩無限意。再三吟咏向秋雲。

詠梅子真送郭先輩

忠臣本愛君。仁人本愛民。寧知貴與賤。豈計名與身。梅生爲一尉。獻疏來君門。君門深萬里。金虎重千鈞。向永且不用。劉向谷永。況復論子真。拂衣遂長往。高節邈無鄰。至今仙籍中。謂之梅真人。郭生負逸氣。百代繼

遺塵進退生自知。得喪吾不陳。斯民苟有幸。期子一朝伸。

和蕭郎中午日見寄

細雨輕風采藥時。褰簾隱几更何爲。豈知澤畔紉蘭客。來赴城中角黍期。多罪靜思如劉蕤。赦書纔聽似含飴。謝公制勝常閒暇。願接西州敵手基。

送黃秀才姑孰辟命

世亂離情苦。家貧色養難。水雲孤棹去。風雨暮春寒。幕府才方急。騷人淚未乾。何時王道泰。萬里看鵬搏。

送王四十五歸東都

海內兵方起。離筵淚易垂。憐君負米去。惜此落花時。想憶看來信。相寬指後期。殷勤手中柳。此是向南枝。

和太常蕭少卿近郊馬上偶吟

田園經雨綠分畦。飛蓋閑行九里堤。拂袖清風塵不起。滿川芳草路如迷。林開始覺晴天迴。潮上初驚浦岸齊。嗟得仙郎詩句好。斷霞殘照遠山西。

又和

抱甕何人灌藥畦。金銜爲爾駐平堤。村橋野店景無限。綠水晴天思欲迷。橫笛乍隨輕吹斷。歸帆疑與遠山齊。鳳城廻望眞堪畫。萬戶千門蔣嶠西。

拋毬樂辭二首

歌舞送飛毬。金觥碧玉籌。管弦桃李月。簾幕鳳凰樓。一笑千場醉。浮生任白頭。

灼灼傅花枝。紛紛度畫旗。不知紅燭下。照見彩毬飛。借勢因期尅。巫山暮雨歸。

離歌辭五首

莫折紅芳樹。但知盡意看。狂風幸無意。那忍折教殘。
朝日城南路。旌旗照綠蕪。使君何處去。桑下覓羅敷。
事與年俱往。情將分共深。莫驚容鬢改。只是舊時心。
暫別勞相送。佳期願莫違。朱顏不須老。留取待郎歸。
拂匣收珠佩。迴燈拭薄粧。莫嫌春夜短。匹似楚襄王。

夢游三首

魂夢悠揚不奈何。夜來還在故人家。香濛蠟燭時時暗。戶映屏風故故斜。檀的慢調銀字管。雲鬢低綴折
枝花。天明又作人閒別。洞口春深道路賒。
繡幌銀屏杳靄閒。若非魂夢到應難。牕前人靜偏宜夜。戶內春濃不識寒。蘸甲遞觴纖似玉。含詞忍笑膩
於檀。錦書若要知名字。滿縣花開不姓潘。
南國佳人字玉兒。芙蓉雙臉遠山眉。仙郎有約長相憶。阿母無猜不得知。夢裏行雲還倏忽。暗中攜手乍
疑遲。因思別後閒牕下。織得迴文幾首詩。

此
页
空
白

徐騎省集卷第四 詩四

和蕭少卿見慶新居

湘浦懷沙已不疑。京城賜第豈前期。鼓聲到晚知坊遠。山色來多與靜宜。簪履尙應憐故物。稻梁空自媿華池。新詩問我偏饒思。還念鷓鴣得一枝。

又和

驚蓬偶駐知多幸。斷鴈重聯愜素期。當戶小山如舊識。上牆幽蘚最相宜。清風不去因栽竹。隙地無多也鑿池。更喜良鄰有嘉樹。綠陰分得近南枝。

送勳道人之建安

下國兵方起。君家義獨聞。若爲輕世利。歸去臥溪雲。挂席衝嵐翠。攜筇破蘚紋。離情似霜葉。江上正紛紛。

送許郎中歙州判官兼黟縣

嘗聞黟縣似桃源。況是優游冠玳筵。遺愛非遙應臥理。許營宰涇縣祖風猶在好尋仙。許宣平黟人得道朝衣舊識熏香吏。祿米初營種秫田。大底宦游須自適。莫辭離別二三年。

送彭秀才南游

問君孤棹去何之。玉筍春風楚水西。山上斷雲分翠靄。林間晴雪入澄溪。琴心酒趣神相會。道士仙童手共攜。他日時清更隨計。莫如劉阮洞中迷。

和明上人除夜見寄

酌酒圍爐久。愁襟默自增。長年逢歲暮。多病見兵興。夜色開庭燎。寒威入硯冰。湯師無別念。吟坐一燈凝。

正初和鄂州邊郎中見寄

潦倒含香客。淒涼賦鵬人。未能全卷舌。終擬學垂綸。故友睽離久。音書問訊頻。相思俱老大。又見一年新。

送劉司直出宰

之子有雄文。風標秀不羣。低飛從墨綬。逸志在青雲。柳色臨流動。春光到縣分。賢人多靜理。未爽醉醺醺。

送從兄赴臨川幕

梁王籍寵就東藩。還召鄒枚坐兔園。今日好論天下事。昔年同受主人恩。石頭城下春潮滿。金柅亭邊綠樹繁。唯有音書慰離別。一杯相送別無言。

送龔員外赴江州幕

煩君更上築金臺。世難民勞藉俊才。自有聲名馳羽檄。不妨談笑奉罇罍。元規樓迴清風滿。匡俗山春畫障開。莫忘故人離別恨。海潮迴處寄書來。

送朱先輩尉廬陵

我重朱夫子。依然見古人。成名無媿色。得祿及慈親。莫歎官資屈。寧論活計貧。平生心氣在。終在靜邊塵。

送德林郎中學士赴東府詩序

德林始以才術優贍。入參近司。旋以地望清雅。寵登書殿。會東畿克復。上以君有遺愛於淮海之都。故輟

侍從之班。攝尹正之任。吾一二親友。共餞行舟。鉉也不才。請以言贈。理大國若烹小鮮。言不可撓之也。況亂後乎。德林當本仁守信。體寬務斷。大兵之後。民各思義。聽其自理。任其自營。爲之上者。導其蒙。遏其淫而已。示之以聰明。則民益迷。拘之以禁令。則民重困。棄仁則吏暴。失信則衆惑。急則民傷。不斷則民懈。慎此四者。何往而不臧。噫嘻。吾黨皆忘形者也。平生以來。胥會者幾何。思當雞犬相聞。舟輿不接。開口而笑。攜手而遊。在吾輩勉之而已。忘身狗國。急病讓夷。德林此行。宜減離戀。盍各賦一物以爲贈乎。九月十七日序。

得江 奉送德林郎中學士 喬彛上

摻袂向江頭。朝宗勢未休。何人乘桂楫。之子過揚州。颯颯翹沙鴈。漂漂逐浪鷗。欲知離別恨。半是淚和流。

得酒 徐鉉上

酌此杯中物。茱萸滿把秋。今朝將送別。他日是忘憂。世亂方多事。年加易得愁。政成頻一醉。亦未減風流。

得菊 蕭彧上

離情折楊柳。此別異春哉。含露東籬豔。汎香南浦杯。惜持行次贈。留插醉中迴。暮齒如能制。玉山甘甯頽。

得遠山 徐鉉上

瓜步妖氛滅。崑岡草樹清。終朝空極望。今日送君行。報政秋雲靜。微吟曉月生。樓中長可見。持用減離情。

得水 陳元裕上

上善湛然秋。恩波洽帝猷。謾言生險浪。豈爽見安流。汎去星槎遠。澄來月練浮。滔滔對離酌。入洛稱仙舟。

得新鴻別諸同志

鍾蒨上

隨陽來萬里，點點度遙空。影落長江水，聲悲半夜風。殘秋辭絕漠，無定似驚蓬。我有離羣恨，飄飄類此鴻。

送陳先生之洪并寄蕭少卿

聞君仙袂指洪涯，我憶情人別路賒。知有歡娛遊楚澤，更無書札到京華。雲開驛閣連江靜，春滿西山倚漢斜。此處相逢應見問，爲言搔首望龍沙。

送龔明府九江歸寧

茂宰墜官去，扁舟着綵衣。溢城春酒熟，匡阜野花稀。解纜垂楊綠，開帆宿鷺飛。一朝吾道泰，還逐落潮歸。

和江西蕭少卿見寄二首

亡羊岐路媿司南，二紀窮通聚散三。老去何妨從笑傲，病來看欲嬾朝參。離腸似線常髮斷，世態如湯不可探。珍重加飡省思慮，時時斟酒壓山嵐。

身遙上國三千里，名在朝中二十春。金印不須辭入幕，麻衣曾此嘆迷津。卷舒由我真齊物，憂喜忘心卽養神。世路風波自翻覆，虛舟無計得沉淪。

送薛少卿赴青陽

我愛陶靖節，吏隱從弦歌。我愛費徵君，高臥歸九華。清風激頰波，來者無以加。我志兩不遂，漂淪浩無涯。數奇時且亂，此圖今愈賒。賢哉薛夫子，高舉凌晨霞。安民卽是道，投足皆爲家。功名與權位，悠悠何用誇。攜朋出遠郊，酌酒藉平沙。雲收遠天靜，江闊片帆斜。離懷與企羨，南望長咨嗟。

送高起居之涇縣

右史罷朝歸。之官句水湄。別我行千里。送君傾一卮。酒罷長嘆息。此嘆君應悲。亂中吾道薄。鄉族舊人稀。胡爲佩銅墨。去此白玉墀。吏事豈所堪。民病何可醫。藏用清其心。此外慎勿爲。縣郭有佳境。千峯谿水西。雲樹杳迴合。巖巒互蔽虧。彈琴坐其中。世事吾不知。時時寄書札。以慰長相思。

宿茅山寄舍弟

茅許稟靈氣。一家同上賓。仙山空有廟。舉世更無人。獨往誠違俗。浮名亦累真。當年各自勉。雲洞鎮長春。晚憩白鶴廟。寄句容張少府。

題紫陽觀

日入林初靜。山空暑更寒。泉鳴細巖竇。鶴唳眇雲端。拂榻安碁局。焚香戴道冠。望君殊不見。終夕凭欄干。南朝名士富仙才。追步東鄉遂不迴。丹井自深桐暗老。祠宮長在鶴頻來。巖邊桂樹攀仍倚。洞口桃花落復開。惆悵霓裳太平事。一函真跡鎖昭臺。

贈奚道士舍象

奚生曾有洞天期。猶傍天壇摘紫芝。處世自能心混沌。全真誰見德支離。玉霄塵閉人長在。金鼎功成俗未知。他日鸞輪謁茅許。願同雞犬去相隨。

題碧巖亭贈孫尊師

絕境何人識。高亭萬象含。凭軒臨樹杪。送目極天南。積竊生泉洞。歸雲鎖石龕。丹霞披翠嶽。白鳥帶晴嵐。

仙去留虛室。龍歸漲碧潭。幽巖君獨愛。玄味我曾耽。世上愁何限。人間事久諳。終須脫羈鞅。來此會空談。

題白鶴廟

平生心事向玄關。一入仙鄉似舊山。白鶴唳空晴渺渺。丹砂流澗暮潺潺。嘗嗟多病嫌中藥。擬問真經乞小還。滿洞烟霞互陵亂。何峯臺榭是蕭閑。

步虛詞五首

氣爲還元正。心由抱一靈。凝神歸罔象。飛步入青冥。整服乘三素。旋綱躡九星。瓊章開後學。稽首奉真經。天帝黃金闕。真人紫錦書。霓裳紛蔽景。羽服迴陵虛。白鶴能爲使。斑麟解駕車。靈符終願借。轉共世情疎。聖主過幽谷。虛皇在藥宮。五千宗物母。七字祕神童。世上金壺遠。人間玉籥空。唯餘養身法。修此與天通。何處求玄解。人間有洞天。勤行皆是道。謫下尙爲仙。蔽景乘朱鳳。排虛駕紫烟。不嫌園吏傲。願在玉宸前。三素霏霏遠。盟威凜凜寒。火鈴空滅沒。星斗曉闌干。佩響流虛殿。爐烟在醮壇。蕭寥不可極。驂駕上雲端。

留題仙觀

瑤壇醮罷晚雲開。羽客分飛俗士迴。爲報移文不須勒。未曾游處待重來。

和陳洗馬山莊新泉

已開山館待抽簪。更要巖泉欲洗心。常被松聲迷細韻。忽流花片落高岑。便疏淺瀨穿莎徑。始有清光映竹林。何日煎茶醞香酒。沙邊同聽暝猿吟。

奉和七夕應令

今宵星漢共晶光。應笑羅敷嫁侍郎。斗柄易傾離恨促。河流不盡後期長。靜聞天籟疑鳴佩。醉折荷花想豔粧。誰見宣猷堂上宴。一篇清韻振金鐙。

又和八日

微雲疎雨淡新秋。曉夢依稀十二樓。故作別離應有以。擬延更漏共無由。那教人世長多恨。未必天仙不解愁。博望苑中殘酒醒。香風佳氣獨遲留。

和印先輩及第後獻座主朱舍人郊居之作

成名郊外揜柴扉。樹影蟬聲共息機。積雨暗封青蘚徑。好風輕透白練衣。嘉魚始賦人爭誦。荆玉頻收國自肥。獨坐公廳正煩暑。喜吟新詠見玄微。印以南有嘉魚賦及第。

和致仕張尙書新創道院

梓澤成新致。金丹有舊情。挂冠朝睡足。隱几暮江清。藥圃分輕綠。松牕起細聲。養高寧厭病。默坐對諸生。尙書時有瘖疾。

和尉遲贊善秋暮僻居

登高節物最堪憐。小嶺疎林對檻前。輕吹斷時雲縹緲。夕陽明處水澄鮮。江城秋早催寒事。望苑朝稀足晏眠。庭有菊花罇有酒。若方陶令媿前賢。

和陳贊善致仕遼京口

海門山下一漁舟。中有高人未白頭。已駕安車歸故里。尙通閨籍在龍樓。泉聲漱玉牕前落。江色和煙檻

外流今日君臣厚終始不須辛苦畫雙牛。

京使迴自臨川得從兄書寄詩依韻和

珍重還京使殷勤話故人別離長挂夢寵祿不關身趣向今成道聲華舊絕塵莫嗟容鬢老詩句逐時新

陪鄭王相公賦簷前垂冰應教依韻

牕外虛明雪乍晴簷前垂霑盡成冰長廊瓦疊行行密晚院風高寸寸增玉指乍拈簷尙媿金階時墜磬難勝晨飡堪醒曹參酒自恨空腸病不能

送禮部潘尙書致仕還建安

名遂功成累復輕鱸魚因起舊鄉情履聲初下金華省帆影看離石首城化劍津頭尋故老同亭會上問仙卿冥鴻高舉真難事相送何須淚滿纓

和尉遲贊善病中見寄

仙郎移病暑天過卻似冥鴻避爵羅晝夢乍驚風動竹夜吟時覺露霑莎情親稍喜貧居近性嬾猶嫌上直多望苑恩深期勿藥青雲岐路未蹉跎

池州陳使君見示游齊山詩因寄

往歲曾遊弄水亭齊峯濃翠暮軒橫哀猿出檻心雖喜傷鳥聞弦勢易驚病後簪纓殊寡興老來泉石倍關情今朝池口風波靜遙賀山前有頌聲

再領制誥和王明府見賀

蹇步還依列宿邊。拱辰重認舊雲天。自嗟多難飄零困。不似當年膽氣全。雞樹晚花疎向日。龍池輕浪細含煙。從來不解爲身計。一葉悠悠任大川。

送高舍人使嶺南

西掖官曹近。南溟道路遙。使星將渡漢。仙棹乍乘潮。柳映靈和折。梅依大庾飄。江帆風淅淅。山館雨蕭蕭。陸賈真迂闊。終軍久寂寥。送君何限意。把酒一長謔。

和王明府見寄

時情世難消。吾道薄宦流。年厄此身莫。嘆京華同寂寞。曾經兵革共漂淪。對山開戶唯求靜。貰酒留賓不道貧。善政空多尙淹屈。不知誰是解憂民。

和方秦州見寄

逐客栖栖重入京。舊愁新恨兩難勝。雲收楚塞千山雪。風結秦淮一尺冰。置醴筵開情豈盡。投湘文就思如凝。更殘月落知孤坐。遙望船牕一點星。

文獻太子挽歌辭五首

國有承祧重。人知秉哲尊。清風來望苑。遺烈在東藩。此日升緱嶺。何因到寢門。天高不可問。煙靄共昏昏。夏啓吾君子。周儲上帝賓。音容一飄忽。功業自紛綸。露泣承華月。風驚麗正塵。空餘商嶺客。行哭下宜春。出處成交讓。經綸有大功。淚碑瓜步北。棠樹蒜山東。百揆方時敍。重離遂不融。故臣偏感咽。曾是嘆三窮。甲觀光陰促。園陵天地長。簫笳咽無韻。賓御哭相將。盛烈傳彝鼎。遺文被樂章。君臣知己分。零淚亂無行。

綠仗清晨出，非同齒冑時。愁烟鑠平甸，朔吹繞寒枝。楚客來何補，緱山去莫追。迴瞻飛蓋處，揜袂不勝悲。

送王員外宰德安

家世朱門貴，官資粉署優。今爲百里長，應好五峯游。柳影連彭澤，湖光接庾樓。承明須再入，官滿莫淹留。

以端谿硯酬張員外水精珠兼和來篇

請以端谿潤，醜君水玉明。方圓雖異器，功用信俱呈。自得山川秀，能分日月精。巾箱各珍重，所貴在交情。

奉使九華山中塗遇青陽薛郎中

故人相別動相思，此地相逢豈素期。九子峯前閑未得，五谿橋上坐多時。甘泉從幸余知忝，宣室徵還子未遲。且飲一杯消別恨，野花風起便離披。

奉命南使經彭澤值王明府不在留此

遠使程途未一分，離心常要醉醺醺。那堪彭澤門前立，黃菊蕭疎不見君。

南都遇前嘉魚劉令言遊閩嶺作此與之

我持使節經韶石，君作閑遊過武夷。兩地山光成獨賞，隔年鄉思暗相知。洪涯壇上長岑寂，孺子亭前自別離。珍重分岐一杯酒，強加飡飯數吟詩。

關阜山

殿影高低雲揜映，松陰繚繞步徘徊。從今莫厭簪裾累，不是乘輅不得來。

玉筍山留題

仙鄉會應遠。王事知何極。征傳莫辭勞。玉峯聊一息。形骸已銷散。心想都凝寂。真氣自清虛。非關好松石。九仙皆積學。洞壑多遺跡。遊子歸去來。胡爲但征役。

廬陵別朱觀先輩

桂籍知名有幾人。鸞飛相續上青雲。解憐才子寧唯我。遠作卑官尙見君。嶺外獨持嚴助節。宮中誰薦長卿文。新詩試爲重高詠。朝漢臺前不可聞。

文彘少卿文山郎中交好深。至二紀已餘。睽別數年。二子長逝。奉使嶺表。塗次南康。弔孫氏之孤。

於其家觀文彘手書於僧室慷慨悲歎留題此詩

孫家虛座弔諸孤。張叟僧房見手書。二紀歡游今若此。滿衣零淚欲何如。腰間金印從如斗。鏡裏霜華已滿梳。珍重遠公應笑我。塵心唯此未能除。

朱處士相與有山水之願。見送至南康。作此以別之。

憐君送我至南康。更憶梅花庾嶺芳。多少仙山共遊在。願君百歲尙康強。

清明日清遠峽作

嶺外春過半。塗中火又新。殷勤清遠峽。留戀北歸人。

迴至南康題紫極宮衷道士房

王事信靡盬。飲冰安足辭。胡爲擁征傳。乃至天南陲。天南非我鄉。留滯忽踰時。還經羽人家。豁若雲霧披。何以寬我懷。老莊有微詞。達士無不可。至人豈偏爲。客愁勿復道。爲君吟此詩。

和歙州陳使君見寄

新安風景好。時令肅轅門。身貴心彌下。功多口不言。韜鈴家法在。儒雅素風存。簪履陪游盛。鄉閭俗化敦。臨牕山色秀。繞郭水聲喧。織絡文章麗。矜嚴道義尊。樓臺秋月靜。京庾晚雲屯。曉吹傳銜鼓。晴陽展信旛。一篇貽友好。千里倍心論。未見歸驂動。空能役夢魂。

和賈員外猷見贈玉蘂花栽

瓊瑤一簇帶花來。便斲蒼苔手自栽。喜見唐昌舊顏色。爲君判病酌金盃。

光穆皇后挽歌三首

仙馭期難改。坤儀道自光。闕宮新表德。沙麓舊膺祥。素帟堯門揜。凝笳畢陌長。東風慘陵樹。無復見親桑。永樂留虛位。長陵啓夕扉。返虞嚴甲仗。復土揜空衣。功業投三母。光靈極四妃。唯應彤史在。不與露花晞。隱隱闔門路。煙雲曉更愁。空瞻金輅出。非是濯龍游。德感人倫正。風行內職修。還隨偶物化。同此畏軒丘。

嚴相公宅牡丹

但是豪家重牡丹。爭如丞相閣前看。鳳樓日暖開偏早。雞樹陰濃謝更難。數朶已應迷國豔。一枝何幸上塵冠。不知更許憑欄否。爛熳春光未肯殘。

侍宴賦得歸鴈

夜靜羣動息。翩翾一鴈歸。清音天際遠。寒影月中微。何處雲同宿。長空雪共飛。陽和常借使。免與素心違。

又賦早春書事

苑裏芳華早。皇家勝事多。弓聲達春氣。奕思養天和。煖酒紅爐火。浮舟綠水波。雪晴農事起。擊壤聽廣歌。

薔薇詩一首十八韻呈東海侍郎太尉中書令鄭王從善

綠影覆幽池。芳菲四月時。管絃朝夕興。組纈百千枝。盛引牆看徧。高煩架屢移。露輕濡綵筆。蜂誤拂吟髭。日照玲瓏幔。風搖翡翠帷。早紅飄薜地。狂蔓挂蛛絲。嫩刺牽衣細。新條宰草垂。晚香難暫捨。嬌態自相窺。深淺分前後。容華互盛衰。罇前留客久。月下欲歸遲。何處繁臨砌。誰家密映離。絳羅房燦爛。碧玉葉參差。分得殷勤種。開來遠近知。晶熒歌袖袂。柔弱舞腰支。膏麝誰將比。庭萱自合嗤。勻粧低水鑑。泣淚滴煙霏。畫擬憑梁廣。名宜亞楚姬。寄君十八韻。思拙媿新奇。

依韻和令公大王薔薇詩

綠樹成陰後。羣芳稍歇時。誰將新濯錦。挂向最長枝。卷箔香先入。凭欄影任移。賞頻嫌酒渴。吟苦怕霜髭。架迴籠雲幄。庭虛展繡帷。有情縈舞袖。無力冒遊絲。嫩葉鶯偷采。柔條柳伴垂。荀池波自照。梁苑客嘗窺。玉李尋皆謝。金桃亦暗衰。花中應獨貴。庭下故開遲。委豔粧苔砌。分華借槿籬。低昂勻灼爍。濃淡疊參差。幸植王宮裏。仍逢宰府知。芳心向誰許。醉態不能支。芍藥天教避。玫瑰衆共嗤。光明烘晝景。潤膩裛輕霏。麗似期神女。珍如重衛姬。君王偏屬詠。七子盡搜奇。

和門下殷侍郎新茶二十韻

暖吹入春園。新芽競粲然。才教鷹觜拆。未放雪花妍。荷杖青林下。攜筐旭景前。採茶須在日未出前。孕靈資雨露。鍾秀自山川。碾後香彌遠。烹來色更鮮。名隨土地貴。味逐水泉遷。力藉流黃暖。形模紫筍圓。茶之美者有正圓捲紫筍。

當鑽柳火。遙想湧金泉。陽羨茶山有金任道時新物。須依古法煎。輕甌浮綠乳。孤竈散餘煙。甘齋非予匹。
宮槐讓我先。槐芽亦可爲茶竹孤空冉冉。荷弱謾田田。解渴消殘酒。清神減夜眠。十漿何足饋。百榼盡堪捐。采擷
唯憂晚。營求不計錢。任公因焙顯。陸氏有經傳。愛甚真成癖。嘗多合得仙。亭臺虛靜處。風月豔陽天。自可
臨泉石。何妨雜管絃。東山似蒙頂。願得從諸賢。

徐騎省集卷第五

春雪應制

繁陰連曙景。瑞雪灑芳辰。勢密猶疑臘。風和始覺春。綵林開玉葉。飄座裊香塵。欲識宸心悅。雲謠慰兆人。

進雪詩

欲使新正識有年。故飄輕絮伴春還。近看瓊樹籠銀闕。遠想瑤池帶玉關。潤逐麴麩鋪綠野。暖隨杯酒上朱顏。朝來花萼樓中宴。數曲廣歌雅頌閒。

自題山亭三首

簪組非無累。園林未是歸。世喧長不到。何必故山薇。小舫行乘月。高齋臥看山。退公聊自足。爭敢望長閑。跂石仍臨水。披襟復挂冠。機心忘未得。棊局與魚竿。

和陳表用員外求酒

暑天頻雨亦頻晴。簾外閑雲重復輕。珍重一壺調絕唱。向風遙想醉吟聲。

奉和右省僕射西亭高臥作

院靜蒼苔積。庭幽怪石欹。蟬聲當檻急。虹影向簷垂。晝漏猶憐永。叢蘭未覺衰。疎篁巢翡翠。折葦覆鸕鷀。對酒襟懷曠。圍碁旨趣遲。景皆隨所向。物各遂其宜。道與時相會。才非世所羈。賦詩貽座客。秋事爾何悲。

憶新淦觴池寄孟賓于員外

往年淦水駐行軒，引得清流似月圓。自有谿光還碧甃，不勞人力遞金船。潤滋苔蘚欺茵席，聲入杉松當管絃。珍重詩人頻管領，莫教塵土咽潺湲。

右省僕射後湖亭閑宴鉉以宿直先歸賦詩留獻

湖上一陽生，虛亭啓高宴。楓林烟際出，白鳥波心見。主人忘貴達，座客容疵賤。獨慚殘照催，歸宿明光殿。送孟賓于員外還新淦

暫來城闕不從容，卻佩銀魚隱玉峯。雙澗水邊歌醉石，九仙臺下聽風松。題詩翠壁稱逋客，采藥春畦狎老農。野鶴乘軒雲出岫，不知何日再相逢。

孟君別後相續寄書作此酬之

多病怯煩暑，短才憂近職。跣足北牕風，遙懷浩無極。故人易成別，詩句空相憶。尺素寄天涯，淦江秋水色。

納后夕侍宴

天上軒星正，雲間湛露垂。禮容過渭水，宴喜勝瑤池。彩霧籠花燭，升龍肅羽儀。君臣歡樂日，文物盛明時。簾捲銀河轉，香凝玉漏遲。華封傾祝意，觴酒與聲詩。

又三絕

時平物茂歲功成，重翟排雲到玉京。四海未知春色至，今宵先入九重城。銀燭金爐禁漏移，月輪初照萬年枝。造舟已似文王事，卜世應同八百期。

漢主承乾帝道光。天家花燭宴昭陽。六衣盛禮如金屋。彩筆分題似柏梁。

北苑侍宴雜詠詩

竹

勁節生宮苑。虛心奉豫遊。自然名價重。不羨渭川侯。

松

細韻風中遠。寒青雪後濃。繁陰堪避雨。効用待東封。

水

碧草垂低岸。東風起細波。橫汾從遊宴。何謝到天河。

風

昨朝纔解凍。今日又開花。帝力無人識。誰知玩物華。

菊

細麗披金彩。氛氳散遠馨。汎杯頻奉賜。綠解制頽齡。

柳枝詞十首座中應制

金馬辭臣賦小詩。黎園弟子唱新詞。君恩還似東風意。先入靈和蜀柳枝。
百草千花共待春。綠楊顏色最驚人。天邊雨露年年在。上苑芳華歲歲新。
長愛龍池二月時。麩麩金線弄春姿。假饒葉落枝空後。更有黎園笛裏吹。

綠水成文柳帶搖。東風初到不鳴條。龍舟欲過偏留戀。萬縷輕絲拂御橋。
百尺長條踈麴塵。詩題不盡畫難真。憑君折向人間種。還似君恩處處春。
風暖雲開晚照明。翠條深映鳳凰城。人閒欲識靈和態。聽取新詞玉管聲。
醉折垂楊唱柳枝。金城三月走金羈。年年爲愛新條好。不覺蒼華也似絲。
新春花柳競芳姿。偏愛垂楊拂地枝。天子偏教詞客賦。宮中要唱洞簫詞。
凝碧池頭蘸翠漣。鳳凰樓畔簇晴煙。新詞欲詠知難詠。說與雙成入管絃。
侍從甘泉與未央。移舟偏要近垂楊。櫻桃未綻梅花老。折得柔條百尺長。

奉和宮傅相公懷舊見寄四十韻

謝傅功成德望全。鸞臺初下正蕭然。搏風乍息三千里。感舊重懷四十年。西掖新官同賈馬。南朝輿運似
開天。文辭職業分工拙。流輩班資讓後先。每愧陋容勞刻畫。長慚頑石費雕鐫。晨趨綸掖吟春永。夕會精
廬待月圓。立馬有時同草詔。聯鑣幾處共成篇。閑歌柳葉翻新曲。醉詠桃花促綺筵。少壯況逢時世好。經
過寧慮歲華遷。雲龍得路須騰躍。社櫟并材合棄捐。再謁湘江猶是幸。兩還宣室竟何緣。已知瑕玷勞磨
瑩。又得官司重接連。聽漏分宵趨建禮。從遊同召赴甘泉。雲開闔闔分臺殿。風過華林度管絃。行止不離
宮仗影。衣裾嘗惹御爐烟。師資稷契論中禮。依止山公典小銓。多謝天波垂赤管。敢教晨景過華輒。翔飛
附驥方經遠。巨楫乘風遂濟川。玉燭調時鈞軸正。台階平處德星懸。巖廊禮絕威容肅。布素情深友好偏。
長擬營巢安大廈。忽驚操鉞領中權。吳門日麗龍銜節。京口沙晴鶴畫船。蓋代名高方赫赫。戀恩心切更

乾乾。袁安辭氣忠仍懇。吳漢精誠直且專。卻許。正明師紀傳。更容疏廣奉周旋。朱門自得施行馬。厚祿何妨食萬錢。密疏尙應勞獻替。清談唯見論空玄。東山妓樂供閑步。北牖風涼足晏眠。玄武湖邊林隱見。五城橋下棹洄沔。曾移苑樹開紅藥。新鑿家池種白蓮。不遣前驕妨野逸。別尋逋客互招延。棊枰寂靜陳虛閣。詩筆沉吟劈彩牋。往事偶來春夢裏。閑愁因動落花前。青雲舊侶嗟誰在。白首親情倍見憐。盡日凝思殊悵望。一章追敘信精研。韶顏莫與年爭競。世慮須憑道節宣。幸喜書生爲將相。定由陰德致神仙。羊公剩有登臨興。尙子都無嫁娶牽。退象天山鎮浮競。起爲霖雨潤原田。從容自保君臣契。何必扁舟始是賢。

相公垂覽和詩復貽長句輒次來韻

西院春歸道思深。披衣閑聽暝猿吟。鋪陳政事留黃閣。偃息神機在素琴。玉柄暫時疎末座。瑤華頻復惠清音。開晴便作東山約。共賞烟霞放曠心。

九日落星山登高

秋暮天高稻穗成。落星山上會諸賓。黃花汎酒依流俗。白髮滿頭思古人。巖影晚看雲出岫。湖光遙見客垂綸。風煙不改年長度。終待林泉老此身。

十日和張少監

重陽高會古平臺。吟徧秋光始下來。黃菊後期香未減。新詩捧得眼還開。每因佳節知身老。卻憶前歡似夢迴。且喜清時屢行樂。是非名利盡悠哉。

御筵送鄧王

禁裏秋光似水清。林煙池影共離情。暫移黃閣只三載。卻望紫垣都數程。滿座清風天子送。隨車甘雨郡人迎。綺霞閣上詩題在。從此還應有頌聲。

和張少監晚菊

憶共庭蘭倚砌栽。柔條輕吹獨依隈。自知佳節終堪賞。爲惜流光未忍開。采擷也須盈掌握。馨香還解滿樽罍。今朝句假猶無事。更好登臨汎一杯。

送馮侍郎

聞君竹馬戲毗陵。誰道觀風自六卿。今日聲名光舊物。共看旌旆擁書生。斬蛟橋下谿煙碧。射虎亭邊草路清。應念筵中倍離恨。老來偏重十年兄。

又絕句寄題毗陵驛

曾持使節駐毗陵。長與州人有舊情。爲向驛橋風月道。舍人髭鬢白千莖。

陳侍郎宅觀花燭

今夜銀河萬里秋。人言織女嫁牽牛。珮聲寥亮和金奏。燭影熒煌映玉鉤。座客亦從天子賜。更籌須爲主人留。世閒盛事君知否。朝下鸞臺夕鳳樓。

送蕭尙書致仕歸廬陵

江海分飛二十春。重論前事不堪聞。主憂臣辱誰非我。曲突徙薪唯有君。金紫滿身皆外物。雪霜垂領更離羣。鶴歸華表望不盡。玉筍山頭多白雲。

賦得秋江晚照

落日照平流。晴空萬里秋。輕明動楓葉。點的亂沙鷗。罾網魚梁靜。簦笠稻穗收。不教行樂倦。冉冉下城樓。

奉和子龍大監與舍弟贈答之什

石渠東觀兩優賢。明主知臣豈偶然。鴛鴦分行皆接武。金蘭同好共忘年。懷恩未遂林泉約。竊位空慙組綬懸。多少深情知不盡。好音相慰強成篇。

史館庭梅見其毫末。歷載三十。今已半枯。同僚諸公。唯相公與鉉在耳。覩物興感。率成短篇。謹書

獻上伏惟垂覽

東觀婆娑樹。曾憐甲坼時。繁英共攀折。芳歲幾推移。往事皆陳迹。清香亦暗衰。相看宜自喜。雙鬢各垂絲。鼎臣學士侍郎。以東館庭梅。昔翰苑之毫末。今復半枯。向時同寮零落。都盡素髮垂領。茲唯二人感舊傷懷。發於吟咏。惠然好我。不能無言。輒次來韻。攀和 悅

憶見萌芽日。還憐合抱時。舊歡如夢想。物態暗遷移。素豔今無幾。朱顏亦自衰。樹將人共老。何暇更悲絲。

再次前韻代梅答

託植經多稔。頃筐向盛時。枝條雖已改。情分不曾移。莫訝塔前老。還同鏡裏衰。更應憐墮葉。殘吹挂蟲絲。

太傅相公深感庭梅再成絕唱。曲垂借示。倍認知憐。謹用舊韻攀和

禁省繁華地。含芳自一時。雪英開復落。紅藥植還移。謂嘗爲翰林。又爲史館。靜想分今昔。頻吟歎盛衰。多情共如此。爭免鬢成絲。

太傅相公以東觀庭梅西垣舊植昔陪盛賞今獨家兄唱和之餘俾令攀和輒依本韻伏媿斐然

錯

靜對含章樹。漢有含章
簷下樹。閑思共賞時。香隨荀令在。根異武昌移。物性雖搖落。人心豈變衰。唱訓勝笛曲。來

往韻朱絲。

鼎臣學士侍郎楚金舍人學士以再傷庭梅詩同垂寵和清絕感歎情致俱深因成四十字陳謝

悅

人物同遷謝。重成念舊悲。連華得瓊玖。合奏發埴篔。餘枿雖無取。殘芳尙獲知。問君何所似。珍重杜秋詩。

太傅相公以庭梅二篇許舍弟同賦再迂藻思曲有虛稱謹依韻奉和庶申感謝

舊春終無替。流光自足悲。攀條感花萼。和曲許埴篔。前會成春夢。何人更已知。緣情聊借喻。爭敢道言詩。

太傅相公與家兄梅花訓唱許綴末篇再賜新詩俯光拙句謹奉清韻用感鈞私伏惟采覽

錯

重歎梅花落。非關塞笛悲。論文叨接萼。末曲媿吹篔。毛詩云仲
氏吹篔。枝逐清風動。香因白雪知。陶鈞敷友悌。更

賦邵公詩。

和鍾大監汎舟同游見示

潮溝橫趣北山阿。一月三游未是多。老去交親難暫捨。閑中滋味更無過。谿橋樹映行人渡。村徑風飄牧

豎歌。孤櫂亂流偏有興。滿川晴日弄微波。

又和游光陸院

寺門山水際。清淺照屏顏。客權晚維岸。僧房猶揜關。日華穿竹靜。雲影過塔閑。箕踞一長嘯。忘懷物我閒。

和張少監舟中望蔣山

谿路向還背。前山高復重。紛披紅葉樹。閒鬪白雲峯。盡日慵移櫂。何年醉倚松。自知閑未得。不敢笑周顛。

御札

新酒初熟。偶與鄭王諸公。開嘗於清宴堂。廡之間。既覽秋物。復矚霜牋。因賦茱萸一題。以遣此時之興。卿鴻才敏思。不可獨醒。宜應急徵。同賦前旨。

茱萸詩

翰林學士臣徐鉉進

萬物慶西成。茱萸獨擅名。房排紅結小。香透夾衣輕。宿露霑猶重。朝陽照更明。長和菊花酒。高宴奉西清。

奉和御製茱萸

臺畔西風御果新。芳香精彩麗蕭辰。柔條細葉粧治好。紫蒂紅芳點綴勻。幾朵得陪天上宴。千枝長作洞中春。今朝聖藻偏流詠。黃菊無由更敢鄰。

蒙恩賜酒奉旨令醉進詩以謝

明光殿裏夜迢迢。多病逢秋自寂寥。臣以病戒酒多時蠟炬乍傳丹鳳詔。御題初認白雲謠。今宵幸識衢樽味。明日知停入閣朝。爲感君恩判一醉。不煩辛苦解金貂。

秋日汎舟賦蘋花

素豔擁行舟。清香覆碧流。遠煙分的的。輕浪汎悠悠。雨歇平湖滿。風涼運瀆秋。今朝流詠處。卽是白蘋洲。

題梁王舊園

梁王舊館枕潮溝。共引垂藤繫小舟。樹倚荒臺風淅淅。草埋欹石雨修修。門前不見鄒枚醉。池上時聞鴈驚愁。節士逢秋多感激。不須頻向此中游。

奉詔度支陳員外

古來賢達士。馳鶩唯羣書。非禮誓弗習。違道無與居。儒家苦迂闊。遂將世情疎。吾友嗣世德。古風藹有餘。幸遇漢文皇。握蘭佩金魚。俯視長沙賦。恹恹將焉如。

明道人歸西林求題院額作此送之

昔從岐陽狩。簪纓滿翠微。十年勞我夢。今日送師歸。曳尾龜應樂。乘軒鶴漫肥。含情題小篆。將去挂巖扉。

送宣州丘判官

憲署游從阻。平臺道路賒。喜君馳後乘。於此會仙槎。緩酌遲飛蓋。微吟望綺霞。相迎在春渚。暫別莫咨嗟。

北使還襄邑道中作九月三十日

九月三十日。獨行梁宋道。河流激似飛。林葉翻如掃。程遙苦晝短。野迴知寒早。還家亦不閑。要且還家了。

禁中新月

今夕拜新月。沉沉禁署中。玉繩疎閒彩。金掌靜無風。節換知身老。時平見歲功。吟看北墀暝。蘭燼墜微紅。

觀吉王花燭

王門嘉禮萬人觀。況是新承置醴歡。花燭喧闐丞相府。星辰搖動遠游冠。歌聲暫闕聞宮漏。雲影初開見露盤。帝里佳期頻賦頌。長留故事在金鑾。

碁賭賦詩輸劉起居矣

刻燭知無取。爭先業未精。本圖忘物我。何必計輸贏。賭墅終規利。焚囊亦近名。不如相視笑。高詠兩三聲。

春盡日游後湖贈劉起居劉時方燒藥

今朝湖上送春歸。萬頃澄波照白髭。笑折殘花勸君酒。金丹成熟是何時。

送察院李侍御使廬陵因寄孟員外

繡衣乘驛急如星。山水何妨寄野情。肯向九仙臺下歇。閑聽孟叟醉吟聲。

後湖訪古各賦一題得西邸

南朝藩閫地。八友舊招尋。事往山光在。春晴草色深。曲池魚自樂。叢桂鳥頻吟。今日中興運。猶懷翰墨林。

送德邁道人之豫章

禪靈橋畔落殘花。橋上離情對日斜。顧我乘軒慙組綬。羨師飛錫指煙霞。樓中西嶺眞君宅。門外南州處

士家。莫道空談便無事。碧雲詩思更無涯。

送陳祕監歸泉州

風滿潮溝木葉飛。水邊行客駐驂騑。三朝恩澤馮唐老。萬里鄉關賀監歸。世路窮通前事遠。半生談笑此心違。離歌不識高堂慶。特地令人淚滿衣。

又聽霓裳羽衣曲送陳君

清商一曲遠人行。桃葉津頭月正明。此是開元太平曲。莫教偏作別離聲。

又題白鷺洲江鷗送陳君

白鷺洲邊江路斜。輕鷗接翼滿平沙。吾徒來送遠行客。停舟爲爾長歎息。酒旗漁艇兩無猜。月影蘆花鎮相得。離筵一曲怨復清。滿座銷魂鳥不驚。人生不及水禽樂。安用虛名上麟閣。同心攜手今如此。金鼎丹砂何寂寞。天涯後會眇難期。從此又應添白髭。願君不忘分飛處。長保翩翩潔白姿。

徐騎省集卷第六制一

保寧王制

南昌王制

張居詠制

馬希崇舒州節度使制

馮延己加特進制

林仁肇浙西節度使制

鄧王加司空制

上太后尊號制

徐運授太子太保制

朱業江州節度使制

朱業宣州節度使制

劉從效檢校太師制

嚴續除司空制

改封江王制

謝庠加特進制

鄭王加元帥制

朱業加中書令制

馬在貴加官制

游簡言平章事制

保寧王制

門下。昔先王聰明時憲。文質載周。親親之義。莫之或改。乃知封建之重。宗社攸賴。友愛之美。風教攸先。寅奉舊章。敢忘循舉。二十弟某。稟質冲粹。慎德孝恭。出言有章。好學不倦。故我文考。慈訓備隆。而能踐修嘉猷。惠迪前哲。卓爾令器。時惟老成。粵予眇冲。肇當纘服。賴貽謀之啓後。仰垂鑒之在天。尙念多艱。懼弗克

荷是用陸懿親以祐涼德。班宗彝以懷萬邦。錫爾以山川。表爾以車服。師長之任。申而寵之。敦敘之恩。於是乎在。於戲。苴茅侯社。禮莫縟焉。連華棣萼。親莫昵焉。履信思順。可以無悔。尊師重道。可以多聞。盡愛敬之奉親顏。極惠和以厚宗室。勿忼勿墮。有初有終。服我訓辭。永光懿烈。可。

南昌王制

門下昔西周之分陝服。則曰風聲所存。南朝之治揚州。則曰本根攸寄。非親賢碩望。不足以表東夏。非輔相重位。不足以副具瞻。天下爲公。百王不易。肆予敷命。匪敢有私。長子某。敦信厚之風。秉孝恭之德。允迪前烈。率由生知。自剖麟符。往綏淮甸。尊敬師保。奉行詔條。有所問而不敢。知爲善之最樂。東楚之俗。向風而安。時以爲能。朕亦自慰。夫陟明賞善。有國大典。苟得其所。雖親何嫌。是用特就留臺。寵開相府。崇貴之義。儀制存焉。噫。爲政無他。勤則有繼。舉德甚易。終之實難。無以安佚自居。而忘夙夜之戒。無以驕貴自負。而忽藥石之言。治亂盛敗。則有先聖之遺經。憲章文物。則有中朝之成式。諮訪佩服。身先行之。敬哉慎哉。無忝多訓。可。

張居詠制

門下昔在先王。任賢尙齒。出將入相。所以任賢也。尊師重傅。所以尙齒也。況乎擇藩屏之寄。膺輔導之求。高步承華。誕揚師訓。克堪其選。我有人焉。某負貞幹之材。稟純厚之德。亟更庶尹。歷事累朝。昇元始基。賴其獻納。故陟鸞臺之位。爰立作相。保大踰歲。藉其綏懷。故委龍節之權。受賑于社。懋乃嘉績。叶于朕心。嚴邦政成。輯瑞來覲。方圖位著。爰得僉諧。而昔自故相。已嘗爲保。重煩耆德。俾傳東朝。尊敬之儀。典章斯在。

噫。昔者叔孫疏廣。善於其職。克繼來躅。可不慎哉。勉著嘉猷。以副時望。可。

撫州節度使馬希崇除舒州節度使制

門下。姬周同德。曹叔封於王畿。炎漢功臣。楊僕恥居關外。是知藩翰之重。所寄必同。遠近之差。以斯爲寵。我有成命。爾其敬聽。某識度恢弘。風猷茂遠。家勳蓋世。不估貴以驕人。多難薦臻。每忘身而濟物。智能適變。仁足亢宗。來庭不俟於七旬。保境豈徒于五郡。劉總舉全燕之地。弘正輸雄魏之邦。故實攸存。懋章何慙。是用加之。飲賜尊以上公。陟負靈之崇資。委建牙於列鎮。虛襟而見前席。與談言語。有章威儀。可則既叶。跂予之望。且堅戀闕之心。藹爾誠明。形于表疏。愈歎忠勤之操。宜更節制之權。而永泰全軍。舒庸舊國。地望無慚于汝水。封疆密邇于王城。用諧日近之言。尙資河潤之福。俾迺新命。往受中權。於戲。大義昭彰。朝恩渙汗。千里之地。可以觀政。三軍之帥。可以圖功。永樹風聲。無忘多訓。可。

太弟太保馮延己落起復加特進制

門下。爵賞之行。憲章斯在。急於務則適其變。終其事則歸于禮。將軍重位。足以奪孝子之情。特進崇班。自昔冠諸侯之上。申爲懋典。允屬公才。具官馮延己。儒雅積中。機神應物。風雲夙契。魚水冥符。處多士之朝。副具瞻之望。及移相府。出鎮臨川。封境綏懷。聲猷茂遠。頃集蓼莪之痛。俯從金革之權。露冕有誠。輯瑞來覲。疇咨舊德。保佑東朝。比疏傅之在前。允諧擬議。類魯公之拜後。適就遷除。俾進崇階。庶申優寵。於戲。將相之重。資爾以惟聖。儲兩之尊。繫爾以成德。知人則哲。予用弗疑。勉揚令圖。無忝多訓。可落起復冠軍大將軍。加特進。餘並如故。

林仁肇浙西節度使制

門下。建侯樹屏。有國之攸先。崇德報功。百王之所共。斯爲令典。予敢忘之。鎮海軍節度。浙江西道觀察等使。留後。金紫光祿大夫。檢校太傅。濟南縣開國伯。食邑七百戶。林仁肇。稟此星芒。鬱爲時幹。鼓鞞之氣。指勅敵而愈高。金石之心。因時艱而益壯。故能灼殊功於南部。夷多壘於東門。元戎所行。績用昭著。及總留務。于浙之西。成師著無犯之威。察俗有惟清之化。屹爾京口。殷然長城。予惟汝嘉。俾正藩守。因爾才略。樹之風聲。雄師大邦。所以屏王室。尊官盛典。所以懋官成。惟惠惟和。有嚴有翼。使予無東顧之慮者。鑿其賴焉。克堅一心。以永百祿。可依前檢校太傅。兼御史大夫。使持節。都督潤州諸軍事。潤州刺史。充鎮海軍節度使。浙江西道管內營田觀察處置等使。功臣散官。勳封如故。

紀國公封鄧王加司空制

門下。宗子維城。良臣維聖。故有王社之數。鼎司之權。親親賢賢。古之大訓也。我有成命。時維至公。第七子某。識度淹通。器質清粹。就傅之歲。威儀不佞。出閣已來。聞望所著。向由邦政。入踐中樞。內形將順之規。外盡彌綸之業。人知親附。俗待和平。邦家之基。斯實攸賴。今六駢巡守。萬乘啓行。方資扈蹕之勤。宜有疇庸之典。畫南陽而錫壤。掌邦土以命官。併加馭貴之資。益峻具瞻之望。於戲。義極君父。愛敬之道兼焉。任綜文武。弛張之政存焉。爾其佩服前訓。咨詢舊德。勿驕勿惰。有初有終。永樹風聲。以保元吉。

上太后尊號制

門下。膺昊穹之眷。荷宗祏之重。何嘗不嚴奉慈訓。聿循孝理。所以化成天下。弘濟多艱。親親尊尊。教之大

者也。況沈潛之德，不顯于國風。輔佐之勤，光昭於王業。今遺恩累洽，靈鑒在天。俾予小子，恭踐大寶。恩弘任奴之烈，紹恢三五之基。彝章盛典，敢忘祇奉。宜上大行國主皇后尊號爲太后。

太子少傅徐運授太子太保制

門下崇德尙賢，推恩錄舊。茲惟令典，允屬時英。予以眇躬，嗣膺丕業。威藩之望，羽翼之恩。敢忘寵章，用光師道。某清直稟氣，忠厚爲資。實戚里之所宗，歷累朝而見重。敬慎卽保家之主，恭勤無出位之思。爰自京口臨藩，克貞師律。鸞臺作相，足厚時風。留侯旋務於退身，疏受更聞於稱職。純誠益著，雅望攸高。昨者預奉綴衣，導揚末命。忠貞以濟，典禮無違。顧惟冲人，懼德弗嗣。當此承祧之日，益堅重傅之懷。是用就改崇資，仍加食賦。於戲班崇一品，秩視三師。苟非賢臣，孰克臻此。永期納誨，無替令猷。可。

朱業江州節度使制

門下古者諸侯之賢，入爲鄉士。上公之寵，出爲方伯。故中外之任，踐更攸宜。我有勳臣，咸曰名將。藩維宿衛，夾輔冲人。肆予仰成，是用申告。某家傳武略，天賦純誠。名因勇聞，位以材致。周旋數紀，佐佑累朝。由裨將以統元戎，勳勞滋茂。自百城而登連帥，聲政洽聞。寵益盛而若驚，位益高而愈讓。予纂服之始，駿奔來朝。且堅戀闕之心，因處周廬之任。忠貞彌固，夙夜惟寅。輦下肅清，時乃之力。永言舊德，豈忘予懷。會九江元侯入奉朝任，中流之寄，非賢不居。是用輟蘭錡之權，付金符之重。往分巨屏，更佇殊庸。噫，簡師旅以壯軍聲，明紀律以宣庶政。可畏可愛，富之教之。是汝所長，無替前效。陟明有典，厥惟欽哉。可。

朱業宣州節度使制

門下車服之寵。所以報功。藩閫之權。所以觀政。茲爲令典。允屬信臣。某智勇克兼。忠貞特立。秉武經而致用。服戎政以居多。誠悃洞然。終始一揆。及分符出守。持節主留。恩信並行。詔條畢舉。肅連營而無犯。視赤子以如傷。所臨之方。去思仍在。向鍾多難。入衛京師。憂國忘家。令行禁止。羣情自固。戎事以寧。肆予仰成。時乃之力。今疆場俯靜。蒸黎未康。宣城奧區。國家巨屏。方當謀帥。是用策勳。資果毅以壯先聲。假惠和而蘇疲俗。付爾節鉞。往鎮撫之。惟爾慈儉。足以安民。剛正足以行法。必當望風自理。投刃皆虛。宜弘寬大之規。以集中庸之德。勉茲具美。永振嘉猷。可。

泉州節度使劉從效檢校太師制

門下望高於朝。則享師保之任。惠加於物。則進土田之封。所以啓佑冲人。藩屏王室者也。我有寵數。屬於元侯。某山岳儲精。星芒稟異。挺全才而應用。激大義以致身。而自際會先朝。奮揚奇策。靜一方之多難。越萬里以來庭。故得倚作藩宣。誓之帶礪。而能恩威洽著。紀律修明。戎政有經。理聲日遠。黎獻有不欺之頌。朝廷無南顧之憂。茂績忠規。古難其比。粵子眇質。嗣德弗明。賴我友邦。越乃賢帥。推誠翼戴。克荷景靈。渙汗之恩。惟恐不至。是用增以井賦。崇爲太師。美號峻階。併伸殊渥。噫。乞言之禮。可以觀德。殿邦之寄。可以樹勳。勉揚令圖。永錫繁祉。可。

右揆嚴續除司空兼門下侍郎平章事制

門下天作司牧。必生丞弼。非君臣同體。道則不明。非律呂交感。功則不濟。粵子眇質。負荷景靈。不有時賢。豈戴多難。敬若先意。疇茲舊臣。某純粹炳靈。惠和成性。襲台鼎之慶。連肺腑之親。歷奉累朝。亟更庶尹。憂

國家之事。知無不爲。經夷險之間。中立不倚。言必由於忠信。行必自於誠明。勞而弗矜。謙以自牧。先朝鑒其誠志。任以腹心。頃當巡守之初。俾貳主留之寄。盡規竭慮。夜思晝行。京輔以寧。時乃之力。及奉揚末命。以佑冲人。送往事居。禮無違者。忠勳茂績。人無閒然。今二后在天。萬物思理。予方乃眷。民亦具瞻。是用命作司空。倚爲左相。兼國史樞機之任。進升階食賦之資。豈曰寵章。是同憂責。嗚呼。受遺作弼。厥惟艱哉。爾其崇遠大之謨。布簡寬之政。詢箴諫之士。塞便佞之言。滿假自賢。則其智益蔽。虛懷接物。則其猷益光。念茲在茲。以底於道。可。

信王改封江王加中書令制

門下唐堯之聖也。旣以序九族爲先。漢祖之隆也。亦以守四方在念。矧予小子。弗堪多難。實賴羣后。共康蒸民。粵有賢侯。亦在諸父。庸勳表德。敢或愛焉。第二十叔某。天賦機神。生知禮樂。肇開朱邸。則孝敬之道。升聞。出建齋壇。則威和之風。遠振。況五嶺之際。俗雜地雄。吏服其明。民安其教。煦如冬日。隱若長城。孤以不明。祇奉不御。今上咨乃庶尹。至于友邦。師保之規。旣自家而刑國。蓼蕭之澤。當由親而及遠。是用正左相之位。崇三司之儀。增賦進封。併伸寵數。於戲。昔我文考。並建懿親。藩屏所繫。社稷是衛。燕翼之旨。可不勉歟。敬佇嘉猷。以永繁祉。可。

謝匡策加特進階增食邑

門下王者均慶推恩。無遠弗及。矧有舊德。居然將臣。方申求舊之懷。豈悛疇庸之典。某素推勇氣。夙負壯圖。立功旗鼓之閒。發跡風雲之會。出分符竹。入守關防。翼衛天門。董齊蘭錡。咸著在公之績。可觀適用之

材享此期頤。保茲優逸。臻富壽之福。全終始之名。比之古人。不可多得。孤以眇質。嗣守慶基。方資無改之規。式重後凋之節。俾升階序。仍進戶封。於戲。二品崇階。三朝貴仕。人臣寵祿。何以過斯。勉荷朝恩。永揚令問。可。

鄭王加元帥江寧尹制

門下睦親尊賢。王者之盛業也。中台上將。有國之重任也。是必疇咨公議。稽若前經。舉而行之。謂之令典。我有愛弟。時惟宗英。論道經邦。勳德滋茂。肆予有命。允叶厥中。某挺命世之才。秉生知之哲。機神穎邁。器宇冲深。自寶玉分封。緇衣授職。內蘊清明之德。外宣寅亮之功。持謙下之資。以親附百姓。體儉勤之節。以表率時風。學問該通。每諮詢而自益。忠誠孝悌。常將順以無違。昔者三后叶心。十亂同德。允茲古義。非爾而誰。粵予眇躬。惠迪先訓。獲守大業。汔臻小康。實繫手足之賢。以集股肱之寄。無德不報。雖親何嫌。是用誕舉渥恩。就加名數。夫元帥者。民之司命。中樞者。國之宗臣。尹京所以表則四方。增封所以藩輔王室。毗倚之重。何以加斯。於戲。義兼國家。權總文武。動靜之際。治亂繫焉。所先者在乎躬諸。所慎者在乎聽受。清如止水。故是非之說不可欺。平如懸衡。故善惡之徵不能惑。有犯無隱。非好異也。不違如愚。非苟合也。惟公是務。惟道是從。所務必老成。所親必端士。服茲多訓。永樹英聲。可。

朱業加中書令宣州節度使制

門下予嘗顧藩屏之重。思黎獻之康。欲使折衝之威。迭行於封略。惠和之化。普及於方州。既報政之屢聞。乃改轅而敷寵。咨爾賢帥。聽吾話言。某武毅致身。忠厚成性。踐更事任。昭著勳庸。倚若金湯。誓之帶礪。自

持使節出鎮中流。恢簡易之風。立嚴明之令。仁而有斷。吏不敢欺。故使萬井阜安。連營輯睦。藹爾殿邦之績。叶予進律之文。率是通才。何適不可。予以宣城列鎮。旬服奧區。久闕元戎。未孚王化。藉爾有成之政。副吾共理之懷。右相之崇。宰司所重。申爲殊獎。以極朝恩。於戲。有惠於民。有功於國。中台貴位。累鎮劇權。苟非純誠。何以臻此。爾尙守益恭之節。勵匪懈之心。永懋嘉猷。以光時望。

馬在貴加官制

門下盡忠于國者。其報深。有勞於事者。其澤厚。方切念功之義。仍當均慶之初。不有寵章。孰光懋典。馬某深沈有勇。質重寡言。少推學劍之能。早識擇君之舉。自策名旗鼓。受任疆場。履險身先。有功不伐。向分符竹。實制要衝。化行於富庶之時。節著于艱難之際。純誠懿績。時論多之。入總禁營。遂成優秩。富壽之福無闕。敬慎之風愈高。予惟汝嘉。思有以勸。屬此推恩之際。俾升掌武之資。噫。忠勳旣明。寵祿亦至。終始之義。今古所高。勉揚令猷。以享元吉。

游簡言左僕射平章事制

門下昔在明王。膺圖嗣統。雖復格天光表。繼文下武。猶曰實相以濟。又曰克艱厥臣。矧惟寡昧。疇咨庶尹。若乃承弼之重。毗倚之隆。詢於具瞻。敢或輕授。游某世濟文雅。挺生公器。中興之始。卽爲辭臣。重熙在運。亟更近署。忠爲令德。實浮於名。藹然直聲。允洽時望。先皇帝省方展義。分命羣司。藉爾重臣。輔予小子。直躬無避。正辭不諂。翊從行闕。克申其勞。至於受命交兵之閒。抗節履危之際。由義以濟。知無不爲。此皆古之所以爲艱。予之所以嘉尙者也。開歲出於獨斷。命長南宮。議者但高其盡公之誠。未許其理劇之用。遂

能正身而令。當官不回。厲風霜之威。以糾其慢。堅夙夜之節。以率其勤。請託不行。紀綱自舉。羣議由是咸伏。六職以之孔修。風雨不渝。始終一致。實爲國器。想見古人。而躬親簿領之間。遽成勞勩。從容廟堂之上。未盡謀猷。疇庸之典。予所多愧。是用命作左相。陟茲鸞臺。進金紫之崇階。典圖書之祕府。勳爵并賦。併示寵名。於戲。釋細務足以導節宣之和。參大政足以暢彌綸之業。緊爾致君之效。成我知臣之明。往惟欽哉。無假多訓可。

徐騎省集卷第七

李匡明御史大夫制

劉崇俊起復制

王彥儔加階制

趙丕御史中丞制

杜昌業江州制

魏王宣州大都督制

高逸休壽州司馬制

馮延巳兼起居郎閣居常兼起居舍人制

查文道知雜制

劉彥貞觀察使制

刁紹工部尙書制

李貽業宗正卿制

蕭儼祠部郎中制

李匡明御史大夫制

宋齊丘知尙書省制

馮延魯江都少尹制

李匡明舒州刺史制

陳褒制

招討妖賊制

王崇文等並本州觀察使制

李萼節度副使制

王仲連米崇楷等制

張義方勤政殿學士制

外祖母追封制

張義方左常侍制

陳繼善工部侍郎制

陳景進工部郎中制

敕御史所職實爲紀綱。百官之邪。得以糾正。衆目不理。得以舉明。使朝廷凜然。罔懈於位。茲朕之攸賴。而和庶政也。向者治刑不暇。官業靡申。遂用省其訊鞠之煩。委以澄清之寄。庶循理本。諒在得人。通議大夫守吏部尚書柱國。賜紫金魚袋。隴西縣開國子。食邑五百戶。李匡明。學術優深。德望清重。可副丞相。以鎮時風。中散大夫守右常侍判御史臺事柱國。賜紫金魚袋。趙丕。自掌憲司。克勤於職。而侍從之列。朝夕論思。期於弼違。宜在專任。今以庶獄移從理官。可歸騎省。以備顧問。各踐乃位。允期懋功。匡明可御史大夫。不可守本官。罷判臺事。

宋齊丘知尚書省制

敕兩掖南宮。樞機之地也。元台上公。股肱之寄也。況親賢在位。中外具瞻。式敘彝倫。爰申明命。夫真宰之重大政。咸歸出納。王言固當綜錄。侍中壽王。某向兼南省。未叶舊章。宜罷判尚書省。便領中書門下兩省事。太保齊丘。雖道在經邦。方資納誨。而事殷會府。兼藉允釐。可知尚書省事。大元帥齊王。總納百揆。以貞萬邦。凡百謨猷。悉關獻替。其三省事。並取齊王參決。朕允思恭已。以荷景靈。用一國之才。敢辭則哲。成天下之務。庶叶無爲。方俟沃心。豈勞多訓。

劉崇俊起復制

敕匡時啓運功臣。威邊將軍。濠州都團練觀察處置等使。光祿大夫。檢校太傅。使持節濠州諸軍事。守濠州刺史。渦口兩城使。兼御史大夫。上柱國。彭城縣開國子。食邑五百戶。劉崇俊。濠上觀風。克昭祖服。光祿大夫。檢校太保。持節常州諸軍事。常州刺史。兼御史大夫。上柱國。劉佑。晉陵守土。允茂政經。而皆夙練軍

聲。習知邊要。方深朝寄。遽屬內艱。永言護塞之權。宜舉墨綬之制。俾加寵命。改授階資。勉抑孝心。以從王事。並可起復雲麾將軍。餘如故。

馮延魯江都少尹制

敕。朝議郎。行尚書虞部員外郎。武騎尉。賜緋魚袋。馮延魯。頃者。尹縣留都。首變田制。克勤于事。以利于人。自歸朝行。已踰周歲。如聞秦庶。未甚樂成。矧彼浩穰。所宜均一。是用假爾亞尹。往畢舊功。其在條理得中。厚薄無撓。俾乃比屋。咸遂所安。止於刑讞之繁。亦以公平爲用。務令稱職。無忝加恩。可以本官判江都少尹公事。

王彥儔加階制

敕。王者旌董戎之功。重殿邦之任。疏寵之命。因事有加。所以勸能而佇效也。佐時衛聖。功臣建威將軍。康化軍節度。池州觀察處置等使。起復雲麾將軍。檢校太尉兼侍中。使持節。池州諸軍事。池州刺史。上柱國。太原郡開國侯。食邑二千戶。王彥儔。作鎮方隅。克揚威信。師謀不撓。庶政有常。肅爾先聲。宣我朝命。向者起于哀制。授以崇階。禮適就於變除。寄方隆於藩屏。俾從增邑。式示推恩。勉揚令圖。無替丕績。可光祿大夫。加食邑一千戶。餘如故。

李匡明舒州刺史制

敕。通議大夫。守御史大夫。柱國。賜紫金魚袋。隴西縣開國子。食邑五百戶。李匡明。向緣時望。命長憲臺。旣歷歲時。亦聞敬慎。方佇茂績。以光大猷。遽覩拜章。固辭重位。俾全寵遇。宜輟準繩。尙賴分憂。無忘守節。可

檢校司徒兼御史大夫使持節舒州諸軍事守舒州刺史充本州團練使餘散官賜邑如故

趙丕御史中丞制

敕朕以御史未理庶政靡清思得良臣副吾慎選中散大夫守右散騎常侍柱國賜紫金魚袋天水縣開國子食邑五百戶趙丕再履憲署欽若攸司迭爲侍臣匡予不及俾授格心之寄宜膺獨坐之權夫才識兼通然後能得大體公正無黨然後能肅百司糾正失中則紀綱撓顧避不言則職業墮爾其欽哉無辱朕命可御史中丞餘官勳賜爵邑如故

陳褒制

敕出身事主忠之效也以年致政古之制也淳風將振斯道復行朕用嘉焉宜示優寵宣徽使某官陳褒以敬慎之操俊乂之才輔予潛九之初叶我司聰之寄出納惟允佐佑盡規勤勞王家數紀於是永念耆德方注虛懷遽從知退之言亟有縣車之請雖面諭難抑豈舊功可忘而司衛列卿秩崇務簡俾退辭近侍猶在立朝勉迴高尚之心式厚君臣之義可衛尉卿

杜昌業江州制

敕十連之帥百城之長藩屏王室其揆一也隨時省置何常之有焉朕祇荷慶基懋循古訓迭用舊德以頒詔條交修予違踐更爾位肆因大慶式舉朝章金紫光祿大夫上柱國京兆縣開國子食邑五百戶杜昌業始以明敏肅恭服勞近密出納惟允固慎無違先帝用能委之邦政明九伐以恢王略堅一心以迪大猷六事允諧時乃之用將圖爾效且盡其才朕以中流之寄九江爲重控五嶺之衝要鎮百蠻之驛騷

屬子相臣。入總樞務。惟爾公望。克嗣其勳。是用輟夏官之崇。膺外臺之職。尙虛使節。以便理戎。其往慎乃攸終。遵我成憲。簡易以申令。恩信以卽師。惟惠惟忠。無忝朕命。依前檢校太保兼御史大夫。使持節江州諸軍事。江州刺史。本州團練觀察使。散官勳如故。

招討妖賊制

朕聞先王之靜人也。四夷咸賓。尙先慎德之誠。一夫不獲。則軫納隍之心。是故導以仁聲。浹之惠澤。猶不可化。遂威有刑。昨者嶺表遺氓。聚爲寇盜。違其上命。犯彼戰鋒。而敢乘我國哀。伺我邊隙。侵軼我封部。誘惑我黔黎。保據谿山。肆爲剽掠。朕以肇膺丕業。先洽德音。矧彼狂徒。皆吾赤子。弗忍盡殺。冀其自新。所以雖命師徒。且令招撫。而凶愚不革。結聚愈繁。暴害吏民。攻圍縣邑。一至於此。其能久乎。國有常刑。吾又可愛。仍聞衆軍致討。累有殺傷。平人無辜。暴骨于野。輿言及此。永惻朕心。況常賦及期。三農失業。特申矜恤。更示懷來。虔州今年應屬省租稅。並可放免。仍委諸縣長吏。安存編戶。宣示國恩。防護警巡。勿令擾動。妖賊張茂賢。首爲劫盜。罪在難容。若能束身歸降。亦與洗滌收錄。如聞命之後。因循未賓。卽令招撫諸軍。分路進討。如所在百姓。及徒黨中有能擒斬茂賢者。不計有官無官。並賜三品賞錢一萬貫。莊一區。並已分產業。並永放苗稅差役。傳之子孫。此恩不改。若能同心計畫。及數內。或擒獲得稱王稱統軍軍使之屬。并次第首級。止於一隊。一寨頭領者。卽約此例等降優賞。放免苗稅差役。或能自出身歸投。有田畝者。各令歸業。仍放三年租賦。無田者。委本道錄奏。各與逐便優穩安排。及重加賞賚。如凶惡不迴。爲諸軍擒獲者。不問人數。卽便處斬明申威信。汝自擇焉。諸軍將士。有能斬獲茂賢。殺戮支黨。官賞之制。並越常規。予不

食言爾宜自勵。朕永惟止殺。許彼悛心。且妖賊等燒毀倉儲。蹂踐禾稼。聚食則資糧立盡。外取則穀實不收。進則大軍扼其前。退則領兵倚其後。況烏合之衆。本不同心。緩則苟避征租。急則各圖恩賞。函首來獻。翹足可期。咨爾羣黨等。自保家鄉。共思寧息。與其碎身於鋒刃。孰若樂業於閭里。咨爾將士等。各奮驍雄。早成功績。與其暴師於境上。孰若受賞於轅門。體我深懷。速清邊徼。布告本道。咸使聞知。

魏王宣州大都督制

敕。惟先王體國經野。建邦設都。並立懿親。以藩王室。嘗畿服之地。則任輔翊之重。有戎昭之績。乃增督護之威。是以王略恢而諸侯和矣。宣城重鎮。陪京之南。制天險之津梁。據三楚之襟帶。境環千里。邑聚萬民。我朝以來。戎寄尤切。太師魏王。受鉞先帝。建牙是邦。宣導皇風。董齊師律。生殖茂途。禮讓興行。時惟懋功。叶此時論。粵朕小子。懼德弗堪。允孚大猷。其在叔父。雖師保之命。已迪茂章。而刺舉之名。未極公望。宜升大府。式壯中權。於戲。立愛之恩。予不敢怠。敬保之義。王其謂何。勉啓乃心。以底於道。可升宣州爲大都督府。以魏王爲宣州大都督府長史。餘並如故。仍編入冊命宣降。

王崇文劉仁瞻張鈞並本州觀察使制

敕。守邊之要在乎崇垣。輸而重威令也。任能之方在乎因善政而加寵秩也。懋迪斯道。時惟令猷。金紫光祿大夫。檢校太傅。使持節吉州諸軍事。守吉州刺史。兼御史大夫。上柱國。太原縣開國男。食邑三百戶。王崇文。儒雅飾身。威猛宜用。入奉旅賁之列。出申刺舉之能。光祿大夫。檢校太傅。使持節袁州諸軍事。守袁州刺史。兼御史大夫。上柱國。劉仁瞻。沈厚有謀。明斷能理。護塞之略。歷任弗遷。光祿大夫。檢校太傅。使持

節歙州諸軍事。守歙州刺史。兼御史大夫。上柱國。清河縣開國子。食邑五百戶。張鈞。踐履班行。昭著聲聞。守土之效。一心靡違。而皆克樹。乃勳。誕揚我武。協比成績。勤勞王家。朕以眇躬。欽承鴻業。實賴良將。綏爰四方。肆于布慶之辰。而有加等之命。就升使職。並駕兼車。仍崇馭貴之封。增立將軍之號。併申寵寄。尙示克終。無懈乃誠。以底於理。陟明有典。予不敢忘。崇文可光祿大夫。依前檢校太傅。使持節。吉州諸軍事。守吉州刺史。兼御史大夫。充本路都團練觀察處置等使。進封開國子。食邑五百戶。仍賜號威勇將軍。散官。勳如故。仁瞻可。依前檢校太傅。使持節。袁州諸軍事。袁州刺史。兼御史大夫。充本州團練觀察處置等使。封彭城縣開國男。食邑三百戶。仍賜號貞威將軍。散官。勳如故。鈞可。依前檢校太傅。使持節。歙州諸軍事。守歙州刺史。兼御史大夫。充本州都團練觀察處置等使。進封開國伯。食邑七百戶。仍賜號武威將軍。散官。勳如故。

高逸休壽州司馬制

敕。朝議郎。行袁州司馬。賜緋魚袋。高逸休。立身謹行。聞於朝廷。負才好謙。老於州縣。先皇獎異。錫以銀章。優秩自居。十數年矣。其子煇。秉乃直筆。爲吾史臣。適當均慶之初。先有腰金之命。而愛敬之切。發於中誠。乞循迴授之文。庶遂顯親之義。辭旨懇激。覽之惻然。俾允所陳。且成其美。仍加寵秩。以就縣車。噫。望族舊人。惟爾而已。覩本朝之恢復。拖紫綬以優游。孝子克家。耆年致養。茲惟盛事。足慰爾心。可檢校尙書水部員外郎。壽州都督府司馬。致仕。賜紫金魚袋。

宣州營田副使兼馬步都指揮使李萼可節度副使罷軍職

敕王者官人之旨。必褒賢能而均勞逸也。列辟垂憲。予弗之忘。某官李萼。夙負壯圖。少爲裨將。餘勇可賈。有勞不矜。泗水剖符。邊候寧晏。宣城從帥。連營輯和。而將領之權。久煩耆德。毗贊之任。未極初筵。俾援尙齒之文。就疏加等之命。勉承朝獎。無替忠誠。可。

駕部郎中馮延己兼起居郎屯田郎中閻居常兼起居舍人

敕朕凝旒端冕。以臨萬邦。而左右史臣。執簡近侍。言動得失。注記無回。故布政罔不臧。承化罔不若。惟聖攸賴。慎柬難虛。某官馮延己。君子之儒。多文爲富。發之爲直氣。播之爲雄文。某官閻居常。行願樞機。學臻精博。得廷臣之體。多長者之言。而皆踐彼周行。奉予元子。或奏記有翩翩之譽。或罇壘多疊疊之談。藹然清風。叶此時望。是宜兼領郎署。咸躋掖垣。於戲。君舉必書。朕敢忘乎。恭已無德不報。爾忽怠於懋官。各振公才。副茲多訓。可。

侍御史王仲連可起居舍人監察米崇楷可右補闕

敕朕嘗思古先哲王。所以致理區中。垂憲萬祀者。蓋有史臣以記其過。有諫官以弼其違。或面諍於庭。或舉書於冊。故政令所及。罔不化成。而怠惰之心。無自入矣。將振斯典。必求其人。某官王仲連。爰藉才能。亟參秩序。正己而率下。盡節而向公。某官米崇楷。早負時名。尋升閭籍。佩韋以臨事。慎獨以修身。而並服豸冠。或司綱憲。或立朝多按劾之奏。或典刑有欽恤之心。叶我懋草。宜升右掖。勉修官業。以副簡求。直筆正言。無有所諱。可。

水部員外郎判刑部查文徽可侍御史知雜

敕。秦漢以御史掌四方之記。我朝以雜端正百官之邪。其名則同。所職實重。副是慎選。其惟通才。某官查文。懃克負美名。早從交辟。尋陟郎署。升爲王臣。法讞之難。俾其參決。而察情無不當。持論無不平。俾上絕濫刑。下知恥格。率是幹用。使持憲綱。在能振舉霜威。肅清朝序。爾其直躬而處衆。正色以當官。糾繆繩愆。無或顧避。陟明有典。可不懋哉。可。

左常侍張義方可勤政殿學士

夫珥金貂。直騎省。以備顧問。非不重也。而文學之選。宜又加焉。某夙號名儒。久登華貫。臺閣踐歷。聲實相符。侍極而來。當官無撓。朕祇奉先烈。勤求大中。諮訪闕疑。藉爾稽古。特加近職。以示開懷。順美彌遠。無忘謏直。

楚州刺史劉彥貞可本州觀察使

敕。懋官之旨。非增秩不足以示寵。行邊之任。非進號不足以申威。施之其人。是爲合典。某寬厚得衆。深沈有謀。克荷家聲。累膺朝寄。百城觀政。三郡底寧。而長淮上游。地雄師衆。刺舉之職。未極當官。廉問之權。實諸僉議。因是敷寵。更佇厥成。噫。千里之長。三軍之帥。任遇斯重。勳庸是圖。爾其敬哉。無墮乃力。可。

外祖母追封某國夫人

敕。昔帝欽明。義先敦序。九族旣睦。萬邦以懷。矧乃推自業之恩。疏漏泉之澤。有光茂典。式表孝心。外祖母李氏。麗德坤儀。垂訓內則。儲慶漸生民之什。顯魂開石窋之田。肆予眇躬。弗忘祇稟。而嗣膺鴻業。若涉大川。奉長樂以自寧。過濯龍而軫念。追遠之數。宜有加焉。是用進啓大邦。載崇懿號。昭示戚里。知予永懷。可。

大理卿判戶部刁紹可工部尙書

敕周禮六卿皆有軍政。漢制尙書奏事禁中。歷代親重也。如是。今予有命。亦屬其才。某官刁紹。始以幹能。屢參煩劇。向由卿寺。踐歷省垣。制國用而無違。登生齒而有羨。丕顯成績。是爲才臣。今朕祗嗣丕圖。永懷司會。俾率諸吏。表於南宮。爰陟冬卿。式申慶澤。爾其欽承彝訓。修舉官司。無忘克終。以忝殊渥可。

兵部侍郎張義方左常侍制

敕某珥貂服冕。侍從獻替。騎省之任也。必以儒學大僚。端方名士。入膺茲選。允叶茂章。而爾義方。可謂能矣。踐歷臺省。抑揚聲實。純誠直道。造次靡忘。今予眇躬。嗣守丕訓。弗惠厥德。思聞讜言。乃均慶恩。命爲常侍。從容左右。敬佇嘉猷。爾其念哉。無渝乃節可。

太常少卿李貽業可宗正卿

敕先王睦親也。必求宗姓之賢者。朝行之名臣。爲之表儀。序其昭穆。今我有命。時惟舊章。某官貽業。學以潤身。文以行禮。貞以幹蠱。直以事君。有一於此。是可嘉尙。矧備四者。非所謂名賢乎。今朕嗣續丕基。敷遵慶澤。是用選於掌樂。爲我司屬。使吾宗室有信厚之風。非貽業而誰。勉修厥官。無忝多訓可。

左司郎中陳繼善可工部侍郎

敕國有六職。百工預其一焉。我朝已來。其選尤重。矧自尙書郎而擢拜者。不其鮮歟。某官陳某。以幹蠱之才。克御今上之美。亟更庶尹。遂歷省垣。委之以繁雜之務。而事益明。兼之以權筭之司。而利不匱。弘羊心計。亦莫加焉。屬朕出震嗣圖。施令布慶。二卿之任。頗難其人。今以繼善爲之。爾其可以稱職。噫。大僚之體。存

乎簡易。興利之要在乎廉平。無渝乃誠。以撓吾法。可。

水部郎中判刑部蕭儼可祠部郎中賜紫

敕某官蕭儼。夫王者之爲政也。任能舉直。理刑懋功。如斯而已矣。今秋官卿佐皆闕。爾儼實專其司。定法察情。克舉攸職。切言直氣。屢聞於朝。靡私厥躬。何其愛朕之深也。方將圖效。適屬均恩。是用就升名曹。仍加命服。俾耀省闕。時予寵章。爾其念哉。無易乃心。無回乃行。決獄以寬。簡當官以公平。一心克終。予愼嘉汝。可。

屯田郎中李景進可工部郎中

敕某官李景進。昔漢館陶公主爲子求郎而不得。何者。非其人也。今汝景進。亦吾外戚。而謹愿儒雅。好學善言。久爲臺郎。頗副時望。故均慶澤。擢轉名曹。彼漢推公。而吾獎善。兩得其道。不亦宜乎。

此
页
空
白

徐騎省集卷第八

張援可司農卿制

潘處常可金部郎中制

景逵檢校司空制

鄭延樞可清江縣令制

閻度可江寧府參軍制

李景述可虞部郎中制

成幼文可主客員外制

喬匡舜可浙西掌書記賜紫制

顧彥回可浙西推官制

鮑濤可虔州判官制

韓熙載可兼太常博士制

高越可水部郎中制

高弼可元帥府書記制

方訥可東都留守判官制

李潯正授江都令制

高越可檢校水部郎中制

景廸可檢校左僕射制

艾筠可江都少尹制

馮偁可祕書省正字制

趙丕可司農卿制

袁特可浙西判官制

查文徽可樞密副使制

周弘祚可池州刺史制

閻居常可檢校司空制

張緯可句容令制

趙仁澤寧國軍都虞候制

孔昌祚可泗州刺史制

田霖可東都留守制

張師古可校書郎制

王崇昭可江西觀察衙推制

沈翽可大理司直制

李匡明可中書侍郎制

霍延祚可水部員外郎制

唐顯可監察御史制

馮延魯可勤政殿學士制

林廷皓責授制

告天地文

祭世宗皇帝文

太府卿張援可司農卿兼大理寺事

書曰。任官惟人。又曰。惟刑之恤。朕服斯道。因舉而行。某官張援。爲性端方。處衆和雅。貞亮足以幹事。哀矜足以得情。亟更攸司。弗易時用。因予有慶。期爾盡才。命爲大農。俾掌廷尉。於戲。庶獄之愼。不可忘也。單辭而行。不可爲也。平反伏念。夜思晝行。尙於措刑。體我求理。敬之哉。

權知江都令李潯正授

勅。四京令之重也。其選惟一。是必試可以進之。均慶以寵之。蓋欲慎厥官而安其政也。某官李潯。屢爲長吏。綽有能名。東夏之理。不易其操。事簡俗便。予甚多之。爰用加恩。俾從真授。勉欽朝獎。無懈乃心。可。

和州司馬潘處常可金部郎中

勅。先王之制官刑也。過無所隱。其肆大眚也。善靡有違。無私之義。於是乎在。某早服時望。亟更臺郎。子在東朝。列于賓席。旋貳廷尉。實奉邦刑。偶違伏念之言。遽貽一黜之命。今朕祇嗣丕業。誕敷慶恩。豈以職事之愆。遂忘罇俎之舊。是用召自近郡。陟於南宮。勉承寵光。以永無咎。可。

浙西判官高越可檢校水部郎中賜紫

勅王者之建藩輔也。必命重臣以臨之。又擇賢士以佐之。政成當遷。留而增秩。古之制也。高越以儒學淹雅。見稱於時。頃自南宮。直于東觀。筆削之言。方勵弓旌之禮。是求從事大邦。率多婉畫。有嘉令望。爰屬慶恩。俾假正郎。仍紆紫綬。服我加等之命。無懈畫規之心。

安陸郡公景遠檢校司空太府少卿

勅夫太上立德。其次親親。能兼之者鮮矣。惟是具美。屬於我朝。某孝友資身。貞幹爲質。守樞機而無悔。居富貴而不驕。藹然善聲。成此嘉器。朕肇襲丕業。廣覃慶恩。矧有名臣。近在宗屬。是用假以空土。列於亞卿。仍進崇階。併示優寵。於戲。行爲民則。爾其勿忘。愛克厥威。朕不敢尙。服我多訓。永揚令圖。

保定郡公景迪可朝散大夫檢校左僕射賜紫制

勅朕歷選列辟。見其睦親名器之難。必當慎簡。信不可私於其屬也。故我疏寵。務先推公。保定郡公景迪。靜惟端方。動必孝敬。佩師友之訓。成信厚之風。宗室之闕。闢望尤著。屬我嗣服之始。叶於立慶之恩。爾其率循令猷。惠迪前烈。勿驕勿惰。以永乃成。

左拾遺鄭廷樞可清江縣令賜緋

勅夫邑令之有聲者。入奉清列。諫官之滿歲者。出宰百里。蓋朝廷憂民立政之意也。某官早歷宦緒。無廢官常。擢參禁垣。克服彜憲。而南楚大邑。長吏尤難。命自周行。往宣朝旨。仍加朱紱。以示殊恩。無易乃心。勉修所職。

浙西判官艾筠可江都少尹

勅天下之大建親分陝以尹之東夏之重選能設貳以維之茲用安民而政舉也某官艾筠識量純素學術通明奉我東朝周知其善輟借侯幕載揚令名海隅之康筠有其力夫以亞尹之難如彼而有適用之才若此俾膺慎選不亦宜乎勉勵公方更施勤績

閻度可江寧府參軍

勅鄉貢明經閻度士子起家而預清級者蓋亦有之自非才地兼茂則不能光朝命而叶時論矣以爾名父之子自強不息學業履行實浮於名屬予出震之初成我多士之世俾掾天府以漸亨衢無忘益恭更揚令聞

馮侗可祕書省正字

勅五品子馮侗蘭臺圖書之府起家而預之自非有才孰克處此以爾早服嚴訓實揚令名勵學檢身如恐不及成爾嘉器富我士林俾授初資以漸清貫無忘詩禮之學以益刊正之勤可

舒州司馬李景述可虞部郎中

勅王者用士其要惟公苟得其才近親何避某官李景述承茂勳之後秉素士之風頗有美名聞於戚里郡丞之任爲久臺郎之位爲宜俾疏慶恩改授清級無忘師友之訓以奉朝廷之儀

江州判官趙丕不可司農卿

勅王者之正百官也黜其有過其肆大眚也許以自新則邦典行而朝恩浹矣某官趙丕謹行以處衆克

勤以在公。臺省踐更。誠心不替。故先皇獎用。寄以準繩。而靡達官常。自罹常憲。朕纘承鴻業。廣布慶恩。以其久列班行。偶因迷謬。特申渥澤。俾授正卿。勉勵乃心。佇揚令望。

江西推官成幼文可主客員外郎

勅諸侯之佐。命于朝廷。而治職有勞。奏課稱最者。則當升閭籍。補爲省郎。蓋勸能取士之旨也。某從事大鎮于茲累年。本以誠明。濟之通敏。論不阿諂。政無頗邪。一方允釐。爾實有力。今予寵爾。以立朝之位。命爾以司藩之官。爾其敬哉。無忝我步明之典。

洪州判官袁特可浙西判官

勅袁特。朕以關輔之大。控制要津。出保傅之重鎮之。以屏王室。擇賓從之賢佐之。以齊政經。而特尹縣神州。理甚簡便。運籌盛府。言必端詳。叶於東求。宜授斯任。夫潤之民。固與洪無異。而爾之操。當與初不渝。則官業允釐。而朝獎無替矣。敬服斯訓。往勵乃司。可。

洪州掌書記喬匡舜可浙西掌書記賜紫制

勅喬匡舜。朕以師傅之重。敬而不違。式遂便安。俾臨關輔。而軍旅之事。不可無佐。奏記之任。不可非才。聞匡舜以高文受知。以直道從事。歷歲斯久。弘益居多。故因其賓席之資。加以紫綬之貴。改轅東適。從吾上公。無替初心。以忝朝命。

知雜御史查文徽可起居郎樞密副使制

勅。秉記言之筆。以待左右。受司聽之寄。以典出納。並居二職。其可非才。某官查文徽。儒雅表文。忠厚成質。

早踐華貫。時爲名臣。以南宮清望之資。當憲府雄極之任。提綱有序。而衆目以理。正身自處。而周行以清。物論與之。予用嘉尚。居中理極。不亦可乎。噫。爲朕腹心。注人耳目。執節一懈。悔咎隨之。爾其慎之。無忝吾命可。

潤州丹徒令顧彥回可浙西推官

勅。長人之吏。親職爲勞。觀風之佐。坐籌爲異。均其所任。是曰優恩。某官顧彥回。以清節士風。嘗參王府。以耆年篤行。出字齊民。課績尤異。自當優寵。馳驅州縣。非爲所宜。俾陟賓階。奉我元老。優游盛府。足以光華。

撫州刺史周弘祚可池州刺史

朕以將復滄風。務先理道。思得良二千石。以安吾民。儻副簡求。迭授大郡。斯蓋布政懋官之旨也。某官周弘祚。勳臣之子。雅有父風。自服佩恩華。踐更事任。訓齊武力。能得士心。綏懷邊戎。克壯兵略。俗阜秩滿。序勞當遷。朕觀其才。可謂良矣。青陽名郡。控制中流。前所任者。咸屬重望。今以授爾。爾其欽哉。進爵升階。式示兼寵。苟勤節弗易。池人來蘇。考績策勳。吾有彝典。

吉州判官鮑濤可虔州判官

勅。虔之爲鎮。俗雜地廣。化不可一時生寇攘。桂蒲旣平。閩井思乂。可以佐吾良帥。而寧吾齊民者。亡聞。某官鮑濤。久倅列郡。克舉官常。從政以和。理劇無滯。況虔吉鄰。聲績素彰。便道之官。率舊爲用。副茲慎選。誰曰不然。爾其敬承。無忝明訓。

給事中閻居常可金紫檢校司空充虜州節度副使

勅王者推念舊之心。申優賢之旨。官序出處。從其所安。諒不可滯於一方也。某官閤居常。執心冲粹。爲學精博。修賢人之業。多長者之言。粵予纂承。實重舊德。俾掌駁議。直于瑣闈。而無妄之疾未痊。貞退之請彌切。重違誠願。抑此朝恩。俾佐藩方式。便頤養。金印紫綬。邦土憲司。併申寵光。以示優渥。陟明之典。當俟有瘳可。

虞部員外郎史館修撰韓熙載可太常博士

勅某官韓熙載。朕以因心之感。同軌有期。嚴恭禮祀。仍從此始。求所以節豐儉而振廢闕者。屬於禮官。慎選其人。必在時彥。以熙載學問精贍。辭氣亮直。本以通識濟之奇文。惟名與實。咸副是命。故輟自東觀。列于曲臺。使代稱禮樂之盛。吾實有望於爾。勉之哉。

虞部員外郎史館修撰張緯可句容令

勅爲政之要在乎安民。長人之吏在乎慎選。故吾用古道。擇尙書郎而命之。某官張緯。學問該通。辭藝精絕。自東朝載筆。石室抽文。朝論藹然。以爲名士。矧又洞識理體。周知物情。是爲通才。何適不可。王畿大邑。旣庶而富。藉爾敏惠。爲吾教之。仍假臺郎。以申朝獎。苟聞報政。豈慳加恩。可。

浙西判官高越可水部郎中

勅多士之世。副臺郎之選者。前代謂之賢。乃知三署之屬。例無輕授。某官高越。早踐朝序。嘗爲史臣。當官有聲。聚學不倦。頃屬上將。出臨大藩。輟參入幕之資。備觀理劇之用。府罷赴闕。時名益高。司川之秩。俾從眞授。無忘職業。以荷朝恩。

左監門將軍趙仁澤可寧國軍都虞候

勅南藩之寄。宣城爲最。師勁而衆。地近而雄。故朝命列校。以貳軍事。所以重其威令也。某官趙仁澤。名將之子。頗有父風。在軍積年。武略精練。出寧大邑。歸預禁營。副予簡求。俾隸宣部。往綏乃績。無替前勞。

左司郎中高弼可元帥府書記

勅某官高弼。王者之用師也。必先以文告之命。訓誓之辭。故戎車之往。記室爲重。而朕前委愛弟。實司邦政。今命爾弼。使典軍書。任才責功。其意斯在。矧弼嘗參西掖。尋履南省。所歷之任。籍籍有聲。今能奮雄辭。而塞慎選。陟明之典。予豈忘哉。

左領軍將軍孔昌祚可泗州刺史

勅左領軍衛將軍甲仗宮城營造等使孔昌祚。朕以長淮北偏。隔閔戎夏。惟彼泗口。實當要衝。凡爲守臣。罔不慎選。而昌祚以貞幹事。以勤懋德。周廬巡徼之政。宮禁繁劇之司。董齊典禮。靡有違者。歷歲且久。秉心不渝。朕觀其才。可爲邊將。授以符竹。付之臨淮。爾其揚我武威。修乃郡政。登于考功之籍。以塞任能之恩。可。

水部郎中方訥可主客郎中東都留守判官

勅某官方訥。朕以分陝之任。非親賢不可。故迭用子弟。以居守。復以佩觿之齒。唯訓導是務。故慎選名德。以從行。而朕在東朝。先皇命爾訥。列我賓席。恭慎文雅。抱其風度。將順規諷。揖其忠誠。尋又奉予愛子。益固是道。今所授任。非訥而誰。客曹正郎留臺幕職。往示兼寵。爾其敬哉。乃心不渝。懋典寧志。

祕書郎田霖可東都留守巡官

勅某官田霖。朕命愛子。表正東夏。管記之任。鱗俎之間。唯才與行。乃可是選。而朕在儲貳。則嘗知霖。文藝直心。綽有餘裕。累參載筆之任。近登祕籍之司。列於王官。頗叶時望。故授以留臺之職。副茲託乘之求。爾往敬哉。無忝予命。

前山陽縣尉張師古可祕書省校書郎

勅王者之行慶也。獎能振滯。赦過責功。如斯而已矣。某前爲縣佐。以公事罷免。而聞其立身修己。有足多者。故從其滌瑕之命。升諸祕籍之司。往服乃官。勿重而悔。

江州錄事參軍王崇昭可江西觀察衙推

勅某官王崇昭。西南大藩。庶政繁會。認獄之理。欽恤是先。重輕一墜。手足無措。必得朝士以典掌之。而聞崇昭可當斯任。往蒞乃職。無忘益恭。

前舒州錄事參軍沈翺可大理司直

勅某。蔭籍從任。以儒術資身。蓬閣曳裾。早揚聲聞。侯藩載筆。亦懋勤勞。向事圭符。實司綱紀。州縣之職。非其所長。既失儀刑。遂從罷秩。今慶賞斯浹。一告咸矜。復爾名籍。俾參棘寺。吾不記過。爾其自修。

前舒州刺史李匡明可中書侍郎

勅朕以不德。恭承丕基。思聞獻替之言。以自開悟。故以侍從之列。尤用簡求。矧乃職奉詔命。地參公輔。歷代精選。可虛授乎。某以風度爽邁。克嗣遺今上御名。以文章弘雅。累踐清途。先皇器之。任遇尤重。故其冠翰苑。

掌天官長憲臺。肅千里靖恭于位。績用有成。舒人既康。執璧來覲。宜加疏等之命。擢爲鳳閣侍郎。敬之哉。出爲諸侯。非不貴也。入首三品。非無位也。持重足以鎮物。納忠足以報我。匡正不逮。予有望焉。

歙州觀察推官翟延祚可水部員外郎

勅某。以外諸侯吏。入爲尙書郎者。非推恩酬勞。何以臻此。聞爾宰百里。佐廉車。皆有政能。宜當選任。往祇乃事。無忝予恩。

大理司直唐顯可監察御史

勅某。夫御史之列。皆一時之清選。而貴仕所由漸也。聞爾執心有常。從事以直。持刑甚平。允當官有勤勞。故升諸朝廷。俾之察視。爾其懋乃才用。修我紀綱。無傾側糾訐以爲能。無依阿顧避以自守。勿貽爾悔。以忝予恩。

禮部員外郎馮延魯可中書舍人勤政殿學士制

勅。侍從庶職。總同清要。若乃參書殿之列。備切問之重。使如綸之命。式光人文。無詢之言。不入吾耳。所寄若是。其選可知。某惟望與才。皆副是任。況東畿亞府。有理劇之用。南宮禮典。多伏奏之勤。俾膺簡求。必叶虛佇。夫前言往行。爾所祇服。正辭讜議。予之嘉聞。無從非彝。以忝多訓。

筠州刺史林廷皓責授制

勅。恥過作非。言不顧行。爲臣如此。在法難容。某頃自歸朝。頗推有勇。俾之爲將。所以圖功。及封疆多難之時。車徒四出之際。遂能激揚壯節。指麾師旅。付以圭符。而畏懦屢聞。遁逃不暇。震驚城守。註誤軍謀。當此

之時。已宜行法。予以義深罪已。功在止戈。既屈身以弭兵。乃含垢而務德。復移郡寄。仍縮使權。苟奏課之有聞。亦在人而何棄。未終考績。爰掇訟辭。猶且累上表章。屢言今上御名陷。洎遣制使。明徵其辭。乃自滌揚罷郡以來。筠州移任之後。侵漁公帑。積數且多。干犯詔條。爲罪不一。證據明具。詞理並窮。殊不省非。更爲文過。謂競廝養爲恥。以對獄官爲羞。欲蓋彌彰。侮我何甚。其武勇也。旣如彼。其誠心也。又如此。倘猶弘恕。何以律人。尙以君臣之間。務全終始。特從薄貶。庶克自新。勉荷寬恩。無重而悔。

告天地文

臣以寡昧。叨嗣慶基。對越上玄。申養長樂。側身恭已。靡敢荒寧。而聖尊后。自夏秋以來。寢膳違裕。醫藥備竭。禱祠畢致。數月於是。有加無瘳。憂勞之誠。不知所惜。敢陳蠲潔。仰告威靈。伏惟精懇上通。玄恩錫佑。哀臣烏鳥之志。憫臣纒棘之心。使六氣惟和。百祥薦降。冀於旦夕。速就康寧。臣內顧眇躬。弗明於道。方深慈訓之益。欲報劬勞之恩。烝烝之懷。區區於是。慙灑肝膽。以俟鑒臨。

祭世宗皇帝文

稽古靈命。造圖伊始。聖人旣生。萬物咸理。玄功格而高謝。令聞垂而不已。通玉帛于無外。執豆籩而萃止。蓋百代之不易。言皇猷之至美。恭惟盛德。乃聖乃神。爰初纘服。舊邦惟新。瞻顧函夏。實始經綸。三驅示禮。四載彌勤。濟之以武。守之以文。降鑒迴慮。全國庇民。旣戢兵而禁暴。咸服義以歸仁。功成理定。返樸還淳。羣賢在位。百度惟貞。方將致宣王之薄伐。焚老上之龍庭。還師柩席。檢玉云亭。何祝壽之無感。忽綴衣之在辰。嗚呼哀哉。神耐軒正。化流南國。率威義以孺慕。共銜哀而膺臚。日月以之匿曜。煙雲爲之改色。痛輯

瑞之長違。恨攀髯而不得。嗚呼哀哉。永惟下國。獲嗣餘基。奉天光而不早。順文告以何遲。仰電霆之震。以警其失。賴陽春之澤。以赦其迷。既賓禮之加厚。亦恩情之過私。大信有千齡之固。承歡無再稔之期。覽計書而慟絕。捧遺賜以漣洏。嗚呼哀哉。集同軌於七月。遏八音於四海。喬山之冠劍長掩。灞涘之川源不改。敢薦忠信。敬陳脯醢。庶有感而必通。願降神而如在。

徐騎省集卷第九

光穆后諡册

封保寧王册

追封許國太妃册

蔣莊武帝册

追封安王册

追封豐王册

劉仁贍改封越王册

慶王進封陳王贈太尉册

追贈留從効父册

昭惠后諡議

光穆后諡册

維年月日。嗣國主臣某。再拜稽首言。臣聞體厚德而母萬物。存乎尊位。騰耿光而蕃百世。繫乎鴻名。繼統
廣業。莫斯爲重。顧惟小子。懼忝貽謀。對越祖宗。敢揚公議。伏惟大行聖尊后。姜任顯族。皇英茂德。作合元
聖。長發祥符。秉婦禮於儲闈。正嬪則於四海。孝心天賦。惠問川流。祚啓重熙。尊歸理內。率循陰教。欽若皇
猷。順承利坤元之貞。輔佐流周南之化。慈撫公族。仁懷六宮。清淨廣于眞風。戒慎刑于外戚。用能永錫繁
祉。弘濟多難。保佑冲人。克荷丕御。今上仰繫慈訓。方恢景福。靈臺告祀。永樂長遠。罔極之懷。觸緒荒殞。恭惟
尊名節惠之典。載考儒臣禮官之稱。咸以爲光大孝悌之懿。肅雍賢德之盛。昭映前烈。垂示無窮。列辟承
式。弗敢失墜。謹奉玉册琮寶。上尊諡曰。光穆皇后。伏惟威靈如在。鑒茲緝禮。延九廟之積慶。與二儀而長
存。嗚呼哀哉。謹言。

封保寧王册

維保大元年八月丁未朔某日。皇帝若曰。稽古夷庚。祇叶皇極。建侯樹屏。保乂王家。用能乘運會昌。歷世重光。先哲所以啓後。列辟所以時憲者也。我思立愛。宜有加焉。咨爾二十弟某。中和萃靈。寬裕成德。戲必俎豆之禮。學無城闕之遊。聰明仁智。仰遵前訓。孝友姻睦。率由生知。昭此玉音。應于麟趾。朕以不德。凜乎丕承。文武之功。期無獨享。契龜胙土。仰爲舊章。今使某官某。持節册爾爲保寧王。食邑二千戶。敬之哉。昔我文考。對越上帝。敷佑下民。克儉于家。無縱于逸。再造之業。與世無窮。予以爾有邦。膺受繁祉。今爾尙迪遺烈。保終令圖。無從非彝。無狎非正。耆老是聽。訓典是師。綏寧乃封。以永元吉。

追封許國太妃册

維保大三年太歲乙巳七月乙未朔某日。皇帝若曰。昔在祖后。法象天明。旁求淑女。式敷陰教。並建內職。以麗外朝。故其先德之舉。顯魂之命。比爰庶尹。無不及焉。蓋敬終貽後之旨也。咨爾故汝南郡君周氏。恭儉執中。明智資性。頃諧法相。入奉先朝。紘緼之勤。夙著于彤史。湯沐之寵。竟飾於泉扃。粵予纂承。祇稟茲訓。家道旣正。國風以理。仰蹈成式。永懷舊人。是用釐舉闕遺。追崇名數。昆吾舊宅。太岳全邦。申畫四封。以光懿德。今使某官某。持册封許國太妃。嗚呼。令聞不忘。盛典無替。昭昭復魂。聞予此言。

蔣莊武帝册

維年月日。皇帝若曰。稽古皇極。訓民事神。詔大號以崇正直之威。垂大名以紀昭明之德。牲幣有數。典禮不愆。政是以和。神降之福。莫不由斯者已。若乃以死勤事。沒而不朽。流光儲祉。蔣帝有焉。惟帝冥符靈氣。

孕毓玄造。嘉猷雄略。昭映前人。在昔潛耀大川。躡鱗下邑。著艱難之節。所以事君。彰變化之神。所以顯俗。惟德是輔。感而遂通。建福會昌。以戡時難。豐功厚德。以享帝郊。史臣執簡于無窮。工祝正辭于不絕。顧惟寡昧。祇嗣龐鴻。敢忘人謀。以叶靈貺。瞻言神岳。作鎮皇州。興運惟新。禎符丕顯。而位極于炎昊。名謝於康惠。隆典未舉。予用慊焉。濮陽諸姬。實纂服之舊邦。尅亂除害。乃庇人之盛業。合爲緝禮。申告祠庭。今使使某官持節奉册。追諡曰莊武帝。嗚呼。丹青懿烈。光光如彼。簡册廟貌。昭昭如此。永爲民正。無乏神主之望焉。

追封安王册

維年月日。國主若曰。稽古大猷。啓迪來裔。藩翰之寄。重事也。不以親屬爲嫌。寶玉之分。盛典也。不以死生易節。昔在有魏。蒼舒早世。降及我唐。子雲無祿。咸用追啓王社。飾于泉扃。垂爲憲章。肆予遵舉。咨爾某。稟信厚之德。持謙下之資。在傳不勤。爲善最樂。蒸蒸孝敬之性。恂恂友悌之風。及苴茅北藩。授任殿省。別六尚之名物。參九伐之政令。行以正直。持之公平。諸御知方。羣校競勸。職修事舉。朕甚多之。爵止極于公封。位未登於六事。流光不待。時望慊焉。申予有勵之懷。加爾飾終之禮。冬卿峻秩。楚澤全封。不舉茂章。永光餘烈。今命使某持節册贈工部尚書。封安王。嗚呼。延吳之懷。予用多愧。閭平之德。人其識諸。簡册無虧。丹青不泯。昭昭復魄。亦克知之。

追封豐王册

維年月日。國主若曰。名器之重。典册之崇。不以親疏爲嫌。至公之舉也。不以死生易節。歸厚之道也。先哲

彝訓。我儀行之。咨爾某。挺岐嶷之姿。稟山河之秀。亦既就傅。時惟老成。迪祖宗之猷。不愆不忘。奉詩禮之學。惟幾惟勤。公室所推。藩屏攸寄。秀而不實。凋此妙齡。天性所鍾。永悼何已。眞王異數。護塞雄藩。舉爲寵章。飾彼幽壤。今命使云云。嗚呼。分以寶玉。苴以白茅。弗及圖功。猶足表德。尙爾不昧。知予此心。

衛王劉仁瞻改封越王册

維年月日。國主若曰。忠臣之事君也。歿且不朽。王者之念功也。久而弗忘。故賢哲膺期。風烈所及。千載之下。若旦暮焉。矧先朝舊臣。藩方賢帥。雄名大節。震耀區中。粵予纂承。敢忘褒寵。咨爾故某。命世英傑。弈葉勳庸。便蕃寵遇。茂著聲實。間者輟自離衛。鎮于壽春。導德申威。罔不率俾。國步中梗。邊烽載驚。介然孤城。橫制險地。威略所奮。以戰則靡亢。恩信所加。以守則彌固。社稷是衛。豈惟封疆。嗚呼。壯圖中奪。而英氣動於二國。奇表長謝。而忠規流於百代。肆我文考。爰極寵章。崇爲帝師。建以王社。大名備物。無不及焉。咨予小子。敬想先正。聞聲之感。斯極。飾壤之禮。未行。是用越于彝章。再光贈典。山陰大國。會稽遺墟。申畫四封。永旌懿烈。今遣使某官持節。改封越王。嗚呼。忘身殉國。其至如彼。慎終追遠。其厚如此。永錫繁祉。子孫保之。

慶王進封陳王贈太尉册

維年月日。國主若曰。古稱王者之貴。必有兄也。豈不以在原之助。義切於邦家。陟岡之恩。情均于存沒。自非贈飾之寵。寧申敦敘之懷。稽迪前經。式揚盛典。咨爾某。受天正氣。爲國宗英。器量川停。機神秀出。縱橫之智。發爲事業。儒雅之度。播爲文辭。自錫壤侯藩。調兵蘭錡。行令惟一。撫下惟仁。周慮不驚。宸極甘寢。天

覆形於鍾愛。時望極於維城。景命不融。儀表長謝。壯圖大略。嗟時運之難并。遺文餘烈。綿歲序而常在。粵予小子。祇荷今上奉慈訓于長樂。頒分器于懿親。友于之恩。追懷何已。是用修嚴。縟禮申告九原。以王有文雅之稱。故改封於陳社。以王有重厚之器。故建號於上公。光昭令猷。永垂不朽。今命使某云。噫。花萼之遊。宛成今昔。寶玉之數。遂隔平生。尙想明靈。鑒茲永悼。

追贈留從効父冊

維年月日。國主某曰。立身揚名。君子所以顯父母也。慎終追遠。王者所以厚風俗也。政之大者。其可忘乎。咨爾清源軍節度使留某父。贈鄜州都督彥雄。行當於躬。量韜於世。修誠明而應物。積善慶以流光。寶啓高門。誕生賢嗣。建節風雲之會。致身藩翰之權。清寧一方。表率羣后。歲勤職貢。恭守朝經。位崇帝師。勳在王府。向非稟訓。有自膺期而生。則功勳所昭。何以及此。雖襲贈之典。已賁於九原。而督護之名。未光於大府。俾加縟禮。薦洽朝章。今遣使云云。持節冊贈爾爲潞州大都督。於戲。節鉞之貴。命屈於生前。典冊之崇。禮符于不朽。旣足以光爾之有後。亦所以表予之推恩。昭昭有靈。知我斯意。

昭惠后諡議

臣聞廣莫極於坤元。則含容光大。擬議著焉。尊莫隆於王后。則窈窕思賢。詠歌發焉。是以上德無名。而稱謂流於百代。至道無象。而儀刑表於萬方。此固天理出於自然。聖人所以無避者也。矧惟節惠之禮。百王盛典。述德之議。史臣至公。誕昭耿光。敢揚懿德。伏惟大行國后。生商遺烈。安劉積慶。淑質奇相。惠問英才。光映台華。作儷公族。紹隆藩闈。載輯儲闈。世子專寢門之禮。孝心不匱。大君以家人之慶。天覆有加。誠曰

肅雍之德。叶此睦姻之盛。言內則者。以爲美談。及屬運飛天。尊歸配地。嚴恭匪懈。稟母儀于上宮。慈惠積中。率婦道於天下。澣濯是服。而六衣有煒。環珮中節。而九御有倫。思脫簪之誠。以成憂勤之政。躬大練之飾。以輔純儉之風。陰教旣孚。王化茂遠。方輿告變。椒風永闕。慟結長樂。哀纏紫宸。龜筮叶從。攢塗將啓。旌德之號。彤管斯存。若乃山河表德。而文之以禮。金玉其相。而守之以恭。垂訓以慈。進賢以哲。至於誦經習詩之敏。審音知樂之明。超然遠識。夙絕終古。勤行孝養。下自從化。故寬裕懷於六宮。天資明惠。學無不通。故遺愛鍾于宸眷。載稽具美。實光前烈。謹按諡法。德禮不愆。容儀恭美。皆曰昭。慈哲遠識。寬裕遺愛。皆曰惠。仰惟實錄。足表鴻猷。諡曰昭惠后。謹議。

徐騎省集卷第十

武成王廟碑

蔣莊武帝新廟碑銘

武烈帝廟碑銘

重修筠州祈仙觀記

筠州清江縣重修三清觀記

武成王廟碑

下臣伏讀前史窮探政經莫不以兵戰爲危事目干戈爲凶器異達人之格論蓋曲士之常談若乃上考
洪荒遐觀擬象九疇垂範何嘗棄從革之功五緯麗天詎可淪長庚之耀春生夏長非秋無以收成雷動
風行非霜不能肅殺先王設教疇敢渝之垂衣裳以正其本爲弧矢以申其用坂泉戡亂所以見軒后之
神明丹浦庇人所以成帝堯之光宅七旬來格本由舞羽之仁八百同辭始自葬枯之惠故修文廟堂之
上者武功之始折衝千里之外者文德之形好仁而忘兵則西夏偃王以之而殞恃力而棄義則夫差羸
政由是而亡乃知文德不修則武功不立武功不試則文德不昭相須而成其揆一也故立其教者謂之
聖大其業者謂之賢聖則應天順人西伯受代殷之任賢則開物成務太師有佐命之功當其偃息朝歌
盤桓渭水量恢宇宙旣處困而能通才冠生民亦俟時而後動雲雷之屯已御今上天人之契冥符歷數有
歸君臣相遇投釣而起同車以還尊爲王者之師我無慙德加之百姓之上人絕異言大矣哉聖哲膺期
無得而稱已故能式遏亂略大拯橫流把白旄而誓師操黃鉞而助斷解倒懸之困釋比屋之誅大統旣

集。天保已定。然後式廬表墓。歸馬放牛。申義風于夷齊。授成事於旦奭。宏開四履。高視五侯。及其德澤將衰。風流已遠。猶使紀侯大去。不遺九世之讐。周室既卑。更賴一匡之業。自非道充四表。功濟三才。孰能不顯烈光。若斯之盛者也。其後聖人既沒。真風漸漓。戰國如焚。羣生殄瘁。先王利器。舉爲爭奪之資。闕里諸生。率用縱橫之說。遂使中都憤歎。聿興未學之詞。柱史傷嗟。始發不祥之論。流遁忘返。積習生常。則我武漢之音。將墜於地。夫至公所以應羣動。上德所以綜萬殊。達其旨則左右咸宜。迷其本則弛張兩失。自漢參霸道。魏濟姦雄。藐爾千年。荒哉七德。國家參墟發命。扈水膺圖。羣黎興後之辭。八表有宅心之地。高祖奉天革政。扇牧野之高風。太宗屈已師臣。躡渭濱之盛軌。施其法則致其報。入其國則思其人。貞觀年中。始于礪谿立廟。玄宗祇若先訓。奮發神謀。平內難於女戎。嗣鴻圖於代邸。永言遺範。重事嚴禋。開元中。詔京師及天下州府。並立太公廟。著良辰於上戊。抗縉禮於虞庠。而復歷選前修。式崇配享。得其體者。參入室升堂之列。蹈其跡者。儼撫衣函丈之容。穆矣皇風。煥乎甲令。肅宗來朝走馬。初嚴避敵之師。九五飛龍。遂荷在天之命。澆戈既戮。商奄猶驕。方資戡定之勤。更舉褒崇之詔。禮尊南面。位極真王。取其大告之稱。以定易名之典。代歷之闕。文備矣。聖皇之能事。烝哉。故得靈鑒孔昭。羣臣競勸。諸侯供職。函夏同文。中興之功。配天齊古。雖復運逢興替。時有安危。造周之德。既隆。思漢之人。常在。烈祖沉潛剛克。神武有徵。靜氛癘于蕭牆。功高庖正。掃攬槍於丹徼。業茂賓門。由是四海樂推。三靈眷命。光復舊物。洪惟至公。大道將行。皇猷累洽。今上允文允武。克長克君。自出震見離。發號施令。雷行天下。豐宜日中。信及豚魚。仁霑行葦。若夫尚齒尊賢之教。宵衣旰食之勤。制禮作樂之文。返樸斲雕之質。固已紛綸帝錄。掩映瑤編。猶復叶比。

臧謀疇咨庶政。以爲五材並用。廢一不可。天下雖平。忘戰必危。是故簡萬乘之人。申九伐之令。六官聯事。百度惟貞。副君以介弟之尊。當撫軍之任。威而不猛。動必以仁。大元帥齊王明德茂親。由諸王而宿衛。副元帥燕王敦詩說禮。以長子而帥師。用能啓迪大中。張皇下武。其餘西京名將。霧集星羅。北府奇兵。騰馳電驚。並列雲臺之像。咸開長水之營。地利人和。思深慮遠。域中無事。則用之於進賢興功。四方有變。則用之於弔民伐罪。故出車馭駟。則係以長纓。鞠旅衡湘。則舉爲內地。皆所以拯其塗炭之患。息其沉闕之爭。非徒誇大兵威。兼并土宇而已。至於篁竹荏蒲之聚。田昭屈景之宗。或粗舉先聲。或聊分偏校。莫不厥角稽顙。請命卽刑。史不絕書。野無遺寇。斯乃聲明文物之外。廟堂帷幄之間。思未半之功。已倍矣。加以爲而不宰。讓德於天。潔粢豐盛。靡違於時事。春蘭秋菊。遠被于無文。乃顧戎韜式嚴邦政。以爲三王四代之事。罔不從師。前哲令德之人。必將崇祀。列聖盛典。實啓孫謀。乃復舊章。爰作新廟。于是宗伯建位。梓人授規。入端門而右迴。旁太學以西顧。瞰康莊而列屏。因爽塏而營基。他山之石咸移。中伐之材畢萃。成之不日。自比靈臺。揆彼方中。寧慙楚室。崇堂屹以特起。高門豁其洞開。筵有籩豆之區。階有賓主之位。干戈在序。鐘鼓在庭。繹然觀藝之場。藹爾致誠之地。春秋二仲。時和氣清。醴醖交羞。牲牲不疾。鶡冠礪劍。展告虔薦。信之儀。玉戚朱干。儼象德達神之列。中軍元帥。出建靈旗。六郡良家。來登勇爵。旆旌鐃吹。桓桓推轂之威。金石絲簧。穆穆燕毛之序。觀之者亂臣知懼。比夫漢尊黃老。詎臻清淨之源。秦用刑名。徒有刻深之弊。中庸之德。其在茲乎。嗟夫。聖人沒而微言絕。王澤竭而頌聲息。奚斯露寢。諸侯之事何觀。吉甫清風。衰世之音孰尙。豈若帝圖光赫。聖作宏新。人知鼓篋之方。家識止戈之漸。固可著之金石。列在鼎彝。微臣學愧常

師用慙兼備。承明再入。固無經國之才。宜室徵還。幸對受釐之間。將使延州聽樂。長聞雅正之聲。圯上受書。世出帝王之佐。敢揚丕訓。敬勒貞珉。其銘曰。

於惟基命。建用皇極。實有武備。以昭文德。弗惠弗迪。是糾是殛。天地剛柔。惟帝之則。是則是傲。文王武王。惟師尙父。時惟鷹揚。匡正天下。綏爰四方。微禹之烈。于湯有光。肅肅牽牲。皇皇表海。簡禮從質。因民不改。難老曰壽。專征爲大。泱泱之風。至今猶在。大道旣隱。明王不遭。走鹿爭逐。鯨魚告勞。泯若四履。紛吾六韜。我思古人心焉。怛怛。天或愛民。物無終否。率此叛國。歸于聖帝。自葛初征。至牧乃誓。君子萬年。本枝百世。鴻圖再造。二聖重光。亦旣大賚。寧惟小康。六事允釐。四維孔張。夢寐卜獵。咨嗟釣璜。虎踞之陽。龍藏之浹。爰作新廟。畢崇明祀。設榘交戟。朱門納陛。嵬鼻穹崇。重深奧祕。名光大告。禮重眞王。侑神祀食。入室升堂。威儀文物。容貌采章。列聖有作。茲焉不忘。膠庠旣成。教義旣明。三湘卽序。百越來庭。馬無南牧。人怨東征。烈烈政典。洋洋頌聲。商郊車騎。灌壇風雨。績用不泯。威神若覩。鏤金石以表德。荐馨香而受祐。春蘭兮秋菊。無絕兮終古。

蔣莊武帝新廟碑銘

臣聞南正司天。授宗祝史巫之職。春官掌禮。詔犧牲玉帛之儀。首所以別類人神。統和上下。三時不害。力穡以之。普存百物。阜安薦信。猶其多品。用能舉明德。而徼景福。播和樂以致靈祇。三五已還。皆是物也。若乃渾元宣氣。山岳成形。雲雨於是乎生。財用於是乎取。故有毳冕之服。璋邸之符。或以肆瘞垂文。或以廢懸著法。虞舜聖帝也。而有徧于之祀。周武明王也。而有惟爾之祈。至于畝田高邑之都。燕莖桑封之秩。稽

稔有羨。蘭菊無虧。大典奇篇。論之備矣。後王徂帝。聞斯行諸。金陵山者。作鎮揚都。盤根福地。峙天險之左。次。歐臺城之北隅。陽嶺前瞻。包舉青林之苑。陰崖右轉。經營玄武之池。絕巘嶽岑。蔽虧日月。深岩窈窕。吐納風雲。層臺累榭。臨其巔。湧泉清池。湛其下。白鹿麕麋。騰其藪。鴛鴦雛孔。翠栖其林。豫章杞梓之材。橘柚櫨梨之實。赭堊丹青之美。錫銀金碧之饒。固以事異假珍。富兼諸夏。登于軌物。掌以虞衡。矧復奇怪中潛。網緼上屬。真人來應。瘞雜寶以祈年。智士攸同。指盤龍而建國。亦何必嵩正發峻。始號降神。岷嶺騰精。獨稱建福。自時厥後。代富靈遊。刺史還都。卽有栽松之地。諸生肄業。非無講學之場。岫幌雲關。訪徵君子。幽谷鹿巾霞帔。集道侶于中林。斯亦羣帝之密都。先王之册府者也。在昔霜鍾細品。猶淹耕父之居。反景微光。尙駐長留之駕。況乎皇州列岳。宅怪儲靈。不有吉神。執司陰隲。蔣帝孕清明之氣。稟正直之資。實九德之所生。與五龍而比翼。自西江考績。謝聯事於玄夷。北部申威。輯庶功於黃綬。于時祚終四百。運偶三分。夫懷塗炭之愁。家有剝廬之痛。帝則勤勞狗物。慷慨憂時。旣援張敞之桴。卽振李崇之鼓。赤心未盡。執漢節以忘生。青骨難誣。降北山而受享。飛蟲顯俗。生民之舒慘焉。依白馬耀奇。平昔之威容如在。故使中都之印。式報陰功。長水之營。旁旌同氣。廬宮改命。非因介子之焚。廟貌崇壇。詎比愚公之徙。自是光靈茂遠。代祀綿長。或昭德而致祥。或害盈而降罰。黃旗紫蓋。奉五馬之禎符。朱鬣碧蹄。殄高山之巨盜。賢如謝傅。猶繫草木之形。親若始安。亦假弟兄之助。故得王封錫羨。帝服歸尊。追炎昊以齊稱。躅虞黃而接武。事光典冊。惠浹幽遐。任水木之遞遷。顧高深而自改。國家綠圖受祉。黃鉞庇人。分二牧於土中。包九有于宇下。雖十聯百里。亟更守宰之權。而四望五郊。不易宗彝之數。及威儀暫失。龜鼎中遷。瀛海颺迴。坤輿幅裂。而盤

礪之際。常奉周正。封域之間。獨爲漢守。衣冠舊族。宛洛遺甿。咸趨懷德之鄉。共免永嘉之亂。終使皇天眷祐。百姓與能。克昌再造之基。奄有六朝之地。烈祖功踰嗣夏。體濬哲而致中興。皇上德邁繼文。懋元良而恢下武。格天光表。慰率土之歌謠。累洽重熙。漸羣黎之肌骨。所以珍符總至。靈命畢陳。極金篋以標年。盡瑤編而紀瑞。襲於六藝。貫彼三墳。矧復聖作無方。神謀不測。殷周損益。文武弛張。制在先機。申於後甲。百吏奉行而不暇。兆民日用而不知。帝典恢弘。天文貞觀。擣華發藻。抉贖披襲。丹浦非好戰之師。兩階有誕敷之舞。坐知千里。廓清五嶺之氛。役不踰時。底定七閩之難。國風王澤。自北而南。樹立之權。由來尙矣。康無專享。止崇藩屏之封。穆弔不咸。但著急難之咏。未有極至公之舉。正太弟之尊。大義鴻猷。如今日之盛者也。副君膺則哲之寄。有聖人之資。由上德而貞萬邦。用英才而總百揆。麗正繼明之業。仰奉宸謀。持謙敬客之心。俯懷庶品。則有齊藩上寄。紆盤綬而握兵符。燕邸眞王。珥貂冠而掌宮籥。周公則武王之弟。夏啓則吾君之子。故能緝熙帝載。寅亮天工。晏平仲之論和。北宮子之謂禮。自家刑國。草偃風行。上下之際。旣交華夷之情。如一黑齒奇肱之俗。款塞來王。碧嵩素滻之濱。除宮望幸。后夔典樂。已播薰絃。司馬進稱。行陳祕檢。功旣隆矣。德亦厚矣。尙復往而未止。謙以益尊。政靡不修。思無不及。以爲無文咸秩。訓誥之格言。明祀是崇。春秋之大義。農祥晨正。豐絜四馳。密雲不雨。馨香並薦。載紆睿鑒。爰顧遺祠。詔曰。蔣帝受命上玄。奠職茲土。力宣往代。澤被中區。所謂有益於人。以死勤事者也。今號位已極。名諡弗彰。闕典未申。朕甚不取。其以勝敵克亂之業。爲民除害之功。因姓開國。追諡莊武。仍令有司。修寢廟。備制度焉。于是卽舊謀新。審形面勢。農工告隙。營室方中。或懸水以爲規。或飭材而攻木。搏埴之工。麇至。圻墳之伎。星羅。徑術

常夷靡蕪。王孫之草。荆榛舊闢。寧誅宋玉之茅。百堵齊興。旬歲而畢。繚垣十里。重屋四周。樹文玉於庭中。交枝羈靡。挺開明於闕外。詭狀髻髻。納陛逶迤。碧疊元州之石。橫梁天矯。雪披後渚之梅。豁朱戶之瞳矐。陽光不夕。闕深宮之靈霽。暮靄常霏。堂上布筵。楹間設奠。管磬鐘鼓。羅于下。籩豆簠簋。肆於前。再變之音。克諧永貞之祝。無愧神光。倏忽。捲服連蜷。孔蓋翠旌。若有來而罔覲。蕙肴蘭藉。若有去而不亡。用是高揖。靈玄。永司純嘏。魍魎魑魅。豈煩夏鼎之圖。風雨雪霜。無待桑林之禱。則知民和而後降福。事理而後不祈。人祇之間。如斯而已者也。粵若先王命祀。神道教人。前哲令德之流。九魁六宗之類。或以公族視秩。或以戶邑奉祠。子晉之爲帝賓。真階匪極。傳說之騎龍尾。景耀未融。斯皆地勢本高。升聞易達。詎有權輕五校。壤狹一同。而能比敬軒臺。分光堯日。縱質文之迭改。代奉典章。及聖哲之不承。更加崇飾。故金簡玉字。興王之統。可尋。兩騎五車。受職之期。斯在。雖將歷選。安得同年。昔者崑閬窮遊。尙紀白雲之什。燕然薄伐。亦陳玄甲之銘。孰與冥貺昭彰。壽宮宏麗。水通懸圃。萃氣色于闔門。路接白楊。煥丹青于垌野。此而莫述。後嗣何觀。微臣潤色無功。討論奚取。思問神於先聖。姑欲事君。苟獲罪于玄穹。曷容媚竈。惟於舊史。想見英風。適當罷役之初。爰奉屬辭之詔。西州作頌。誠慚邑子。見稱南國。刊銘或望至尊所改。庶使千八百國會。執玉於茲峯。七十二家。配泥金於此地。其銘曰。

茫茫玄造。萬物資始。一經神怪。一緯人理。先聖則之。以著綱紀。仰觀俯察。上天下地。高卑既定。品物咸宜。宣氣者山。配地曰祇。三公是擬。九德攸司。天作金陵。蔣帝荒之巖巖。金陵作鎮。上國陰林。巨壑材生物植。洞穴岩房。逶迤詰屈。隱士無言。仙童不食。洪惟廟貌。奠此名區。位重天孫。權傾陸吾。薜荔之服。辛夷之車。

若自空桑來遊下都。翼翼京揚。馮馮輦轂。運屬多壘。聿禱深福。峻殄堅夷。助亡景覆。肸蠶玄功。威蕤帝錄。皇唐膺運。和悅人神。崇名則舊。受職惟新。祥圖雜集。祀典紛綸。終全王土。以俟真人。再造延洪。繼文光大。陰陽不測。天地交泰。沒羽梯航。雕題冠帶。成民致力。祭神如在。猶防闕典。乃顧遺靈。永懷簡冊。欽若昭明。克亂除害。膺茲大名。亦有制度。備於祠庭。式瞻昏定。昏定既正。爰揆農時。農時弗虧。虞衡肅給。般爾交馳。加之礪斲。益以章施。新廟既成。神居既寧。我有常祀。蒸餽薦腥。匪禁匪祈。歆我惟馨。三時不害。大庖不盈。昔在周家。逮於漢室。徒聘驪騮。虛羅甲乙。純嘏弗臻。斯猷愈失。載返真風。爰歸聖日。五衢植木。四照栽花。馳烟驛霧。晦景縹霞。方介十巫。何憂一車。行觀吉玉。願折踈麻。謝傅長逝。王公不作。獨我莊武。先紆睿略。魯墳無棘。遼城有鶴。刻此茗華。永傳嵩霍。

武烈帝廟碑銘

臣聞昊穹凝命。玄化不宰。司契牧民之重。授以聖功。益謙輔德之明。顯諸神道。玉燭景風之瑞。所以報憂勤。天時地物之妖。所以警安逸。是以古之聖人。覩災而懼。因敗而成。撥亂反正之勳。偃武修文之業。延洪光大。皆有幽贊者焉。故禹奠九州。受蒼水繡衣之命。武師牧野。接五車兩騎之神。或假靈於五將三門。或取象於長庚北落。奇怪恍惚。歷代有之。然則潔粢豐盛。崇名紀號。欽若天意。丕顯陰功。元元本本。政之大者也。茲我后所以側身修德。允濟時屯。武烈帝所以禦災捍患。光膺帝服。人神合應。豈不偉哉。惟帝才冠生民。道高振古。登賢能于鄉老。論昭穆於本朝。若夫忠孝文武之風。信智言之懿。提綱案部之績。夷凶靜亂之勤。論道經邦之猷。宮懸錫馬之寵。忘身徇國之節。驚愚顯俗之奇。固已炳煥丹青。鏗鏘金石。用能

高標明祀。大庇蒸民。犧牲玉帛。數有加於羣望。備物典冊。禮遂縟於眞王。是知妙極無方。數均不測。告禎符於元后。集景命於舊邦。豈徒雪霜風雨。禳祈零禁而已。我唐之中興也。南司天北司地。命義和而治曆。法鴈鳩以安民。令行而風雨不愆。澤廣而禽魚允若。無文咸秩。墜典由是孔修。有開必先。百神於焉受職。及運終下武。慶洽重熙。二聖相承。載光明德。五材並用。誕告多功。御名正而泰階平。王澤流而頌聲作。人將登於壽域。時已洽於淳風。數或推移。唐堯有懷襄之患。天將警戒。周成有雷雨之災。丙辰歲。金革爰興。師徒四出。師屯細柳。火照甘泉。蠢茲越人。伺隙稱亂。焚我郊保。軼我封陲。宵災御亭。晨圍武進。天子爲之旰食。東郊於是弗開。於時令儲后以長子帥師。以九命作伯。風行京口。氣懾句吳。激大義以推心。授成謀而警衆。右武衛將軍柴克宏。見危致命。臨難忘生。總率禁兵。星言赴援。人懷國耻。如報私仇。軍政肅而上。下接和人心。感而神祇助順。若昆陽雷電之震耀。淮淝草木之形勝。兵勢颯馳。醜徒冰泮。冥貺彰灼。有如此焉。當是時也。以承平之人。鄰貢獻之國。燿燿卒至。溝隍未嚴。首尾方畏。衆寡非敵。摧堅如拉朽。擒寇如拾遺。崇朝之間。邊鄙克定。匪大君之昭感。豈人力之獨能。雖通幽洞靈。實聖哲之所務。而問神語怪。非典冊之攸先。故揚摧而論蓋。蓋史臣之職也。主上以功成弗處。無德不報。增封進號。厥有舊章。乃下詔冊贈武烈帝。備名數禮也。於是正南面之尊。窮大壯之勢。耽耽新廟。奕奕崇堂。雉門兩觀之嚴。左城右平之制。龍旂纓輅。雲罕軒懸。兼三代之盛儀。抗五郊之殊禮。與夫周人革命。止陳玄牡之祈。晉室主盟。但用朱絲之禱。報功之典。不亦盛乎。常州刺史何重貴。初領前軍。獨當強寇。以忠貞爲甲冑。以恩信爲金湯。首挫賊鋒。力全郡壘。褰帷之任。因以疇庸。坐樹之風。更成德讓。皆足以光昭雅頌。垂示來雲。後之君子。知天命不可

以智取大福。不可以力勝。幸災怙亂。鬼得而誅。背盟奸好。人將誰與。覆車斯在。殷鑒匪遙。類委土以爲師。樹豐碑而紀事。下臣奉詔。謹勒銘云。

玄功不宰。帝德無爲。化機冥運。羣動交馳。必有神道。鑒而董之。董之伊何。惟帝之職。恍惚有象。陰陽不測。如岳降祥。配天輔德。保我蒸民。莫匪爾極。偉哉開傑。多藝多才。名馳八紘。位重三槐。祀典光啓。王封肇開。人思召樹。俗畏軒臺。洪惟我后。積仁累慶。運啓再造。功宣二聖。金鏡在握。璿璣以正。陰陽旣和。人神交應。時災有數。孰克違斯。靈命自天。疇能問之。盜兵竊發。玄貺冥期。風雲鼓蕩。氣厲殲夷。蔣侯助順。霍山啓道。卑聽匪遠。誠明則到。上曰欽哉。享茲昭告。帝服加尊。大名紀號。多壘旣平。連營旣寧。奕奕新廟。崇崇百城。民罔疵癘。年斯順成。庭有備物。時殷頌聲。禍福何常。惟人所擇。棄信毀義。恃衆與力。上帝不蠲。明神是殛。勒石嚴祠。敢告萬國。

重修筠州祈仙觀記

筠州祈仙觀者。東晉黃真君上升之地。因爲道觀。綿歷代祀。互有增修。國朝保大中。元宗皇帝。奉爲吳讓皇。再加營御名。金石具刻。此不備書。夫言意假象。故立朝修之所。形器有壞。故資繕完之工。此觀當荆楚之要津。實郵傳之便道。過賓稅駕。遊子解裝。憧憧往來。罕或虛月。加葺之後。二紀有餘。閑閤垣墉。頽落且半。道士羅自正。總攝眞侶。啓煥玄風。以爲道由人弘。德以勤繼。不飾不美。人其謂何。于是心謀躬行。節用蓄力。授其徒之可任者。會其士之好道者。月省歲計。經之營之。卽舊謀新。興廢補闕。十有餘歲。其績大成。凡建聖祖殿。黃真君殿。各一區。峙瑤壇。範洪鐘。造橫橋於通津。植茂樹而蔽野。其修舊整壞者。層樓重廊。

二十餘閒。其取材也時。其擇匠也良。程之以壯。督之以固。瓴甌礪礪。尙其密。藻繪丹雘。尙其麗。帑廩不費。工庸不勞。煥然新宮。峙此靈境。君子是以知其能也。夫神仙之事。史臣不論。豈不以度越常均。非擬議所及。故邪。仲尼書日食星隕。皆略其微。而著其顯。慮學者之致惑也。又況於希夷恍惚之際乎。然而載籍之間。微旨可得。書云。三后在天。詩云。萬壽無疆。斯皆輕舉長生之明効也。及周漢而降。則事迹彰灼。耳目不誣。天人交感。民信之矣。于是通儒洪筆。始著于篇。至如許君。黃君。通幽洞冥。窮神極妙。逮爾姻族。與夫家人。乘景上躋。超然絕俗。故墟舊井。真氣裴回。至其鄉而思其人。仰其道而踐其迹。斯觀之盛。豈徒然哉。鉉頃歲扈從南巡。有事于游帷之觀。唯二宮相距。兩舍而遙。使指有程。瞻望弗及。逮今一紀。無日忘之。會羅君狀其功績。圖其形勝。見託紀述。欣然而書。開寶七年九月二十四日記。

筠州清江縣重修三清觀記

元氣既判。天地乃位。氣之清明靈粹者。鍾乎洞天福地。名山大川之間。真聖之所戾也。景福之所興也。然則游居走望。乃建道館焉。通都大邑。往往而在。豫章之地。實曰奧區。帶豫章之通川。據西山之雄鎮。鬱映磅礴。神異所栖。高真十二。震耀方夏。萬靈軌轍。靡迤蟬聯。保大庚戌歲。詔復高安縣爲筠州。析其北鄙。爲清江縣。而三清觀。負新邑之左。瞰長江之濱。形勝高奇。壇宇嚴淨。聞諸故老云。昔吳許二君。嘗遊茲地。夜覩青氣。上屬於天。相與嘆曰。此非凡地。當爲神仙之宅。及二君登晨之後。邑人追感前言。共御今上茅茨。歲時薦獻。衆目爲草堂道院。函關紫氣。事往名留。蓋屋草樓。人非郭是。年世彌遠。增修益崇。開成中。始詔賜號三清之觀。自時厥後。又踰十紀。運逢治亂。道有汗隆。中興已還。百度咸復。官得其守。人盡其能。道士吳

宗元允迪玄風。克堪道任。以爲朝禮之城。飈歛所臨。不飾不美。衆將安仰。於是月考歲計。庀工飭材。補廢扶傾。無所不至。建三清之殿。造虛皇之臺。設待賓之區。敞飭賢之室。範華鐘之鏗。訇今上層樓之若。亭回廊複道。重深奧祕。于是飾儀衛。備器用。肅然必洽。煥焉可觀。夫其誠至者。其禮修。其守固者。其事舉。道不遠矣。人焉廢哉。宗元又以雲境昭回。祥符胥鑿。思刻貞石。以貽後人。不遠千里。見訪論譔。嘉尙其志。故爲直書。時甲戌開寶七年十二月十二日記。

徐騎省集卷第十一

舒州周將軍廟碑銘

壽州刺史劉公神道碑銘

唐故德勝軍節度使扶風馬匡公神道碑銘

舒州周將軍廟碑銘

冠軍諱瑜字公瑾廬江舒人也。吳史列傳。功炳乎丹青。皖城遺祠。頌闕乎金石。嗚呼。皇天有造物之柄。有愛民之仁。必待聖人而後行。王者有承天之德。有濟世之量。必待聖人而後發。故天人合應。聖賢相須。民之司命。闕一不可。雖復凌雲之御今上。非一木之材。千金之裘。非一狐之腋。然其建大號。運長策。總攬英傑。弘濟艱難。亦一二人而已。故革夏者。九有之師。而伊尹爲阿衡。翦商者。三千同德。而呂望爲尙父。秦爲無道。高祖誅之。則鄼侯蓋於羣后。莽據閭位。光武正之。則仲華冠於四七。漢宗失御。孫氏奮發。破虜討逆。繼志勤王。而將軍傾蓋于千載之期。濡足於百六之會。策名江左。宣力中朝。殊勳盛烈。曠代齊契。何其偉哉。于時王業始基。羣凶方熾。國難薦及。人心屢搖。將軍情發于中。義形于色。履艱危之際。貞節彌堅。率振蕩之衆。伸威方厲。推誠以明大義。故逆折游說之鋒。屈身以表至公。故首定君臣之敬。摧赤壁之陣。勢動九州。建漢中之謀。量包四海。於是強敵攝迹。羣生延頸。姦雄之智。無所施焉。漢室之隆。未可量也。嗚呼。天未悔禍。國之不幸。修塗止於偏帥。大命殞於巴丘。流勳于當時。遺恨于終古。豈四百之祚。歷數難移。三分之基。疆宇有限。不然。何雄才大略。神授之如彼。短命促齡。天奪之若此。忽乎茫昧。不可得而詳也。夫英聲由

于茂實。元功出于全德。威稜所及。非勉強之攸能。績用斯存。豈毀譽之可奪。有吳爲新造之國。柴桑乃觀望之師。大帝非爭衡之才。子布有私室之顧。將軍投袂而起。橫戈以出。魏蜀二主。天下英雄。或垂翅而宵奔。或俛首而求隸。降茲以往。烏足道哉。至於分財推宅之仁。觀樂審音之妙。知人先覺之哲。存交服物之懷。實天縱其能。亦行有餘力矣。嗟夫。民墜塗炭。眞主所以臞瘠。天造草昧。良佐所以驅馳。非君臣同體。不足以濟大業。非帷幄共斷。不足以制橫流。將軍能沮幼生之譚。而吳主亦能拒敵國之間。將軍能畫不世之策。而吳主亦能破羣疑之心。故得不顯霸功。若斯之盛。當此時也。如趙士之碌碌。漢相之齷齪。徒使有若林之會。安能施一繩之維。又況於市道之交。署門之客哉。此義夫節士。所以感激于風雲。惆悵于時運者也。嗚呼。徵管之績。旣耀于中區。盛德之祀。遂崇於東夏。歷世逾遠。善慶彌彰。翼子謀孫。徒封移社。而支庶繁衍。故在舒庸。召樹猶存。魯堂無壞。光靈不泯。實生太尉。中書令。西平恭烈王焉。半千之運。懸符祖德。萬夫之望。允濟時屯。始爲定亂之雄。終爲佐命之老。而仁風所被。多在故鄉。王與嗣子。鄴。皆節制廬江。今仲子祚。復刺舉濬部。過里門而載軾。瞻廟貌而長懷。命梓人以新其堂。奧督里宰以除其徑。術教祝史。以潔其籩豆。率宗屬以薦其孝思。肇建豐碑。以永前烈。懿哉象賢之美。共理之勤。民用綏和。歲則大有。戾夫不佞。敢作頌云。

皇天上帝。敷佑下民。旣命賢主。亦生賢臣。有若將軍。救時之屯。仗義秉信。資忠輔仁。堂堂定策。審審忘身。雄飛夏口。橫厲江陵。將軍猶生。漢室不傾。將軍旣沒。天下三分。盛德之享。嚴祠未墜。壯夫擊節。義士沾巾。猗歟舊國。赫矣雲孫。嗣勳纂服。長戟高門。壽宮有煥。靈貌如存。我紆蘭佩。來挹犧罇。懷賢慷慨。用獻斯文。

大唐故匡時啓運功臣清淮軍節度壽州觀察處置等使特進檢校太傅持節都督壽州諸軍事

壽州刺史御史大夫上柱國彭城威侯贈太尉劉公神道碑

聞夫郊圻內理。牧萬民者。是曰諸侯。夷狄外攘。守四方者。其惟猛士。然則安危異任。文武殊塗。故天下方爭。韓彭英吳。橫雕戈而震耀。羣生待理。龔黃寇賈。擁阜蓋以從容。及夫昭格寰區。紛綸簡冊。其歸一也。代有人焉。若乃總是全謨。覃于奕葉。流光受社。潛齊累將之家。崇德計功。下視慙卿之族。古難具美。我則兼之。公諱崇俊。字德修。其先彭城人。高祖升。調補山陽淮陰尉。遂家焉。卽爲縣人也。岳峻洪基。海疏遙派。陽城相土。千齡侯伯之封。沛澤中興。兩代帝王之胤。懷黃結紫。論鼎甲以盱衡。刻像圖形。誓山河而捧袂。國史家牒。披卷可知。頃者。聖運中微。羣方暫擾。驪山之北。犬戎興戲水之師。踐土之庭。天子屈河陽之召。公路擁南陽之衆。僭號仲家。隗囂據隴右之圖。坐論西伯。勤王問罪。吳太祖始定揚州。賜賑專征。昭皇帝遂加殊禮。于是揚旌北討。遷寇迹于淮濱。闢土西封。謀守臣于諸將。命我顯祖。作牧鍾離。乃固保障之嚴。載施犬馬之備。軍無糶政。將期十萬之行。師有見糧。卽聚九年之蓄。方圖大舉。已仗前旻。永年不登。未幾而歿。長山羣盜。舊畏來公。西域故營。願從班勇。復命烈考。嗣膺使符。不還渭水之兵。誓卒龍門之託。故蓼城之戰。斬獲過當。汝陰之圍。策勳居最。先零委質。闢充國以無由。獫狁驚魂。射郢都而不中。疇庸錫羨。建清淮軍以壯中權。加禮愼終。贈太尉公以光幽窆。旣而鼓驚悽愴。部曲徘徊。家有遺恩。人思世德。帝曰。崇俊。惟爾恭儉孝友。誠明惠和。任則中軍帥。位則文昌長。誕舉攸職。予惟汝嘉。濠梁之郊。控扼遐裔。惟乃祖金克懋厥始。乃考仁規。克愼厥中。肆予命爾。克成厥終。往哉汝諸。無廢朕命。公銜恤奉詔。墨經卽戎。鋪陳政

經。討。閱。軍。實。思。有。以。光。大。前。緒。播。揚。國。風。初。二。先。公。之。理。也。屬。洛。邑。再。遷。浚。郊。作。梗。僞。新。竊。據。仍。延。十五。之。期。黃。武。開。元。始。創。三。分。之。業。犬。牙。之。地。蠶。尾。常。搖。鋒。鏑。縱。橫。車。徒。奔。走。摧。牙。獸。困。尙。遙。匡。復。之。謨。鱗。尾。魚。勞。未。暇。綏。懷。之。術。逮。公。之。理。也。寇。皆。遠。遁。民。佇。息。肩。千。里。風。從。四。方。聳。聽。以。爲。格。物。必。在。於。立。制。也。故。藝。貢。賦。以。息。貪。暴。之。端。暢。刑。章。以。拯。姦。宄。之。極。賞。不。虛。授。罰。其。必。行。以。爲。富。邦。必。在。於。務。本。也。故。使。民。以。時。相。地。之。利。持。未。熟。之。稻。游。惰。自。遷。班。再。易。之。田。兼。并。絕。倖。以。爲。邊。寧。不。可。以。忘。武。備。也。故。遠。斥。候。浚。溝。隍。竹。與。木。而。靡。遺。橐。與。苦。而。畢。給。亭。障。屹。峙。軍。聲。隱。然。以。爲。強。兵。必。在。於。實。王。畿。也。故。招。懷。邊。貳。講。習。戎。事。游。兵。冀。馬。俱。有。無。犯。之。容。晉。勇。齊。雄。並。集。選。和。之。下。歲。揀。精。銳。歸。之。京。師。其。餘。庶。政。常。經。門。見。戶。睹。斯。可。畧。而。言。也。高。皇。帝。禮。均。元。老。寵。冠。列。藩。受。禪。之。初。則。進。上。公。之。秩。肆。類。之。際。則。委。廉。使。之。權。言。必。見。從。無。再。卻。之。奏。君。常。高。枕。忘。北。顧。之。憂。皇。上。欽。奉。重。熙。聿。遵。無。改。毗。倚。尤。重。親。敬。有。加。初。先。太。尉。公。之。薨。也。西北。小。驚。戒。嚴。從。便。因。詔。執。事。移。清。淮。軍。于。壽。春。及。是。復。立。定。遠。軍。卽。命。公。爲。節。度。使。仍。以。公。少。子。匡。符。尙。永。嘉。公。主。留。侯。操。印。初。躋。上。將。之。壇。帝。子。吹。簫。卽。降。王。姬。之。館。禮。優。伯。舅。望。重。懿。親。於。時。公。洩。濠。梁。十。有。七。年。矣。米。鹽。皆。序。丞。史。當。才。閉。閣。罕。爭。舉。烽。無。警。朝。庭。以。公。能。光。前。烈。雅。得。邊。情。清。淮。之。師。遺。風。仍。在。俾。盛。一。家。之。美。載。嚴。萬。里。之。城。改。壽。州。刺。史。充。清。淮。軍。節。度。使。鄧。侯。倏。去。雞。鳴。傷。父。老。之。心。長。者。聿。來。虎。渡。息。鄉。閭。之。患。能。事。畢。舉。考。功。再。葺。方。將。建。大。旆。以。風。驅。指。函。關。而。電。掃。雲。中。雞。犬。八。公。之。迹。徒。存。夢。裏。膏。肅。二。豎。之。妖。遂。作。春。秋。四十。保。大。四。年。夏。六。月。十。有。六。日。薨。于。壽。春。公。署。皇。上。翦。鬚。靡。及。穿。壁。方。遙。投。綠。沈。之。瓜。悲。哀。竟。日。賜。黃。銀。之。帶。慷慨。沾。襟。廢。朝。三日。中。使。護。葬。詔。兵。部。侍。郎。李。貽。業。持。節。冊。贈。太。尉。賜。

諡曰威。卽以其年秋九月十五日。備鹵簿鼓吹。葬於濠州鍾離縣大化里之原。禮也。前夫人李氏。後夫人隴西郡君李氏。皆太師趙忠懿王女也。賴鄉仙李。卽開柱史之源。參野飛龍。遂紀宗卿之籍。勳庸六鎮。時高謝氏之門。師範兩朝。室有班姬之訓。荃蘩蘭蕙。映戚里以芬芳。藻荇蘋蘩。播婦儀而昭哲。門內之理。夫人有焉。子八人。二子幼。長子節。早亡。次範。濠州刺史。次簡。次策。次霸。時未仕。次符。秘書郎。或得公之政事。或得公之兵鈴。學禮學詩。惟忠惟孝。皆推酥酪之味。咸有芝蘭之芳。所謂積善餘慶。世濟其美者也。惟公山河龍鳳。凝粹彩於神姿。緯候風雲。集淵謀于靈府。議公家之事。不以身爲。行將軍之令。每由剛克。卒祖禰之成業。可謂聿修膺牧伯之寵章。訖無虛授。所以始終匪玷。福祿攸歸。同族之閒。朱輪結軌。季父仁瞻。作鎮夏口。弟崇怙崇僖。更典晉陵。其餘將軍列侯。中郎校尉。銀黃照爛。光浮通德之門。珩珮陸離。響雜高陽之里。苟非自天攸相。與國無疆。其孰能與於此乎。向使享大年。敷遠畧。鴻飛鵬舉。功未可量也。天命不然。能無永悼。昔者荊州從事。猶牽墮淚之悲。大宰舊寮。亦有懷鉛之請。況乎世功丕顯。揭日月以高驥。帝念惟隆。會雲龍而下濟。欲垂萬葉。可不務乎。微臣職典絲綸。詞非清潤。持赤管以承詔。拂貞珉而投刃。庶使蚩蚩萌隸。觀迹而長懷。眇眇來雲。披文而盡信。其銘曰。

惟彼陶唐。有此冀方。自天祐之。後嗣其昌。侯遷魯縣。帝隱芒碭。猗邠大族。嵩華配長。瀕瀕彭城。興我遐祚。顯顯山陽。著我高祖。高祖伊何。仁而不遇。慶鍾令孫。聿來用武。皇運中否。諸侯起爭。浚郊怙亂。淮壖不庭。吳王奮發。受鉞專征。命我顯祖。守濠之城。濠城嚴峻。濠兵驍勇。顯祖帥之。羣兇振恐。將軍下世。邊烽亦聳。乃命象賢。荷時之寵。荷寵伊何。載大其功。蠡蠹梁寇。言言穎壩。是誠是俘。兵無頓鋒。爰有奇略。集于威公。

威公嗣侯。不墜其訓。戎事之隙。民功是振。爲之中典。著之令問。泗上風移。京師河潤。帝曰伯舅。予嘉乃勳。扞境則武。安邦則文。乃降王姬。于爾慶門。乃改乘轅。于彼西軍。西軍何在。鎮彼衡靈。威公來思。式遏寇虐。胡馬已遠。將星俄落。百身寧贖。九原誰作。明明天子。惻愴聞聲。歲云秋止。返旆遲遲。二藩士女。泣涕漣漣。而賢侯逝矣。吾誰與歸。黯黯塗山。湯湯淮浹。駟馬悲鳴。滕公所閉。甘棠勿翦。召伯攸憇。是用刊碑。永告來裔。

唐故德勝軍節度使檢校太保同中書門下平章事扶風馬匡公神道碑銘

夫道被萬物。處其中者。是曰賢人。功濟橫流。讓其先者。方稱君子。施之則開物成務。與廣業而同歸。卷之則保族宜家。垂令名於必大。是以長沙吳芮。繁祉邁於三雄。南陽賈復。賈寵隆於四七。歷代已降。靡不由之。迄于我朝。則扶風公其人矣。公諱仁裕。字德寬。其先扶風人。子孫或從官於徐方。今爲彭城人也。粵若萬邦。作乂益有佐禹之功。因封受氏。奢有卻秦之績。公侯必復。關西靡孟起之威。文武未墜。南郡被季長之德。存乎譜牒。無俟闡揚。曾祖某。祖某。皆以鹵介之氣。當屯蒙之運。不履王侯之事。歸全父母之邦。考某少負雄名。爲武寧軍裨將。才高位下。厥用弗昭。累贈尙書右僕射。傳曰。有明德而不顯。當代後必有興者。故其餘慶。集於我公。惟公克稟粹靈。夙彰奇應。方娠而神貺協夢。旣生而異氣充庭。宗族相驚。里閭交慶。識者謂之曰。不意英物。復鍾此兒。天將啓之。馬氏爲不朽矣。長而爽邁。輔以博聞。善無常師。器以虛受。及皇圖中否。赤縣淪災。戰國縱橫。爭求策士。孔門堂奧。半作家臣。公負先見之明。審擇君之義。舉旗沛澤。卽授中涓。定難京城。仍參主簿。而上方從歷試。允懋臣功。經綸草昧。諮訪遺闕。公親侍左右。日奉謨猷。能知四國之爲。且掌賓客之禮。勞無伐善。夙夜不離于公。美則歸君。議論莫闕其際。出入二紀。懋肩一心。車服

以庸寵祿來假。乃升朝序。乃掌禁師。以左領軍將兼總丞相之兵衛。申令惟一。任衆惟睦。推以恩信。先之勤勞。周廬既嚴。軍事以簡。考績稱最。帝用嘉之。遷檢校司徒。遙兼宿州刺史。夫千騎之長。可以圖功。百城之權。可以觀政。中外迭處。抑惟舊章。卽授楚州刺史。本州團練使。旬服之際。邦賦是繁。長淮之衝。戎寄爲急。公奉揚王略。遵舉詔條。八不易方。計日而治。徵爲右衛大將軍。復領舊兵。以衛相府。董齊之略。有踰于初。明年改右金吾大將軍。以扶風縣三百戶爲封邑。執金之職。歷代雄重。綿祀虛位。公首居之。內訓卻非之士。外察苛留之禁。熊羆宣力。輦轂無塵。及上允膺內禪。光啓建業。寺府軍衛。半存舊京。委公留臺右師。俾率東夏。卽遷檢校太保。改右天威副統軍。進爵爲伯。陝服從入。公有力焉。及參告類之儀。益光求舊之舉。寵開幕府。遙領徐方。進封郡侯。定食千戶。左輔之地。王業所基。藩屏京師。惟公攸賴。乃移使節。往鎮京口。公慈惠著于郡國。威德洽於士心。由是齊人向風。期年報政。加同中書門下平章事。廬州節度觀察等使。自南北分隔。戎華交馳。合肥之郊。常制衝要。故有台階之命。以增外閫之威。公於是謹斥候。審號令。習組練之士。則聲如飈馳。嚴堡障之備。則勢若山立。虜不敢犯。邊是以寧。而察俗之方。如南徐之理。方當矢謨。帷帳薄伐。關河渡江之誓。旣陳。源渭之舟已具。嗚呼。良圖未展。景命不融。春秋六十有三。昇元六年閏三月五日。薨于廬州公署。上省奏震悼。廢朝三日。卽用玄甲之數。式擬鐵山之功。給于官司。臨以中使。奉常以視履。考祥之義。循貞心大度之美。詳協公論。易名曰匡。卽以其年四月七日。備鹵簿儀衛。葬於廬州合肥縣鄉里。禮也。公娶同郡萊氏。封彭城郡君。麗穠李之華。親采蘋之職。理內協鵲巢之詠。從貴有魚軒之華。某年月日。先公而逝。嗣子右弓箭庫使光庭。束頭供奉官光祚。閣門承旨光紹。皆稟義方。無忝遺烈。

家承膏梁之後。而恭順克修。職在綺紈之間。而雅素自若。君子謂扶風公。其有後乎。夫碑頌之設。有自來矣。琬琰之細。既垂於茗華。盤盂之微。又參于警戒。若乃道合天眷。忠存王家。累輔翼之功。而鐘鼎之報。罔闕。享將相之賞。而帶礪之誓。弗渝。時無閒言。沒有餘慶。故其宗廟之紀。金石之銘。昭示來雲。不可誣也。小臣不學。奉旨刊文。庶使計功稱德。代遠而愈信。披文相質。事久而彌芬。覘首之懷。靡盡。昆吾之烈。長存。嗚呼哀哉。其銘曰。

益作朕虞。實曰元凱。崇基締業。明德攸在。維趙于蕃。封移族改。祚實刊山。源長巨海。因枝別代。覩渭來遷。導德絳帳。勤王跼蹙。流光襲祉。映後昭前。懷黃結紫。著簡成編。誕發材英。肇惟明懿。鼎角膺奇。龜文履異。博容汎愛。入孝出弟。運有屯蒙。器無凝滯。爰初發迹。雲從潛泉。濯纓職幟。拊翼中涓。良驥處服。忘歸在絃。樞機言行。無競惟賢。繾綣從君。匪伊履屐。勤愆前爰。周旋陸戟。居國必聞。在身無擇。帝爰允諧。胙乃丕績。惟彼淮泗。疆以獯夷。惟此京浙。續以邦畿。封淮表浙。惟惠惟威。椒蘭在俗。轅轍興思。羣舒待理。獫狁孔棘。帝謂侯氏。纘服新息。式固爾猷。惠此廬國。乃陟台階。俾藩于北。龍旂四牡。鉤膺鏤錫。命服有煒。光聲載揚。獷狄弭耳。蚩毗嚮方。上儀像物。下謚飛蝗。梁木或顛。通川有逝。長城既嚴。哲人永瘁。像著雲臺。風存遐裔。輟春盡思。瞻山隕淚。信結殊俗。悲深上旻。丹碑既刻。列鼎書勳。祁連不泯。庸器長存。丕顯百代。惟子有臣。

徐騎省集卷第十二

茅山紫陽觀碑銘

池州重建紫極宮碑銘

唐故道門威儀玄博大師貞素先生王君之碑

袁州宜春縣重造紫微觀碑文

舒州重建文宣王廟碑序

茅山紫陽觀碑銘

臣聞太初之氣。其生也無始。衆妙之門。其本也無名。積而成形。散而爲器。乾坤運之而兩儀位。王侯受之而天下貞。是故斷鼈鍊石之功。絕地通天之業。衣裳軒冕之后。干戈揖讓之君。雖復遭罹異途。步驟殊致。莫不契協於神明之域。飲和于道德之原。廣無爲之爲。執無象之象。萬物恃生而不有。百姓日用而不知。其迹也。則格天光表。化人而成俗。其本也。則收視返聽。全真而養身。至其玉檢登封。蘿圖啓後。游神象外。脫屣區中。鑄金鼎而乘白雲。登寒門而立玄極。闕宮清廟。式嚴觀聽之場。玉洞金壇。別啓下都之所。由是靈符總集。真籙岐分。三元八會之文。潛通髣髴。七映九華之室。密擬形容。足以徼福應於含生。致孝思于時事。望人繼作。靈今上相望。故茅山紫陽觀者。今上敬爲烈祖孝高帝。元敬皇后之所重修也。爾乃星紀儲精。下爲峻極。河圖著錄。懸示禎期。自道氣融明。真科流衍。治化宏開于赤縣。符圖廣被於名山。而華陽洞天。實羣仙之都會。金陵地肺。又三茅之福鄉。左憑柳汧。煙霞韜映。右帶陽谷。川原隱鱗。伏龍灑逆。鎮以雷平之嶺。鬱岡迴合。浸以護軍之潭。郭真人叩絃之池。不遷留岸。許長史煉丹之井。自冽寒泉。白霧紫烟。

照映其上。飈輪鶴馭。往來其間。高真七人。四處茲地。其後貞白先生。以玄德應世。肇開朱陽之館。以玉書演秘。爰立昭真之臺。堂靖疏基。玄洲之蹤。可擬。生徒廣業。白龜之迹。斯存。金紐鳳羅。代相傳授。龍車虎駕。世有飛升。及玄靖先生。以冲氣含和。體庚桑之歲計。玄宗皇帝。以尊師重道。屈軒后之順風。由是天眷遐臨。皇心密契。惟新舊館。再易華題。丹鼎洞經。潔修無倦。芝泥龍簡。投奉相望。戶邑之民。豈止奉明之縣。樵蘇之禁。寧唯柳下之墳。故得雲物告祥。芝英表瑞。小周王之瑤水。徒詠空歌。異漢帝之猗蘭。唯陳甲帳。自茲厥後。代有修崇。上士名人。時時解脫。雲輶羽蓋。往往降靈。皆著之金石。播于謠頌。嗟乎。四時代謝。天道盈虛。雖九氣長存。歷劫以資其融結。而三階有象。隨時因表。其晦明則斯觀也。將世運以汗隆。與皇圖而升降。赤明未啓。猶多閭戶之悲。白水方興。始漸高門之慶。孝皇帝猶龍孕德。指樹垂陰。應樞電之殊祥。有天之壽表。甘盤就學。和光於百六之初。庖正分官。利見於九三之際。賓門納揆。有大造於當時。彤矢拔弓。光至公於四海。由是法堯受命。祀夏中興。補西北之不周。應東南之王氣。御明堂而揖羣后。輯瑞玉而覲諸侯。既治定而功成。更憂深而思遠。奔馭朽。不以黃屋爲尊。旰食宵衣。唯以蒼生是念。知無爲之無敗。體上德之不德。凝神姑射。端拱穆清。政舉其中。事至而應。愛民重法。敦本訓農。偃革銷兵。守好戰必危之誠。卑宮菲食。懼以人從。欲之譏。故得百寶効靈。三辰薦祉。遠無不屈。邇無不安。少康光武之功。獨高帝錄。貞觀開元之業。更啓孫謀。今上承積德之基。法自然之道。變化無方之謂聖。神武不殺之謂仁。學洞精微。守謙光而冲用。明昭隱伏。體大度以包荒。動則庇民。不矜功而尙智。靜惟修政。恆務齋而勸分。聞善若驚。每賞秋毫之細。容光必照。寧遺行葦之微。化洽風隨。時和俗厚。常以天下者烈祖之天下。憲章者昇元

之憲章。垂裕無窮。永懷罔極。衣冠原廟。未足盡思。聲樂娛神。良非至敬。緬慕在天之駕。因嚴訪道之宮。尋
屬長樂上仙。濯龍興感。載詠生民之頌。思弘十亂之功。乃眷靈岩。誕敷明詔。發虞衡之吏。集般爾之工。執
藝駿奔。飭材庸至。果園之柰。供其龔斲。北邙之土。給其圻塿。乃新秘殿。秘殿孔碩。黯其靈霽。屹其穹窿。璇
題互照。以晶瑩。珠網交疎。而窈窕。震殷雷於滴瀝。拖宛虹於楹軒。忽陰闔而陽開。乍霞駁而雲蔚。儼若虛
皇之御。穆然太上之容。疑馭氣以迴。躋眇凌雲而遐觀。乃立高門。高門有闕。擬金闕之觚稜。洞朱扉而煥
照。龍章鳳篆。以之題署。霓旌絳節。茲焉出入。乃建兩序。紛邈迤而重深。乃起層樓。邈茗亭而顯敞。北彌郭
阡之路。南巨姜巴之衢。赫光景以燭坤。麗丹青而藻野。速如神運。恍若化工。每至日薄星迴。歲聿云暮。桐
華萍合。春已載陽。赤城旋軫之初。白鶴會朝之際。都人士女。舉袂成帷。襲靈風而共洽。天和仰雲今上御名而
方知帝力。豈止百年猶畏。獨識軒轅之臺。三壽作朋。永闕姜嫄之廟。大哉至矣。無得稱焉。夫妙本太無。名
垂不朽。挺窮神知化之盛。然後顯通幽洞。靈之微立。尊道貴德之教。然後致還淳返朴之理。漸於人爲富
貴。被于樂爲聲詩。告於太史爲典冊。著於豐碑爲銘篆。耿光不顯。其在茲乎。爰命下臣。敬書令德。其詞曰。
邈矣至道。悠哉妙門。眴眴無物。綿綿若存。是生清濁。爰闢乾坤。乃生之民。乃作之君。德盛惟皇。功高曰帝。
訪道峒山。求珠赤水。下或知有。時稱至理。三正循環。鴻圖資始。於惟基命。赫矣皇唐。運啓再造。天降百祥。
玄德升聞。既壽永昌。時乘白雲。至於帝鄉。穆穆嗣君。雄雄下武。禮極配天。教明尊祖。明發盡思。優然若覩。
敬佇仙遊。式嚴靈宇。靈宇何在。句金之陵。丹霞夕映。白霧朝凝。重屋四注。崇臺九層。雲生窈窕。日麗觚稜。
三秀交陰。五便分徑。丹沙流液。玄洲立靖。柳谷緝煙。雷池寫鏡。彷彿九華。依稀七映。至誠則感。有應斯來。

含真上客。蕭閒逸才。鸞輪條忽。晨葢徘徊。浮黎認土。方丈凝臺。昔在聖人。建言敷教。救物以慈。奉先以孝。敬佩真契。恭聞大道。顯妙用於言象。鼓淳風於億兆。薦純嘏于無窮。仰皇猷之克紹。

池州重建紫極宮碑銘

域中之大曰道。百行之先曰孝。故孝心充乎內。必道氣應乎外。於是有聿修之德。追遠之懷。揚名顯親之善。集靈徵福之舉。用於邦國。則臣節著。施于家庭。則子道光。以之爲政。則民從。以之薦信。則神降福。然則壇館之作。焉得已乎。池州紫極宮者。本東晉之普明觀也。浸之以秋浦。鎮之以齊山。北望陵陽。竇真人飛升之所。南瞻九子。費徵君棲隱之鄉。玄風徘徊。精氣交感。代有奇士。居爲殊庭。旣奉玄元之御。因崇紫極之號。治亂迭運。隆替不常。戊午歲。太守陳公始臨此郡。歷堦垣而歎息。步遺址而顧瞻。役不徒興。義將有屬。公媯水洪派。太巨舊族。重世避地。徙居建安。祖德門風。冠映圖牒。王師拓境。閩方卽敍。撫納歸附。旌訪賢能。惟我嚴君。首奮奇節。芟夷逋穢。弘濟艱難。偏師所指。無往弗克。故十年之間。由裨將。歷郡守。登上公。建齊壇。功名之盛。近古無匹。及王室多故。邊城不寧。復遣公督舟師。率諸將。萬里赴援。三年轉戰。算無遺策。兵不頓鋒。威行軍中。勳在王府。舍爵再命。聿來是邦。於是解甲釋兵。頒條布政。事從中興。民用綏和。會文賦詩。彬彬然有儒者之風矣。俄而王妣國太夫人凶問至。公孺慕出次。烝烝永懷。以爲柔儀慈訓。實大吾族。鞠育仁愛。兼倍諸孫。嘗藥弗親。執紼且違。欲報之恩。王事靡盬。思所以薦社於冥漠。求神於希夷。非龜山之宮。必易遷之館。然則琳房金闕。瑤壇檜井。迎列真之御。資闡風之游。仙經不誣。勝事可作。于是瞻星揆日。飭用庀徒。散廡下之金。出荆門之絹。人百其力。工薦其能。易其傾頽。化以壯麗。成於心匠。不窳

素期。自某年月鳩工。至某年月訖事。凡出錢若干萬。築室若干間。正殿當陽。三尊負屐。享列宿之位。于東序。設三官之堂于西廂。嚴饋奠之室於良維。所以盡時思之禮。敞閑宴之亭於乾位。所以極坐忘之懷。矢棘雉飛。霞駁雲蔚。璇題行月。煥城邑之晶光。飛臺白日。壯江山之氣色。如是則騰歎之駕。不得不臨。臍蠻之福。不得不集。想見武夷之會。足申令伯之心。至矣哉。善慶孫謀。無得稱已。嘗試論之曰。神仙者。君子之所歸也。故真誥云。至孝至貞之人。皆先受靈職。次爲列仙。歲登降其幽明。如人間之考績矣。若乃盡忠於君。純孝於親。敷惠於民。歸誠於仙。而不得與夫餌芝朮。醮星斗者。同躋眞階。吾不信也。勗哉夫子。其惟有終。鉉扈駕南巡。致禮名岳。假道過此。仰瞻久之。博我以文。輒不遜讓。其銘曰。

我經池陽。池陽旣康。化以至道。民知嚮方。乃新闕館。以奉虛皇。君子薦祉。則惟其臧。我登新宮。新宮旣崇。深嚴耽耽。丹彩彤彤。九華散影。十絕盤空。若在宣岳。如游闐風。至道不煩。玄關甚邇。孝享誠敬。奉時祖妣。善慶純嘏。施於孫子。三茅二許。夫何遠已。流芳金石。永永千祀。

唐故道門威儀玄博大師貞素先生王君之碑

原夫至道之先。邈哉稀矣。書契已降。可得而云。黃帝堯舜。澄其源。故垂衣恭己。在宥天下。伯陽仲尼。導其用。故建言立德。憲章無窮。赤松羨門。神而明之。故輕舉上賓。留侯商皓。變而通之。故解景滅迹。順是以下。莫不由之。故有搢紳端委。利萬物于廟堂之上。萬巾蕙帶。全陰功於塵埃之外。隱顯殊致。趣舍同歸。其人。有終。其魄不死。闐風玄圃。羣帝之密都。赤城華陽。仙聖之治所。光靈臍蠻。若在左右。仁人君子。往往至焉。見之於貞素先生王君矣。君諱棲霞。字玄隱。華宗繼世。積德所鍾。生於齊得泱泱之風。長于魯習恂恂之

教七歲神童及第十五博綜經史。闕黨童子。靡敢並行。東方諸侯。爲之前席。而仙材靈氣。稟于自然。塵纓世縈。不可拘係。每名山獨往。神契感通。奇怪恍惚。衆莫能測。天祐丁卯歲。避亂南渡。至于壽春。感四海之分崩。想八公之遺跡。于是解巾名路。委質玄門。問政先生。聶君師道。見而奇之。授以法籙。是日彩雲皓鶴。翔舞久之。旣而窮方士之遐遊。得東鄉之勝境。道無不在。善豈常師。又從威儀鄧君啓遐。受大洞眞法。玄科祕旨。動以諮詢。福地仙源。因而棲託。誅茅穿徑。枕石漱流。身旣隱而名愈彰。道已寂而節彌苦。桑田自改。桂樹長留。烈祖孝高皇帝。方在賓門。實來作鎮。紫氣表眞人之應。青雲符好道之占。君鵠書被徵。褐衣來見。談天人之際。講道德之源。靡勞牧馬之迷。自契順風之問。因從敦請。來止建康。有玄眞觀者。陳宣帝爲臧於先生之所作也。殿堂岑寂。水木清華。遊焉息焉。以遂其好。竹宮望拜。玉牒秘詞。叩寂求真。必君是賴。嘉祥靈應。世莫得聞。聖歷中興。恩禮殊重。加金印紫綬。號玄博大師。烈祖嘗從容謂君曰。吾不貪四海之富。唯以蒼生爲念。君對曰。夫古之聖人。修其身而後及天下。天下待一人安而後安。今天子勤勞萬機。忘寢與食。身且不能自治。豈能治蒼生哉。帝善其言。以百金爲之壽。其識度亮直。又如此焉。今上嗣濟淨之基。尊玄默之化。諮諏賓敬。有踰于前。而君茅嶺夙心。老而彌篤。比年抗表。請歸舊山。優詔惜之。又加貞素先生之號。旣而玉棺有命。紫素告期。葛洪見留。不成大藥。少君捨去。先夢繡衣。保大壬子歲。夏四月甲寅。隱化於玄眞觀。春秋六十有二。恩旨痛惜。賻錢二十萬。道俗嗟慕。會葬數百人。初君之處茅山也。卽良常洞之前。相雷平山之下。披榛剪穢。面壑臨流。除地爲壇。表朝眞之位。因上設隧。卜安神之室。至是歸葬。符夙願焉。六月發自京師。泝淮而上。時畿內久旱。川塗可揭。是日大雨洪注。騰波卻流。蒼長隄。踰重堰。飄

然利涉人不知勞。昔周王有樂水之朝。宣尼有四川之應。校靈比德。其殆庶乎。君傳法度人。數逾累百。有若玄真觀主朱懷。名先入室。道極嚴師。首座孫仲之。章表大德。劉德光。素受經法。預聞玄祕。永懷在三之義。願垂不朽之風。威儀王可德。首座陳希聲。並仰高山。共刊貞石。鉉也不佞。夙承教義。雖復仙凡異迹。靜躁殊途。而誠心所感。素交斯在。徘徊祠宇。邈若山河。敬書峴首之悲。以俟遼城之歎。其詞曰。

於鑠子晉。上賓於天。亦有令孫。窮神體玄。昔我來思。世稱其賢。今我往矣。人謂之仙。至道希夷。孰知其然。華陽洞府。句曲風煙。林芳橘葉。地卽芝田。披文相質。億萬斯年。

袁州宜春縣重造紫微觀碑文

若夫聖人有作。沒而不朽。畏其神而向其臺。思其治而戀其樹。故尊道貴德。玄化所以無窮。高山景行。後賢所以不乏。妙門光啓。上士勤行。書契已還。煥乎丹青者可數。邦域之內。表厥宅里者相望。時運與并。人境交得。教之大者。其可忽乎。袁州宜春縣紫微觀者。蓋有晉鄧表真人上升之地也。左鍾山之奇峯。右洪陽之仙洞。巉巖千仞。蔽虧日月。窈窕百里。畜洩風雷。迴岡層巒。崇其基坳。激湍澄谿。宜其氣象。真靈之所游集。邑居之所走望。皇統中。否。下國尋戈。齊臺盡傾。魯宅多壞。鹿巾霞帔。藐矣流離。藻局黼帳。翦焉墜廢。而周德未厭。漢中仍存。舊物旣甄。墜典咸復。惟茲靈境。將俟其人。道士孫去華。殖本康樂之川。從師新吳之邑。清心煉氣。絕粒忘形。三十餘年。其道彌固。保大中。自所居華林山館。南遊此鄉。望佳氣之鬱葱。躡境垣之靡迤。慨然歎息。誓志終完。於是面壑依巖。披榛築室。勤身而感物。應迹以化人。鄉閭風隨。曉信日至。節以致用。時而命工。二十餘年。厥功克就。紺殿特立。重廊迴合。闢朱戶以瞰野。峙瑤壇而在庭。至于像設。

之尊嚴。仗衛之精麗。廚廩之充物。居室之清閑。洪纖必周。奢儉中度。美矣顯績。昭哉素誠。夫褒善稱伐。春秋之旨。雖在遐遠。人其捨諸。監察御史李君思義。奉使宜春。稅駕斯館。覩厥成今上。嘉其秉心。碑而揭之。以文求我。言意難盡。強爲之銘。銘曰。

袁君之賢。此州乃名。鄧氏之仙。此觀乃形。春華麗絕。真氣融明。允矣奧壤。居然福庭。運逢交喪。地有遺靈。美哉孫師。興廢扶傾。重開金籥。還飛火鈴。煙霞聚散。飈歛逢迎。精誠所感。大道方行。用刊樂石。永告雲局。

舒州新建文宣王廟碑序

鉉嘗讀文中子所著書。竊觀其建言設教。憲章周孔。有道無位。故德澤不被於生明。然而門人弟子。如房、魏、李、杜輩。皆遭遇真主。佐佑大化。元功盛烈。亦云至矣。猶以爲禮樂不興。未能行文。中子之道。嗟乎。使顏、閔之徒。遇貞觀之世。舉聖人之業。成天下之務。豈不益大乎。時運不並亨。聖賢不世出。可爲長歎。息已矣。夫太羹玄酒。足以通神明。而不能饒適口之味。大咸雲門。足以和風俗。而不能高娛耳之聲。五常六藝。足以興國家。而不能勝撻繪之數。釋柴合樂。足以祈永貞。而不能掩福田之說。李斯荀卿弟子也。而爲焚書之酷。德彝文皇上宰也。而沮王道之議。況其餘哉。故用兵以來。郊庠鄉塾。委而不修者有年矣。皇唐中興之一紀。天子乃崇學校。養庶老。舉六德。教胄子。旁達郡國。靡然向風。舒州古諸侯之封也。其地廣。其任重。太傅周公。舊勳碩望。來頒詔條。武以貞師。仁以行政。動必資於前訓。舉必順于人心。前吏部郎鍾君。頃登銓管之司。實參侍從之列。論思興治。必以名教爲先。洎從左官。來爲佐職。神交主諾。人無間然。始一年而早曠作。二年而百穀登。三年而上下和。旣富而教。爰修廢典。乃嚴社稷。則播殖之功報。乃祀箕畢。則風雨

之候時。乃卽饗堂。謁先聖。寢廟卑而將圯。袞冕陋而不度。政之大者。烏得已焉。于是庀功庸。示儀制。堂與戶牖。巍乎大壯。山龍藻火。煥乎有章。重門以深之。周垣以繚之。俎豆升乎筵。干戚由乎序。侏侏衆賢。是配是侑。肅肅燕毛。以衍以樂。閭伍之屬。耆幼之倫。惠澤漸乎肌膚。風教移乎情性。惜其所治者百城耳。推是而往。何所不至哉。鉉也不才。放逐至此。蒙地主之惠。接故人之懽。博我以文。宜無所讓。屬役旣具。冠蓋將畢。會鍾君召還京師。祖行之夕。視草以送。且曰。敬教勸學。非大君子不能行。計功稱伐。非大手筆不能任。吾友紫微郎韓君。卽其人也。託之銘頌。以永清風。

此
页
空
白

徐騎省集卷第十三記一

宣州涇縣文宣王廟記

復三茅禁山記

宣州開元觀重造中三門記

紫極宮新建司命真君殿記

楞嚴院新作經堂記

攝山棲霞寺新路記

常州義興縣重建長橋記

宣州涇縣文宣王廟記

昔夫子祖述堯舜。憲章文武。扶東周於已絕。拯蒼生於既墜。其迹屈而道愈大。其人亡而教愈遠。則生民已來。未之有也。其在祀典。法施於人。則祀之。矧褒聖之祀。其可忽乎。然則中人不足以語上。下士聞道而大笑。故斯教也。衰於戰國。廢於嬴政。漢魏以降。續而復絕。夫仲尼日月重昏。千祀非聖人孰能廓之。故斯教也。興於武德。盛於貞觀。極於開元。理自然也。兵興以來。大化陟替。先王禮器。委頓於勝廣之門。闕里諸生。悽惶於絳灌之下。矧厥祠宇。其存幾何。天之愛人。不當遂絕。皇統再造。六藝始修。太歲丙午。重熙在運。宣城雄鎮。帝之叔父在焉。故幕府之選。殊重。尚書郎吳君光輔。奉詔佐廉部。兼理於涇。既蒞事。乃被儒服。謁先師。闢荆棘。歷坵垣。以造於茅茨之間。仰瞻俯觀。喟然而歎。於是奉開元之成制。采頻宮之舊章。經之營之。是卜是築。惟新祕殿。儼飾睟容。入室升堂。森然如在。籩豆有位。賓主由序。表著咸列。門衛肅然。於是青衿零服之子。有從師觀藝之場。鯢齒鯢背之徒。識養老慈幼之節。欣欣然其化之大者歟。明年秋。君奏

計如京師。因得其實。嗚呼。聖人在上。羣才畢舉。使三代之風。得達於邑里。不其偉哉。余承君之歡。美君之志。刊石紀事。實於祠庭。後之君子。無忘企及其餘理。畝籍。察庶獄。闢汗萊。遏陂塘。則有考功之吏在。故不書於時。太歲丁未冬十月九日。尙書主客員外郎。知制誥徐鉉記。

復三茅禁山記

華陽洞天金陵福地。羣仙之所都會。景福之所興作。故其壇館之盛。薦享之殷。修奉之嚴。樵牧之禁。冠於天下。其所由來舊矣。聖厯中。微官失其守。望拜之地。多所荒蕪。若乃真靈翔集。玄貺胥蠻。興復之迹。必假異人。天祐丁丑歲。貞素先生王君棲霞。始來此山。恭佩上法。徘徊地肺。偃息朱陽。永懷舊規。期在必復。先生潛德內映。符彩外融。名士通人。道契冥會。凡縞紵之贈。脆信之資。悉奉山門。以成夙志。於是由良常洞。至雷平山。十里而近。於入萌隸者。盡今上贖之。芻蕘不得輒至。墟墓不得雜處。藝樹蔽野。植松爲門。川梁必通。榛穢必翦。建方壇於雷平之上。造高亭於良常之前。朝修有致誠之地。游居有稅駕之所。姜巴古陌。秦望舊封。肅然清光。復如開元天寶之歲矣。先是紫陽之右。有靈寶院焉。真臺故基。鞠爲茂草。先生殫罄資用。克今上御名。殿堂有開必洗。無遠弗屆。都督武陵康王。奉錢百萬。梁王造殿一區。向道之徒。咸助厥事。會未周歲。惟新舊宮。皆先生之力也。昔大隗致襄城之駕。庚桑化畏壘之人。是知道心惟微。其應如響。時則有若道士。經若虛。協規同志。是攝是贊。幹事以恪。感物以誠。積用不愆。斯實攸賴。先生以保大壬子歲。夏四月。悉書夫屋之數。疆畔所經。請命於京師。申禁於郡縣。以授茅山都監鄧君棲一。能事旣畢。數日而化。期命玄應。昧者不知。夫仙階感召。諒非一揆。若乃神清氣靈。骨籙標映。受之於天也。心虛器沖。玄德寔蔚。

基之於性也。昭真垂教。啓煥靈迹。行之於勤也。故策名紫素。飛步黃庭。流功儲慶。必參相合。然則先生之道。其殆庶乎。雖斂駕不留。冥升日遠。而高風可述。遺範在人。進而紀之。翰墨之職也。鄧君企慕前躅。見託直書。己未歲秋八月記。

宣州開元觀重建中三門記

夫清淨玄默。道之基也。宮館壇墀。道之階也。生知者。因基以成。御今上勤行者。升階而覩。奧故君子德業。玄挺仁慈。積中必廣。馴致之方。乃形兼愛之迹。爲科誠以檢其情性。爲象設以致其誠明。情性平則和氣來。誠明通則靈符集。由是登正真之境。入希夷之域。曠矣無際。薰然太和。斯實興化致理之方。還滄返朴之本。豈與夫延方士。尙祕祝。求長生。以自奉者。同年而語哉。宣州開元觀。遠擬清虛。獨標形勝。敬峰崇峻。鎮其後。句谿澄澈。經其陽。鍾一方淳粹之精。結三素氤氳之氣。當泰陵之尊道。揭聖厓於華題。藹爾殊庭。居爲福地。及運纏百六。數偶三災。雖棟宇不渝。而制度多闕。靈蹤必復。有待而興。主上嗣位之七年。皇室再造之一紀。今儲后徇臧札之操。讓德承華。體間平之賢。總戎藩服。首台司而握師律。鎮京口而領宣城。其爲政也。質于先正。諮於耆老。義以果斷。仁以發生。民力不偷。闕政咸舉。而斯觀路門久廢。遺址將蕪。非所以敬教尊祖。會昌建福者也。乃命執事。卽從經度。民多暇日。府有羨財。勤而不勞。成而勿亟。巨棟山立。層簷翼舒。六扉洞開。方軌並入。重廊助其迴合。祕殿表其深嚴。十絕之幡。拂文楣而絢彩。九龍之驂。軋金鋪而振響。瞻之者有凌雲之氣。經之者疑駕歛之游。信足以勵上士之進修。福蒼生於仁壽。旣而功宣納麓。望集撫軍。大壯之制。斯成。重離之位。亦正。貞符允塞。盛德宜書。道士孫洞虛。素業瀟深。至誠敦懇。發揚真

迹啓迪嘉猷。永爲不朽之功。願紀他山之石。宮臣執筆。以謹歲時。戊午秋九月庚申記。

紫極宮新建司命眞君殿記

夫金闕琳房。不可階而升也。惟至誠能通之。靈符景福。不可企而望也。惟至行能致之。故君子行道於時。宣力於國。敷惠於民。貽範於家。此人之極致。自天所祐也。又況考集靈之地。崇列眞之宇。薦納約之信。勵勤行之誠。然則希夷眇邈。超言象之表矣。有若故司空相國。馮翊懿公。承世功之緒。襲重侯之業。地親於副馬。美繼於緇衣。便蕃臺閣。夷險中立。不倚金石貫其心。唯力是視。風霜盡其節。故四綜會府。再踐中樞。三殿方鎮。一平邦土。慎終如始。沒有遺忠。激楚之樂雖窮。通德之門不改。嗣子太僕少卿俊等。祇奉慈訓。弗敢失墜。以爲公之純誠沖氣。本道家者流。而仁政令典。近浹於三茅之境。高齋甲第。夙鄰乎玄元之宮。故棲神植福。必先於是。爾其治城峻址。西州舊署。卜忠貞之遺隴。郭文舉之故臺。九原可作。勝氣如在。乃相形勢。補廢闕。建司命眞君之殿於宮之良維。披眞蘊以立程。集國工而考藝。瞻星揆日。不勞而成。崇高壯麗。重深藻繪。煥如也。凝旒端簡。負辰仍几。穆如也。珠幡絳節。紛披乎左右。空歌洞章。蕭寥乎晨暮。眞聖以之而臨御。純嘏以之而蕃錫。賢人啓後。孝子奉先。無以加於此矣。鉉始以事分通舊。從子弟之游。終以禁掖具員。陪僚屬之末。及公之啓手足也。復忝國士之許。辱寄託之任。知己之厚。何日而忘。短篇敘事。蓋感遇之萬一也。

楞嚴院新作經堂記

君子才足以治劇。惠足以安民。見危致命。以死勤事。有一於此。然後可以薦信於無方之神。儲慶於必大。

之門噫。楞嚴院經堂之作也。其庶幾乎平陽柴君諱進思字昌美故太尉中書令尋陽靖王之孫也。少而爽俊長而忠恪尤善騎射頗曉兵書靖王愛之出則典親兵居則專家政幹蠱之美宗族稱之王薨始爲公臣累遷旅帥鴻圖再造金革寢威上以其才能可任故以爲內宴副使乘軺建節將命四方盤根錯節所至皆治改鄂岳觀察巡官知永興縣事縣有山澤之征權管之利歲終考績倍於前人遷秦州軍事判官兼營田鹽監平蠹政決庶獄勞農督課潔已律人民不告疲公有餘利除勸農使復監池吉二郡護武昌軍千里晏安上流靜謐會梁人入寇我武未揚東畿陷沒羣情震駭命君爲行營應援軍使率舟師數千鼓行而東平難濟口復海陵郡於是淮泗之地聲勢始通乘勝長驅因逼隋苑前茅接戰羣帥後期振臂奮身有死無二雖破竹之勢敗於垂成而東道清夷本由君之一舉也江都剋復歸葬京師天子憫焉贈左千牛衛將軍賻贈加等禮也嗣子殿前承旨廷遇等棘心在疚荼蓼兼倍以爲苴麻苦肉飾哀之期有終蒸嘗封樹追遠之禮有數復欲圖不朽之績徼無邊之福則金仙之教世之所崇宗旨在於經文威容存乎像設於是擇奇勝之地補闕遺之事御名上經堂六間塑地藏菩薩像一軀几席什器之類華而備精而固眈然其質煥乎其章深嚴足以遠世喧虛明足以味玄旨其全節之風也如彼其集靈之所也如此然則冥冥之祐縣縣之慶豈誣也哉余頃歲左官海陵君盡傾蓋之分感忠臣之事主嘉孝子之奉親刻石紀事以聳善也援筆悽愴無心於文保大丁巳歲春三月日東海徐鉉記

攝山棲霞寺新路記

棲霞寺山水勝絕景象瓌奇明徵君故宅在焉江令公舊碑詳矣高宗大帝刊聖藻於貞石紆宸翰於璿

題煥乎天光。被此幽谷。先是茲山之距都也。五十里而遙。方軌並驅。崇朝可至。及中原今上亂。多壘在郊。野無牧馬之童。岐有亡羊之僕。義祖武皇帝潛龍茲邑。訪道來游。始命有司。是作新路。金椎既隱。玉馱言還。桐山之駕不追。回中之道亦廢。於戲。聖人遺迹。必將不泯。微禹之歎。夫何逮哉。保大辛亥歲。時安歲豐。政簡民暇。粵有寺僧道嚴。名高白足。動思利人。百姓莊思。惊家擅素。封積而能散。嗟亭候之不復。憫行旅之多艱。乃相與翦荆榛。疏坎窞。闢通衢之夷直。棄邪徑之迂迴。建高亭於道周。跨重橋於川上。鑿甘井以救渴。立名表以指迷。草樹風煙。依然四望。峰巒臺榭。肅肅前瞻。由是江乘之塗。復識王畿之制矣。余職事多暇。屢游此山。喜直道之攸遵。嘉二叟之不懈。爲文刻石。用紀成功。俾後之好事者。以時開通。隨壞完葺。此碣有泐。斯文未湮。不亦美乎。其年八月一日。兵部員外郎。知制誥徐鉉記。

常州義興縣重建長橋記

聖人作川梁以濟不通。舟車所及。纜連棋布。若乃形勝傑大。名聞天下者。亦無幾何。陽羨長橋其一也。夫英賢之所躔次。邑居之所瞻望。山川之精粹。宅焉里城之神靈。憑焉廢而興之。圯而葺之。豈惟備政。足以徵福。是橋也。徵諸圖牒。則後漢邑令袁君創造。國朝永泰中。令丘君新之。其他無聞焉。中興之初。邑有義夫曰吳濛。吳瀆。率以私帑。備加營今上。人賴其利。踰三十載。丙辰歲。國步中梗。百越寇邊。邑人敗之。燒營而遁。飛餒旁及。宏梁半摧。甲寅歲。著作佐郎劉君來爲邑長。視其制度。知非民力之所能濟。乃狀其事。白於有司。上聞嘉之。詔賜錢八十萬。君信而好古。寬而得衆。尉盧倩。鼎甲餘慶。俊造策名。政是以和。事無不舉。乃相與敷王澤。因民心。備物致用。程功揆日。器利工善。材良事時。戊辰歲冬而栽。明年暮春而畢。長五

十步。廣七步。對縣樓而直出。跨荆谿而橫絕。丹雘其飾。宛偃蹇而虹舒。崇高其勢。邈蒼亭而山立。朱輪方軌。駟馬連騎。營營市井。憧憧往來。有衽席之安。無揭厲之患。昔者乘車濟涉。聖人謂之無教。橋梁弗修。賢相知其不能。以今方古。勝負分矣。夫書云考績。傳載稱伐。庸庸善善。其可廢乎。刻之貞珉。以示來者。庚午歲春二月十五日記。

此
页
空
白

徐騎省集卷第十四 記二

重修徐孺亭記

喬公亭記

毗陵郡公南原亭記

劍池頌

九疊松贊

硯銘

野老行歌圖贊

四皓畫贊

許真人井銘

高侍郎畫象贊

文獻太子哀冊文

齊王贈太弟哀冊文

重修徐孺亭記

至矣哉。天之愛民甚矣。雖數有治亂。而常生聖賢。故得其位。則功加于時。舛其運。則教垂于後。雖銷聲滅迹。全身遠害。不德而德。普逃名而名揚。擁篲築宮。禮重于列國。式閭表墓。道光於無窮。舉善而教。政之大者也。恭惟我祖。炳靈南國。舊宅界乎仙館。高臺峙乎澄陂。孺亭之稱。海內瞻仰。名公良牧。代加崇飾。千載之下。猶旦暮焉。頃屬邦君。非才。敗我王度。翦焉層御。今上鞠爲茂草。噫。百世之祀。誰能廢之。庚申歲。始建王都。辛酉歲。遂迂清蹕。肆覲羣后。疇咨先賢。餘基未傾。偉人將至。旣而鼎湖在御。桐圭錫壤。丞相司空。鄧王以茂親之重。膺分陝之權。思老成之典刑。仰高山之景行。罔言而信。不肅而嚴。乃命經營。將從締御。今上九成方起。百堵未周。甲子歲。入秉國鈞。以武昌連帥。侍中濟南公。代司宮籥。公致用以武。從政以文。祇奉蕭

規率由周禮。再廣成制。詳考舊基。夷坎窞而就平。裨崖岸而增固。乃崇堂奧。乃加藻績。右巖罇坳之序。左設庖膳之區。前臨康莊。旁眺城闕。平湖千畝。凝碧於其下。西山萬疊。倒影於其中。依然懸榻之場。想見致芻之狀。與夫洪崖之館。絢綵於煙霞。滕王之閣。騫飛于雉堞。南州之物象備矣。前哲之光靈萃焉。嗟乎。君子興一役。建一事。于時必可頌。于後必可觀。茲亭之作也。都人朋悅。過賓矚目。紀于方國之史。播于樂職之詩。鉉也。幸承燕翼之謀。獲參翰墨之任。俾垂不朽。敢憚蕪音。

喬公亭記

同安城北有雙谿禪院焉。皖水經其南。求塘出其左。前瞻城邑。則萬井纒連。却眺平陸。則三峰積翠。朱橋偃蹇。倒影於清流。巨木輪囷。交陰於別島。其地豐潤。故植之者茂。遂其氣清粹。故宅之者英秀。聞諸耆耆。喬公之舊居也。雖年世屢遷。而風流不泯。故有方外之士。爰今上經行之室。回廊重宇。眈若深巖。水瀕最勝。猶鞠茂草。甲寅歲。前吏部郎中鍾君某。字某。左官茲郡。來游此谿。顧瞻徘徊。有懷創造。審曲面勢。經之營之。院主僧自新。聿應善言。允符夙契。卽日而栽。逾月而畢。不奢不陋。既幽既閑。馮軒俯盼。盡濠梁之樂。開牖長矚。忘漢陰之機。川原之景象咸歸。卉木之光華一變。每冠蓋萃止。壺觴畢陳。吟嘯發其和。琴棊助其適。郡人瞻望。飄若神仙。署曰喬公之亭。志古也。噫。士君子達則兼濟天下。窮則獨善其身。未若進退以道。小大必理。行有餘力。與人同樂之爲懿也。是郡也。有汝南周公以爲守。有潁川鍾君以爲佐。故人多暇。豫歲比順成。旁郡行再雩之禮。而我盛選勝之會。鄰境興閭戶之歎。而我賦考室之詩。播之毗頌。其無愧乎。余向自禁掖。再從放逐。故人胥會。山水窮游。良辰美景。賞心樂事。有一於此。宜其識之。立石刊文。以示

來者于時歲次乙卯保大十三年三月日東海徐鉉記。

毗陵郡公南原亭館記

人生而靜性之適也。若乃廟堂之貴，軒冕之盛，君子所以勞心濟物，屈已存教，功成事遂，復歸于靜，用能周旋於道，常久而不已者也。有唐再造，俗厚政和人，多暇豫，物亦茂遂，名園勝概，隱麟相望。至于東田之館，西州之墅，婁湖張侯之宅，東山謝公之游，青谿賦詩之曲，白楊飲酒之路，風流人物，高視昔賢，京城坤隅，爰有別館，百畝之地，芳華一新，舊相毗陵公習靜之所也。其地却據峻嶺，俯瞰長江北，彌臨滄之觀，南撫新林之戍，足以窮幽極覽，忘形放懷。于是建高望之亭，肆游目之觀，睨飛鳥於雲外，認歸帆於天末，四山隱見而屏列，重城邈迤而霞舒，紛徒步而右回，闢精廬于中嶺，倚層崖而築室，就積石以爲階，土事不文，木工不斲，虛牖夕映，密戶冬燠，素屏塵尾，榭几黎牀，談玄之侶，此焉游息，設射堂于其左，淇方塘于其下，虛楹顯敞，清風爽氣，襲其間，椅岸縈迴，紅葉翠苔，藻其涘，至于芳草嘉禾，修竹茂林，紛敷翳蔚，不可殫記。凡廡庫之室，廚廩之區，賓燕所資，不戒而具，每良辰美景，欣然命駕，羣從子弟，結駟相追，角巾藜杖，優游笑詠，觀之者不知其爲公相也。古人有言，朝廷之士，入而不能出，況於輕鐘鼎之貴，狗山林之心，將相之權，不能累其真，肺腑之親，不能系其遁，道風素範，豈不美歟。又以鉉無事事之情，有善善之志，見徵拙筆，用勒貞珉，是時歲次辛酉冬十月日記。

劍池頌并序

歲次辛酉月躔仲冬，王人徐鉉，揚旌銅柱之鄉，稅駕劍池之廟，慨嘆靈迹，徘徊故墟，或曰：龍泉太阿，安得

爲寶出也不爲當世之用。佩之不免亡身之災。天下固有虛名而無實效者歟。愚以爲不然。夫聖人之於天下亦物耳。所稟受者異。故能與造物者並而爲天下王。是以聖人之作也。天不愛其道。地不愛其寶。同聲相應。同氣相求。人謀鬼謀。皆爲聖人用。無功無迹。豈尋常所能識乎。然則集陰陽之英。萃山澤之精。窮爐冶之妙。極鋒鏑之利。宜其冥合玄造。弼成聖功者也。昔黃帝法月滿而鑄鏡。用能照燭怪魅。辟除不祥。大禹收貢金以鑄鼎。使民知神姦。以遠不若。漢高祖佩斬蛇之劍。以撥亂除害。奄有天。是以三者皆人力所爲也。咸能輔佐興運。與時隱見。其可誣乎。在昔三分叔世。咸有昏德。天命將改。寰宇將同。斯劍知之。故靈發于下。氣浮于上。應帝王之符命。矚識者之觀瞻。亦猶伊尹負鼎於莘墟。仲尼動色于魯相。千載一會。聖賢所以汲汲也。向使晉武能誕若天意。克明峻德。判忠邪之路。絀驕侈之心。則賢能盡其才。神靈效其用。溇耀之烈可續。七百之期不爽。而王猷旣鬱。亂本旣成。百姓失望。羣龍沮色。於是斯劍也。委質張雷之鑑。一泄其憤。遠迹劉石之醜。復歸于潛。其出也。所以示神之不亡。其去也。所以示唯德是輔。則其爲用也遠矣。昔者周過其數。秦不及期。是知天命之精微。可以人事而延促。前哲論之備矣。若夫精眞之誠修于內。感召之致應乎外。自然而然。有道存焉。不可以智求。不可以言達。王者得之。則三五之功。其餘事耳。然則天下至寶。本非人臣所服。變化無方。神物之事也。忘身殉國。忠臣之節也。兩造其極。求仁得仁。復何怨乎。廟在豐城故縣。俯瞰池岸。壯武侯雷府君之象祀焉。去今縣四十里。而龍泉太阿之廟。別在中路。棟宇綿久。皆將傾頽。邑人朱暉等。洽重熙之化。感百世之祀。獎率同志。唯壽宮千載光靈。煥然如在。縣令孟賓于。尉孫舉。皆以文行之懿。中賢良之選。接武連事。惠此王畿。推誠於民。荐信於神。風雨不愆。耕鑿咸若。

先賢遺躅。其不泯也宜哉。是池廣不終畝。深才數尺。父老云。近歲旦暮。往往有雲霧蒙覆其中。恍惚之理。不可測已。今中興三葉。聖政惟新。豈非靈命孔昭。玄貺將集。天命不僭。弘之在人。使臣司言。敢告有位。乃爲頌曰。

周室旣衰。仁獸來臻。晉祚不融。龍劍効珍。神化無方。天命無親。德之不建。與運俱淪。歸潛厚載。以俟真人。惟劍之神。惟賢之識。湛湛靈沼。綿綿廟食。瑞氣常在。玄符靡測。垂茲頌聲。永永無極。

九疊松贊并序

同安郡南二十里。古城南隅。有松焉。拳曲擁腫。勢若九疊。交柯聳幹。無不蟠屈者。其地高迥。旁無壅闕。莫知其何由如是。或曰。下有頑石。根不得舒。氣脉債輿。故爲此狀。好事者以爲盛觀焉。余始聞其名。今至其下。睹之而貽曰。嗟夫。草木麗地。稟天之和。條暢秀茂。固常也。若乃原隰之宜失。陰陽之候違。柔脆之姿。則離披枯瘁。貞勁之質。則鬱抑盤錯。生理乖矣。獨有瓌奇之貌。嗚呼。失其所乎。昔在太古。君臣強名。賢愚同域。洪洪洞洞。是謂大和。降及後代。望人有作。顯仁義。建功名。扶衰拯弊。不得已也。於是有愛惡。則象生焉。其甚者。飾行以矯時。執方以違俗。考槃閭巷。聲重王公。上德喪矣。獨有高世之譽。嗚呼。荀孟。屈賈之徒。豈斯松之類耶。感物徘徊。因爲之贊。吁。嗟彼松。孰爲而生。天枉其性。屈折其形。人實我貴。我非所營。噫。嘻。瀆風曷歸。大道安行。吾欲與汝。各全其真。作此好歌。以告騷人。

硯銘

他山之石。是斲是治。荆藍表瑩。雲露含滋。執簡而至。磨鉢在茲。言出乎身。文以行之。噫。嘻。君子。慎爾樞機。

野老行歌圖贊

昔在陶唐。光宅萬國。下或知有。帝將何力。鼓腹擊壤。嬉游無極。自然而然。忘適之適。中古道薄。親仁懷德。末世政亂。姦宄寇賊。溘風不還。可以嘆息。丹青志古。存諸往則。嗟爾有位。鑑茲王式。

四皓畫贊

君子道行。必資其位。邈哉四賢。隱居救世。皤皤之貌。丹青假志。爾無素餐。觀此知媿。

許真人井銘

長史含道。棲神九天。人非邑改。丹井存焉。射茲谷鮒。列彼寒泉。分甘玉液。流潤芝田。我來自西。尋真紫陽。若愛召樹。如升魯堂。敬刊翠琰。求識銀牀。噫嗟後學。揖此餘光。

高侍郎畫象贊

穆穆清真。不緇不磷。文高學富。道直誠純。昭質已邈。斯猷愈新。丹青畫象。以永光塵。棠陰峴首。瞻仰霑巾。

文獻太子哀册

維顯德六年。太歲己未。九月癸卯朔四日丙午。文獻太子。薨于東宮延春殿。以某年十有二月壬申朔十三日甲申。遷座于文園禮也。象輅差階。龍樓向曙。肅仗衛以將引。儼罇壘而不御。主上感深守器。念極賓天。痛玉符之靡召。悲銀榜之空懸。詔下臣於信史。載盛烈于瑤編。其詞曰。

於昭我唐。誕受帝祉。舊邦維新。令聞不已。亦有積慶。載生賢嗣。平王之孫。吾君之子。越在綺紈。芳若蘭蓀。綠車表慶。寶玉疏恩。東平錫壤。南昌啓藩。耆老諮訪。正墳討論。文以行禮。時然後言。敬愛表於天性。信厚

由於自然。運屬重熙。地惟明兩。古尙達節。吾先德讓。剖符分陝。居東作相。封燕禮緝。副戎業廣。績著保釐。道高寅亮。敬亭南屏。浙水東馳。是惟關輔。以衛京師。乃移節鉞。建此藩維。擇其令典。導以由儀。仁薰俗厚。化洽風隨。國步中艱。文身怙亂。鎮以高臥。制之長算。取彼鯨鯢。戮爲京觀。吳門載同。輿詞協從。天之眷命。我豈矜功。乃正皇統。斯維至公。爰撫軍而監國。亦納揆而登庸。業彌盛而學彌廣。望益高而禮益恭。不言而信。有感則通。多壘以之而罷警。四門以之而除兇。反瀆和于國儉。致符瑞於年豐。天亦難諶。胡寧不惠。枉矢流蒼震之野。火耀奄前星之次。捨內豎之問安。進浮止而把袂。九重增慟。萬邦銜涕。冥茫少海之波。寂歷滄雷之肆。嗚呼哀哉。感神飈之遠至。嘆芳歲之云徂。違大學之齒冑。啓佳城而下居。建采章于綢練。儼備物于塗芻。經武帳之崩旒。據青龍之鬱紆。嗚呼哀哉。苦霧閉塗。窮陰殺節。重雲之旭日如晦。大壑之層冰似雪。指京口而不臨。背都門而永訣。萬目愁而旆旌慘。羣心感而笳簫咽。嗚呼哀哉。瞻瑤山之落木。聽玄圃之迴風。臺思子以何極。宮長男而遂空。集荆門之故吏。會商嶺之悲翁。淚淋漓而洒袂。氣怨結而盈胸。嗚呼哀哉。歷邃古以遐觀。考令猷於三善。孰仁孝之昭著。復功名之不顯。惟史筆與眈頌。配天長而日遠。寧騁麗于東田。豈駁能于文選。嗚呼哀哉。

齊王贈太弟哀冊文代喬侍郎

維年月日。天策上將軍。太師尚書令。臨川牧齊王。薨于臨川府之正寢。主上追先皇付託之意。表叔父遜讓之風。乃下明詔。冊贈太弟。卽以其年十一月日。葬于江州某縣某鄉廬山之原。從理命也。綃幕夕陳。虞歌曉引。改兔園之賓館。設龍樓之陛楯。閔靈儀以愈遠。窮哀端而靡盡。愴永恨于宸襟。俾誕揚于令聞。其

詞曰。

皇天眷祐。錫唐良輔。時惟宗英。裔自文祖。孝弟敦慤。機神穎悟。昔在中興。爰當就傅。申畫宛水。錫茲茅土。德望日躋。邦家是毗。鉤陳宿衛。宮籥攸司。於惟淮甸。實始皇基。道之以禮。董之以威。俗賦甘棠之頌。人歌樂職之詩。運屬繼明。業隆二聖。首輯瑞玉。來參大政。乃爲左相。其班上台。乃封夏口。其賦千乘。赫矣元后。蒸哉古風。不私其子。天下爲公。並命叔仲。奮茲顯庸。或踐我舊藩。或陟爾青宮。辭不獲命。處之益恭。晉鄭之勳。推而更融。札之操。久而彌崇。若秦伯之讓。異周公之東。京江汝水。旄節從容。皇統旣正。靈符允答。國步清謐。羣生欣洽。復大道于三古。永文昭于萬葉。越我嗣君。尊尊親親。極以呂望之高位。崇以貞觀之舊稱。賜書不詔。贊禮不名。曰予小子。實繫叔父。維藩維翰。宗社之故。永錫難老。日新王度。謂天蓋高。命亦靡常。台階殞宿。河月沉光。慟東堂之哀臨。輟南國之春相。與聖賢而共歎。獨天地之何長。嗚呼哀哉。知生若寄。臨凶奢於蜃炭。舉士庶而均哀。頌聲猷于無間。嗚呼哀哉。歸虎節於王府。靡鸞旌于雉門。閑西園之風月。慘緜嶺之烟雲。象輅廻兮遵途遠。歸帷整兮逝水奔。賓友散兮霰雪積。巾箱故兮經籍殘。嗚呼哀哉。身歿壤存。道悠運促。贈今日之典冊。闕當時之寶玉。全大義以經國。激清風而被俗。昭遺烈于千齡。寄玄堂於陵谷。嗚呼哀哉。

徐騎省集卷第十五

唐故左諫議大夫翰林學士江君墓誌銘

唐故秦州刺史賈公墓誌銘

唐故秦州刺史陶公墓誌銘

唐河南方公墓誌銘

唐故筠州刺史周君墓誌銘

唐故朝議大夫太原王君墓誌銘

唐故奉化軍節度判官趙君墓誌銘

唐故左諫議大夫翰林學士江君墓誌銘

公諱文蔚。字君章。其先濟陽考城人也。昔高陽恢若水之靈。光有萬國。伯益獲箕山之護。克成夏功。故其子孫。延祚丕顯。茅土錫胤。圭組流光。在漢者爲孝子。在宋者爲忠宰。在梁者爲烈將。在陳者爲詞臣。長城旣封。淮水亦絕。辭周粟而遠驚。避嬴亂而深藏。徙籍建安。世爲大姓。至於我王。考毗。考秦。皆以隱德清操。垂爲門風。惟公嗣奕葉之賢。負生知之異。幼挺奇表。夙韜殊量。殫儒墨之祕奧。窮文史之菁英。閭里歸仁。宗黨稱孝。于時天下未一。遐方不寧。公鄙斥鷃之爲。從黃鵠之舉。類延州之觀樂。同太史之探書。升名俊造。從事河洛。衰俗難佐。天壤不支。我烈祖孝高皇帝。王業始於江東。仁風被于四裔。公杖策高蹈。款關來儀。府朝肅以生風。臺閣藹其增氣。署州觀察。巡官試祕書郎。遷水部員外郎。賜緋魚袋。王國初建。改比部員外郎。知制誥。于時天人協應。獄訟攸歸。舜禹相與言。游夏不能措潤色之任也。我則無慙。旣受禪。遷主客郎中。知制誥。如故。俄而眞拜。仍賜金紫。今上嗣位。大禮聿脩。徙公爲給事。判太常卿事。時同軌胥會。會

有司失職。公與司門郎中蕭君儼。博士韓君熙載。協力建議。周行翕然。由是祖功宗德之位定。大行昭名之義允。功著高廟。與天無窮。明年拜御史中丞。矯枉持平。無所顧憚。坐廷劾宰相。其言深切。貶江州司士參軍。初國朝自王義之後。曠數百年。憲著之間。舉無廢職。然未有危言激論。如此之彰灼者也。故權右振竦。朝野喧騰。傳寫彈文。爲之紙貴。人心旣爾。天鑑亦迴。前所劾者。或免或黜。公就加江州營田副使。頃之徵爲衛尉卿。俄拜右諫議大夫。充翰林學士。權知貢舉。出納密命。樞機靡失。登進造士。衡鑑無私。聳禁署之清風。著春官之故事。薦賢之賞行。及于台司。曳杖之期。奄先于朝露。春秋五十有二。保大十年八月二日。卒于京師官舍。皇上痛惜。爲之廢朝。送死卹孤。一從公賜。有司考行。易名曰簡。卽以其年九月十三日。葬于某縣某里之原。禮也。長子翥。祕書省正字。次子騫。皆早卒。今以從子翹爲嗣。嗚呼哀哉。公心平氣和。貌古神正。雅好玄理。有方外之期。尤善詞賦。得國風之禮。去華簡禮。不以位望驕人。憐才誘善。不以威名傲物。操履堅正。靡得動搖。襟懷坦夷。初無蒂介。謫居江楚。恬然自足。孜孜色養。蒸蒸孝心。嘗爲詩云。屈平若遇高堂在。應不懷沙獨葬魚。此其心也。江州節度使賈公崇。以武立功。以剛肅物。事公如師傅。親公如兄弟。時皆服公之重名。而賢賈之樂善也。旣歸京寓。居公廨。無以家爲。二子繼亡。一慟而已。齊死生于夢覺。遺寵辱於錙銖。古之達者。何以過此。嗚呼。凡我僚舊。均哀共戚。入黔婁之門闔。覽伯喈之經籍。睇落日以流慟。愬秋風而沾臆。企景行於高山。勒哀詞于樂石。其詞曰。

高陽之裔。伯益之孫。展矣君子。載大其門。爰翔爰集。樂我樹檀。影纓幕府。振藻西垣。禮儀卒獲。風憲攸端。道行在時。業隆自我。英英若人。見義必果。直指烈烈。宮鄰瑣瑣。死生以之。何適不可。允矣天鑒。明哉主恩。

乃還宣室。乃入修門。從容禁署。密勿王言。得才爲盛。知人則難。求尸宗伯。載善其官。人必有終。古無不死。嗟嗟若人。風流永矣。徐庶有母。鄧攸無子。闕里諸生。荊州故吏。謂之何哉。啜其泣矣。秋風落木。逝水成川。昨朝飛蓋。今日荒阡。一邱殘照。萬古愁煙。素車自返。寶劍高懸。高才兮直道。共盡兮何言。

大唐故中散大夫檢校司徒使持節秦州諸軍事兼秦州刺史御史大夫洛陽縣開國子賈宣公

墓誌銘

公諱潭。字孟澤。洛陽人也。周先同姓。卽列國之諸侯。漢得名臣。乃洛陽之才子。攀鱗河北。豈須方面之功。借筭譙都。自有良平之策。源長派遠。德厚流光。史不絕書。後將必大。當先天之內禪也。我七代祖黃門侍郎平陽公會。實演丕命。及至德之中興也。我六代祖黃門侍郎晉國公至。實贊大猷。曠古已還。一家而已。五代祖孫衡州刺史高祖。司門員外。曾祖昶。太子司議郎。祖琛。河南密令。皆有韜世之量。濟衆之仁。大位不躋。餘慶斯洽。考翊。以經術擢太常第。以才用爲諸侯卿。捍寇輸粟。有勞王室。于是佩金紫。升朝廷。上疏論邪寧節度王行瑜。恃功恣橫。坐貶愛州掾。及行瑜就戮。優詔徵還。復出常州刺史。鹽鐵江淮留後。屬宗社中絕。官司解弛。計吏未上。哲人其萎。公有世德之資。負夙成之器。風神爽邁。智術通明。景福二年。以學究一經。射策高第。釋褐京兆府參軍事。遷祕書郎。侍從南遷。進修不懈。天祐丁卯歲。居先君憂。服喪過哀。宗黨稱孝。楚泗郡守。宣城廉使。虛左交辟。三府馳名。俄丁內艱。感憂如禮。藝祖武帝。創基分陝。側席求才。素與公周旋。卽加禮命。奏記書檄。一以委之。內贊謨猷。外爲詞令。出應盟會。入陪罇俎。霸功光赫。公有力焉。十有餘年。任用無閒。旣而楚雲告變。穆醴不陳。已酬國士之知。亦得退人之禮。改宣池觀察判官。烈

祖高皇帝受命中興。不忘舊德。徵拜祕書少監。充儀禮副使。遷中書舍人。崇英翰林學士。周慎密命。潤色王言。公望無渝。朝獎彌厚。保大嗣統。拜兵部侍郎。知制誥。學士如故。充永陵儀禮副使。同軌胥會。大禮無違。遷兵部尚書。修國史。考定郊廟之樂。褒貶歸正。擊拊允諧。會六夷南侵。天眷北顧。命公持節。使于契丹。宣大國之威神。得諸戎之要領。及軺軒還軫。而控弦出塞矣。報命稱旨。時論具瞻。于是避寵台衡。就安關輔。除秦州刺史。視事數月。不變土風。遘疾還京。保大六年九月二十有一日。卒於江寧永安里官舍。享年六十有八。皇上軫悼。再不視朝。飾終之禮。務從加等。太常考行。賜諡曰宣。以某年月日。葬于某所。與夫人楊氏合祔焉。禮也。長子朝散大夫。行大理司直彬。次子秦州司倉參軍穆。少子修等。咸負當世之才。皆爲保家之主。種德垂範。未易可量。長女用文。適水部員外郎楊元鼎。不幸早世。次曰用柔。適膳部員外郎。知制誥張緯。次曰用光。適進士姜某。少曰季芳。尚幼。惟公事業富壽。昭映一時。族望婚姻。熏灼當代。自非天監與善。孰能若斯。雖大用未光。而能事畢矣。鉉以世親之舊。執隨行之敬。服義承教。惟公在焉。刊勒論撰。蓋感遇之萬一也。其銘曰。

於惟茂族。實有世德。七葉繼軌。嘉猷允塞。亶矣君子。其儀不忒。修詞立誠。以匡王國。言以文身。兵由威克。東畿之政。爲邦之則。天地長在。春秋代遷。今朝喪善。何日生賢。蒿里誰地。佳城許年。永安舊里。門館依然。寢丘傳邑。京兆開阡。勒銘泉石。以配青編。

唐故秦州刺史陶公墓誌銘

公諱敬宣。字文褒。其先尋陽人。因官徙籍。今爲合淝人也。西京作相。開國封侯。于是貽孫南國。主盟長沙。

公茲焉不朽。籬邊黃菊。解縣印以言歸。嶺上白雲。挂朝衣而莫返。光靈攸屬。固無得稱之。丹青所存。可略而言也。高祖復右監門衛將軍。曾祖琳。建州錄事參軍。祖晟。青州博昌縣令。皆天縱其能。世濟其美。韎韐君子。屈迹于驍游。縉紳先生。折腰於州縣。積善餘慶。明德後興。考雅。武昌軍節度使。贈太師。楚惠公。雲雷今上。屯龍虎。冥會橫瑠。戈而蕩寇。功冠一時。裂鶉尾以疏封。禮優萬戶。公卽太師第四子也。幼而岐嶷。長而俊茂。非禮勿動。時然後言。天祐中。門廡起家。太子校書。遷至府長史。賜緋魚袋。丁先公憂。時年十四。孝心昭感。喪禮無違。釋服除都官郎中。賜紫金魚袋。改大理少卿。青縑寓直。時推伏閣之勤。丹筆持平。人絕署門之歎。俄遷江都少尹。趙張治劇。由來表則之。司淮海分疆。自昔輕揚之地。公處之貞固。行以廉平。愛民則忠。事長以順。一圻欣賴。三載有成。遷大理卿。仍兼尹事。烈祖孝高皇帝。允釐百揆。實總六師。爰求鄭國之良。以貳楚人之廣。奏請君判左右軍事。丁酉歲。堯咨文禪。禹迹中興。徵舊德于角犀。考官成于喉舌。拜工部尚書。今上嗣位。加金紫光祿大夫。檢校太保。會閩人作梗。王旅欲南。聲實所資。豫章爲急。故輟公副總判軍府。及羽檄四出。芻輓相尋。民以悅而忘勞。事有備而無患。嶺表既定。洪人亦康。復移宛陵。仍兼棣州刺史。海陵郡甸服之地。邦賦最優。歲比不登。民用胥怨。除泰州刺史。公以清淨爲理。仁恕積中。視吏民其如傷。守法令而畫一。餘糧棲畝。無庚癸之呼。白駒過隙。感辰巳之歲。春秋五十有二。保大八年夏四月十有八日。卒于位。上省奏。傷悼輟朝兩日。有司考行。賜諡曰順。卽以其年月日。權窆于東都。明年月日。葬于江都府縣里。與前夫人合祔焉。禮也。惟公冲和體質。仁孝爲基。立身有常。與物無忤。尤善聲韻。聞音而知樂。頗好篇詠。下筆而成章。身後不留餘財。所任必有遺愛。求之作者。斯亦難能。嗣子泰州司倉參軍。

崇鼎崇諒崇倫等皆勤修令名夙奉成訓君恩靡替家法如初鉉昔在朝行實惟舊好今從左宦仰繫東道痛死生之已矣感意氣以何報延陵挂劍願保于不欺峴首刊碑終慙於妙絕銘曰
淮澠之靈衡霍之精必有賢傑爲時而生乃伯乃仲乃侯乃卿望冠六事風馳百城人生有涯大命夙傾不見君子猶存政聲遠日旣吉靈輻旣行寂寞公館蕭條古垆哀哀郡人泣涕沾纓嗚呼彼蒼不知福善之胡明

唐故金紫光祿大夫檢校司徒行少府監河南方公墓誌銘

公諱訥字希仁其先河南人也後世從官徙籍新安支派繁衍遂爲郡之著姓迨公數世皆以儒雅退讓播爲門風曾祖顥登州文登縣令祖亮左武衛兵曹參軍考毅榮王府司馬母聶氏追封河南縣太君問政先生師道之長女也公承積善之慶負夙成之智砥節礪行好學能文時然後言非禮勿動鄉曲之黨翕然稱之太師陶公來守新安撫納人士署爲郡吏委以典籤恪恭詳敏甚稱所職歷事累政其志如初烈祖肇基王業元宗實綜軍政管記之任勤擇其人聞公之名召致幕府王國初建署寧國軍節度館驛巡官掌都統表奏皇室再造慶賞遂行擢拜虞部員外郎掌元帥表奏數歲以皇孫就傅命公侍讀講道贊德勵裨益之誠端己直躬盡表微之節俄遷水部郎中明年皇孫封南昌王東都留守以公爲留守判官遷主客郎中參贊政務事無違者改司農少卿依前充職明年王移任宣潤二州大都督復以公爲浙西營田副使通判軍府六載匪懈庶職交修懋官之賞詔命疊委累遷至金紫光祿大夫檢校司徒封河南縣男俄拜秦州刺史充本州屯田監院使正身而令悉心爲理公無遺利民自從風屬強敵深侵東京

失守而州兵盡出。人心大搖。于是士庶老幼盡室南渡。公自歸闕下。坐是降名。數年除歙州團練判官。上曰：戰爭之際，吾豈以武勇責書生哉？軍法不得不爾。即召拜太子右諭德。今上嗣位，遷少府監。丙寅歲正月十六日卒於京師。美仁坊官舍，享年七十七。上爲之廢朝一日，賜諡曰定。以其年某月日葬于某所。禮也。前夫人謝氏早亡，繼室施氏，封沛縣君。長子前宣州寧國縣主簿，次子志饒。州文學公以名教爲樂，以矩矱自任，行必中立，居無惰容。縉紳之閒，推爲純行。公之外祖，得道之士，故公頗以朝禮修養爲務。鷄鳴而起，孜孜不倦。年俯悼耄，體常康強，及屬纊之晨，無伏枕之疾。斯亦力行之報也。鉉也不佞，早辱交契，昔先君從事黜歎，公適出本部，及公策名郎署，鉉亦忝官聯。既熟其素履，願垂于不朽，附于史氏，以永令猷。其銘曰：

聖人四教，文行忠信。惟公似之，光有令聞。秉筆贊畫，登朝典郡。寵至若驚，道喪無悶。年俯中壽，官參列卿。歸全委順，終吉永貞。宰樹長在，高臺自傾。用刊圓石，闕此佳城。

唐故客省使壽昌殿承宣金紫光祿大夫檢校太保使持節筠州諸軍事筠州刺史本州團練使

汝南縣開國男周君墓誌銘

君諱廷今上，字正材，洛陽人也。岐山至德，綿瓜甃者萬邦。洛宅舊都，守枌榆者百世。簪組相繼，譜牒存焉。曾祖侃，太常博士。祖潛，深州樂壽縣令。避亂南徙，因家廣陵。考延禧，明經擢第，有吳之霸，受辟爲淮南巡官。至戶部郎中，與殷文公游貞公同掌文翰，無祿早世。故大位不躋，君即戶部第四子也。幼而岐嶷，長而篤厚，躬行孝悌，餘力學文，以蔭釋褐，補弘文館校書。試吏爲池州司戶參軍，改宣州寧國縣尉。烈祖在藩，

乃睠舊族。聞君修謹。復有吏能。因表爲黃州長史。寵以朱紱。置之府朝。及受禪。遷通事舍人。鴻業肇興。王澤遐布。贊導之任。實寄司聰。護戎修聘。觀風按獄。受命而出。動罔不臧。歷事兩朝。任遇彌厚。賞賜旣數。階勳屢遷。而通事之任如故。蓋惜其能也。保大七年。轉將作少監。判四方館事。浩穰之地。尹正爲難。復以本官判江寧府事。其閒監諸侯之典者十通。四方之命者三。攝州府之政者六。按枉撓之獄者四。或敷惠於新附之俗。或投身於危亂之地。本于忠而後動。忘其生而後存。元宗嘉之。以爲客省使。今上嗣位。深惟舊勞。特加金紫光祿大夫。台州刺史。常御壽昌殿視事。中外之人。咸得引見。又以君爲壽昌殿承宣。出爲忠義軍監軍。泉南等州宣諭使。還遷筠州刺史。本州團練。仍使充客省使。君以備嘗艱危。復逼遲暮。懇辭繁劇。恩旨不從。丙寅歲十月二十二日。終於京師某里之官舍。春秋六十有六。詔廢朝一日。賜諡曰某。明年正月。葬于某所。禮也。夫人天水縣君姜氏。輔佐之勤。率由婦禮。訓誨諸子。備有義方。子大理評事崇儉。太常寺奉禮郎崇素。及崇順。崇信等。皆儒謹。能不墜其先。鉉家世通舊。嘗接姻婭。淡成之分。終始不渝。何以真懷。是用刊德。其銘曰。

猗嗟周君。世濟其名。展如之人。克嗣厥聲。受任幹蠱。臨難忘身。居中處約。全和保真。與物皆化。萬古同塵。松楸勿伐。蘭菊惟新。刊石表墓。于嗟善人。

唐故朝議大夫行尚書禮部郎中柱國賜紫金魚袋太原王君墓誌銘

君諱某某。其先太原人也。昔者諸侯共職。起末運于髡王。儲后上賓。示靈期于瞽史。緱山維岳。肇翦賁之崇基。汾水遂荒。導沈渾之遠派。其後金行云季。貴種言還。行者制禮樂于土中。處者保邱園于淮左。世

濟之德。鄉人所宗。故今爲廬江人也。曾祖廬江令。祖洪州長史。皆有廉讓之風。純粹之行。得祿于仕。不累于高。考吳尚書左司郎中。贈太府卿。負適用之才。獲愛人之譽。應星辰而列位。道邁朝倫。視河海以命官。禮優贈典。君則府卿之第三子也。門風漸教。天質孕和。翼翼服勤。眞保家之主。愔愔若訥。多長者之言。墨妙筆精。固稟于性。奕思琴德。咸是所長。幼有令聞。獲鍾慈愛。及加冠之歲。以門子敝資。漢室孝廉。方從令史。晉時英俊。更屈下僚。晨昏之養。有歸州縣之勞。靡憚。乾貞二年。自黃州司馬。遷洪州都督府別駕。治中懋績。屏星煥其增華。公府見知。佩刀由其受賜。俄拜尚書度支員外。再遷虞部郎中。皆判吏部兵部事。夫當官匪懈。伏閣之勤也。照姦得情。坐曹之能也。前史所隲。君皆則焉。頃之以親累解官。君雅好玄言。夙尙閑適。由是角巾私第。閉關卻掃。交游罕得見其面。窮達不以介其懷。用晦而明。居貞以利。高皇帝受禪之始。牽復疏恩。拜工部郎中。轉禮部郎中。寓直中書省。預聞機密。彤庭弘敞。禁垣清切。絲綸之出。堯言于是。惟行樞機之微。省樹由其勿洩。方將振鱗溟渤。驥首雲霓。而生也有涯。仁而不壽。昇元六年夏六月二十有二日。卒于建康翔鸞里之官舍。享年五十有一。嗚呼哀哉。惟君孝於事親。悌于承長。和以接上。廉以在公。胥史臣僕。靡不被仁恕之惠。家人妻子。未嘗見喜愠之容。學古觀書。如恐弗及。卹舊敬老。周知其疲。三德聿修。五福斯闕。卽世之日。遺愛存焉。卜遠不從。旅殯京邑。後四歲春二月五日。嗣子延紹。延貞等。始備大葬之禮。窆于江都縣某鄉里。從先卿府君大塋。與夫人李氏合祔焉。禮也。鉉以世親之舊。承子妻之知。怨明德之不常。痛祖行之斯在。退食自公。薄送于畿。刊樂石以爰紀。庶令名之不虧。嗚呼哀哉。其銘曰。汾川溶溶。淮源颯颯。興我宗兮。世濟其美。家餘其慶。生我公兮。靖恭正直。言行名迹。存南宮兮。與義相扶。

知命不憂。永考終兮。邗城之右。蜀岡之陽。馬鬣封兮。道不虛行。有令之子。遵遺風兮。

唐故奉化軍節度判官通判吉州軍州事朝議大夫檢校尚書主客郎中驍騎尉賜紫金魚袋趙

君墓誌銘

君諱宣輔。字仲申。其先天水人也。累世從官。不常厥居。曾祖全真。工部員外郎。滕州刺史。祖倚。太子校書。考台。歙州海寧令。君卽海寧府君第三子也。生於廣陵。長于江左。幼而俊敏。博綜羣書。尤善刑法之學。烈祖輔政。方申明紀律。君以是中選。釋褐補江都府文學。直刑部。明年改信州司法參軍。終獄詳刑。號爲詳練久之。召赴闕。以本官權參元帥府法曹事。踰年改大理評事。元宗嗣服之初。庶獄權要。舉不附己者。因中傷之。君坐黜爲饒州司士參軍。明年王師伐閩。護軍查公表君才可煩使。以本官判軍司事。時頓兵深入。自冬涉秋。經東馬懸車之塗。督飛芻輓粟之役。事集師克。君有力焉。師還。加朝散大夫。行常州義興令。推誠率下。民用協和。丁憂去職。復爲江州錄事參軍。時連帥議浚滙浦。以屯舟師。詔從之。君以無益戎備而勞民力。乃指陳利害。抗疏極論。上甚嘉之。卽命止役。由是遷大理司直。通判蘄州軍州事。明年遷檢校水部員外郎。充建州觀察推官。通判軍府事。會越人闕邊。使閒誘建民。將以爲亂。君廉得其實。盡按誅之。優詔褒美。賜衣一襲。遷檢校屯田員外郎。三年徵拜守水部員外郎。判度支。時師旅薦興。軍食不給。命君爲浚江催運使。輶傳所至。轉輸如流。朝議以姑熟居畿甸之間。實供億之始。徙君爲當塗令。踰月復徵爲主客員外郎。判大理寺。賜紫金魚袋。始君以理官得罪。至是上知其無私。故復任焉。守官循理。挺然中立。轉工部員外郎。仍判寺事。今上嗣位。上疏論時政。以爲刺史縣令。親民之先。而考績掄材。未盡其理。上深

然之。遷朝議大夫。戶部員外。充宣歙常潤等道安撫使。以刺舉無避。爲權臣所排。宸喉昭明。故得無咎。使還。以本官判兵部事。廬陵羣盜充斥。州兵不能制。上憂之。亟命君爲奉化軍節度判官。判吉州事。轉主客郎中。擒姦摘伏。克舉其職。其年秋九月七日。遇暴疾。翌日終于郡之官舍。享年六十有一。明年春二月。歸葬江寧府某所。禮也。夫人查氏。吉王府長史昌之女也。工部尙書文徽之妹。婉孌之德。閨房之秀。內助著美。士林所推。子七人。長曰鈞。袁州新喻尉。次曰錯。樞密院承旨。次曰鍾。舉進士。次曰銓。前國子監三禮。次曰鑑。鉞。鑲。皆國子監生。女一人。適祕書省正字周希定。君有孝悌之性。聞于宗族。敦然諾之信。稱于友朋。守己有常事。君不諂位。未達而知足。祿雖優而彌貧。其當官持事也。必盡己所長。不爲利回。不爲威惕。故屢失大臣意。然好直之士。亦以此多之。鉉久塵近職。熟君操行。直筆贊善。以告後人。故銘其墓曰。英英趙君。松茂蘭薰。應用以法。飾身以文。道直詞正。心平氣純。如何不淑。今也爲塵。金陵仙鄉。古多名人。歸骨于是。與善爲隣。泉臺不曉。壟樹空春。勒銘挂劍。慷慨沾巾。

此
页
空
白

徐騎省集卷第十六

唐故中書侍郎光政殿學士承旨昌黎韓公墓誌銘

唐故守尙書刑部侍郎喬公墓誌銘

唐故建州觀察處置等使陳公墓誌銘

唐故檢校司徒苗公墓誌銘

前虔州零都縣令包府君墓誌銘

唐故常州團練判官檢校尙書左僕射劉君墓誌銘

唐故印府君墓誌銘

唐故御史中丞包君墓誌銘

唐故中書侍郎光政殿學士承旨昌黎韓公墓誌銘

公諱熙載字叔言其先南陽人傳稱武王之穆詩美韓侯受命晉以六卿升降漢以三傑重輕至東晉末征西從事延之以忠義之節踐艱屯之運避亂遠徙遂家昌黎餘慶流光最爲繁衍曾祖鈞太僕卿祖般侍御史考光嗣祕書少監淄青觀察支使故又爲齊人公秉夙成之智負不羈之才文高學深角立傑出年始弱冠遊於洛陽聲名藹然一舉擢第同光之亂藩郡崩離公以國難方興家艱仍今上瞻烏擇木杖策渡江烈祖孝高皇帝納麓在辰側席時彥得公甚喜賓禮有加于時有吳肇基庶事草創公以俊邁之氣高視名流旣絳灌之徒弗容亦季孟之間不處以校書郎釋褐出爲滁和常三州從事公亦怡然不以屑意詠風月遊山水而已中興受命上嗣撫軍以公有七子之才膺四友之拜徵爲祕書郎掌東宮文翰元宗深器之及踐位以爲虞部員外郎史館修撰賜緋又以大禮繁疊加太常博士時有司議孝高廟宜

稱宗司門郎中蕭君儼上疏論之公與給事中江君文蔚協同其議凡書疏論難皆成于公手由是廟號尊諡定于一言君子以爲眞博士也頃之以本官權知制誥初公但以文章際會未嘗與政及其當維新之運感知己之恩未及聽政章疏相屬或駁正失禮或指摘時病由是大爲權要所嫉竟罷其職丞相宋公朝之元老勢逼地高公又廷奏黨與詞旨深切天子優容之而用事者滋怒旋貶和州司士參軍數年移宣州節度推官徵還復爲虞部員外郎遷郎中史館修撰賜紫俄拜中書舍人從時望也公雖才識優贍而質性疎散凡在位者道復不同於是深居移病罕與朝謁時兵興之後國用不充公援古酌今請以錢爲幣時獻封者甚衆元宗獨以公議爲長卽拜戶部侍郎充鑄錢使今上踐位改吏部侍郎兼修國史初鑄錢之作也自宰執而下相與沮之故百司不供久未就上爲之曉譬事理親加督責而公猶不勝其忿嘗因對見聲色俱厲因徙爲祕書監不逾年復拜吏部侍郎新錢旣行大濟經費詔賜錢二百萬拜兵部尙書充勤政殿學士承旨公少而放曠不拘小節及年位俱高彌自縱逸擁妓女奏清商士無賢愚皆得接待職務旣簡稱疾不朝家人之節頗成寬易雖名重于世人亦訝其太過上不得已左遷太子右庶子分司南都于是謝遣伎樂單車首路留之未幾復爲兵部尙書學士如故是時歲比旱歉主上憂勤公復論刑政之源明防救之術又上格言五篇手詔嘉納卽拜中書侍郎充光政殿學士承旨初上選近侍數臣直宿禁中常御光政殿召對夜分乃罷故命公此職以寵異之霖雨之望方深鐘漏之期遽逼春秋六十有九庚午歲秋七月二十七日沒於京鳳臺里之官舍上省奏震悼爲之涕流有司奏當輟朝三日手批天不憇遺碎我瑚璉辭章乍覽痛切孤心嗟乎抗直之言而今而後迨不得其過半聞聽者乎可別

輟朝一日。贈右僕射平章事。仍官給葬事。士庶聞之。知與不知。莫不爲之悲歎。有司考行。易名曰文靖。卽以其年九月某日。葬于某所禮也。夫人隴西郡君李氏。生簪纓之族。有桃李之芳。內則有光。夜川先逝。繼室北海縣君蔣氏。長子疇。爲奉禮郎。早卒。次子伉。爲校書郎。聰慧夙成。無忝世德。次曰佩。曰儼。曰倜。曰儔。曰俛。女四人。或作公族。或爲尼出家。嗚呼哀哉。公之爲人也。美秀而文。中立不倚。率性而動。不虞悔吝。聞善若驚。不屑毀譽。提獎後進。爲之聲名。片言可稱。躬自諷誦。再典歲舉。取實去華。故其門人多至清列。屢從譴逐。殆乎委頓。俯視權倖。終不降心。見理尤速。言事無避。凡章疏焚藁之外。尙盈編軸焉。審音妙舞。能書善畫。風流儒雅。遠近式瞻。向使檢以法度。加以慎重。則古之賢相。無以過也。俸祿旣厚。賞賜常優。忘懷取適。不事生計。身歿之日。四壁蕭然。衣衾樸。皆從恩賜。詔集賢院編其遺文。藏之祕閣。凡所開卷。可知也。鉉與公鄉里遼。年輩相懸。一言道合。傾蓋如舊。綢繆臺閣。契闊江湖。區區之心。困而獲雪。一生一死。何痛如之。援毫反袂。識彼陵谷。其銘曰。

猗嗟韓公。有蔚其文。俊才絕俗。逸氣凌雲。高名直道。玉振蘭薰。猗嗟韓公。天賦忠規。君臣之際。言行俱危。其身可辱。其節寧虧。猗嗟韓公。屈亦能伸。松寒益茂。玉焚始真。乃感明王。乃爲大臣。送往事居。不緇不磷。嗚呼韓公。胡爲而然。闕此相印。歸于夜泉。茂陵遺簡。京兆新阡。斯文不朽。此別終天。哀哉郢匠。已矣牙絃。勒銘圓石。永識桑田。

唐故朝請大夫守尙書刑部侍郎柱國賜紫金魚袋喬公墓誌銘并序

士有放懷夷曠。介然中立。外物無累於心。沒齒不違于道。吾友喬公。嘗從事於斯矣。公諱匡舜。字亞元。廣

陵高郵人也。曾祖譚祖泰，皆不仕。考鴻漸，本縣尉，家世清操，州閩稱之。故其子孫必有與者。公少好學，善屬文，弱冠游京都，詞藻典麗，容止都雅。烈祖輔政，見而器之，補祕書省正字。丞相宋楚公初獲進用，位望日崇，聞公之名，辟置門下。每爲文賦詩詠，輒加稱賞。由是名譽日洽，而卿士大夫皆前席待之。累遷大理評事、司直、監察御史、屯田員外郎。從宋公出藩，爲江西浙西掌書記。府公告老，歸九華山。公乃升朝爲駕部員外郎，未幾守本官。知制誥就遷祠部郎中，中書舍人典掌樞機。周慎靜默，凡十餘年。值邊境倣擾，師出無功，詔旨親征。中外憂懼，公上疏極諫，坐阻撓軍勢，黜居臨川。頃之，宋公獲譴，又以故吏爲累。由是累年沉廢。今上卽位，徵爲水部員外郎，改司農少卿，判太常寺，轉殿中監，修國史，拜給事中，權知貢舉。又兼獻納使，遷刑部侍郎。公自徵還，數年間，聯歷清望，蓋舊齒直道，上簡聖心。至是以老病不堪朝謁，聞上知其家貧，詔以貳卿之秩養疾。壬申歲九月二十有三日，卒於京師濱江里官舍。享年七十有五。遺命以周易孝經寘棺中，太常考行，易名曰貞。卽以其年冬十月二十有三日，葬于江寧縣某所。禮也。夫人太原縣君郭氏，代公玄孫晉陵令喻之女也。餘慶所備，門風甚高。婦德母儀，聞于宗族。一子僧儒，祕書省正字。早卒。孫謂亦爲正字，公之爲人，寬簡真率，常以詩酒自適，不以勢利縈心，毀譽讒慝之詞，聞之晏如也。從事楚公府，殆二十年。凡爲府公見知者，皆詭譎傾側，公獨淡然無營，守正不諂。故但以文藝知賞，未嘗任用。烈祖下詔，公卿舉可以親民者，楚公所薦非其人。烈祖甚不悅，謂給事中常公夢錫曰：「吾望其薦匡舜也。」常公及中書侍郎韓公熙載，嫉楚公如讎，而與公善，嘗相謂曰：「宋公誤識亞元，正可怪也。」公之歷任奉法循理，似不能言者，及其臨危擊節，抗詞忤旨，侃侃然有古人之風。黜官奪祿，甘貧守約，凡五年，不形于言。

色。恂恂然道家之流也。故能享老壽。保康寧。歸全委順。斯可貴矣。公臨終數日。舍弟往候之。怡然言曰。吾往矣。君兄弟可各爲一詩哭我。翌日復告門生曰。吾已得徐君兄弟許我詩。餘無事矣。其忘懷死生也如此。嗚呼。絮酒之禮。已隔平生。挂劍之信。永畀穹壤。故以二章爲誌。闕於九原。所撰集七十餘卷。編紀之任。屬于門人。此不備書也。其詩云。

舉世重文雅。夫君更質真。曾嗟混雞鶴。終自異淄磷。詞賦離騷客。封章諫諍臣。襟懷道家侶。標格古時人。逸老誠云福。遺形未免貧。求文空得草。埋玉遂爲塵。靜想忘年契。冥思接武晨。連宵洽杯酒。分日掌絲綸。蠹簡書陳事。遺孤託世親。前賢同此嘆。非我獨沾巾。

錯詩云

諸公長者鄭當時。事事無心性坦夷。但是登臨皆有作。未嘗相見不伸眉。生前適意無過酒。身後遺言只要詩。三日笑談成理命。一篇投弔尙應知。

唐故左右靜江軍都軍使忠義軍節度建州觀察處置等使留後光祿大夫檢校太尉右威衛大將軍臨穎縣開國子食邑五百戶陳公墓誌銘

公諱德成。字仲德。其先穎川人也。帝嬀餘烈。侯滿崇封。盛德之祀。綿邈于百世。光遠之慶。蕃衍于萬國。故我洪胄。代雄建安。王室中微。閩方角立。網羅英異。弘濟艱難。我曾祖茂新。祖滔。皆以雄才勇略。奮揚忠力。將領之任。生表其策勳。督護之名。沒垂于飾壤。父誨。檢校太尉。兼侍中。建州刺史。忠義軍節度使。諡忠烈。殊勳大節。有信史豐碑存焉。公卽忠烈公之長子也。鍾粹和之氣。秉沖淡之心。通習孫吳。固其家法。酷好

墳典乃自天資。就傅之年。已著名譽。先公剖符劍浦。威信洽聞。諍子之助。實有其力。弱冠爲本郡裨將。先公以身守邊郡。心存本朝。累表遣公入宿衛。卽擢拜右千牛衛將軍。充殿直指揮使。恭命畏法。修身擇交。先公每言邊事。常密疏于紙。遣公上啓。默識強記。敷奏閑習。元宗甚嘉之。累遷右靜江指揮使。值淮上兵起。王師不振。公屢上書自奮。詔隸西北面行營。以舟師趣濟難。破其屯戍。遂入海陵。與諸軍會。勵兵固守。強敵日益。公連戰破之。虜獲千計。圍兵旣遁。乃涉長淮。指下蔡。別率戰艦。分擊浮橋。三中流矢。神色自若。自秋徂冬。且戰且前。凡五進軍壘。皆以衆寡不敵之勢。當輕悍卒至之師。臨難忘身。每戰必捷。而元戎逗撓。逆臣攜叛。羣帥失道。公全軍而還。遷右宣威軍廂虞候。制曰。獨此一軍之衆。堪爲百戰之師。其見稱如此。數月爲和州刺史。又爲左天威將軍廂虞候。明年改池州刺史。是時疆場甫定。閭井未完。公奉法循理。正身率下。庭無滯訟。吏不生姦。鐵軸牙檣。無忘水犀之備。輕裘緩帶。常爲峴首之游。賦詩紀頌。粲然可述。元宗南狩。從至石牌。上每登臨置酒。必命公陪侍。訪山川之形勢。問風俗之美惡。應對詳備。咸有條貫。捧觴上壽。進退由儀。求解印。扈蹕。優旨不許。今上嗣服。屢表乞還。徵爲右天德軍都虞候。舊制常以舟師爲下軍。至是詔旨。以南國之用。尙于舟楫。今而後知非是。乃簡練精銳。置龍翔軍。以隸親衛。命公爲龍翔都虞候。舟師之重。自茲始也。會先君來朝。臥疾邸第。公親侍醫藥。躬執煩辱。容貌瘠損。衣不解帶。客至問疾者。不知其已貴也。及丁憂制。哀毀過禮。扶護靈柩。歸于建安。詔起爲歙州刺史。本州團練使。視事三載。其理如初。秩滿復爲右龍翔諸軍都虞候。遷都指揮使。每仲秋講武。訓兵。仲冬而畢。進退號令。由公指顧。威容嚴整。覩者肅然。頃之。又爲虔州巡檢使。知州事。五嶺之際。地廣民悍。內據豁洞。外接蠻夷。告訐斂斂。習

以爲俗。于是申以刑政。示以嚴明。廣視聽。審情僞。吏以微文出入者。皆面詰其狀。莫不惕息。退弊爲之革。人以之和。於是浚溝隍。嚴壁壘。出私帑以助費。因農隙而僱功。凡書勞考績。此其昭昭者也。尋拜池州觀察使。以其秩居虔州上。以建安之地。人思舊德。且欲以畫錦之盛。顯公之能。乃除忠義軍節度使。建州觀察處置等使。留後。公以違奉歲久。無以私爲。抗表來朝。固辭不拜。改右威衛大將軍。充左右靜江都軍使。又轉光祿大夫。檢校太尉。奉以建州之祿。歲計千萬。甲第廐馬。賜與優渥。俄而被疾。自識終期。申告理命。備有規度。中使問疾。但曰。世受主恩。未有以報。唯此爲恨耳。又親問門吏。草遺奏。旣成。自益兩句曰。苟游岱之有知。必結草以爲報。上省表震悼。手詔答之。公猶捧詔向闕。稽首流涕。壬申歲。秋七月十有二日。卒於建業濱江里之官舍。春秋四十。上痛惜之。至再不視朝。贈安南大都護。遣中使監護。葬事皆從官給。有司考行。易名曰烈。卽以其年九月日葬于某所。從理命也。夫人信都郡君刁氏。故昭武軍節度使能之女。容德之美。閨房之秀。宜家睦族。光此門風。子倩。孝友聰慧。修詞好學。以蔭起家。授著作佐郎。必大之慶。其在于是。嗚呼哀哉。公生於戎馬之際。長承鐘鼎之業。修文習武。全孝資忠。風格端莊。襟懷夷直。嫉惡獎善。如恐不及。穆親念舊。無有所遺。先人之費。公私畢給。出入數載。家爲之貧。在公之餘。手不釋卷。篇詠詞筆。皆傳於時。近代儒學。將唯公而已。凡四典藩郡。皆有借留去思之美。民到于今稱之。由是恩顧特隆。委遇無間。修塗方騁。大年不登。知與不知。皆爲悲歎。鉉與公非故。特以道義相期。雖復出處不齊。班序致隔。金蘭之分。終始不渝。寢門流慟。痛生死之永已。圓石表墓。患陵谷之靡常。亦公之遺言。以此見託。豈非慷慨之氣。思振發于知己哉。故爲銘曰。

龍泉之靈。武夷之英。生我儒將。垂茲令名。臨戎有勇。察俗有聲。爲臣之節。與世作程。位逼建牙。秩參掌武。才實膺時。忠惟得主。鬱此雄圖。溢然中露。謂天蓋高。不可以愬。悲哉俊氣。永已荒丘。鳳臺遺館。梅嶺窮秋。樹惟挂劍。地卽眠牛。餘芳不泯。淮水長流。

唐故檢校司徒行右千牛衛將軍苗公墓誌銘

公諱延祿。字世功。其先上黨人。昔者楚多淫刑。賁始逃難。晉賴謀主。苗受其封。高門之慶。雄視欒郤。綿綿瓜瓞。翼翼孫謀。存諸簡編。可以揚摧。延洪於我七代。祖中書舍人延嗣。光大於我六代。祖太師晉卿。源流繁衍。蔚爲甲族。中朝喪亂。後裔播遷。匿迹淮楚之間。今爲盱眙人也。先公諱隣。生於兵戈之間。長習旗鼓之用。遭遇英主。建功立事。出爲泗州防禦使。入爲靜江軍統軍。世卿之祀。衰而復振。公卽靜江之長子也。弱不好弄。壯而有立。負雄勇之量。不以驕人。秉剛直之資。未嘗忤物。持重善戰。默識寡言。時輩推之。以爲君子。初先公奉王略。領偏師南破山越。西定江楚。東絕滄海。北捍徐戎。弓不解。弩兵不墜。公年甫弱冠。實參其間。擐旗斬將。所向披靡。宣力用於君父。舒壯氣於風雲。然而職以序遷。蓋歸美於先公也。烈祖孝高皇帝。中興大業。疇咨舊人。命公領泗上精兵。入爲宣威軍裨將。六卿之選。以翼京師。八屯之權。實資宿衛。歷紀授任。一心靡渝。今上祗嗣鴻圖。益宣朝寄。總千牛之士。以爲心膂。假五教之秩。以崇班列。會侍中燕王。以帝子之重。兼鎮兩藩。詳求命卿。以事大國。俾公提步卒屯宣城。凡甲兵壁壘之事。皆聽於公。夙夜惟勤。燥濕生疾。春秋六十一。保大九年十月七日。卒于宣州公署。上省奏傷悼。爲之罷朝。送終之禮。有以加等。卽以其年十二月二十七日。葬于江寧府縣里禮也。夫人王氏。淮南裨將唐之長女也。先公負游俠

之氣有征討之功。勇冠三軍。力制奔虎。夫人麗桃李之質。襲蘭蕙之芳。婦禮聿修。遺訓無墜。君子以孝慈率教。夫人以嚴正克家。閨門之理。實有內助。以保大八年五月一日。先公而逝。今始祔焉。子全厚。全瞻。全節。全義。全海。皆有父風。苗氏爲不朽也。鉉本自世親。早爲姻族。歎侯封於李廣。發哀詞于杜篤。刻翠琰于荒阡。擬高陵于深谷。其銘曰。

才之俊兮將之雄。位之侯兮壽未中。天難諶兮人云亡。川旣逝兮歲將窮。素車兮丹旆。白草兮青松。悲雄心與壯氣。漸荆棘兮蒙龍。

前虔州零都縣令包府君墓誌銘

銘序

昔者鄭都涕產。知懷仁之有誠。孔門慟淵。見福善之無驗。遺恨千古。可勝言乎。君諱詠。字義修。其先延陵人。漢大鴻臚咸之後也。曾祖章。祖岌。皆眷戀本土。卒于縣寮。考泊。遇故侍中寶之亂。乃去仕唐。吉州長史。入吳。終和州歷陽令。政有遺愛。故家焉。今爲歷陽人也。君幼而岐嶷。長而學問。孝敬自律。名利弗嬰。安貧怡然。綽有餘裕。順義末。丁先府君憂。泣血絕漿。杖而後起。朝廷獎勸善政。砥礪淳風。卽起君爲歷陽主簿。秩未滿。移知含山縣令。先是兵興之後。循吏用稀。君簡法紓刑。約廉敦信。縣無逋事。吏不能欺。蒞官七考。清嘯而已。選授知虔州零都令。西楚之地。南際殊隣。本之以蠻蜒之風。因之以彼數之衆。長鯨之戮。雖久。碩鼠之刺。猶繁。君下車考政。經察人病。矯異俗。均地征。常爲諸邑之最。吏民上書。借替期求真命者。無虛歲矣。而懋賞弗臻。成功輒去。解印之日。單車卽塗。君素多疾。至是增劇。以己亥歲秋九月十九日。終於歷陽。馴翟里之私第。享年四十有一。以其年冬十一月六日。葬於本縣本鄉許思里。祔先君長史之塋。禮也。

君前娶潁川陳氏。後娶樂安花氏。皆良家之子。淑德不爽。二子曰德容、德鈞。二女皆佩觿、非角之歲。君天資貞潔。立性和雅。尊敬師友。敦睦親姻。移之於官。故所至皆理。而位不參于朝籍。年不登於下壽。能無遺恨乎。鉉兄弟少孤。長于舅氏。親承撫卹。勉以進修。門御今上不傾君之力也。嗚呼。渭陽之贈已矣。寧追逝川之嘆。哀哉。何極。故拂貞珉。紀述遺德。庶深谷以徙遷。見清芬之未泯。其詞曰。

懿哉華族。鴻臚有聞。家餘厥慶。世濟其文。祉祚鍾積。實生我君。惟君之生。姿性天成。清談變馬。寶思凌雲。道光表式。才中銓衡。爰職縣符。政閑務舉。旋綏二邑。鳧飛鸞舞。天亦難讎。俄悲物故。驚波易遡。陽露難收。荒郊落日。宿莽窮秋。銘茲幽壤。永樹芳猷。

唐故常州團練判官檢校尚書左僕射劉君墓誌銘

夫資忠全孝。含貞履潔。君子所以沒身而守之。聖人所以屈己而申之。其道可傳。其風可仰。嗚呼。劉君。其殆庶乎。君諱鄣。字巨源。其先彭城人。徙居廣陵。重世矣。曾祖永。澧州司戶參軍。祖審。不仕。考瓌。檢校戶部尚書。贈右僕射。君生而岐嶷。有異常童。五歲而孤。卽稟至性。年在幼學。卓然老成。初先君事吳。實幹近職。而太夫人王氏。與貞穆皇后。復有姻舊。故宣帝命君。使事丹陽公。府公龍飛。以君爲殿前承旨。便蕃左右。靖恭夙夜。動必稱職。人無閒言。二十年間。累遷檢校禮部尚書。充崇賢殿使。及軍府代謝。衆或將迎。君侃然正色。有死無二。游說之詞。不能入。權利之勢。不能動。于是闔豎希旨。以飛語中之。坐除名。流池陽郡。明年有唐受禪。烈祖嘉君盡忠。亟召之還。除常州長史。悉還其官階田宅。未幾。又改和州長史。聽歸廣陵。舊居。初元宗方在膠庠。吳帝使君召拜郎中。賜以章綬。自爾。至於爲相。每朝謁。必先見君。而後入。及元宗卽

位。召至京師。復命太夫人入禁中。如貞穆之時。謂曰。吾受吳朝恩禮。不敢忘也。今猶數夢讓皇帝。執臣子之禮。吾觀當時近臣。唯夫人兒爲長者。帝意親之。今復得在吾左右。良足慰也。君聞之。遂稱足疾。不任趨拜。上仍賜第以居之。歲時錫賚甚厚。時使親近諭旨。竟不能移。上乃加太夫人封邑。召君受命于朝。固辭以疾。上嘆息曰。此子至孝。今以其母故。召之不來。是必然也。此亦古人所難。吾何爲奪其節耶。久之。以君爲常州團練判官。不使之任。優其祿而已。今上嗣位。加檢校右僕射。君家承鐘鼎之富。少居綺紈之職。時逢革故。年俯壯室。而遂閉門卻掃。高謝人間。孜孜色養。怡怡自得。姻族以之肅穆。士友以之景仰。名節終始。清風邈然。丙寅歲夏六月某日。終於建安某坊之私第。春秋五十有九。初君葬太夫人於茅山良常洞之西。因自卜塋地。卽以其年月日葬焉。禮也。前夫人張氏早亡。今夫人吳氏。實有萊妻之賢。能從伯鸞之操。天資玉映。令聞薰蘭。子昭嗣。女某等。善慶所鍾。家聲不隕。愛敬哀感。在禮無違。嗚呼。令人其必有後。鉉家世通舊。復連懿親。常以君抗節遺世。旣近代之孤標。而元宗推誠。簞善又列辟之難事。足以激揚薄俗。垂示將來。乃爲銘曰。

忠於事君。孝於養親。逢時有道。以義衛身。隱不絕俗。居能保真。我永終吉。誰爲古人。地肺之原。三茅之麓。左盼松岡。前瞻柳谷。欒棘新吹。松楸再卜。令聞昭顯。流光似續。刻此茗華。永芳蘭菊。

唐故印府君墓誌銘

君諱某。字某。其先京兆人也。因官徙牒。遂居建康。曾祖知章。無祿早世。祖某官。考某官。君幼而勤學。長而力行。孝悌著於家庭。信義行于州里。弱冠明經擢第。釋褐太子校書。千里之行。時輩推許。會上國喪亂。遂

南奔豫章。連帥鍾公見而悅之。辟爲從事。豫章府變。始歸建康。井邑更移。親舊泯沒。君慨然悲世難之未已。感宦路之多艱。于是抗志衡門。息機世表。樂山水。寡言語。極談不過經籍之事。足迹不游卿相之門。篤好六經。歲誦再徧。雖憂慘疾病。未嘗廢也。孜孜焉修善。如不及。恂恂焉與人無間言。保大丙寅夏四月日。考終命。臨終訓勵諸子。備有嚴誡。如魏顥之命。無莊烏之吟。春秋六十有九。夫人徐氏。通儒書。有婦德。先君而逝。卽以其年月日。合葬於某所。禮也。子崇禮。崇粲。舉進士。崇簡。明經及第。爲舒州司法參軍。秀茂之業。聞於場中。咸以爲印氏之門。其後必大。諸子以我宗之自出。故銘撰是求。銘曰。

於惟穆氏。代有君子。恂恂若人。亦旣克似。退不丘壑。進不朝市。體道居貞。全高沒齒。俊造之學。施於後嗣。昭昭令名。與石無已。

唐故銀青光祿大夫檢校國子祭酒御史中丞包君墓誌銘

君諱諤。字直臣。丹陽延陵人也。粵我長源。發於夏后。分封受代。著於會稽。司農而後。代有賢哲。轉徙旁郡。遂家延陵。種德流光。世爲大姓。曾祖章。丹陽令。祖輒。潤州錄事參軍。考洎。和州歷陽令。業官之美。播于岷。頌公以廣明庚子歲。生於丹陽。長於戎馬之間。遂好金鼓之政。氣質慷慨。而孝于事親。材用敏幹。而慎于畏法。命不我與。事多無成。高皇帝兼總六師。以輔王室。署君牙門右職。將進用之。君以歷陽府君喜懼之年。辭歸就養。因隸歷陽軍中。自是服勤祇役。多在外郡。家貧。援寡。仕不求聞。三十餘年。有勞無過。養心知命。以保遐齡。交泰元年春二月日。卒於鄱陽舟中。春秋七十有九。夫人危氏。故賀州刺史諱德卿之女也。婦道以順。家政以嚴。內慎有光。六姻是則。子三人。曰會宗。曰穎。曰銳。皆敬述先志。勤修令名。號奉靈輔。俯

就成制。卽以其年月日。葬于江寧縣某里。禮也。某感深自出。名謝貴甥。載悲渭陽之詩。永痛西州之墅。敬書遺懿。以鏤貞珉。其銘曰。

猗歟府君。世載其聞。有道無命。與俗同羣。代耕得祿。全和保真。高壽八十。下從先人。乃整歸艗。秦淮之濱。乃卜玄宅。句金之陵。不可不識。封丘勒銘。悠悠餘慶。永永芳塵。

此
页
空
白

徐騎省集卷第十七

岐王墓誌銘

故平昌君孟氏墓誌銘

故昭容吉氏墓誌銘

唐故鍾氏太夫人太原縣太君王氏墓誌銘

唐故太原府君夫人彭城劉氏墓誌銘

唐故隴西李氏夫人墓誌銘

唐故文水縣君王氏夫人墓誌銘

岐王墓誌銘

天地之靈氣發爲賢人。邦家之積慶鍾于公族。其或富老成之智。促殤子之年。感羣情者。自出於天資。垂英聲者。非由於事業。是以蒼舒軫悼于魏祖。表行曰哀。夏王鍾愛于明皇。錫名爲一中興。在運代有人傑。見于岐王矣。王諱仲宣。今上之第二子也。文武儲慶。日月輪祥。實太妃之子。如魯桓之貴。天質秀發。神機內融。亦旣免懷。未遑就傅。問安長樂。視膳寢門。承歡愛於瑤齋。極友悌于朱邸。成人之量。宛由生知。三歲受封爲宣城郡公。假大司馬之秩。維城之望。日以光矣。不幸_{今上御名}疾。甲子歲冬十月二日。薨於閣內。年四歲。主上痛幼敏之異。極天慈之懷。詔輟朝七日。冊贈司徒。追封岐王。旣而感上聖之忘情。遵先王之從儉。節哀簡禮。以厚古風。卽以其月十有八日。備鹵簿鼓吹。葬于江寧府某縣某里之原。有司諡曰懷獻。禮也。惟王以襁褓之年。蘊金玉之度。異迹昭灼。可得而言。至如禁中娛侍。常在左右。或異宮一日。則思戀通宵。翌旦未明。必親至御幄。須奉顏色。然後卽安。其孝也如此。上每罷朝稍晏。莊色未迴。王則儼然侍立。不妄

言笑。須天顏悅懌。則趨就膝下。怡怡稚戲。不失其儀。中宮以上之鍾愛。恐漸于驕。故撫字之方。威克于愛。每加教訓。過於嚴厲。而王凜然祇畏。初不壞容。退或見上。乃啼而自悔。其敬也如此。始二歲。上親授以孝經。雜言。雖未盡識其字。而每至發端。止句之處。皆默記不忘。至于寢疾。近數千言矣。時聽奏樂。必振袂擊節。咸中律度。工人試中變其曲。王輒止之曰。非前曲也。雖周郎之顧。何以加焉。其慧也如此。受封之日。見于內殿。音詞宣朗。容止閑習。觀之者咸歎重焉。其敏也如此。凡玩好之物。意有欲者。瞬目賞譽。未嘗求索。識其意。持以與之。必再三推卻。不肯即取。受其毅也如此。上曰。昔人謂王勣爲神仙童子。今此兒近是乎。及其薨也。悼念之甚。曰。吾見佗人賢子弟。猶惜之。豈惟父子之性乎。中宮哀慟。至於加疾。自非英姿感動。孰能臻此哉。議者以爲列宿淪精。高真降迹。表瑞王室。今復還矣。嗚呼。凡我臣庶。暨乎藩戚。瞻飛蓋之何期。慨神理之難測。寧盡美于稱讚。庶騰芳於簡冊。詞臣奉詔。謹勒貞石。其銘曰。

粵我仙源。流光慶延。公族之異。惟王生焉。禮詩仁孝。斯之謂賢。夙習非學生。知自天。旣與之智。胡奪之年。瞻庭蘭刈。顧掌珠捐。孟冬寒氣。京兆新阡。鼓吹蕭蕭。旌旆翩翩。踈逸躅於稚齒。闕藩房于夜泉。已焉哉。庶彭殤之一夢。豈沒世之無傳。

嗚呼。庭蘭伊何。方春而零。掌珠伊何。在玩而傾。珠沉媚澤。蘭隕芳馨。人猶沮恨。我若爲情。蕭蕭極野。寂寂重扃。與子長訣。揮涕吞聲。噫嘻哀哉。

又銘一首

至尊所作。上省庭蘭掌珠之句。謂得比興之實。遂廣其意。發爲斯文。親迂宸翰。批於紙尾。足以厚君親之

義行孝慈之風。是用勒石。永光泉戶。謹記。

故平昌郡君孟氏墓誌銘

太歲癸卯五月十有九日。大行皇帝諸妃。平昌郡君。歿於大內之別院。享年四十有三。嗚呼哀哉。昔天保定。大東啓其疆。魯道有蕩。三桓紀其政。實始孟氏。代爲強宗。德厚流光之符。祥發慶膺之效。宜乎來裔。生此淑人。曾祖某。祖造。父及。皆以含道居貞。遞世無悶。克家垂訓。式永門風。郡君麗窈窕之容。秉肅雍之德。游依漢水。氣兆河閒。乃膺八月之求。入預良家之選。璧門受職。彤管服勤。恭順之心。奉坤儀而得禮。明惠之智。導宮教而無遺。爰屬造邦。遂崇封邑。路寢之後。柔芳載揚。旣而千載上仙。宮車晏駕。號遺弓於萬國。感餘香于九御。沈哀共極。美疹獨縈。不延幽窆之期。重惻上宮之念。嗚呼哀哉。卽以其年六月日。葬于江寧縣安德鄉德信里之原。禮也。青烏旣吉。覆斧斯營。永光烈女之風。盡紀他山之石。詞臣奉詔。謹勒銘曰。

杳杳平野。蕭蕭一丘。原松積靄。隴吹臨秋。吁嗟淑女。於此藏舟。委貞質兮長夜。奉靈駕兮仙游。惟悼史兮未泯。豈餘芳兮不休。嗚呼哀哉。

故昭容吉氏墓誌銘

天子建內官。必先令德。九嬪掌婦學。以教六宮。是故盡則成風。漢濱流化者矣。昭容吉氏。麗瑤姬之質。富班女之文。治絲枲以服勤。宮功有序。徹粢盛而舉職。祀禮無愆。用能妙簡皇心。光膺盛典。頃錫粉田之賦。因開左輔之封。嗣服之初。日不暇給。視月卿而命秩。近正朝恩。閱逝水以成川。俄悲異物。春秋三十有三。

保大三年秋七月二日。薨于別宮。皇帝悼之。廢朝一日。遣奠之禮。有加等焉。卽以其年月日。葬于上元縣龍城鄉之原。禮也。昭容諱某字東海。胸山人也。曾祖徵。朗州龍陽縣令。祖黨。壽陽縣令。父彥輝。海州懷仁縣令。咸膺鄉里之選。屈從州縣之勞。有利物之能。不享其位。垂積善之慶。克茂其宗。著籍金門。移家戚里。昭映悼史。不其美歟。詞臣奉旨。式揚懿德。庶使高深自改。長延丹砌之恩。金石無虧。仰慰璧臺之念。其詞曰。

吉甫作頌。穆如清風。儲慶炳靈。實生昭容。史曰明智。詩云肅雍。內職以理。柔芳有融。閱川宵奔。燃膏曉滅。西陸移景。涼風殺節。虞殯流聲。遣車成列。茗華不磨。蘭菊無絕。

唐故鍾氏太夫人太原縣太君王氏墓誌銘

夫人太原祁人也。因官徙籍。遂居豫章。自緱嶺肇基。晉陽錫壤。光靈繁祉。蔚爲大宗。圭組簪纓。與世升降。聖歷中否。我亦不彰。故祖考某。皆蘊道居貞。流謙毓德。夫人有金玉之質。桃李之姿。柔順睦姻。以奉慈訓。組紉織紵。聿勵家風。宗族里閭。莫不稱美。先公司徒。纘戎嗣服。實臨我邦。夫人誕昭四德之華。用光九女之選。門內之理。實皆聽之。家人尙嚴。婦道貴順。主饋以敬。均養以慈。契闊夷險。始終若一。邦君內則。皆取正焉。嗚呼。昊天不庸。路寢卽順。夫人棘心蓬首。率由舊章。素尙空玄。益所明習。常齋居晏處。諷誦真文。雖祁寒盛暑。未嘗廢也。又以恭儉孝悌。文學道義。訓勵子弟。皆成其名。保大□年。詔封太原縣太君。從子貴也。二子長曰懷建。由校書郎。歷東府掾。以羣從百口。家于豫章。於是辭祿公朝。歸綜司政。因除洪州都督府司馬。次曰舊。以屬詞敦行。從事戚藩。累登臺郎。爲集賢殿學士。會中令齊王。避親讓寵。授鉞臨川。朝廷

慎選英僚。以光幕府。除撫州觀察判官。檢校屯田郎中。既拜而夫人疾亟。交泰元年春二月十八日。卒於京師嘉瑞坊之官舍。享年七十有五。卽以其年月日歸葬于洪州某縣某里之原。禮也。嗚呼。富壽戩穀。天所以祐善。金石銘謨。世所以垂範也。二者無愧。可謂賢哉。鉉早奉世親。晚連姻好。景行懿德。敢用直書。其銘曰。

緱山不傾。清淮不湮。故我王氏。實生令人。衛姬之智。孟母之仁。光昭祖禰。垂慶來雲。西山之陽。章江之濱。靈仙攸宅。松檟相因。遐壽歸全。以反吾真。

唐故太原府君夫人彭城劉氏墓誌銘

夫人麗窈窕之容。蘊幽閒之德。孝敬肇于天性。明惠本於生知。光乎六姻。是謂賢女。初我大父殷。考遇皆立功興運。蔚爲將臣。婚姻之盛。冠彼當代。故夫人旣笄。歸于我府君。君諱承進。壽州節度使國公之第三子也。二族斯睦。百兩是將。婦禮之嚴。家道爰正。府君性疎直。喜賓客。理劇如簡。不以世務嬰心。行已取適。不以家財爲重。鐘鼎之族。化爲簞瓢。夫人雅性冥然自足。慈和待物。恭儉飾躬。子孫以之。而克家。僕御以之。而服教。及罹蓬首之痛。誓全柏舟之節。柔芬方遠。景命不融。春秋四十有九。戊午夏六月某日。終於京師濱江坊里第。子某等。俯就成制。號奉靈輜。卽以其年月日葬于某鄉。祔府君之塋。禮也。鉉幸參諸壻。獲從外姻。載陳執紼之儀。仍奉懷銖之託。敢書懿範。以鏤貞珉。其詞曰。

嗟淑女兮。仁慈肅雍。伊君子兮。亮簡疎通。合二姓兮。五侯之宗。垂內則兮。素士之風。悲秋霜與冬霰。摧女蘿與青松。念光塵之倏忽。獨天長兮無窮。

唐故隴西李氏夫人墓誌銘

夫人諱某某其先太原人故左司郎中贈太府卿諱潛之孫今太弟洗馬裔之第三女也伯仲世父皆踐歷臺閣抑揚聲實相糾以孝相高以讓芝蘭桃李閨庭燦然夫人襲圭組之英發爲秀色鍾姻睦之氣凝爲淑性柔而有則愛而不驕紉組之工翰墨之妙稟自天性能必過人及長歸於李君君名俛故楚州刺史諱承嗣之孫今禮部尙書度之少子也舅甥之故齊魯之匹好合之美潘楊之風夫人移天睦族率由典禮不恃舊以廢職不矜能而怠敬門內之理清芬穆然嗚呼嚴霜春零薜華朝墜享年二十有五某年月日卒於京師某里之寓居二族悲慟六姻悽愴仁而不壽古則有之以其年某月日葬于江寧縣某鄉里之原禮也東海徐鉉以世親之舊實維私之敬執紼永悼刊石爲銘銘曰

天之命兮不可知生此賢女兮鍾淑姿嬪于盛族兮昭令儀與之才兮不與之壽永凋落兮芳時儼黼黻道靈輻小江村兮長江湄千秋萬代兮草離離空餘初月如蛾眉

唐故文水縣君王氏夫人墓誌銘

夫人諱曉字國香其先太原人今爲廬江人也祖潛左司郎中贈太府卿考坦禮部郎中皆以貞幹純懿見稱于時夫人麗窈窕之容秉明慧之性幼失所恃事繼親以孝聞在家不違于姆師移天不失于婦順初先姑之治也嚴而有惠通而得禮夫人觀形稟教莫不率循故三十餘年門風家法凜然如舊性尙靜退不樂世喧始愚之在要職也夫人憂形于色及其居貶所反欣然忘貧此其所以爲異也雖門族素盛而世塗多故祿賜所入賙給無遺豐約同之親疎如一至於澣濯之儉組紉之勤繁藻盡敬儒玄勵操環

珮中節。始終不渝。少善秦聲。長亦捨棄。每晨輿誦五千言而已。享年五十。戊辰歲八月一日。終于京師舜澤里之官舍。其年十月二十三日。歸窆于西山洪崖鄉鸞岡里。從先姑大瑩禮也。有子曰夷直。女曰神華。林華。嗚呼。愚常以體道委命爲懷。而情之所鍾。不知其慟。銜涕秉筆。庶不泯其聲塵焉。銘曰。緱嶺之靈。生此淑人。洪崖之濱。寄此新墳。生與道俱。沒與仙隣。悠悠精爽。豈或爲塵。嗚呼。吾信積善之必爾。故攄恨於斯文。

此
页
空
白

徐騎省集卷第十八

御製春雪詩序

後序

御製雜說序

北苑侍宴詩序

文獻太子詩集序

翰林學士江簡公集序

蕭庶子詩序

成氏詩集序

御製春雪詩序

臣聞堯尙文思。書有詠言之目。漢崇儒學。史稱好道之名。所以澤及四海。化成天下。其後迂闊王道。蕩淫淳風。正始之音闕而莫續。魏帝浮雲之句。不接輿詞。王融曲水之篇。無聞聖作。將興古義。允屬昌期。我皇帝陛下。常武功成。右文業廣。明踰日月。不以聖智自居。思挾雲天。不以才能格物。其或南薰有懌。東作無憂。民思秋稼之娛。物茂冬蒸之禮。恩覃在鎬。調振橫汾。天籟發音。疇非聳聽。乾文垂象。寧隔仰瞻。信可以暢列聖之謨猷。變生人之耳目者也。於是歲躔作噩。序首青陽。玄鳥司啓之明晨。白獸稱觴之節日。有唐中興之一紀。皇上御歷之七年。地平天成。時和歲稔。衢樽之味。普洽玄風。擊壤之聲。散爲和氣。同雲密野。朔雪飛空。急勢隨風。影亂東郊之仗。凝華接曙。光浮元會之筵。星躔旣移。雲壘乃啓。太弟以龍樓之盛。入奉垂旒。齊王以鳳沼之崇。來參帑几。霞軒結轍。革履齊趨。唯陳韶濩之音。無取魚龍之戲。喜油油之旣洽。顧奕奕之方呈。筆落天波。言成帝典。七言四韻。宣示羣臣。乃命太弟太傅建勳。翰林學士給事中朱鞏。常

夢錫翰林學士中書舍人殷崇義游簡言吏部尙書毗陵郡公景蓮工部尙書上饒郡公景遜左常侍勤政殿學士張義方諫議大夫勤政殿學士潘處常魏岑駕部員外郎知制誥喬舜主客員外郎知制誥徐鉉膳部員外郎知制誥張緯光祿卿臨汝郡公景遼鴻臚卿文安郡公景遊太府少卿陳留郡公景道左衛將軍樂安郡公弘茂駕部郎中李瞻等或廣元首之歌或和陽春之曲如葵心之向日馭似螿戶之由雷門二十一篇咸從奏御皆所以美豐年之兆申萬物之情非徒載笑載言一吟一咏而已昔者白雲之唱七萃驅馳黃竹之詩萬人凍餒王猷且塞後嗣何觀孰若偃仰大庭優游六藝初筵有秩而六宮不移夜漏未央而百官已事被之樂府授以史官煥乎文章無得而稱也有詔爲序以紀歲月御批云宿來健有餘力何妨一爲之序以紀歲月何呵天慈過聽猥屬微臣徐樂上書徒慙暮入其日內宴臣安國作序幸冠首篇狂簡僅成兢憂罔措謹上

後序

昔者漢宮故事著成王負辰之圖魯殿弘規紀黃帝垂衣之象用能昭文昭物雖十世而可知如玉如金更百玉而不易況乎天統建寅之首皇猷累洽之晨上瑞方呈宸游載穆拱北極而衆星咸在祝南山而萬壽無踰明皇花萼之樓風流不泯德祖中和之節雅頌常垂實奕世之耿光爲中朝之盛觀固當騰之竹帛飾以丹青襲六藝以同明與天文而共麗皇太弟重離普照博望凝思敦古道以致君法前經而作事命千秋而指畫召立本以趨馳粲然後素之功焯爾彰施之象煦如就日肅不違顏萬國式瞻若奉衣裳之會羣臣仰止似聞輿馬之音盛德形容於斯大備者也初外朝旣罷內宴方陳赴召者上自副君逮

於戚里。銅壺已晏。聖藻爰飛。或逶巡而載歌。或蹈詠而不作。既而有詔出示羣官。臣建勳、義方、鉉等。聞命在前。援簡先就。因承中旨。入奉斯筵。而兩省衆篇。翌日咸集。故奉和者二十一首。而侍宴者十有四人。前序闕遺。被令重述。謹上。

御製雜說序

臣聞軒后之神也。畏愛止乎三百。唐堯之聖也。倦勤及乎耄期。文王之明夷也。爰象周於六虛。宣父之感麟也。褒貶流于百代。乃知功利之及物者。與形器而有限。道德之垂憲者。將造物而常新。是故體仁者必懇懇於立言。務遠者必勤勤於弘道。然則封泰山。告成功。七十二家。正禮樂。刪詩書。一人而已。大矣哉。立教之難也。有唐基命。長發祥符。舊物重甄。斯文不墜。皇上高明博厚。濬哲文思。既承累聖之資。仍就甘盤之學。鴻才綺縟。理絕名言。默識泉深。事符影響。自祇膺眷命。欽若重熙。廣大孝以厚時風。勵惟精而勤庶政。宥萬民而罪已。體百姓以爲心。俗富刑清。時安歲稔。其或萬機暇豫。禁籞宴居。接對侍臣。宵分乃罷。討論墳典。昧旦而興。口無擇言。手不釋卷。嘗從容謂近臣曰。卿輩從公之暇。莫若爲學爲文。爲學爲文。莫若討論六籍。游先王之道義。不成。不失爲古儒也。今之爲學。所宗者小說。所尙者刀筆。故發言奮藻。則在古人之下風。以是故也。其高識遠量。又如此焉。昔魏武帝有言。老而勤學。而所著止於兵書。吳大帝亦云。學問自益。而無聞述。作風化之旨。彼其惡歟。屬者國步中艱。兵鋒始戢。惜民力而屈己。畏天命而側身。靜慮凝神。和光戢耀。而或深惟邃古。遐考萬殊。懼時運之難并。鑑謨猷之可久。於是屬思天人之際。游心今古之間。觸緒研幾。因文見意。縱橫毫翰。炳煥縑緗。以爲百王之季。六樂道喪。移風易俗之用。蕩而無止。愒心

堙耳之聲。流而不反。故演樂記焉。堯舜既往。魏晉已還。授受非公。爭奪萌起。故論享國延促焉。三正不修。法弊無救。甘心於季世之僞。絕意于還淳之理。故論古今瀆薄焉。戰國之後。右武戲儒。以狙詐爲智能。以經藝爲迂闊。此風不革。世難未已。故論儒術焉。父子恭愛之情。君臣去就之分。則褻申生。明荀彧。俾死生大義。皎然明白。推是而往。無弗臻善。天地之深心。聖賢之密意。禮樂之極致。教化之本源。六籍之微辭。羣疑之互見。莫不近如指掌。煥若發蒙。萬物之動。不能逃其形。百王之變。不能異其趣。洋洋乎大人之謨訓也。夫天工不能獨運。元后不能獨理。故有道無時。孟子所以咨嗟。有君無臣。鄭公所爲歎恨。庶乎斯民有幸。大道將行。舉而措之域中。則三五之功。何遠乎爾。臣又聞將順致美。鋪陳耿光。布堯言於萬邦。稱漢德于殊俗。蓋詞臣職也。若乃嚮明而理。負辰而朝。慶賞威刑。豫游言動。則有太史氏存焉。又若雅頌文賦。凡三十卷。鴻筆麗藻。玉振金相。則有中書舍人。集賢殿學士。徐鍇所撰御集序詳矣。今立言之作。未卽宣行。理冠皇墳。謙稱雜說。臣鉉以密侍禁掖。首獲觀瞻。有詔冠篇。勒成三卷。而三卷之中。文義旣廣。又分上下焉。凡一百篇。要道備矣。將五千而並久。與二曜以同明。昭示孫謨。永光冊府。謹上。

北苑侍宴詩序

臣聞通物情而順時令者。帝王之能事。感惠澤而發頌聲者。臣子之自然。況乎上國春歸。華林雨霽。宸游載穆。聖藻先飛。雷動風行。君唱臣和。故可告於太史。播在薰絃。帝典皇墳。莫不由斯者已。歲躔己巳。月屬仲春。主上御龍舟。游北苑。親王舊相。至於近臣。並儼華纓。同參曲宴。時也。風晴景淑。物茂人和。望蔣嶠之嶽。登祝爲聖壽。汎潮溝之清淺。流作天波。絲篁與擊壤齊聲。醴斝共君恩與醉。乃命卽席。分題賦詩。容思

雲飄天詞綺縟。文明所感。蹈詠皆同。旣擊鉢以爭先。亦分題而較勝。長景未暮。百篇已成。自揚大雅之風。豈在逾人之職。奉詔作序。冠於首篇。授以集書。藏之金匱。謹上。

文獻太子詩集序

鼓天下之動者在乎風。通天下之情者存乎言。形于風可以言者。其惟詩乎。粵若書契肇生。雅頌乃作。達朝廷邦國之際。其用不窮。更治亂興替之時。其流不竭。六義浸遠。百代可知。若夫王公大人。居尊履正。其行道也無迹。其成務也不宰。所以可則可象。有功有親。非夫詠言。何以觀德。周文陳王。業之什。召穆糾宗。族之篇。聖人輯之。皇猷備矣。子桓建安之藻。昭明總衆之作。英體有古今。理無用舍。夫機神肇於天性。感發由於自然。被之管絃。故音韻不可不和。形於蹈厲。故章句不可不節。取譬小而指大。故禽魚草木無所遺。連類近而及物遠。故容貌俯仰無所隱。怨則可戒。贊美不誣。斯實仁者之愛人。智士之博物。王室光啓。人文化成。上去刪詩。綿二千祀。其用益廣。其制益精。絕其流冗。結以周密。王言帝典。炳蔚于縑緗。詞人才子。充溢于圖牒。若乃簡練調暢。則高視前古。神氣瀟薄。則存乎茲人。亦何必以苦調爲高奇。以背俗爲雅正。者也。殿下挺生知之哲。有累聖之資。道冠三才。學兼百氏。虞庠齒胄。騰聲於就傅之年。侯社錫圭。底績於爲邦之際。隨城封壤。人歌召伯之棠。浙右控臨。時賴京師之潤。戎機鞅掌。曾不勞神。閑館娛游。未嘗釋卷。深遠莫闕。其際喜慍不見於容。唯奮藻而摛華。則緣情而致意。至鍾山樓月。登臨牽望。闕之懷。北固江春。眺聽極朝宗之思。賞物華而頌王澤。覽檣事而勸農功。樂清夜而宴嘉賓。感邊塵而憫行役。沉吟命筆。顧盼成章。理必造於玄微。詞必關於風教。或寓言而取適。終持正於攸歸。著於簡編。凡若干首。

及玉符來觀。玄圃歸尊。臨飛閣之華池。卽滄雷之講肆。斯文閒作。盛德日新。蓋曠代之宗英。實一時之師匠。以鉉幸塵贊論。嘗典絲綸。謂可言詩。因令視草。聽鈞天之奏。徒欲動心。酌滄海之波。唯知滿腹。敬抽短翰。式繼頌聲。謹序。

翰林學士江簡公集序

士君子藏器於身。應物如響。成天下之務者。存乎事業。通萬物之情者。在乎文辭。然則日月不知。人亡政息。瞻之則眇然在羲軒之上。蹈之則肅然若旦暮之間。自非遺文餘教。則作者之道。或幾乎息矣。嗟夫。天地長久。英靈超忽。鄴中才子。與樂事以俱淪。江左名臣。及玄譚而共盡。清流可挹。勝氣猶生。閱蠹簡以淒涼。撫絕韋而慷慨。斯文未喪。何代無人。濟陽江公。鍾川岳之粹靈。體角犀之奇相。芳蘭十步。本自天資。建木千尋。非求外獎。弱齡聞道。夙歲馳名。竹箭稱美於東南。來充王府。天馬擅奇於西北。入奉乘黃。於時聖歷中興。賢才閒出。從容冠蓋之際。頡頏臺閣之間。文高學深。識優理勝。虛襟接物。簡易多通。正色當官。直方無擾。定祖宗之大號。功補神明。端風憲之直繩。氣懾姦宄。身可屈而名不辱。用卽行而舍卽藏。故叢棘三年。雅懷自若。承明再入。時望彌高。人無閒然。道亦光矣。嗚呼。運逢上聖。年在中身。人之云亡。空嗟殄瘁。死而可作。誰與同歸。詩所謂胡不萬年。傳有云古之遺愛者也。昔襄陽孟浩然。年五十有二。疾發背而亡。公豈其後身歟。何符合之若此。惟公以進士擢第。以詞賦馳名。事藩邸。參管記之司。登朝籍。專掌綸之任。奏議表啓。時然後言。詩筆歌頌。和者彌寡。絕文場而遠鶩。橫學海以孤飛。綜南北之清規。盡古今之變體。優游兩制。不亦宜乎。然而初無簡編。文乃亡逸。嗣子翹門。生王克貞等。或搜諸經笥。或傳於人口。或焚藁

之外。或削材之餘。彙聚羣分。得十卷。授之執友。以命冠篇。鉉族近情親。官聯迹密。每西垣景晏。北第風清。忘形樽俎之間。得意筌蹄之表。西江東海。俱爲賦鵬之鄉。北門右掖。並對受釐之問。嗟乎。相如旣往。空存封禪之書。季子云來。但有心期之劍。寢門流慟。已隔生平。都門長送。遽成今昔。追託言於夙契。申永悼於斯文。援毫悲吒。存諸梗概云耳。

蕭庶子詩序

人之所以靈者情也。情之所以通者言也。或情之深。思之遠。鬱積乎中。不可以言盡者。則發爲詩。詩之貴於時久矣。雖復觀風之政闕。逾人之職廢。文質異體。正變殊塗。然而精誠中感。靡由於外。獎英華挺發。必自於天成。以此觀其人。察其俗。思過半矣。此夫澤宮選士。入國知教。其最親切者也。是以君子尙之。蘭陵蕭君。江左之英。詩苑之精。其爲人也。樂易其處世也。靜默忘形。衡泌之下。苦節戎馬之間。其道日新。其名益震。諸侯虛左。五府交辟。今晉王殿下。樹藩作相。樂善愛才。幕府初開。君實首冠。由典校書。至儀曹郎。出入兩宮。官無虛授。優游多士。交必正人。每良辰美景。登高送遠。適莫不存於心。府勢利不及於笑談。含毫授簡。唱予和汝。其性淡。故略淫靡之態。其思深。故多清苦之詞。大雅之士。何以過此。鉉與君爲友。幾將二紀。其閒聚散窮達。罕或寧居。淡成之懷。終始若一。靜言投分。想見古人。丁巳歲。撫王高讓承華。出分陝服。君以宮省舊德。復踐初筵。撰行之夕。俾予視草。鉉也不佞。無足揚君之美。徒欲申別恨。敍交情。故作斯文。冠於篇首云爾。

成氏詩集序

詩之旨遠矣。詩之用大矣。先王所以通政教。察風俗。故有采詩之官。陳詩之職。物情上達。王澤下流。及斯道之不行也。猶足以吟咏情性。黼藻其身。非苟而已矣。若夫嘉言麗句。音韻天成。非徒積學所能。蓋有神助者也。羅君章。謝康樂。江文通。三希範。皆有影響。發於夢寐。今上谷成君。亦有之。不然者。何其朝捨鷹犬。夕味風雅。雖世儒積年之勤。曾不能及其門者邪。逮余之知。已盈數百篇矣。觀其詩如所聞。接其人如其詩。既賞其能。又貴其異。故爲冠篇之作。以示好事者云。戊戌歲正月日序。

徐騎省集卷第十九

送謝仲宣員外使北蕃序

送贊善大夫陳翊致仕還鄉詩序

送張泌郭賁二先輩序

送武進龔明府之官序

送劉生序

游衛氏林亭序

送謝仲宣員外使北蕃序

自昔新都盜國。撓我中州。建武開元。越在江左。日月之照。不及河洛之地者。四十年矣。主上方恢遠略。弘文下武。聖作物覩。有開必先。故使僞邦失政。胡馬大入。山泉反覆。羌渾沸騰。五州遺屯。二京故老。引領南望。庶幾撫予。天子聞之。憫然。故命大司馬賈公。使以觀變。儀曹郎謝君副焉。儀曹別予。應曰。美哉。是行蒼生之福。在斯舉矣。始予及子同省。予弟又與子同府。交道深矣。今子將之絕域。無以爲贈。請贈以言。夫格天地。充四方。莫先乎禮。我太宗文皇帝。革暴隋。一寓內。屈己濟物。虛心納諫。故四夷君長。歷代不賓。稽顙闕下。可謂德矣。聲名文物。垂三百年。絕而復續。可謂禮矣。苟使踰百千代之有國家者。猶當企簞下風。奉行不墜。況中興之嗣。君乎。周秦宮闕。是本朝二宅。貞觀德禮。是本朝家法。若棄之而不念。委之而不修。非天子之意也。主上躬行於內。而使二君順之於外。今強胡入貢。中原無主。聖人不能違時。時至不可失也。子其勉之哉。思聖意。顧人心。犬羊百萬。以攻戰爲事。不可以威武服也。酋豪聚首。以姦詐爲常。不可以智力勝也。子其將之以德。慎之以禮。衣冠餘緒。必觀光於使臣。一覩漢官威儀。必感泣頓服。宅心南向。苟或

不爾。是絕蒼生之望也。可不慎歟。鉉自束髮從宦。則聞長者之論。盛言爲戰國者。必以權道。子視商周以降。誰非戰國。寧有以權道躋太平乎。而言以人棄。故事與願違。今子王府元僚。居可言之地。遠使上介。當可行之時。勉之哉。故人之願。蒼生之望。在此而已。行矣。文昌。春風二月。征途萬里。捨游宴之適。就鞍馬之勞。征虜亭下。南朝送別之場。臨滄觀側。茂弘思洛之所。敝離懷古。寧無情乎。矧軺車所經。觸緒牽思。渡長淮。則想清流映月之景。過睢園。則思愁雲零雪之興。望鞏洛。則傷麥秀之詩。指唐晉。則感大風之歌。綏懷之暇。彈琴詠詩。以祛鬱陶之慮。還軫在邇。不復多陳。聊序鄙志爾。

送贊善大夫陳翊致仕還鄉詩序

夫進退之機。大易稱首。止足之誠。玄文所宗。君子動必乘時。故言行而事立。靜惟體道。故身貴而名全。然則知之非艱。行之不易。去聖既遠。引年益稀。是以古之明君。爰有成式。重辭祿之士。優懸車之禮。賁飾寵秩。靡限常均。所以崇德尙賢。激貪勵俗者也。皇風所及。我有其人。太子洗馬陳翊。江浙炳靈。鄉閭獲譽。棲遲下位。而升聞自高。便蕃寵任。而祇畏日積。時方多難。寄切司聰。將命無私。臨事能斷。盤錯必解。風雨不渝。及少海告符。搖山表慶。天下之本。旣正。四郊之壘。亦罷。於是詠遂初之賦。決高謝之懷。京口之西。先有別墅。前臨廣陌。卻枕長江。田逾二頃。桑都八百。戴仲若軒懸之地。不遠風煙。蒲真人鹿迹之鄉。依然川域。誅茅築室。素欲終焉。其所闕者。飛泉而已。嘗因暇日。策杖尋幽。爰有道人。指示岩溜。百步之內。一道懸流。其清可鑑。其味如醴。縈崖漱石。滌慮蠲痾。信山川助其好尚。亦心府資其瑩濯。旣而挂冠請命。伏閣陳詞。優詔嘉之。竟允其請。錫金紫之服。升贊善之資。輕舟東浮。盡室而去。副君執手流涕。似宜都之別。弘景羣

公供帳。祖餞若都門之送。二疏知與不知。莫不稱歎。殿下調高雅頌。文動星辰。賦詩一章。以寵行邁。掩鄰中之舊制。流樂府之新聲。足以厚君臣之情。敦風化之本。縑緗麗色。丘壑增華。自周行之人。與觀光之士。靡然投贈。粲爾成章。遠比河梁之篇。近擬白雲之集。夫其貞退之節。樂善之風。實教義之所臻。亦詠歌之盛觀也。鉉名參望苑。迹本騷人。敢言能賦之才。濫奉言詩之賜。敬序麗則。冠於首篇。

送張佖郭賁二先輩序

君子所以章灼當時。焜耀來裔者。必曰進士擢第。畿尉釋褐。斯道也。中朝令法。雖百王不移者也。自聖歷中興。百度漸貞。能興此美者。今始見張郭二生矣。則知九仞之勢。千里之行。凝雲逐日。未可量也。鉉也不佞。生於先賢之後。進在二子之前。此美不兼。可以歎息。然有事同而時異。請試論之。噫。詞場陞廢。五十年矣。故老之言。議殆絕。後生之視聽。懵然。今百辟有司。達於郡國。吏徒見趨走公府中一尉耳。焉知其餘哉。而二君子調高才逸。年少氣盛。將以俊造之業自重。責人以既廢之禮。又將以堯舜之道爲用。議政於俗吏之間。如是將與時大乖矣。嗚呼。彼衆我寡。或者難以勝乎。君子之道。無施不可。舒之彌四海。卷之在掌握。日碑見奇于牧馬。元揚知名于水碓。彼二人卽公輔大器也。豈以恥辱爲累哉。愚願二君子反己正身。開懷戢耀。無望人以不知。無強人以不能。如斯而已矣。今天子重文好古。諸生懷才待用。所以蒼生未蒙福者。上下之勢殊。中有閒爾。大易之義。物不終否。否極必泰。泰之時。在上者其道下降。在下者其道上行。君臣相合。然後事業遠矣。吾以爲斯道之復不遠。吾子其勉之。句曲仙鄉。廣陵勝地。多難將弭。春物將華。琴棊詩酒。足以爲適。贈言之旨。盡於斯焉。

送武進龔明府之官序

古人有言士君子志意既立名譽不聞蓋朋友之過也嗚呼予於龔生有之矣始予居獻納之地生已爲赤縣尉嘗竊議謂生宜參諫垣憲府之任而未果拔茅之志遽爲賦鵬之行生不旋踵亦左授天長用武之地朝廷置建武軍于其所使爲將者治之習兵與儒其志不通也處長與佐其勢不均也軍市之征日困於民王澤之流不被于俗及生之至官聯始舉刪煩革弊丕變舊風踰年告歸舉邑之民相率遮道不聽去乃潛匿佛廟室中耆耄輩索而獲焉扶之上車擁之而還竟不得已中夜而遁異哉遺愛之風若此考功之吏弗聞丙辰歲予避兵于池陽遇生侍親郡中勉之東下是時甘泉有烽火之急天子下哀痛之詔予謂生必自致青雲之上以解天下之倒懸而出入三年始爲武進宰噫非朋友之過乎嘗試論之曰才不才在我用不用在時道之所存其人乃貴功名寵祿何足算哉苟澤及於民教被於物則百里之廣千室之富斯可矣與夫楊孟之徒坎珂閭巷垂空言於後世者不猶愈乎行矣龔生苟有良田何憂晚歲贈言之要其過此乎

送劉生序

彭城劉生爲南畿令天官侍郎昌黎公作序以送盛稱故歷陽宰楊員外光儒之爲政以勗之鉉與楊君有姻深知其內行君清簡仁愛心無適莫自妻子僕妾及家族吏民接之無親疎之隔求之於形骸之外蓋眞純之氣充而感召之應遠民之好競者皆相與言曰衆若歸訟必撓吾員外矣嗚呼其古人乎今劉生才俊於楊學優於楊觀其政績等然生猶有耿介不平之氣觀吏部之勗子與予之贈言蓋爲是也子

其心藏用。溜然與道合。在古人上矣。矧西山神仙之宅也。旌陽其遠乎。僕固倦談。生停驂已久。故揚摧以論之。九月二十七日。中書舍人徐鉉序。

游衛氏林亭序

建康西北十里。所有迎擔湖。水木清華。魚鳥翔泳。昔晉元南渡。壺漿交迓於斯。今中興建都。人煙櫛比。於是其閒百畝之地。宮率衛君澣水之所也。前有方塘。曲沼之勝。後有鮮原。峻嶺之奇。表以虛堂。累榭飾以怪石。珍木悅目之賞。充物其中。待賓之具。無求於外。庶子王君。諭德蕭君。贊善孫君。與上臺僚。嘗游焉。賢衛君也。陶陶孟夏。杲杲初日。虛幌始闢。清風颯然。班荆蔭松。琴弈詩酒。登降靡迤。闕臨駘蕩。熙熙然。不知世與我之爲異矣。嗟夫。天生萬物。貴適其性。君子有屈身以利物。後己而先人。或行道以致時交。或效智以濟世用。斯有貴乎自適者也。朝市丘壑。君得中道焉。下雍道。汙智劣。無益於事。山資弗給。歸計未從。每尋幽選勝。何遠不屆。一踐茲境。杳然忘歸。凡我同游。皆爲智者。徵文紀事。其有意乎。壬子歲夏五月。祠部郎中。知制誥徐鉉。躊躇慨歎之所作也。

此
页
空
白

徐騎省集卷第二十

百官奏請行聖尊后冊禮表

賀德音表

謝詔撰元宗實錄表

謝賜莊田表

爲蕭給事與楚王書

又代蕭給事與楚王書

復方訥書

答林正字書

答左偃處士書

常夢錫行狀

薦處士陳禹狀

冊秀才文四首

祭文獻太子文

與中書官員祭江學士文

祭韓侍郎文

祭王郎中文

祭劉司空文

百官奏請行聖尊后冊禮表

文武百官臣某等言。伏奉制旨。以聖尊后冊禮。奉令旨。俟百日後上進者。仰承嚴命。固合遵行。但以事有未安。理須陳奏。中謝伏以歷代以來。嗣極之主。禮之大者。尊奉上宮。儻或正儀未行。庶事莫敢先舉。所以陛下裁膺冊禮。卽下制書。長樂歸尊。已先孝理。百司承式。將撰吉辰。及金輅言還。六宮卽敍。惟憂典禮。已屬稽遲。遽覩絲言。備聽慈旨。在直麻之次。誠極感傷。然凶吉之儀。本無妨礙。歷觀前載。徧考儒臣。法度具

存事體至大。況渙汗之澤。普及諸侯。簡冊之行。便當相次。未修大禮。交慊羣情。伏乞陛下。再稟嚴慈。俯迴聽允。臣等幸塵有位。庶免曠官。冒瀆冕旒。無任云。

賀德音表

文武百官某等言。伏觀御札。崇尚儉約。克己庇民。節省服用。去金玉之飾。減放嬪御。屏聲色之娛。供進珍羞。製作奇巧。中禁賜與。內門資用。並從損廢。以緩征徭。宸翰章明。德音流布。凡百卿士。至于兆人。歡呼感動。倍百常品。中賀臣聞文武之政。方策存焉。知之非艱。行之不易。故自三代已降。繼體之君。有師保之訓。以制其情。有諫諍之臣。以救其失。及其行也。猶未臻焉。豈有發自宸衷。出于獨斷。乾文昭煥。至德宏新。聳動四方。如此之盛者也。伏惟陛下。重熙撫運。下武膺期。翼翼小心。乾乾夕惕。寅畏所感。人神罔弗。和仁明所加。細大罔弗。理然猶勞。謙訪道。虛己求才。日照天臨。山藏海納。體唐堯之仁。以親九族。極虞舜之孝。以奉上宮。率天下之尊。以承顏問安。舉四海之富。以扇枕調膳。德既充矣。化亦孚矣。然後卹小民之艱食。閔羣吏之急徵。息澤虞之征。釋公田之禁。崇足用之本。近取諸身。致九年之儲。無求于外。斥靡曼之色。咸遂物情。除玩珍之飾。率由舊典。去淫巧以急用。罷私積以歸公。生人之耳目。惟新風俗之澆。浮立變。先皇帝貽翼子之訓。垂聖人之資。言有所未宣。行有所未逮。陛下奉揚先志。推而行之。數年之間。盛美斯備。向若非陛下之孝心廣達。無以見先帝之聖作。惟幾巍乎煥乎。不可得而名已。昔者成湯。因歲旱而罪己。周成動天威而責躬。咸能卽致時雍。永錫繁祉。豈若陛下春秋方富。中外方寧。制于幾先。行此難事。宗社之降靈。可見邦家之流祚。何窮。率土之濱。孰不幸甚。則臣向所謂知之非難。行之不易。陛下既能行之矣。臣又

聞行之甚易終之實難。願陛下慎而守之。則登三邁五。夫何遠耶。臣等幸塵班列。無補盛明。徒慙充位之譏。但賀蒼生之福。措詞有盡。順美難周。臣等無任瞻天仰德。歡呼躍踊之極。云

謝詔撰元宗實錄表

臣鉉伏奉詔諭。以元宗皇帝實錄。命臣修撰。才微任重。恩厚責深。拜捧絲綸。若臨冰谷。中謝臣聞握圖御宇。既憲章于在昔。創法垂統。亦啓祐於後昆。然則至德無名。玄功無迹。惟日用而不竭。豈淺局之能量。是以良史之才。歷代爲重。以南董之直。而無聞于成編。如遷固之能。而不絕于浮議。則知鋪陳王業。昭灼皇圖。求之當仁。豈易輕授。伏惟元宗皇帝。紹中興之統。承累洽之基。大孝邁於有虞。仁恕逾於漢祖。愛人節用。得孝文之風。重學崇儒。有建元之烈。東京則光武章明。以憂勤立政。魏室則太祖陳王。以文藻化人。綜是全功。允昭聖德。對越上帝。敷佑下民。二十年間。慎終如始。陛下嗣膺寶歷。欽若天明。以累聖之資。輔生知之哲。導揚休命。啓煥貽謀。故得畏軒后之神。更延三百。配文王之祀。永奉明堂。必將著以丹青。播于金石。斯爲重任。宜在鴻儒。如臣者。章句末流。記問微學。遭逢之便。塵玷司言。豈意天鑒不遺。宸慈過聽。猥加寵寄。及此非才。進退莫遑。怔忡失次。然臣祇事先帝。常忝近司。沐王澤以滋深。欽皇風而永久。報大君之厚德。誠有愚心。廁作者之清塵。其如公議。戴恩愈極。揣分彌驚。未識津涯。徒知慶躍。云

謝賜莊田表

右臣伏蒙宸慈。念及闕乏。特降宣旨。爲置莊田。仍且于少府監。賜熟米二百石者。望外之恩。莫知所自。撫躬拜命。終懼且驚。伏以臣稟性顛愚。觸塗疎拙。幸緣際會。早玷清華。祿秩之資。旣爲過量。吉凶之備。皆沐

優恩空費稻粱。寧裨海嶽。但以家傳清白。族有羈孤。雖欲居常。終慙逼下。蓋亦闕於世務。非敢竊效古人。伏惟陛下。明極燭幽。仁深廣覆。親加寵諭。曲軫殊私。昔者葛亮薄田。不聞君賜。孫弘脫粟。尙獲時譏。如臣非才。何以致此。辭讓則有。辜憫則祇受。則更覺貪饕。徒承推食之恩。轉積素餐之懼。乾坤之施。無可上酬。螻蟻之軀。惟知畢命。

爲蕭給事與楚王書

世事推移。長塗圯隔。違離軒砌。二十餘年。追念生平。有覲心目。伏承大王。英謀奮發。妙略宏施。長驅伐叛之師。克正奪宗之罪。奉大朝之正朔。慰全楚之謳歌。成功上簡于帝心。惠澤遠敷于疲俗。風猷所及。慶快同深。儼早被恩私。今通信問。欣躍之極。倍萬常情。

又代蕭給事與楚王書

儼聞君子退人。忠臣去國。舊君有反服之禮。交絕無惡聲之嫌。以義始終。古今一也。某受性無術。闇于事機。佩師訓以周旋。忘時態之險易。追維疇昔。受遇先王。國士之知。何嘗暫忘。某復曳裾侯館。委質府庭。松楸所依。兄弟少長。大義若此。乃心如何。而世事推移。讒言交_{御今上}。忠信獲罪。干戈日尋。某雖不才。非敢愛死。過君以求名。則不忍。苟生以失節。則不能。誠恐叢爾之身。終爲執事之累。所以仰冒嚴禁。逃還故鄉。出魯國以悲歌。向西河而下泣。子鮮去衛。非欲立朝。梁鴻適吳。本期自質。先皇帝恩深善貸。義極綏懷。采鄉曲之棄妻。收荆岑之遺璞。遂得服勤州縣。歷職朝廷。始望初心。豈將及此。但封疆遠隔。玉帛不尋。奕世君臣。一朝胡越。愧三州之父子。羨五部之弟兄。外覲交朋。俯慙章綬。每春秋代序。霜露交零。飛江南之羣鷺。

嘶代北之朔馬。悲興觸緒。淚落霑襟。自分沒身。長懷永歎。而天將厭亂人。或與能。大王以命世之資。克清家難。聖上以至仁之舉。宏濟橫流。車書既同。冠蓋相望。方承大王。念紉蘭之逐客。哀叢棘之離人。煦以恩光。感之意氣。乘軒食肉。有若平生。始聽音塵。猶疑夢寐。且悲且慰。五情無主。苟非大人之德。不以細故介懷。則惠好所臻。孰能若是。某又聞善父母者。必推錫類之感。善兄弟者。必廣棠棣之風。故能功冠生民。道濟天下。大王英謀遠略。弘量深仁。上國仰其嘉猷。全楚被其渥澤。如某昔年事分。曾無壘介之嫌。今日支離。合在昭蘇之數。況東西一體。道路無虞。儻蒙閱以懸旌。全斯大造。兄弟子姪。並許還朝。存者荷二天之恩。沒者釋九原之恨。則生死肉骨。未可比量。瀝膽墮肝。寧申萬一。某以學古爲家業。以感義爲素懷。空言虛詞。且非說客。皇天后土。實鑒此心。猶覲拭玉張旂。或從行人之末。捧禽執贄。重趨典客之傍。丹懇獲申。微願斯畢。雖復身填溝壑。猶望魂魄。知歸攬筆陳詞。悲來橫集。

復方訥書

鉉以疎拙之性。頑滯之資。廁于人曹。無足比數。然以荷先人之業。猥踐清貴。讀往聖之書。頗識通方。累朝舊恩。漸于肌骨。至於行道濟物。立身揚名。報國士之知。成天下之務。竊不自揆。頗嘗有心。故膺耳目之寄。當要津之路。侃然受任。不以爲憂。而才與心違。命與運背。言出而不能寤。主身廢而無足救時。三年之中。百艱備歷。干戈擾于內地。烽火照于闕庭。奔走道路。容身靡所。當此時也。苟得耕于南畝。齊于一民。以斯終焉。尙爲幸也。而副君將聖。王道漸亨。博采遺賢。以濟多難。贊諭之任。首及非才。拜命以來。齷自憂媿。何者。儲后踐納。簾之重。而處于承顏之地。有從諫之善。而立于無過之場。徒欲持稊米以實太倉。秉燭火以

助義御恐不足以副上德之舉。塞故人之望也。但當正身潔己。狗公滅私。使內不媿于本心。外不違於所學而已。閣下德我太甚。期我太深。歷陽郡佐白君至京。辱賜手札。慶譽優渥。勗勵殷勤。知己之情。無以過此。然此日副君之垂顧。乃昔時閣下前席品題之所致也。緘藏佩服。何日忘之。今兵難少寧。蒸民未泰。頂踵利物。斯實其時。閣下高臥已久。羣望頗鬱。宣室之召。斯在不遠。勉慎興居。以副翹企。悽悽之意。遲用面論。不宣。某再拜。

答林正字書

十二月日復書正字足下。辱賜長牋。詞高旨遠。循環捧讀。欲罷不能。見顧之深。良足愧也。吾子以老成之智。蘊救世之心。一言悟主。俯拾初筮。雖位未充量。然升聞特達。超然獨異。亦古之所難也。推是而往。其道可知。鉉也不才。猥廁先達。雖復識不能見之于未兆。才不能濟之于已形。然而振天下之公議。舉天下之公器。推轂後進。心無適莫。庶幾不下于昔賢。吾子異日當知之不妄。其古今之變。安危之勢。忽乎微哉。未可一二以言語盡也。謹俟暇日。當接餘論。聊奉還答。伏惟鑒悉。徐鉉白。

答左偃處士書

月日東海徐鉉答拜稽首。復書處士足下。鉉讀聖人之書。探作者之意。出處語默。信非徒然。故高臥堯舜之代。不爲背時。濡足楚漢之際。不爲趨利。嗟夫。天下兵起。百年于茲。立功名。取富貴者有之。貞苦節。安徒步者。何寂寞而無聞也。愚常疑廉恥之風。于是乎絕。而足下負磊落之氣。畜清麗之才。褐衣韋帶。賦詩自釋。介然之操。其殆庶乎。悠悠之人。尙未識其所謂。惟韓君叔言知之。以鉉愛奇好古者也。故屢稱足下之

行。亟誦足下之詩。相視欣然。以爲今猶古也。然鉉才名地望。遠謝韓君。故望廬息心。不敢當隱君子之厚。願足下德我太甚。惠然而來。咫尺之書。則古人之道在其中。百篇之詩。則作者之序冠其首。先以溢美之贈。益以謙光之詞。發絨欣翫。不能自己。又念昔之隱者。消聲物外。絕迹時人。今足下高蹈如彼。自屈若此。得非以吾道久否。思發憤而振起之爾。鉉誠淺劣。不足以堪。願契素交。歲寒然後盛集。續當歸納。不宣。鉉再拜。

故朝散大夫守禮部尙書柱國河內縣開國男食邑三百戶賜紫金魚袋常公行狀

曾祖不仕。祖泓。邠州宜祿縣令。考修。成都府戶曹參軍。京兆府萬年縣。洪固鄉。曹貴里。常夢錫。字孟闔。年六十一狀。

公字量恢。弘識度。寬曠質重。有氣博學多聞。初舉秀才。值世亂。不克隨計。西州羣后。羔雁交辟。累爲秦隴諸郡判官。岐王茂貞。據有扶風。傳國二世。承制除公寶雞縣令。兼監察御史。是時京洛屢變。幙府驟更。公審擇木之所宜。乃瞻烏而來止。烈祖肇基王業。物色異人。得公甚喜。授大理司直。今上初秉機務。慎求賓從。公實預焉。允塞時望。旣受禪。遷殿中侍御史。改禮部員外郎。寓直中書。預聞機密。周慎詳敏。冠于當時。烈祖深器之。擢拜給事中。封駁奏議。無所顧憚。由是始爲當塗者所疾。今上嗣位。恩禮甚優。公以發號之初。四海瞻望。機微所慎。宜在斯時。盡規極言。如恐不及。于是大忤權貴。貶佐池州。明年徵爲戶部郎中。復拜給事中。仍充翰林學士。知貢舉。天子以典司詔命。最宜親密。乃別置宣正院于內庭。以先朝選授。公爲稱職。俾以內任。專掌是司。秋霜之操。歲寒不易。凡敢言之士。皆依賴焉。甲辰歲。諫臣皆貶。公亦罷院事。公

深惟君臣之義。思全進退之禮。稍儲伏臘。將卜優游。又除吏部侍郎。領御史臺事。上復置文理院。爲司聽之寄。以公爲文理院學士。承旨。公以椒蘭不雜。絳灌方隆。從容中道。守正而已。明年以疾固辭。乃遷戶部尚書。領商州刺史。上以公聞望夙重。足以坐鎮雅俗。強起令知省事。而病久不復。公私廢失。爲宰相所劾。坐貶饒州。上以羸瘵憂之。詔留東都。以便醫藥。踰年小愈。徵爲吏部侍郎。翰林學士。改禮部尚書。戊午歲冬十一月。方與客談。奄然而逝。主上念藩邸之舊。追亮直之誠。罷朝悲悼。贈送優渥。以嗣子方幼。詔中使監護其喪。惟公誠純性剛。文高學富。詞賦典麗。而執筆甚稀。名理精覈。而吐論甚簡。多識故事。洞明政禮。自昇元中。至保大之初。便蕃密勿。有犯無隱。門絕私謁。出則詭辭。獨見先覺。邈然靡及。政先古義。而時方尙權。論舉大體。而人捷給。彼衆我寡。故不能克。主恩方重。莫果歸田之心。世路未夷。竟鬱濟時之用。恥爲狷介之行。以邀皦察之名。畜伎樂。飲醕酒。怡然自得。聊以卒歲。啓手足之際。無呻吟之聲。古之達者。正當此耳。不以名法之學。獲選丘門。固非良史之才。曷紀賢人之德。庶爲實錄。以俟易名。謹狀。此文與門生樹丕作

薦處士陳禹狀

右臣伏觀國家哀采羣才。搜揚片善。有上書言事者。猶有可取。必加甄錄。廣納之意。遐邇知恩。然臣竊嘗觀之。率皆淺近。止於采取金寶。檢榷賦租。製作舟車。斬伐木材。巡察關禁。收捕寇攘。旣利害相參。亦虛實略半。食祿者衆。成務者稀。若乃先王教化之源。朝廷刑政之本。謂之迂闊。竟爾寂寥。得人之盛。未可致也。去夏有布衣陳禹。詣獻納院上疏。獨與衆異。其言曰。五常之教。不立度量之器。不均。又曰。江鄉之民。存不事之以禮。亡不祭之于室。斯實有意于教化。而不溺于流俗者也。臣于是訪其爲人。則鄉曲無過。延之與

語則靜默寡詞。儻使行。顧其言才副其識。則古之循吏。何以踰之。願陛下以親民之職。試其爲理。考績之際。自有常科。臣忝豫銓司。願慙則哲。謬妄論薦。俯伏兢惶。謹奏。

冊秀才文四首

自三五以還。文質迭變。百王之法。六籍渙然。及周室旣衰。諸侯異政。俊賢之士。分軌並馳。至如管仲。霸齊之功。商鞅。強秦之令。申韓之名。法孫吳之戰陣。李悝則務盡地力。墨翟則崇尚節儉。此其尤著者也。蓋百家之說。雖其道不同。奉而行之。皆足以致理。子大夫服膺聖道。必盡幽深。試論其中。孰得周孔之旨。可爲當今之用者。悉心極慮。以著于篇。

夫君者。民之表也。天下取則焉。故慎威儀。定其聲氣。時其憲令。審其好惡。以此示之。未有不化者也。然而唐堯在上。日用而不知。聖祖立言。親譽者其次。夫如是。則寂然不動。澹乎無爲。使蚩蚩之氓。何所則象。而能革其浮僞。驅之仁壽哉。舉要立中。必有其說。

昔太公理齊。因其俗。故報政速。而後世強。伯禽爲魯。易其俗。故報政遲。而後世弱。則商辛淫虐之風。不可以不去也。周家仁厚之化。不可以不被也。修舊者。未見其遷善之塗。革故者。豈傷于惟新之義。遲速之效。強弱之由。願聞嘉言。以釋斯惑。

肉刑之法。明王之制。著于周禮。垂憲無窮。何故三苗行之。以爲虐。秦人奉之。以爲暴。漢文除之。以爲仁乎。自魏晉以還。議論閒出。理竟不決。法竟不行。豈時運之變有殊。將聖賢之才或異。願聞歸趣。以正古風。

祭文獻太子文

粵惟上天降鑑我李文昭武穆神孫孝子赫矣謨訓昭哉圖史以濟時屯以永千祀恭惟盛烈仰屬尊靈惟精惟一克長克君有信厚之風以睦公族有孝敬之德以奉天經避寵崇讓以正流俗主留分陝以樹風聲惠下之政爲民慈父平戎之績爲國長城簞多士之耳目煥萬古之丹青儲闡既正鴻猷允塞雖主器而納揆更承顏而養德四海無波百官成式光昭興運允答靈心宗祊之所託者重蒼生之所望者深何國步之已泰忽神儀之永沉陽光爲之而晝晦萬籟爲之而哀吟惟恩信之所洽孰憂傷之可任某等迹備三千義深凡百或選自朝廷或仰由推擇或方列于宮府或嘗陪于賓席分曹著位有先後之差辱顧推誠無高卑之隔徒歲月以滋深愧涓塵之靡益今也徒御分散軒墀閨寂摧傷于望苑之前慟絕于華池之側實邦家之不幸豈臣吏之空惜嗚呼哀哉寢園斯啓遠日將從儼象輅以帷白建鸞旗而旒紅聽寂歷以無視視杳冥而遂空撫躬弔影涕雨號風敢寓誠于簋豆庶寫恨于心胸願賓天之下降鑑永慕之無窮嗚呼哀哉尙饗

與中書官員祭江學士文

維年月日廣平游簡言隴西李貽業清河張緯東海徐鉉謹以清酌庶羞之奠敬祭於故翰林學士江公君章之靈眇眇玄造茫茫萬有若明若晦爲天爲壽顏子不幸仲宣無後豈同概之能量實令名之不朽惟公之生俊德高名一日千里三頃五城乃邦之彥乃時之英藹然臺閣存此風聲惟公之沒音容倏忽二子繼天高堂結髮有女垂髻摧心裂骨門館秋風階庭夜月哀從中來云誰能遏簡言固陋夙奉光塵廟朝之舊豈無他人西垣並入禁署相因二十年中心同道親曾無間隙靡或淄磷貽業不才依仁仰德

晚獲同舍。因成近戚。形忘累遣。情深分密。杯酒痛飲。光陰一擲。豈料歡遊。遽分今昔。緯在三川。論交早年。才力工拙。詞場後先。與之聲價。借以騰騫。徒欣踐迹。敢曰差肩。佗鄉胥會。舊分依然。倍成感歎。轉奉周旋。鉉實後生。幸爲同族。聯事之好。友于之睦。以道相許。以義相勗。官路迢遞。天涯譴逐。千里關山。佗鄉心曲。自帝里連歸。周行並復。稅駕未安。捨我何速。嗚呼君章。魂遊何方。非巫陽之可招。非祖洲之可望。平時笑語。舊日顛狂。何夢覺之不識。何悲歡之不常。惟四友之分義。成終天之感傷。雖山公之無託。豈延陵之可忘。有肴在御。有酒盈觴。死生之會。終于此堂。願公如在。來爲我嘗。長號有慟。迸淚無行。薄奠云畢。哀情未央。嗚呼哀哉。尙饗。

祭韓侍郎文

維開寶三年太歲庚午九月己亥朔七日乙巳東海徐鉉謹以清酌庶羞之奠昭祭于故中書侍郎贈相國昌黎公之靈天祐下民必生賢人數有治亂道或亨屯君子處之全名保真窮不易節達不私身嗚呼明公與道爲隣其本也忠其動也仁折而不撓屈則能伸懋此成績揚于王庭名聞天下道合明君宜若張公上應台星宜如衛武享茲百齡如何不淑與世同塵城郢遺忠感深紫宸黔婁之衾賜從御府季子之印佩入泉扃知與不知孰無悲辛嗚呼哀哉某惟不佞早奉光容傾蓋之交繾綣相從公之知我如我知公何義不協何言不同寧懼觸鱗之忤豈防羸角之凶先號後笑無初有終霰雪旣消陽光乃融海郡山城幾憐煦沫南宮西掖近見搏風豈主恩之可報幸吾道之非窮今也歲月逾邁悲歡一空平生氣宇夙昔心胸極視聽而無所與造化而冥蒙露茲門柳霜凋井桐物感于外悲來自中生芻表德絮酒申恭

願貞魂之降鑒庶丹懇以斯通。

祭王郎中文

維年月日朝議郎行秘書省秘書郎直門下徐鉉謹以庶羞之奠昭告于故郎中丈夫人之靈惟靈立身行己之規理職奉公之節聞于士友著在官司今以銜悲豈容繁述伏思頃歲獨奉深知獲承子妻之恩追序通家之舊邕和二族出入十年情不閒于初終義實敦于骨肉去歲天恩舉善右掖登賢幸以王事僅同省垣不隔陪侍靡違于旦夕興居常在於見聞雖無光益之期且慰因依之望豈謂悲歡迭代光景須臾才周旬歲之間奄御名終今上天之痛追攀靡及哀慕何窮嗚呼哀哉昨聞訃之初方嘗臥病不能親臨易箘躬奉遺言徒掩淚于漳濱但痛心於夜壑嗚呼哀哉家存餘慶念屬帝心有後之期自符公議不孤之任豈在佗人嗚呼哀哉故國方遙良時未卜王畿寓殯遠日將臨霧昏而丹旆悠揚日落而繡帷蕭索涼風助慘行路同悲瞻望靈筵酸辛無地敬陳薄奠少道深懷髣髴明靈一賜臨降尙饗

祭劉司空文

惟靈氣稟冲和志推廉潔白璧蘊孚尹之美朱紘含清越之音操行純深性克全于天爵襟懷弘遠譽早播于人龍頃自奮迹清朝策名近侍既保後凋之節終諧貞退之心道因損而益光名以謙而更著優游自得忠孝歸全求之古人我復何愧某等幸承事舊況豫姻連眷分過私襟期莫逆厯歲時而彌固經險夷而不回挹淡水以無厭仰高山而何極今則佳城將啓遠日有期光容有隔于重泉醜擘聊申于薄奠仰惟貞魄俯鑒丹誠尙饗

徐騎省集卷第二十一

奉和 御製雪

豐登盈尺瑞。物象九門深。璧月環丹砌。梅花滿上林。茶香偏自得。酒力詎難禁。別有寒郊外。銀河映玉岑。

奉和 御製打毬

上閑精習渥。注聽玉鏤花。鞍錦覆驥。金埒無塵初。裊露朱旗向日。自生風雷傳畫鼓。偏增氣星度飛毬。欲映空共道。宸遊因習武。凱歌猶似奏平戎。

又五言

彩仗映花韞。春庭散曙煙。毬飛皆應手。馬駿不須鞭。仙樂飄雲外。祥風起日邊。籌多不虛發。制勝在機先。

奉和 御製春雨

祁祁甘雨正當春。草樹精神一倍新。勻灑農郊偏長麥。緩飄花檻不驚人。密隨宮仗環青輅。普逐皇恩下紫宸。霽後榭臺更堪望。滿園桃李閒松筠。

冬至奉和 御製

吹律政知寬。迎長物倍安。初陽殊勝臘。積雪更添寒。庭實羅千品。珍符薦百般。羣臣同偶聖。不歎夜漫漫。

奉和 御製寒食十韻

朝陽散宿煙。登望思悠然。簷影晴偏暖。雲容晚更鮮。共歡時景好。不惜歲華遷。旋試嬌驄步。新調寶瑟絃。

宮花紅照耀。御水碧潺湲。歌吹清連夜。輜輶麗滿川。依林張幄幙。夾道建鞦韆。仙樂來天上。祥光起日邊。遊絲輕冉冉。芳草綠芊芊。聖製如春色。周流遍八埏。

奉和 御製歲日二首

運歷三元正。升平太古同。五侯皆輯瑞。四海盡占風。聖政乾行內。羣生壽域中。撞鐘元會罷。晃朗日升東。

二七言

正仗臨軒萬國來。漢儀周禮盡堪哈。光浮雲蓋青龍轉。香透椒花白獸開。慶賜應時均億兆。卜年從此數京垓。羣臣共感文明運。況是天言誠懋哉。

奉和 御製上元燈

幔亭高敞九門前。銀箭遲遲夜漏遷。明月靜添華燭影。和風時度御爐烟。朱輪繡轂車聲接。玉勒金羈馬首駢。一曲雲謠飛聖藻。萬方歌詠仰堯天。

奉和 御製烟

春晴纖鷺映斜陽。冪冪偏能覆水鄉。濃似慶雲同馥郁。薄如輕素自飛揚。堤橫新柳真成畫。樓對遙山正好望。誰見朝元香案上。龍旂交影共騰驤。

奉和 御製暑中書懷

浴殿晨開氣象新。虛亭金井轆轤鳴。陰成楊柳千絲密。涼入襟懷一扇輕。寒水乍沉朱李熟。薰綃長有好風生。高樓更稱頻臨望。臺笠行歌麥隴青。

奉和 御製聞早蟬

綠樹陰陰。懣豫游。早蟬清韻遠。還收喚回。晝夢和宮漏。引起微涼。助麥秋。禁柳烟中飛。乍覺御溝聲裏聽。偏幽羣生。遂性宸章悅。從此人聞不識愁。

奉和 御製夏中垂釣作

物茂時平日正長。翠華停馭。瞻方塘。文竿乍拂。圓荷動。頰尾時翻。素苻香。睿賞只應從暇豫。聖恩寧肯間。沉翔吞舟。自是貪芳餌。猶笑成湯一面張。

奉和 御製殿前松兼以書事

長松修幹列承明。虎盼龍盤氣貌靈。風度乍聞琴曲調。巢高初見鶴儀形。枝籠陛戟寒生檻。葉帶鑪煙翠滿庭。澗底山頭各生殖。託根爭似在青冥。

奉和 御製扇

齊紈新製月輪全。蟬雀分明彩翠鮮。救暍自符仁主意。揚風須假手中扇。暫遮樓日霞光透。半掩歌唇寶鑿圓。一曲睿詞精比興。好將金石奉雕鐫。

奉和 御製碁二首

制法精微自帝堯。勢如天陣布週遭。沉思迴覺忘千慮。妙訣終須附六韜。急劫未分香印匝。一枰初滿月華高。御詞仍許羣臣和。愁殺中山玉兔毫。

二

常嫌羣藝用心麤。不及棊枰出萬途。妙似孫吳論上策。深如夔益贊訃謨。靜陳玉檻連琴榻。密映珠簾對酒壺。聖智縱橫歸掌握。一先終不費多圖。

奉和 御製早春

羣生遂性得天眞。陽景无私發秀勻。堯厯永從新律正。皇恩散作萬方春。華林日麗紅苞坼。太液冰消綠浪新。天意分明起昌運。岱宗卽看報羣神。

應 制賞花 懷字

上林春暮紫英開。組織成帷蔭玉階。豔逐晨光隨步武。香和輕吹透襟懷。生成澤廣時芳茂。魚水情通樂詠諧。禁籞年年陪睿賞。何時梁甫奉燔柴。

和陳處士在雍邱見寄

衰薄喜多幸。退公誰與閑。高人乘興去。相望兩程間。卷箔有微雪。登樓无遠山。清談勝題贈。何日杖藜還。

送湯舍人之陳州

尼父悽惶地。離情向此偏。家貧聊復爾。道在肯徒然。詩景明松雪。鄉山隔水煙。三年須赴召。莫戀甕頭眠。

送阮監丞赴餘杭

楊柳依依水岸斜。鷁舟東去思無涯。坐臨碁局延明月。行采詩題對落花。盧白亭中多宴賞。錢塘湖上剩煙霞。風光到處宜攜酒。況有餘杭阿姥家。

送容州程員外端州吳員外

士生秉道義。公論重才名。美哉雙白璧。價高等連城。昔在南國時。折桂嘗抗衡。今爲北朝客。通籍齊振纓。連鑣適炎徼。並命典州兵。地遠乃寄重。無爲憚遐征。俗雜則材難。當在通其情。投香與還珠。前哲有遺聲。君看奏諫者。接武趨承明。揶揄贈斯言。斯言勿見輕。

和潁州賈監軍

別離情緒兩難任。消遣唯應有醉吟。冉冉光陰玄鬢改。勤勤書札舊情深。涼宵夢寐清淮月。永日徘徊玉樹陰。野鶴乘軒無所用。角巾何日返中林。

和清源太保閑居偶懷

朝退閑齋落葉天。道心眞氣本仙源。簾前風月澄秋景。門外輪蹄任世喧。棊罷早寒生北戶。酒醒黃菊滿西園。時人自有思齊者。踐迹觀形不在言。

又和寄光山徐員外

早年南國日追隨。冠劍晶熒佩陸離。匪石心誠徒自許。浮雲蹤跡信難知。官閑從飲扶頭酒。地僻誰同敵手碁。門館舊恩今更重。高齋遙枉謝公詩。

和徐秘書

年少支離奈命何。悲秋懷舊苦吟多。龍泉有氣終難掩。荆玉無瑕豈憚磨。會偶良工收杞梓。莫將閑夢挂煙蘿。佗年得路搏風去。肯念今朝煦沫麼。

送汪處士還黟歛

孤雲野鶴任天真。乘興遊梁又適秦。興盡卻歸南國去。黃山何謝武陵春。

和翰長聞西樞副翰隣居夜宴

開筵別有隣居興。卜夜應憐禁漏長。舊友不期爭命駕。新姬憑寵剩傳觴。香煙結霧籠金鴨。燭焰成花照杏梁。京邑衣冠多勝賞。鱸魚爭敢道思鄉。

和清源太保寄湖州潘郎中

老大離羣一倍愁。谿山風物且淹留。醞成春酒誰斟酌。抄得新書自校讎。莫似牧之矜曠達。須教子重讓風流。恩門舊分知難忘。題取新詩上郡樓。

送南華張主簿改承縣

適去莊生邑。還臨孔父鄉。仍聞舊隱處。近在武夷傍。道氣年長度。儒風日以光。何時看解組。歸去事仙方。

和白州錢使君上元夜侍宴

御宴宵陳敞百層。君恩芳景兩難勝。風傳天上九成樂。月映樓前萬樹燈。醉捧玉觴疑夢寐。靜臨丹檻似飛騰。因觀謝守牕中詠。自媿瀛洲是濫登。

送蘇州梁補闕

軋軋朱輪道路長。虎丘山下剩春光。軍城舊是吳王國。郡守曾爲諫署郎。祖席詠歌金玉振。下車條教蕙蘭香。青雲舊是高飛處。三載徘徊亦未妨。

和金州錢太保春雨

濛濛膏雨遠空迷。點滴圓紋水繞堤。柳帶喜如和醉舞。花房愁似宿粧啼。煙籠麥隴連天闊。雲映漁舟掠岸低。廉使解分天子念。一篇騷雅慰蒸黎。

送高秀才

龍門一上嫌輕進。關塞西遊自愛山。緱嶺春歸林影密。津橋人靜水聲閑。如今正得幽尋興。佗日青雲不易還。

送施州單員外

精金百鍊始知難。何似仙枝兩度攀。名逐鳳書歸故里。身從鳥道入巴山。詔宣遠俗皇恩厚。惠洽齊民利刃閑。珍重加餐順風土。歸來高步七人班。

送宣州張員外

故國干戈後。憐君得意歸。綺霞橫郡閣。犀燭照漁磯。天迴青山遠。江平白鳥飛。此行同衣錦。況是老萊衣。

和筠州談鍊師見寄

共歎崑岡火。誰知玉自分。寂寥人境外。蕭索數峯雲。眞籙終年秘。空歌偶得聞。應憐霸陵上。衰病故將軍。

送吳郎西使成州

所向皆爲道。遐征豈足辭。中華垂盡處。別路正秋時。高閣蘭臺筆。閑吟板屋詩。良工無棄物。珍重歲寒姿。

送下博陳員外

曠望叢臺路。飄飄楚塞人。琴堂無故舊。何計免霑巾。

送淨道人

北阜與西山。前期夢寐閒。羨師乘興去。應擬此生閑。喬木人誰有。鱸魚我未還。歸心寄秋水。東去日潺潺。鄴都行在和。刁秘書見寄。

征袍結束從宸遊。邊上塵清見戍樓。柏殿賦詩知是幸。茂陵多病自堪愁。清漳幽咽長流恨。銅雀荒涼幾換秋。深羨高眠全道氣。姓名應已在丹丘。

和旻道人見寄

戎服非吾事。華纓寄此身。謬爲金馬客。本是釣鄉人。引領梁園雪。揚鞭輦路塵。知師亦多病。擁褐待陽春。

和復州李太保訓筆

處處良工事筆鋒。宣毫自昔最稱雄。因思南國巾箱學。願入蘭臺掌握中。委質幸歸雕玉匣。操詞曾侍兔園宮。一篇麗藻真閒暇。共仰才多道不窮。

送蒯員外東遊舊治

百歲猶強健。知君卽地仙。孤飛下華表。太息問桑田。故吏今誰在。高名昔共傳。伊余亦遺老。相送一濟然。

送王監丞之歷陽

歎息曾遊處。江邊故郡城。青襟空皓首。往事似前生。綠綬君重綰。華簪我尙榮。年衰俱近道。莫話別離情。

送阮殿丞之靜海

聞子東征效遠官。行行春色黯離魂。中途輟棹尋吳苑。西向登樓望海門。鵬舍曾嗟經歲謫。靈光空念歲

然存陵遷谷變今如此爲我停驂盡酒罇。

送周員外之達州

之子數王澤。迢迢蜀棧東。頰條有餘刃。對酒與誰同。身占賢良籍。家傳道德風。遠民思靜理。卽此是陰功。

送長社胡明府

黃綬繫未穩。桂枝香尙新。琴堂寧久次。諫署正求人。皎皎涼秋月。飄飄清路塵。元常有遺翰。求作篋中珍。

送表姪達師歸鄱陽

故鄉禾黍世親稀。中表相尋只有師。惆悵離懷向何許。鄱陽湖上葉飛時。

送秘閣朱員外知復州

景陵山水舊知名。珍重詩人建隼行。未免簿書勞利刃。省貪煙月縱高情。揚雄閣下諸生送。陸羽門前百吏迎。聖代羣賢皆得路。三年傾首望鵬程。

送淨道人東遊

身服竺乾教。心爲鄒魯儒。觀風遊稷下。訪古入中都。短景程途遠。寒原店舍孤。東州多俊造。能賞碧雲無。

送李道士南遊

雲水李道士。曾爲中貴人。綺紈終不戀。松鶴自相親。雲氣蒼梧晚。芳華紫蓋春。匏瓜老猶繫。惆悵望行塵。

送國子徐博士之澧州

多才適世用。學者不遑處。新詞八詠樓。更汎涪陽浦。行當應列宿。且復施甘雨。高齋閑坐時。清談孰爲伍。

送錢副使黎陽發運

一盃寒食酒。珍重送君行。花影黎陽渡。春風浚水聲。汎舟無廢事。騁驥有修程。應用方无暇。何須愴別情。

寄張階州

儀甫秉忠信。神明自來舍。絳灌雖不容。蠻貊皆從化。榮名任紛糾。道性常閑暇。傳語當途人。無爲勞歎吒。

送文懿大師淨公西遊

乘興西遊誰與同。一囊詩藁一枝筇。厭棲廬岳蓮花社。卻訪南山紫閣峯。懷古有時應悵望。尋幽何處不從容。關中風物常牽夢。老臥閑曹轉放慵。

奉和武功學士舍人寄贈文懿大師淨公九首

舊國荒涼成黍稷。故交危脆似琉璃。高人獨喜湯師在。手把新文數道碑。

其二

滿卷文章爲世重。出塵心迹少人同。騰騰自得修真理。不管浮生覺夢中。

其三

文似春華鋪曉陌。思如泉湧注長江。詩情道性知無夢。頻見殘燈照曙牕。

其四

已潔心源超世表。卻緣詩句有時名。初聞行業如耆宿。及見容顏是後生。

其五

只有閑情搜景物。不將容鬢惜流光。京華才子多文會。衆許清詞每擅場。

其六

惠遠禪師名素重。維摩居士室皆空。羣公競有詩相贈。組繡珠璣滿袖中。

其七

南朝人物古猶今。只恐前身是道林。處處經行常自適。不妨譚笑不妨吟。

其八

往往冥搜宵不寐。時時任性晝仍眠。高情麗句誰偏重。聖代詞臣李謫仙。

其九

霜髯病叟掩閑局。禪客相尋有故情。每憶江南初識面。至今猶得愛才名。

詠史

京洛多權豪。游服相追隨。青牛中甸車。白馬連環羈。珩珮競照耀。紳組舊參差。騶鳴行人駐。倏若流風馳。名園不問主。下輦輒成嬉。秦官錫雕盤。光祿假羽扈。侏儒善爲優。邯鄲有名姬。坐客應餘論。顧盼成恩私。鹵簿留國門。誰何不敢譏。歸來臥華堂。瑣牕承文楣。武夫瑩庭階。壁璫攢榮題。列燭正晶熒。噴香常逶迤。明朝入君門。密侍白玉墀。開言迎合旨。羣公默無爲。乍請考工地。亦拜牀下兒。吹噓枯稊生。指顧千鈞移。回瞻狗名士。擯介爾可施。朱雲折檻去。梅福棄官歸。寂寞楊子雲。口吃不能辭。著書述聖道。徒許俗人嗤。漢室已久壞。往事垂于茲。眇然千載下。慷慨有餘悲。

此
页
空
白

徐騎省集卷第二十二

送曾直館歸寧泉州

常憐客子倦征騑。誰似曾郎得意歸。廳鎖石渠封簡冊。手持仙桂拜庭闈。舟橫劍浦凌清瀨。馬過猿巖點翠微。卻笑遼東千歲鶴。下來空歎昔人非。

送樂學士知舒州

憶在同安郡。誰知是勝遊。仙山常獨往。騷客自忘憂。暫別經多難。勞生已白頭。羨君驅舊旆。兼得漱清流。民俗長如古。風光最稱秋。短歌聊抒意。爲我謝沙鷗。

送慎大卿解官侍親

聖朝無事九卿閑。藹藹東門采服還。舊日高名齊汲、鄭。今朝至行似曾、顏。更憐雙鬢垂玄髮。猶恨深居遠舊山。老鶴乘軒真自愧。徘徊空在稻粱間。

代書寄泗州錢侍郎

起部紆兩綬。恢恢刃有餘。旣爲侍中郎。又復專城居。無久戀鈴閣。早應還直廬。浚川春水滿。珍重寄雙魚。

寄舒州樂學士

皖伯臺前綠樹春。吳塘初下碧溪分。舊遊風景長牽夢。遙羨高齋望白雲。

送吳支使之長安

幕府清資新雨露。高陽舊第久塵埃。百年遺老知誰在。應喜遼東鶴下來。

和譚鍊師見寄

一別高人世事多。歸山岐路轉蹉跎。定知上藥延衰齒。每憶玄談養太和。任道人生如夢寐。也從時態起風波。錦囊眞籙遙相許。只待颿輪更一過。

和錢祕監與邊諫議南宮同直贈答

筵上詩題共筆牀。罇前酒興話高陽。心清自覺官曹簡。院靜先知節候涼。南國少年推貴重。東堂前輩讓賢良。好看雙鳳追飛處。胡粉新塗紫界墻。

送周郎中還司

憶在廬山始識君。當時唯擬共眠雲。那知身計關前定。卻向人間逐世紛。紫閣峯前欣獨往。銀臺門裏歎離羣。青囊舊有登真訣。莫遣間人取次聞。

太師相公輓歌詞二首

巖廊舊德漢儲師。富貴優游自古稀。四序不能違代謝。九原誰可與同歸。精神恍惚騎龍尾。功業紛紛在虎闈。惆悵鳴珂洛陽道。素車丹旆奉靈衣。

其二

風流安石在東山。曾許從容妓樂間。傾蓋算來能幾日。逝川東去不知還。北邙原上寒雲結。鄭國門前曉月彎。祖奠欲收賓御散。滿衣零淚掩衰顏。

送贊寧道人歸浙中

故里夫差國，高名惠遠師。君恩從野逸，歸棹逐凌澌。舊訪雖無念，牽懷亦有詩。因行過秦望，爲致李斯碑。

和元少卿送越僧

塵機息盡一眞僧，唯有林泉捨未能。蓮社故人今暫別，稽山舊隱與誰登。時清豈覺前游改，道勝寧辭白髮增。遙羨高齋吟望處，孤雲野鶴是親朋。

代書寄譚鍊師

朱山松桂翠連雲，中有清虛小隱君。密養丹砂存正氣，靜披瓊蘊誦眞文。塢笮金石心長在，圭組煙霞路自分。憑仗鄉人傳尺素，山前驚起白羊羣。

送鄭先輩及第西歸

春晚緱山路，華光滿翠微。憐君持郢桂，歸去著萊衣。故國幾人在，浮生萬事非。唯當拭病眼，看子九霄飛。

送高先輩南歸

鄉國悲前事，風光屬後生。名從天上得，身入故都行。草色初裁綬，鵬飛不算程。自憐枯朽思，相送剩含情。

送嚴秀才下第東歸

世胄今爲旅，多才懶自營。坦懷君子道，惜別故人情。歸棹春潮滿，郊居海月明。雄文不輕售，須待最高名。

送周味道秀才東歸見別依韻

庭闈勞夢想，孤棹度江關。駿馬猶論價，荆藍且抱還。晚花縈綵服，疎雨映家山。頻見春官說，明年待鑄顏。

送曾秀才

滄水神仙宅。仙山夾縣樓。吾孫好詩句。歸詠故鄉秋。紫竹遮書幌。紅蕉拂釣舟。東堂有平路。莫謁外諸侯。

寄玉笥山沈道士

珍重江南沈鍊師。未曾相識久相思。已全真氣能從俗。不墜家風善賦詩。玉笥共游知早晚。金貂回顧覺喧卑。多慙書札遙相問。更望刀圭換白髭。

和錢秘監旅居秋懷二首

祕監疎朝謁。門前長綠苔。未愁玄鬢改。且喜素秋來。獨坐翻碁勢。閑行繞藥栽。涼風入書幌。時動水沈灰。

其二

閑靜無凡客。開罇共醉醒。琴彈碧玉調。書展太玄經。酒熟看黃菊。詩成寫素屏。晚來瀟灑甚。山鳥下中庭。

送元道人還水西寺

李白高吟處。師歸掩竹關。道心明月靜。詩思碧雲閑。綠樹寒凌雪。飛泉響徧山。自慙丘壑志。皓首不知還。

送李秀才歸建安

昔聞武夷士。皆是帝曾孫。李君卽其人。命舛道常存。愛子已折桂。華組耀閨門。吾身可拂衣。綵服歸丘園。捧觴慶北堂。其樂不可言。清溪環幽居。遠岫橫前軒。彈琴詠招隱。芳意飄若蘭。老夫無此分。何必矜彈冠。

和李太保寄刁秘書

名位雖卑道自光。訟庭無事俗平康。簾開尙覺琴牀暖。院靜偏聞酒甕香。養性已知無病染。持廉唯恐有

名彰。主人莫訝睽違遠。千仞由來有鳳翔。

又和刁秘書寄李太保

百里臨民自可憐。青雲何必藉階緣。家貧聊欲資三徑。政簡無非草太玄。處衆忘懷均物我。程才不器任方圓。江湖相望真堪喜。聚散歡悲盡偶然。

送坊州賈監軍

聖主欲東封。憐君四護戎。鄉心經霸岸。詩思省幽風。舊業今成旅。朱顏已變翁。忘懷一盃酒。閒夜與誰同。

送李補闕知韶州

南國求良牧。中朝輟諫官。君恩偏念遠。臣節豈辭難。騎影過梅嶺。溪聲上賴灘。曲江宜訪古。韶石好憑欄。詩景緣情遠。民心逐政寬。衰翁尋舊分。爲致葛洪丹。

送脩武鄭主簿糾郡梓潼兼寄王舍人八韻

杖策辭清洛。驅車向梓潼。棲鸞才乍展。叱馭氣方雄。暫割趨庭戀。將伸糾郡功。詩情衝密雪。別酒慙寒風。山水秦關外。煙花錦里東。府公名素重。語掾道仍同。坐嘯新知洽。隨行舊分通。當令從此去。不復數文翁。

和李秀才雪中求酒

雪英飄灑繞虛廊。曉景沈沈朔吹狂。銀闕晶瑩標帝里。桂華紛糅認仙鄉。少年風味新吟動。老叟襟懷萬事忘。自倒空罇酬絕唱。書幃聊得泛寒光。

送謝著作之濠梁

謝客乘輅去。清和景物初。淮流宜映月。濠上好觀魚。吏事應微撓。吟情自有餘。偏州莫留滯。東觀待紬書。貢院鎖宿聞。呂員外使高麗贈送。

聖化今無外。征塗莫憚賒。揚帆箕子國。駐節管寧家。去伴千年鶴。歸逢八月槎。離情限華省。持此待疎麻。代書寄宋州錢大監。

衰朽經煩暑。慵將病共侵。北窗時企足。東望一披襟。祕監清罇滿。平臺綠樹深。年來書信少。何以慰離心。送錢先輩之虔州。

子實東南美。來參第一流。從容持片玉。談笑運前籌。贛石連雲秀。廉泉帶月秋。可憐行樂地。況從板輿遊。送阮洗馬之全州。

望苑迴先馬。山城駐使車。塗中值歸雁。頻寄北來書。

觀燈玉臺體十首

吳歌楚舞玉詩新。華燈蘭焰動魚鱗。臺前共道明如畫。醉裏唯愁夜向晨。

其二

綺席金爐香正燃。銅壺銀箭漏初傳。天迴星月迷燈燭。風過樓臺度管絃。

其三

雙闕重闌夜不關。金車寶馬曉應還。亭亭朗月臨瑤席。灼灼華燈照玉顏。

其四

火樹燈山高入雲。紅筵翠幄自成春。游女有時還解佩。青樓何處不留人。
其五

帝京風景不曾秋。萬戶千門夜更游。玳瑁銀鞍連繡轂。晶瑩珠網挂瓊鈎。

其六

夜未央。明月光。熒煌九華燭。交影照歌梁。

其七

敞麗譙。披綺寮。歌聲和夜漏。火樹似花朝。

其八

星漢斜。樂無涯。明月千門雪。銀燈萬樹花。

其九

撫雲敖。吹玉簫。豔舞迴羅袂。香風閃步搖。

其十

日照花。七香車。歌舞平陽第。經過趙李家。

和李秀才端午見寄

角黍菖蒲酒。年年舊俗諳。采衣君自樂。白髮我何堪。靜味瑤華句。閑思玉柄譚。報之長命縷。祝慶在圖南。

送清道人歸西山

嘗憶漱甘醴。洪涯藥臼旁。今來眇如夢。此景未曾忘。圭組老無味。林泉路更長。羨師從此去。當暑扣雲房。

送張學士赴西川

右蜀分憂輟近臣。翩翩旄節下青冥。單車唯載支機石。夙駕長先使者星。已有清風馳棧道。猶酣別酒過長亭。佗年報政徵黃入。留取文翁舊典刑。

和李宗諤秀才贈蒯員外

性僻時難偶。神清壽有餘。曾施卓魯政。蒯累宰劇縣。皆有善政。舊講老莊書。賤更襟懷曠。貧猶世利疎。聖君將就見。慎勿買山居。

送德明道人還東林

每憶曾遊處。東林惠遠房。老來情更重。師去興何長。澗曲泉聲咽。松深露氣香。題詩寄楚老。惆悵不成章。

送馮中允使蜀

莫笑皤然一病翁。百年交分兩家同。今朝倒屣迎王粲。舊日清談賞阿戎。玉壘無辭輶傳送。金閨初喜姓名通。青城山下逢仙客。爲說心丹未輟功。

送新除國博徐員外知婺州

憐君盡室泛安流。職重官新未白頭。楚老歡迎歸舊里。春風留戀過揚州。逢時肯更嗟庭樹。屬詠還應上郡樓。殷仲文。沈隱侯。宗黨故人鄉外少。勤勤書札緩離愁。

送望江張明府

之官別是榮。詔許侍親行。溫清自爲樂。煙波不算程。山留丹竈室。俗有故鄉情。無使千年後。空傳麴令名。
送廖舍人江南安撫

上天本愛民。治亂當有時。傷嗟江表人。三災迭擾之。如何遭盛明。不能免流離。王澤限遐遠。孰云天聽卑。賢哉廖夫子。盡忠不顧私。朝聞青蒲奏。暮見軺車馳。愚聞奉使者。受命不受辭。但使民瘼瘳。無憂國賦虧。貞觀笑割股。文侯諭治皮。學古平生事。行行當在茲。贈言聊執手。願子副心期。

送陳使君之同州

太守驅征旆。翩翩西過關。冰容先臘至。膏雨逐春還。綠樹游沙苑。高樓看華山。從來京輔地。出入盡崇班。
送顧道人還西山

嘗憶洪崖澗。穿雲路萬尋。曾經照玄鬢。未得卸朝簪。老去馳莊蝶。年來有越吟。羨師從此去。舊隱翠微深。
送歷陽方明府方被召當授京官辭乞侍親因除歷陽令歷陽余外氏舊邑

古縣橫江北。絃歌似武城。善辭金馬召。欣著綵衣行。舊感吳山色。離愁浚水聲。外門廬井在。相送幾重情。
送李著作之漢陽

聞道驅征旆。行行至漢陽。初程微雨霽。滿路落花香。遠宦心常適。青雲去未妨。惟餘親戚分。惆悵上河梁。
賦二首

牡丹賦

伊牡丹兮灼灼其華。擢秀暮春。交光綺霞。其氣則胡香楚蘭。其麗則湘娥越娃。向日爭媚。迎風或萎。爛如

重錦粲若丹沙。京華之地。金張之家。盤樂縱賞。窮歌極奢。英艷既謝。寂寥繁柯。無秋實以登薦。有皓本以蠲疴。其爲用也寡。其見珍也多。所由來者舊矣。孰能遏其頽波。

感舊賦送鄭殿丞西使

兩綬威蕤。駟牡駸駸。送子于行。關中陝西。惟天道兮迴復。嗟人事兮推移。昔百二之形勝。今尋常之藩維。龍池閣道。徒處所驪山仙館。空崔巍。豈憐感舊之遺老。心如灰兮鬢如絲。喜使者之得人。美大君之拔奇。察爲政之善否。求斯民之癘疵。庶我奮擊。轡澄清之志。致國風于貞觀。開元之時。

詩補遺

和元少卿雪諸本在送陳使君之同州後徐氏原本脫

朔風飛雪徧遙天。爲瑞偏宜在臘前。有客棹舟將命友。何人高臥共稱賢。瑤花散亂紛臨席。玉樹晶瑩爛滿川。閒想冰容比君子。始知姑射有神仙。

徐騎省集卷第二十二

重修說文序

韻譜前序

韻譜後序

故兵部侍郎王公集序

文房四譜序

張氏子集序

鄧生詩序

進士廖生集序

廣陵劉生賦集序

重修說文序

銀青光祿大夫守右散騎常侍上柱國東海縣開國子食邑五百戶臣徐鉉奉直郎守秘書省著作郎直史館臣句中正翰林書學臣葛湍臣王惟恭等奉

詔校定許慎說文十四篇并序目一篇凡萬六百餘字聖人之旨蓋云備矣稽夫八卦既畫萬象既分則文字爲之大輅載籍爲之六轡先王教化所以行于百代及物之功與造化均不可忽也雖復五帝之後改易殊體六國之世文字異形然猶存篆籀之迹不失形類之本及暴秦苛政散隸聿興便于末俗人競師法古文既絕譌僞日滋至漢宣帝時始命諸儒修倉頡之法亦不能復故光武時馬援上疏論文字之譌謬其言詳矣及和帝時申命賈逵修理舊文于是許慎采史籀李斯楊雄之書博訪通人考之於賈逵作說文解字至安帝十五年始奏上之而隸書行之已久習之益工加以行草八分紛然間出返以篆籀

爲奇怪之迹。不復經心。至於六籍舊文。相承傳寫。多求便俗。漸失本原。爾雅所載。草木魚鳥之名。肆意增益。不可觀矣。諸儒傳釋。亦非精究小學之徒。莫能矯正。唐大歷中。李陽冰篆迹殊絕。獨冠古今。自云斯翁之後。直至小生。此言爲不妄矣。於是刊定說文。修正筆法。學者師慕。篆籀中興。然頗排斥許氏。自爲臆說。夫以師心之見。破先儒之祖述。豈聖人之意乎。今之爲字學者。亦多從陽冰之新義。所謂貴耳賤目也。自唐末喪亂。經籍道息。皇宋膺運。

二聖繼明。人文國典。粲然光被。興崇學校。登進羣才。以爲文字者。六藝之本。固當率由古法。乃詔取許慎說文解字。精加詳校。垂憲百代。臣等愚陋。敢竭所聞。蓋篆書堙替。爲日已久。凡傳寫說文者。皆非其人。故錯亂遺脫。不可盡究。今以集書正副本。及羣臣家藏者。備加詳考。有許慎注義序例中所載。而諸部不見者。審知漏落。悉從補錄。復有經典相承傳寫。及時俗要用。而說文不載者。承詔皆附益之。以廣篆籀之路。亦皆形聲相從。不違六書之義者。其間說文具正體。而時俗譌變者。則具于注中。其有義理乖舛。違戾六書者。並序列於後。俾夫學者。無或致疑。大抵此書。務援古以正今。不徇今而違古。若乃高文大冊。則宜以篆籀著之。金石。至于常行簡牘。則草隸足矣。又許慎注解。詞簡義奧。不可周知。陽冰之後。諸儒箋述。有可取者。亦從附益。猶有未盡。則臣等粗爲訓釋。以成一家之書。說文之時。未有反切。後人附益。互有異同。孫愐唐韻。行之已久。今並以孫愐音切爲定。庶夫學者。有所適從。食時而成。旣異淮南之敏。縣金於市。曾非呂氏之精。塵瀆 聖明。若臨冰谷。謹上。

韻譜前序

昔伏羲畫八卦。而文字之端見矣。倉頡摸鳥迹。而文字之形立矣。史籀作大篆。以潤飾之。李斯變小篆。以簡易之。其美至矣。及程邈作隸。而人競趣省。古法一變。字義浸訛。先儒許慎。患其若此。故集倉雅之學。研六書之旨。博訪通識。考于賈逵。作說文解字十五篇。凡篇六百字。字書精博。莫過于是。篆籀之體。極于斯焉。其後賈鮪。以三倉之書。皆爲隸字。隸字始廣。而篆籀轉微。後漢及今。千有餘歲。凡善書者。皆草隸焉。又隸書之法。有刪繁補闕之論。則其譌僞斷可知矣。故今字書之數。累倍于前。夫聖人創制。皆有依據。不知而作。君子慎之。及史闕文。格言斯在。若乃草木魚鳥。形聲相似。觸類長之。良無窮極。苟不折之以古義。何足可觀。故叔重之後。玉篇切韻。所載習俗。雖久。要不可施之于篆文。往者。李陽冰。天縱其能。中興斯學。贊明許氏。奐焉英發。然古法背俗。易爲堙微。方許。李之書。僅存於世。學者殊寡。舊章罕存。秉筆操觚。要資檢閱。而偏旁奧密。不可意知。尋求一字。往往終卷。力省功倍。思得其宜。舍弟楚金。特善小學。因命取叔重所記。以切韻次之。聲韻區分。開卷可觀。楚金又集通釋四十篇。考先賢之微言。暢許氏之玄旨。正陽冰之新義。折流俗之異端。文字之學。善矣盡矣。今此書止。欲便於檢討。無恤其它。故聊存話訓。以爲別識。其餘敷衍。有通釋焉。五音凡十卷。貽諸同志者也。

韻譜後序

初韻譜既成。廣求餘本。孜孜讎校。頗有刊正。今復承詔。校定說文。更與諸儒。精加研覈。又得李舟所著切韻。殊有補益。其間有說文不載。而見於序例注義者。必知漏脫。並從編錄。疑者。則以李氏切韻爲正。始無遺矣。前序猶謂學者殊寡。而今之學者益多。家畜數本。不足以供其求借。潁川陳君文顯。任當守土。罷列

侍祠習武好文。憐才樂善。見人爲學。如己誨弟子焉。因取此書。刊于尺牘。使摹印流行。比之繕寫。省功百倍矣。噫。仁人之用心也。因躬自篆籀。庶祇來命。序之於後。以記其由。雍熙四年正月序。

故兵部侍郎王公集序

君子之道。發于身而被于物。由于中而極于外。其所以行之者言也。行之所以遠者文也。然則文之貴于世也。尙矣。雖復古今異體。南北殊風。其要在乎敷王澤。達下情。不悖聖人之道。以成天下之務。如斯而已矣。至於格高氣逸。詞約義微。音韻調暢。華采繁縟。皆其餘力也。琅琊王公。負英俊之才。稟耿介之氣。世濟其美。爲時而生。適文麗句。冠縉紳而傑出。純誠直道。歷夷險而安貞。故能奮厲羽儀。抑揚聲實。振清芬于臺閣。浹仁政于藩垣。潤飾典謨。銓衡人物。主恩時望。終始不渝。載籍所高。何以過此。鉉頃歲來自江左。會公西適三峰。客有以拙文示公者。大相知賞。擊節而喜曰。此人必能知我。及召還京輦。惠然見尋。亦以舊文爲貺。觀其麗而有氣。富而體要。學深而不僻。調律而不浮。尋繹反覆。如四子復生矣。由是傾蓋甚歡。恨相知之晚也。是時天子方闡文明之化。闢俊造之場。網羅羣才。待以不次。公則首冠綸閣。標表朝倫。前達後進。莫不推仰。猶以爲古道未盡復。己用未盡伸。每在談宴。屢形詞色。由是論者。頗以躁競爲譏。愚以爲不然。夫古之君子。莫不汲汲於逢時。孜孜于救世。汲汲長孺。漢之賢卿也。而有積薪之嘆。李令伯。晉之名臣也。而有中人之詩。其有仰憚貴勢。旁畏流議。緘詞含意。從容自全者。不得已也。如公則內無隱情。外無飾貌。遇事輒發。胸中豁然。此真趙魏意氣之士。豈爲兒女之態哉。上方注懷。而公寢疾。十旬旣滿。卽臥內拜兵部侍郎。其恩禮如此。嗚呼。流運不停。儀表長謝。伯牙之絃已絕。延陵之劍徒懸。公平生所爲文。未嘗編

錄。至是諸子緝綴斷簡。得二十卷。泣授故人。鉉也不才。無足延譽。善善惡惡。敢言褒貶之能。一死一生。粗達交朋之分。後之知我者。庶斯言之不誣。端拱二年夏六月序。

文房四譜序

聖人之道。天下之務。充格上下。綿亘古今。究之無倪。酌之不竭。是以君子學然後知不足也。然則士之處世。名旣成。身旣泰。猶復孜孜于討論者。蓋亦鮮矣。昔魏武帝獨嘆于袁伯業。今復見於武功蘇君矣。君始以世家文行。貢名春官。天子臨軒考第。首冠羣彥。出入數載。翺翔青雲。綵衣朱紱。光映里閭。其美至矣。而其學益勤。不矜老成。以此爲樂。退食之室。圖書在焉。筆硯紙墨。餘無長物。以爲此四者。爲學之所資。不可斯須而闕者也。由是討其根源。紀其故實。參以古今之變。繼之賦頌之作。各從其類。次而譜之。有條不紊。旣精且博。士有能精此四者。載籍其焉往哉。愚亦好學者也。覽此書而珍之。故爲文冠篇。以示來者。

張氏子集序

觀夫賢人君子。稟清真之氣。應期運而出。故生而岐嶷。幼而敏惠。旣成而負國士之器。旣立而爲天下之用。康寧壽考。繁衍流祚。此其常也。若乃秀而不實。仁而不遇。前聖所以興嘆。百代所以遺恨。斯則神道忽恍。萬化茫昧。自古乃爾。吾將奈何。嗚呼張氏子。秀而不實者也。子名冉。本字叔相。今戶部員外郎洎之長子也。年七歲。博覽經史。日誦千言。十歲能屬文。詩賦議論。成于俄頃。十二著禮上下二篇。舊君吳王。見之而嘆曰。此子天假之年。佗日必爲國器矣。乃至梁京。翰長李公昉。閣長李公穆。皆引之登門。特加禮遇。其道日以光矣。其風儀標格。蕭然朗徹。觀者謂之玉人。余甚重之。以爲四科之俊也。故改其字師德。于時天

子敦重文學。親考英秀。海內士子。靡然向風。咸謂子必當振鱗附翼。一舉凌邁。而介然特立。澹然貞退。求聖賢之微旨。以養親。修心爲先。復探釋老玄言。讀華陽諸真經。飄然有脫落塵滓之志。而況於榮名乎。不幸羸瘵踰歲。遽從天折。年十有六。諸公聞之。無不憫惜。余以事舊之厚。鍾情特深。故求其遺藁。集而爲序。又嘗覽前載。見古之人。如子之人物敏俊。詞藻趣尙。而促齡無祿者。皆密契真籙。蛻爲列仙。此乃靈篇奇紀。非史筆所當言矣。但用遺慈。父追念爾。其草隸遺迹。及佗著述。皆藏于家。此不備述。辛巳歲冬十月序。

鄧生詩序

古人云。詩者志之所之也。故君子有志於道。無位于時。不得伸于事業。乃發而爲詩詠。南陽鄧君。少而從吏。服勤靡盬。時命不偶。淹翔末涂。養心浩然。不以爲慊。遇事造景。輒以吟詠自怡。悔吝不及。終始無累。至于皓首。未見愠容。家貧晏然。惟詩藁盈篋。太原王君。武陵龔君。好文樂善。皆序而伸之。愚亦與君有姻。故復爲之述。嗟夫。士君子樂道自娛。貞節沒齒。斯可矣。悠悠世利。曾何足云。子其勗之。無易爾守。丙子歲秋九月。左散騎常侍徐鉉述。

進士廖生集序

端拱改元歲。春官庀職。俊造畢集。有廖生者。惠然及門。以文十五軸爲贄。觀之。則博瞻淵奧。清新相接。其名理則師荀孟之流。其文訓得四傑之體。問其年則旣冠矣。覆篲之功。往而未止也。詢其爵里。則閩方茂族。組綬奕葉。善慶之所及也。他日與之語。則風骨清粹。識度淹雅。咸以爲遠大之程。可企而致。不幸遇暴疾。數日夭于逆旅。士君子知與不知。莫不爲之悲歎。嗚呼。以生之詞藻俊秀。蓋天假之也。而促齡早世。又

天奪之也。然則神理玄邈。聖人猶復不論。余當何言哉。會其友生。采其遺文。著於編簡。因爲之序。以示方來。夏四月辛卯。左散騎常侍徐鉉述。

廣陵劉生賦集序

楚人孟賓于。嘗爲予言。其叔父工爲詞賦。應舉入洛。贄文于學士李公琪。公爲之改定數處。時中書舍人姚公洎知舉。謂人曰。孟生賦。李五爲改了。不煩更書看也。遂擢上第。孟還鄉從事郡府。亟歷危難。唯以李公所改文。綴於衣中。曰。吾家但存此足矣。賓于每自喜其家門美事。嘆後來之無人。今廣陵劉生。奮衣衡門。振藻文囿。詞瞻而理勝。行潔而言芳。求己若不足。好問如不及。余之名不逮于李公。何能振發于子乎。聊薦所聞。以答子勤學之志。冠篇于首。以伸我與進之心。噫。子家貧親老。必將圖登龍之舉。不暇從冥鴻之遊。文明之世。羣才畢舉。慎重足以全孝。靜退足以知命。此前達之務也。子其勉之。

此
页
空
白

徐騎省集卷第二十四

送潘湖州序

送刁桐廬序

送高紳之官序

送汪遜序

送葉元輔秀才序

連珠詞五首

安金藏畫象贊

參政李公眞贊

玉芝贊

方竹杖贊

筠州三清觀逍遙亭銘

虎谿銘

龍山泉銘

晁錯論

伊尹論

出處論

送潘湖州序

士君子所以貴于衆庶者。以其能理民也。理民者。莫若二千石。其地廣。其勢重。仁以字之。義以斷之。文以行之。信以成之。於是乎優游暇豫。以平其心。導其和。數者闕一。則不足以爲良。二千石。吳興名郡。新被大化。延頸企聳。以佇德音。以成德之才道。將明主憂勤之旨。而頒詔條。當下車政成。待箴諷。况蘋洲雪谿。天下勝絕。緩轡縱權。嬉遊其閒。發之以詩詠。參之以奕思。名教之樂。何以過斯。豈惟吳氏民歡康。固亦我曹企慕。閣長隴西公。敦義聳善。賦詩寵行。懷文之士。靡不閒作。視衆君子之詞。知成德之爲人矣。某辱事舊

之尤者。是用冠于篇首。

送刁桐廬序

陶彭澤古之逸民也。猶曰。聊欲鉉歌。以爲三徑之資。是知清真之才。高尚其事。唯安民利物。可以易其志。仁之業也。元賓長官。生鐘鼎之族。處綺紈之間。懿文敏行。角立傑出。雲心鶴態。蕭然物外。而世祿所及。初筮賓從。策名蘭臺。寓直宮省。挂冠解紱。至于再三。終以地連肺腑。時屬憂患。睚俛從事。出入十年。及時移世。改自以爲獲平昔之志矣。而物有萬殊。命不我與。昔之朱紫盈門。今則羣從無所庇矣。昔之金玉滿堂。今則簞瓢不常給矣。乃慨然曰。潔其身而忘其宗。得爲孝乎。于是濯纓清流。投迹名路。綬洩於桐廬。暮春三月。飲餞都邑。傳曰。人之所欲。天必從之。嘗聞桐廬江浙之勝景也。朱張顧陸遺墟邇焉。王謝任沈舊迹存焉。山水林壑。應接不暇。夫以天下之廣。而首獲此邑。非天從子之欲乎。將惟新之化。撫思父之俗。道在于己。事至乃應。誠接于物。令行莫違。彈琴詠詩。角巾蠟屐。推是而往。所至必安。朝市邱壑。復何有異。他日豈失爲東方曼倩哉。離羣之思。亦宜裁抑。慎夏自愛。無假多談。

送高紳之官序

高生以俊造之科。中聖明之選。清秩解褐。尹縣南荆。少年得途。其道光矣。復能追步前哲。求以言贈。愚也不佞。試爲子妄言之。觀夫閭里之民。皆能用天之道。分地之利。仰以事父母。俯以畜妻子。重生畏法。蓋真性也。其所冒沒詐僞。由吏擾之也。吏所以能擾之。由賦役之煩也。賦役之煩。由爲政者從諛也。夫君之與下民。其勢曠而不接。故設守宰。以代一人之耳目焉。受百里之寄。當以百里爲己任。民之舒慘。由乎己。

之窮達存乎天。率是道也。其何往而不可。此老夫平生之所守。吾子以爲何如哉。

送汪遜序

士君子懷道于己。有志于時。講學以聚之。修詞以發之。不苟且於名譽。不隕穫於貧賤。見之于汪生矣。生家世從宦。幼而孤子。託迹于諸侯之門。主人武夫。不知其善。輕田文之下客。棄衛青之舍人。迨余季氏司貢籍。克日將蒞職。悉出羣士所贊文。共詳之首舉。一通乃生之文也。相與驚歎曰。此子文甚高。而名甚晦。是必守道寡合者也。卽與之上第。旣而主人大慙。乃御名造誣謗。布於用事者。由是久不得調。余時參典選事。抗疏論事。始得爲嶺隅一尉。生亦怡然。不以屑意。歷佐二邑。皆有善聲。及至天朝。復幹郡掾。考績繕最。遷秩新都。白髮青袍。惠然訪別。君子曰。士之處世。不欺閭室。不羞小官。游心于自得之場。措身于無過之地。以此行天下。雖蠻貊可也。況右蜀之域。列仙之都。風景融和。山水奇秀。一時之遇。誰克如之。行矣自愛。無假詞費。仲冬十一月序。

送葉元輔秀才序

君子依仁據德。讀書爲文。孜孜于求己。汲汲于待問。蓋將以行道濟物。勤身存教。然而有不偶者焉。人君側席賢。懸科取士。昧且不顯。日旰忘食。蓋將以盡一國之才。成天下之務。然而有所遺者焉。此古人所謂離合之由。命運之謂也。君子審其若此。故退而無悶。進而不矜。豈以無可奈之命。而撓不可奪之志。間者。愚及諸賢。品第貢士于南宮。其間高等者。數年之中。登第略盡。今所遺者。惟葉生而已。苟有良田。何憂晚歲。先後之間。其與幾何哉。行矣。葉君。蘋洲若下。清風朗月。一時勝賞。矧復故鄉。唯恐子青雲之志。不得

嘯傲于其間爾。盛夏自愛。無假多談。己丑歲孟夏序。

連珠詞五首

背時則棄。不必論貴賤之殊。適用則珍。不必論精麤之異。是以瀉風既返。抵金壁于山林。考室已成。間泥塗于采翠。

運不常偶。體道者無憂。時不常來。抱器者無滯。是以霜露既降。徂來不易其貞。弓矢載囊。董澤不渝其利。道不可以權行。終則道喪。情不可以苟合。久則情疏。是以兵諫愛君。君安而忠敬已失。同舟濟險。險夷而取舍自殊。

先王之道。或拙於合變之謀。萬乘之權。或輕于衆人之力。是以時逢革命。夷齊餓而呂望封。連偶愛才。絳灌強而賈生絀。

有用于物。雖遠弗遺。無功于時。雖近猶棄。是以楸枰在野。見采于良工。蒿艾在庭。不容于薤氏。

安金藏畫象贊

心腹腎腸。所以爲人。安公感激。捨此求仁。既已其亂。不愆厥身。眉壽高位。惟天所親。咨爾百世。仰之愈新。

參政李公至字言幾年三十八眞贊

金玉其相。君子之容。廟堂之器。多士攸宗。謀先帷幄。道合雲龍。絕景橫鶩。干霄直上。黑頭三公。風流宰相。人具爾瞻。惟肖之像。

玉芝贊

天地粹和之氣。交感化成。鍾于人事爲仁孝。鍾于植物爲芝英。故以孝行感。必芝草生。以類至也。宜春易君延慶。先君徙籍。來占臨淮。清節考終。因葬其郡。君茹荼泣血。廬墓終喪。申罔極之哀。盡善居之禮。里閭率化。生植效祥。乃有玉芝。產于塋域。擢本數十。爛然叢倚。柯條交今上。玲瓏朗瑩。樛枝俯映。間以葩華。雪英碧藥。紛敷灼瑛。客有好事者。圖之而來。蓋耳目所及。圖象所紀。未始有也。余與君遇甚邇。而熟君伯氏。聞君世家積善餘慶。果生孝子。且有奇應。以振滄風。昔天台之琪樹。唐昌之玉蕊。皆以珍麗。見頌詩人。比之於此。曾何足貴。乃爲贊曰。英英玉芝。生彼邱墳。交柯離巒。揚葩敷芬。神之應斯。其意訕訕。愷悌君子。愨然泗濱。孝心潔白。孝德升聞。撫翼亨衢。振衣衡門。勗增爾慶。以永後昆。

方竹杖贊

彼美者竹。確乎貞堅。峻節無撓。虛心體玄。用之扶老。可以窮年。所不足者。其形乃圓。誰謂奇標。產于巴夔。削成廉稜。挺然端直。旣方旣勁。斯爲全德。會吾素心。寶爾無極。

筠州三清觀逍遙亭銘

羽客吳君。心馳窈冥。興隆道館。陟降真靈。綽有餘裕。建茲幽亭。下臨曲池。甘泉清泠。環植嘉樹。羣芳苾馨。俯矚長川。滄波帶縈。前睇仙山。奇峯翠橫。游者忘歸。居之體寧。君子修道。物境與并。必有福地。居爲殊庭。勤行不已。可臻層城。我聞其風。用刊斯銘。

虎谿銘

遠公宴居。虎谿之陽。將迎順理。步武有常。斯須或違。猛摯爲防。其閑不逾。其道彌光。湯湯碧流。與名俱長。

咨爾後學。鑑之勿忘。

龍山泉銘

建康城北有雞籠山焉。傍帶潮溝。卻臨宋元嘉中。改爲龍山。湖曰玄武。紀瑞也。雷次宗之儒學。蕭子良之西邸。遺蹤可識。爽氣長留。東麓有泉。至清而甘。水旱不增減。道人今隱。今上御名精廬於其陽。酷愛此泉。以爲靈液。因思前作。皆有銘贊。而此獨闕。常欲補之。無何。夕次松下。恍忽若夢。見一人玄巾素衣。謂隱曰。此泉已有銘矣。因徵其文。卽高吟四句。吟罷不復見。觀其詞意。無以加也。余聞而異之。因篆于石。其詞曰。原發石中。派分塵外。如醴之味。與時而在。

晁錯論

愚因讀李觀所爲文。見其論晁錯盡忠于漢。而袁盎以私讎陷之。景帝過聽。可爲王者之羞。誠皆然也。以愚觀之。則盎之罪一也。夫二子者。才識度量。不相上下。遭天下初定。文帝勵精求理。能用善言。故盡忠論事。並獲聽用。而皆欲功名在我。莫肯急病讓夷。故相與爲敵。非素有父兄之讎也。及七國兵起。而錯遽欲按治袁盎。宜知吳之計謀。其吏不聽而止。盎聞之懼。遂譖錯焉。然則忘公家而務私及怨。其罪先在錯也。夫古之君子。爲而不有。功成不居。付物以能。任之則逸。故能成可大之業。今二子者。冒道家之所忌。以智能爲身榮。故終于惡。是知道不可離也如此。

伊尹論

伊尹放太甲。論者多惑其臣節。請試論之。太甲在諒陰。百官聽于伊尹。太甲不明者。蓋居喪之禮有闕。修

身之行不周。伊尹訓而罔念慮。不堪繼統。故徙于成湯之墓。使其親見松柏。切感慕之心。追思王業。知艱難之迹。三年之制。纔終。伊尹乃迎歸于亳。非謂絕其大位。幽于別宮也。古之言質。故與放逐同文。亦猶君臣交相稱朕。下告上亦爲詔也。霍光憂昌邑王淫亂。而不敢有異謀。田延年盛稱伊尹廢太甲。以決大事。宗社之故。不得已也。本非如霍光之廢昌邑也。聖人舉至公于前。姦雄躡陳迹于後。自古而然。非聖過也。魏晉之後。更相傾奪。皆引堯舜揖讓爲詞。亦當不可罪堯舜矣。禹讓天下于益。知天下歸啓。故不敢當。苟天下歸益。益則爲王。亦無媿也。如令太甲遂失德。天下歸伊尹。伊尹復何辭哉。今天下未忘成湯。故伊尹復奉太甲。無傷于至公也。夫古之有天下者。一身處其憂責。億兆蒙其富壽。天下旣理。則辭之。巢由是也。天下不理。則受之。湯武是也。後之人役天下以奉其私。故比于騎獸。不可下。步驟之相遠如此。豈可一槩而論哉。

出處論

人之爲貴。與天地參者也。是則有四人焉。食爲民天。故農爲政本。工致天下之器用。商通天下之有無。此三人者。交相養者也。而士人者。無所資于三人。而坐受其養何也。蓋爲之君師。而司牧之。教其不知。卹其不足。安其情性。遂其生成。爲之立上下之節。正長幼之序。闕一則亂。故魯哀公曰。信如君不君。臣不臣。父不父子。不子。雖有粟。吾豈得而食諸。是則資三人之最切者也。故享天下之祿。而無愧。及世之衰也。上之道不被于下。下之情不達于上。億兆困窮。無所告訴。在位者惠不及物。徒以富貴爲身資。君子恥之。故逃之而隱。於陵爲農。輪扁爲工。弦高爲商。如此者。不可勝數。是皆失路之人也。不肯無功而徼利。故任力而

自食。以免貪冒之罪。非其所欲也。不得已也。而後之人。不本其意。以爲高尚之士。桎梏軒冕。糝糠祿稍。若爾。則伊臯稷契。曷足貴哉。或曰。伯夷叔齊。當文武之世。曷爲棄之而窮處也。答曰。聖人一致而百慮。殊塗而同歸。天下至大。非一人所能兼也。力之所及。擇處一焉。當是時。十亂協心。以著翦商之業。沛有餘力矣。故夷齊不復措意于其間。至于正君臣之大節。垂百世之大統。則十亂不能兼也。故夷齊以是爲己任焉。方知扣馬而諫。左右欲兵之。太公曰。此義士也。扶而去之。夫以夷齊爲義。則明己之不義矣。故歸惡于己。以成立義之志。是太公知夷齊之心也。夫積德累仁之聖。因八百諸侯之心。以滅獨夫之紂。盛業如此。而義士猶恥之。不食其粟。乃知以臣伐君之惡也大矣。則後之帝王。罪未及桀紂。諸侯之德。未及湯武。敢有闕竊者乎。故春秋之時。周室微弱。不絕如線。以桓文之強大。不敢自用。乃糾合諸侯。以尊王室。則夷齊之功所及也。逮至秦漢興替之際。士君子濡足援手之時。而南山四皓。隱居自若。夫四皓者。知漢高之寬仁神武。有三傑輔之。足以安天下。無待于己故也。及太子之危。留侯不能正。于是褻然而起。以救其失。出處之分。高尚之名。皆不以屑意。功成不有。超然而去。于時有應響耀者。與四皓俱徵。應獨不至。時人爲之語曰。南山四皓。不如淮陽一老。彼應生焉。蓋知四皓足以安太子。無待于己。故不出也。不然。豈獨潔其身乎。斯皆大人君子。至公之舉。而淺局者。輕爲褒貶。不亦傷乎。

徐騎省集卷第二十五

大宋李公德政碑文

大宋新建上清太平宮碑銘

大宋重修蛾眉山普賢寺碑銘

巫馬大夫碑銘

江州彭澤縣修山觀碑

大宋推誠宣力翊戴功臣金紫光祿大夫檢校司徒使持節齊州諸軍事齊州刺史充本州防禦使河隄等使關南兵馬都監兼御史大夫上柱國隴西郡開國侯食邑一千九百戶李公德政

碑文

臣聞四岳疇咨。帝堯所以光宅。三良共理。漢室于是隆興。然則運歷冥符。風雲交感。必有則哲之后。乃有稱職之臣。用能遠肅邇安。刑清俗富。其或久於其道。課最于時。行邊按部。籍其能。羣吏萬民。浸其澤。流芳金石。舊典存焉。公名漢超。其先隴西人。因官移籍。今爲雲中人也。柱下史之真源。克昌厥後。前將軍之壯氣。不隕其聲。世有哲人。多爲名將。備諸前載。可以不書。昔者同光之季。莊宗失馭。公烈考諱霸德。饗典親衛。力扈乘輿。奮不顧身。有死無二。忠顯於國。慶鍾於家。及公之貴。詔贈左監門衛將軍。夫人石氏。追封本縣太君。道不虛行。沒而可作。有後之報。斯焉豈誣。公方幼而孤。嶷然特立。英果之氣。出於天資。遠大之期。志爲時用。年未弱冠。自奮從軍。始負羽於魏侯。復策名於鄆帥。有周受命。選入禁軍。夫忘歸之鏃。非逢蒙無以宜其利。絕影之駿。非造父無以聘其能。

今上當歷試之辰。受有征之任。妙選比較。公首預焉。上黨之役。名書勳籍。奏發礪之刃。起漸陸之程。及眷命有歸。飛天在運。攀鱗之効。捨爵攸先。乃掌句陳。式嚴微道。恩威洽著。而七萃知方。夙夜惟寅。而九重甘寢。其歲考績。較然可稱。

皇上以文武之任。中外惟一。有和衆之略。必著撫俗之能。有衛社之勤。必堪守土之寄。越建隆二年。拜齊州刺史。本州防禦使。爾乃海岱封圻。虛危躔次。歷下屯兵之地。夙表要衝。東陵聚衆之鄉。素稱暴桀。公本以簡易濟之強明。恕己以兼容。正身而可象。先之以孝悌。故其民和。則爭訟息。而囹圄虛矣。示之以誠明。故其民信。則賦役充。而儲廩實矣。農時不奪。故曠土闢。而生殖滋。關市無征。故百貨通。而財用足。于是舉廢典。正國容。樹門反坫。以備制度。高闕厚垣。以待客使。蒸肴折俎。以宴嘉賓。椎牛醢酒。以享軍旅。出于私積。無以家爲。近悅而遠懷。家至而戶到。一年而宿弊革。載稔而新政行。郡齋肅然。清嘯而已。由是知董戎之用。可移之于頒條。露冕之風。可推之于護塞。乾德二年。詔公以本官充關南兵馬都監。幽都南際河間北壤。守方之要。慎簡爲難。至則遠斥堠。審號令。養士如子。戢軍無私。威聲颯馳。亭障山立。絕關邊之虜。有狎野之農。而郡之大事。亦皆聽命。千里之內。若指掌焉。二職交修。七載如一。開寶二年。召赴京師。天言褒慰。復遣還郡。而戍士思慕。毗俗繫憑。故其年冬。再爲關南監護。公負個儻之氣。蘊沈厚之謀。民已安而政益修。邊旣寧。而備愈謹。績茂而不伐。寵至而若驚。君子知福祿之攸歸。郡人感惠澤而思報。于是僚吏之屬。耆艾之徒。相與上言。願旌不朽。且曰。任賢使能。天子之明也。計功稱伐。先王之典也。非有理世。孰揚頌聲。優詔嘉之。克遂其請。昔者考父循墻之頌。非曰君恩。當陽沈水之文。真成自伐。豈輿情欣洽。令譽升聞。

播樂石于無窮。等高山而可仰。永惟懿美。足煥文明。爰命下臣。勒銘紀實。其辭曰。
茫茫禹迹。畫爲萬國。建侯定守。立民之極。提封且千。屬城以百。惟威惟懷。有典有則。威懷伊何。君子時中。
典則伊何。三代同風。以使則悅。以令則從。率是古道。茲惟李公。濟水之南。東陵之下。伏生荒耄。盜跖狙詐。
嗟我蒸黎。孰聞道化。至魯猶遠。尊周靡暇。李公來思。富之教之。政先體要。物必由儀。夜犬無撓。晨羊不欺。
歸民影附。末俗風移。天下雖平。四方是守。桓桓虎旅。懾爾戎醜。藉我兼資。是率是糾。道合舞干。威行戴斗。
郡政旣成。邊塵旣清。侁侁比屋。肅肅連營。夫懷其惠。人竭其誠。欲報之恩。思垂頌聲。明明大君。知臣善使。
舉必至公。義無虛美。用建隆碣。永昭信史。錫爾介福。施于孫子。晉稱峴首。漢紀燕然。風流不續。寥落千年。
猗歟良牧。無愧前賢。高深自改。蘭菊常傳。

大宋鳳翔府新建上清太平宮碑銘并序

臣聞鴻荒代序。太極流形。二儀肇判。而猶通萬類。交馳而未別。巢居血飲。孰知王者之尊。物魅神姦。尙作
生民之患。於是聖人繼統。大化宏開。畫八卦而序四時。奠五山而分九服。衣裳軒冕。采章之制。以庸動植。
飛沉性命之宜。必遂高卑。旣位幽顯。旣分蒸嘗。零禁致其恭。宗祝史巫。紀其秩。猶或觀其道。而設教。依于
人而後行。通其變而不窮。感於物而遂動。未始有極。無得而名。其或數偶三災。德如二季。民懷慈衛。帝念
疇咨。必有靈符。允歸輿運。易著與能之旨。傳稱觀政之徵。史遷之論至哉。左氏之書詳矣。我國家受天之
命。如日之升。御六氣而平泰階。麗大明而照萬國。清亂略于百王之季。返溘風于邃古之初。天瑞呈祥。羣
靈受職。粵

御歷之元祀。有神降于鳳翔府盩厔縣之望仙鄉。其象不形。其言可紀。蓋玄帝之佐命。禹強之官聯。眞位參于紫微。靈職分子并鉞。其稱述則儒玄之奧旨。其敷演則禳禱之嚴科。教義之深也。則孝友姻睦之行。與焉威力之大也。則魍魎魑魅之害除矣。由是秦雍之地。尸而祝之。

太祖神德皇帝。聖智淵深。睿謨默識。饗之明德。待以不祈。方且奉天時而蒼靈心。握玄符而齊七政。故得皇猷允塞。庶績其凝。舞兩階而四隩來同。正九伐而庶邦承式。得遺珠于罔象。協吉夢于華胥。乃知玄告之不誣。駿命之如響。豈止五車兩騎。來爲牧野之祥。亦帝素靈。出表芒碭之應而已哉。

今皇帝千年應運。二聖繼明。恢大業而惟新。浸深仁而累洽。如周王之翼翼。若夏后之孜孜。聖作無方。先幾靡測。雲門大濩。綜六代之昭聲。稷卜淹中。采百家之精義。酌而不竭者。衢罇之味。仰之彌高者。垂象之文。王澤旣流。頌聲無斁。而復念深。後義切勤民。睿眷春臨。皇威電擊。大禹會諸侯之地。盡入隄封。宣王逐獫狁之鄉。率從稽服。舉無遺策。役不踰時。聊存尉候之官。已戢囊鞬之器。瑤圖之盛也如此。珍符之至也如彼。深惟肸蠁。益驗昭明。而豐報未嚴。壽宮不度。非所以光敷景貺。垂示方來者也。夫庸庸祗祗。爲政之要。元元本本。致理之端。蓋神之受命于天。天之造始於道。是用歸誠衆妙。訪制昭臺。申畫福鄉。聿崇仙館。緬維虛皇之眞境。參以聖歷之嘉名。詔立上清太平宮。於所降之地。爾其星分玉井。邑峙金城。終南峻極。鎮其前。渭水清深。紀其後。鮮原靡迤。接漢皇訪道之臺。佳氣鬱蔥。對關令棲眞之宅。物皆茂遂。風雨罔愆。人盡淳和。舟輿不用。瞻新宮之爲狀也。崇墉繚野。絳闕凌空。祕殿雲高。俯軒櫺而轉眩。修廊繩直。步櫺宇而中疲。極丹青黼藻之工。窮銑鏤壁璫之飾。玉几正御。瑤壇在庭。帝座旣嚴。衆眞畢饗。鹿巾霞帔。

之士。霓旌絳節之儀。空歌洞章。揚其音。紫煙素雲。散其彩。騰敷之馭。縵縵于太虛。氤氳之氣。充被于羣有。至矣哉。元后之德。與天地合。眞人之應。將富壽并。亦何必定。郊鄩以下。年禪岱宗。而探策者也。夫金石之刻。雅頌之興。所以示民不佻。永啓厥後。況乎尊道貴德。廣清淨之風。窮神知化。超言象之表。是宜告于太史。副在名山。爰命下臣。式揚丕烈。其銘曰。

上天之載。無臭無聲。恍惚有象。氤氳化成。寄以神理。發爲昭明。惟德是輔。惟皇作程。赫矣元后。悠哉遂古。咸有靈貺。式昭天祚。龜出清洛。鳳臨玄扈。赤字興堯。玉書授禹。降及商亳。逮于邠岐。天之所啓。神亦格思。牲玉有秩。馨香孔儀。奕奕宗祀。子孫保之。道德下衰。質文不復。俗限楚夏。運遷水木。時歎陵夷。民嗟慘黷。必有眞人。膺圖受籙。

皇哉帝宋。大拯橫流。出自蒼震。類茲九疇。垂衣卷領。端拱凝旒。永言建福。式協人謀。有煒明靈。降從玄極。致帝之命。觀政之德。用薦忠信。寧惟黍稷。藉陋蕙蘭。帳非甲乙。運隆二望。慶洽重光。誕敷一德。奄有八荒。時文載郁。我武惟揚。通幽受職。罄宇儲祥。乃眷珍符。本乎至道。肇建仙館。是彰玄造。前望終南。旁瞻豐鎬。泱泱平原。崇崇新廟。端闡特立。秘殿宏開。九華之室。方丈之臺。平闕列缺。直寫昭回。崆峒邈爾。姑射遼哉。聖靡不通。道無不在。靈場旣穆。祀典無改。福爾蒸黎。格于四海。用刻貞珉。永垂千載。

大宋重修蛾眉山普賢寺碑銘并序

臣聞聖人闡化。必有胥附之資。賢士膺期。必垂不朽之迹。是以顏回默識。冠師門於洙泗之濱。尹喜受經。應眞氣於崑函之右。故得千載之下。好學之徒。入其國而知其教。思其人而愛其樹。聖賢相遇。有如此焉。

在昔像教權輿。能仁命世。綜百靈而貫羣動。歸向如流。窮絕國而亘諸天。感通若響。爰有法王之子。來從普勝之方。憑翼真乘。導揚宗極。具大悲之願行。綜十智之因緣。從我立名。斯爲上首。及乎慈航既濟。慧炬分華。乃暨衆眞。俱承佛勅。乘六牙之瑞獸。降右蜀之靈峯。將以協井絡之會昌。鎮金方之勁氣。猶且潛而勿用。明而未融。闇持摩頂之仁。陰隲含生之命。故使神嬰青纓。肇建國都。路關金牛。始通華夏。沈犀息沱。李太守之玄功。喫酒救災。藥尙書之妙用。郡開學校。文翁廣洽於儒風。樂播中和。四子誕揚于帝德。藹爾褒斜之域。穆然周漢之民。非法力之攸憑。豈人謀之獨得。其後金人既應。白馬斯來。神開顯俗之徵。家識致誠之所。于是祥符煥爛。靈變紛綸。或則銀色浮空。與朝陽而共麗。或則燈光並列。將夜魄以俱明。聖衆盤旋。眞容隱見。奇蹤萬狀。不可勝圖。瞻之者耳目咸新。聞之者身心共肅。一方欣賴。歷代修崇。遂于白水之源。特建普賢之寺。金土交運。開閉不常。白毫之相長存。法鼓之音靡絕。夫以導江遺迹。天漢名區。必有道之見歸。豈三分之能久。

太祖神德皇帝。文修內禪。武定中區。正卿揚九伐之威。遠俗致七旬之格。納蜀王之土貢。受劉禪之驟車。重鈕坤維。還銘劍閣。于時皇風初被。汙俗尙繁。游魂篁竹之間。假息萑蒲之際。匪輕刑之可禁。顧先甲以徒勤。金地寶坊。浸成藪澤。田衣毳褐。漸致流離。妖禽既就于焚巢。紺宇終悲于閭戶。雖復葺其撓棟。繕彼堦垣。而階序猶卑。基局未廣。

尊號皇帝。長君嗣統。二聖重熙。覆萬物以如天。廓重昏而比日。聿修成業。欽若靈心。尺書徵懷德之君。折筮定畏威之地。盡炎洲而極玄朔。尉候徒存。亘日域而浹流沙。車書莫二。然後勝殘去殺。反朴斲雕。包干

戈以虎皮。鑄劍戟爲農器。定大濩。雲門之樂。舉淹中稷下之儀。慈衛仁薰。時和俗阜。天地應而慶雲甘醴。律呂調而玉燭景風。猶復成而不居。勤則有繼。一游一豫。表王度之惟常。必躬必親。示庶民之光聖。慮極冰霜之誠。皇綱畢舉。睿思彌精。以爲象外微言。無生妙理。修于心則圓通無滯。被于物則福應來臻。足以助王道之和平。致蒼生于仁壽。乃申明詔。歷選精廬。唯此蛾眉。獨標殊勝。真人皇諭道之地。楚狂接輿。隱景之鄉。封域之間。氣象盤薄。洪源奔注。二江雙流。沱潛之川。峻岳回環。玉壘銅梁。岷嶓之阻。況禪枝擢秀。來自祇園。法海餘波。別疏定水。慈氏所相。疇能廢之。烝哉聖謨。符此玄貺。五年春。申命中使。率將籽人。伐貞石于它山下。瓌材于邃谷。或子來而肆力。或神運以標奇。模制度于鷲峰。極莊嚴于花界。耿耿正殿。轍轍飛甍。玉甃丹楹。金鋪瑣闕。洞戶順陰陽之候。中宸變寒暑之威。揭以端闈。繞之周廡。鑄鴻鍾之萬石。貫猛簾之千鈞。桀孽凌空。鏗旬震野。其後則層樓入漢。飛陛連雲。彩檻離婁。冠餘霞而上出。璇題均瑩。綴列宿以旁迴。神明之臺。不足以語其高。天梁之宮。不足以矜其麗。鑠金爲字。寫大藏之經。祕于上。逾五百函。範銅爲像。擬普賢之容。設於下。高二十尺。味其文。則如來之宗旨。可得而觀。禮其相。則菩薩之威神。于是乎在。將使三蜀之地。一切有情。皆冲氣以含和。盡革凡而成聖。則知大雄之教。漸于世也深焉。元后之仁。利於民也至矣。昔者軒皇訪道。歷襄野以猶迷。漢帝祈年。拜竹宮而無得。恭惟盛美。允屬皇猷。若夫事以頌宣。言以文遠。作而不記。後嗣何觀。爰命下臣。式旌不朽。其銘曰。

允矣象教。洪惟法王。如河不竭。比日同光。有情斯應。無遠弗彰。化自八國。聲馳萬方。爰有大賢。是稱達者。異境齊致。同聲協雅。聞道莫逆。瞻顏不捨。乃演真乘。來儀東夏。蛾眉之阻。羣帝之庭。作固作鎮。棲真宅靈。

普賢至止。潛耀千齡。爾未我覲。我疇爾形。經教既孚。神明乃作。瑞相顯晦。圓光歛霍。萬變凌峯。百靈溢壑。信士歸依。輿人駭愕。崇崇梵宇。于此宏開。時遷末運。數偶三災。焚如魯廟。傾若齊臺。瀉風必復。望日斯廻。赫矣皇圖。烝哉二聖。混一區宇。受天明命。與物皆春。得人爲盛。式敝九疇。迭修三正。皇帝曰咨。咨爾西人。助我神化。其惟正眞。爲爾祈福。轉茲法輪。禪林則舊。寶刹惟新。祕殿眈眈。高門奕奕。修廊四注。層樓百尺。尊經聖像。金文寶質。妙善周圓。福釐繁錫。乾光俯燭。慧炬朝焯。同開壽域。共闢重昏。羈珉之伍。杜宇之魂。乘是妙果。俱登法門。明明大君。照臨下土。墜典咸修。靡神不舉。彼都人士。式歌且舞。揭此豐碑。永傳終古。

巫馬大夫碑銘

大夫與宓子賤俱事仲尼。迭宰單父。宓子恢上聖之道。舉任賢之明。故有鳴琴之化。大夫勤以繼德。身親其勞。故有戴星之迹。從師則同行。行道則背。其故何哉。夫天下至大也。萬物至衆也。至大者不可以一槩量。至衆者不可以一術治。故君子出處語默。屈伸變化。一致而百慮。同歸而殊塗。其要在存至公於百代。不私榮名于其身而已。若夫上德無爲。玄功不宰。知人則哲。付物以能。功成身泰。神全理勝。與夫勞心焦思。靡瘠胼胝。勝負之間。較然可見。徇名之士。皆奔走之。則將有智小而謀大。行邇而志遠。推是以往。天下必有受其弊者。子期知之。故就而爲其節制。並分聖人之體。以極萬物之變。効伯禹之力。師文王之勤。夙興夜寐。不遑啓處。仲尼識其志。故譽子賤而不譏子期。以此防民。而西晉王夷甫之徒。猶祖尙浮虛。望空署白。以亂天下。則子期之慮。不亦遠哉。夫君子道積于躬。惠加於物。事至而應。時動則隨。功之豐約。視事之細。大力之勞逸。繫時之險易。致理而已。何常之有焉。舉成績而較優劣。難與言智矣。泱泱舊國。藉藉遺芳。

舊俗不偷。頌聲未泯。行太守事。彭城劉君名察。望高持憲。寄重頒條。以師古之學。舉時中之政。訟庭益簡。祀典咸修。永懷前賢。願紀貞石。鉉也不佞。承命爲文。其銘曰。

烈烈先聖。侁侁衆賢。升堂入室。體道同玄。其用無方。萬化齊焉。其教無窮。百世賴焉。文王旣勤。大禹盡力。英英子期。服勞繼德。夙興夜寐。自強不息。苟利於後。唯變所適。季世道薄。務華喪真。居簡行簡。不躬不親。亂由是生。俗以之淪。思我子期。亡己爲人。瞻言舊鄉。魯道之首。邈哉二賢。佐佑先後。同焉皆得。通則能久。千齡旦暮。敢告邦守。

江州彭澤縣修山觀碑

混元資始。玄造權輿。道以久而化成。樸旣散而爲器。聖人在位。修之於天下。則有明堂清廟。表訓民事。神之方。賢者貞遯。修之于身。則有名山福地。爲朝真降靈之所。小大則異。宗致惟均。江州彭澤縣。有修山焉。瞰天險而高標。抗廬峯而特立。氣雄而勢聳。翠積而光寒。峻岷深巖。風雲蓄泄。茂林穹谷。材用蕃滋。游居之所。走望真隱之所。棲息考諸圖牒。昔靖節先生。游憩之地也。杉松交影。猶懷種柳之風。山水清音。尙想素琴之意。遺德所及。仙祠以興。梁大同元年。有句曲道士尉文光。靈氣夙成。陰功將滿。遐擇勝地。以恢妙門。聿來此山。益廣基今上御名。制度無闕。標題載光。越二年。尉君白日登晨。舉邑咸覲。人民未改。飈歛載還。霓衣則殊。鶴貌如故。稅駕之地。甘棠永存。故今有尉駕池焉。而中山丹竈香鑪。松壇石室。儼然奇迹。若奉宴居。歷代嚴恭。有如旦暮。唐狄梁公履虎不啞。絃歌此邦。企仰仙游。重加崇飾。又塑高宗大帝聖像。以伸送往之誠。朔望朝拜。不失常禮。復以錢五十萬。爲致田園。廚廩所資。至今猶賴。季唐之世。臨川宋震。來爲宰

邑掘地得藥鼎藥合。因建尉真人之室于東序。設象以奉之。秩滿還鄉。遂入麻姑山爲道士。是知清心冥契。玄鑑孔昭。青天白日。孰云其遠。道士謝又能早參真籙。夙負時名。閑館靈場。備嘗踐歷。空談祕訣。悉詣精微。克享修齡。言歸廬岳。郡侯敦請。付以修山闡教之心。勤行匪懈。棟宇之制。日以增嚴。瑞闡屹其穹隆。周廡紛其回合。煥然藻繪。藹爾重深。清澄之氣。攸充汗漫之游。斯在戊寅歲。謝君解化。弟子王省昂繼之。方行。才亦世出。金石之刻。僉曰其宜。鉉也。欽羨真猷。因爲之頌。其詞曰。大道混成。修之乃真。必有勝境。以居異人。南楚之域。玄風所臻。邈哉修山。棲靈降神。陶令高名。尉師仙卿。狄公元臣。矯矯三賢。千祀齊聲。是相是宅。載經載營。疏此翠巘。列爲殊庭。想像玄圃。規模赤城。瞻之者肅。處之者寧。心之所至。道豈虛行。刊名翠琰。永告諸生。

徐騎省集卷第二十六

揚州新建崇道宮碑銘

洪州奉新縣重建闔業觀碑銘

洪州西山重建應聖宮碑銘

驪山靈泉觀碑

洪州延慶寺碑銘

揚州新建崇道宮碑銘并序

有天地然後有萬物。有萬物然後有君臣。有君臣然後有教化。教之大者當由其本。則大道是已。夫道積乎中。動合于真。故能舉堯舜周孔之法。奮禮樂刑政之用。若道不在焉。而守其遺蘆。則莊周于是糠秕仁義。輪扁于是糟粕古書矣。夫孝本因心。而宗廟簠簋。所以致孝也。道本勤行。而宮館壇墀。所以尊道也。爲政者有能原聖人之旨。以垂憲。崇列真之宇。以薦誠。其殆庶乎。廣陵大藩。四海都會。制度之盛。雄視諸侯。士德旣微。三災斯御。今上井邑屢變。城郭僅存。

皇宋膺圖。更造區夏。雖天寶輔德。亦世而後仁。今上嗣位之六年。詔太常博士孫君邁。佐理斯郡。君服膺古訓。得意玄關。以爲教之不興。民之安仰。於是相爽塏之地。卽清曠之墟。創朝修之宮。奉玄元之御。當崇墉之左次。俯合瀆之東涯。出俸錢以易置。運心匠以經度。班倕方集。畚鍤旣興。未及僉功。移典秋浦。同聲之應。千里非遙。太子右贊善大夫潘君若冲。負儒雅之才。韞恬淡之量。允膺朝選。代撫斯民。庶政交修。能事畢舉。惟茲靈宇。旣有成規。于是揆日庇徒。克終懿績。若乃殿堂階楯之制。閤罍罍之列。或躊躇以閑。

宴或窳穰而曼延。睟容肅穆。仗衛紛繹。搖太霄之佩。植紫旄之節。拊洞陰之磬。扣豐山之鐘。歛若經闕。風而歷琳房。飄如排玄雲。而挹丹露。風亭月觀之地。紫氣浮空。歌臺舞閣之基。芝英擢秀。學者假筌蹄而有得。游者甘藥餌而斯留。驚然福鄉。丕變浮俗。既畢雲今上御名。乃揚王庭。有詔賜名曰崇道。大矣哉。望人在上。墜典咸修。自成畏壘之區。何假崆峒之間。是宜刻於樂石。紀在方書。某也素爲道民。嘗學史氏。以文見屬。所不獲辭。銘曰。

大哉道原。湛然常在。其質無象。其功不幸。君子得之。勤行不息。勤行伊何。啓煥靈場。乃闢隙荒。乃築宮墻。峨峨高門。屹屹崇堂。祀事孔明。玄儀載光。淮海惟揚。九州之奧。厥民伊何。富庶而教。夫仰靈今上御名人。知至道。咨爾三方。是則是效。崑岡北峙。邗水南通。聖日麗天。真氣盤空。煒煒煌煌。魂魂熊熊。道民作頌。永播皇風。

洪州奉新縣重建闔業觀碑銘并序

道之爲體也大。大則衆無不容。道之爲用也柔。柔則物莫與校。南方之強也。故沖氣之所萃。異人之所生。壇館之所宅。景福之所興。相乎域中。南楚爲盛。先聖之論。豈誣也哉。洪州奉新縣闔業觀者。案方志。西晉邑人劉真君之故居也。真君名道誠。以經明行修。仕至刺史郡守。金行不競。仁獸非時。知幾之賢。有道士卷懷而退。修之於鄉。玄德陰功之昭。受靈貺。故真君辭張邴之祿。追茅許之風。單車還家。勤行不息。以永嘉二年八月十五日。舉族上升。藹爾福鄉。依然舊址。錦帷乍降。玉鳥長留。後學瞻望。若仲尼之闕里。遺民思慕。如召伯之甘棠。梁大同元年。乃建爲觀。爾其豫章垂蔭。洪井儲靈。華林蒼翠。當其陽。馮水清冷。環其

域烟霞韜映。竹樹青蔥。居然人境之閒。自是仙游之地。載祀四百。朝市三移。封域之閒。英靈不泯。鹿巾霞
帔之士。往往冥升。縉紳逢掖之流。時時傑出。存諸舊史。是號名區。士德旣微。羣方御今上。難城有復隍之患。
室多撓棟之凶。乃眷殊庭。俄悲閭戶。而瓊蘊之所祕。霜鐘之所懸。屹爾麗譙。儼然對峙。有道門都監。余守
徵者。翦除宿莽。草創精廬。苦節忘形。口五十餘載。修心以化俗。傳法以度人。入室弟子。龔紹元。吳紹甄。皆
能肅奉真科。祇稟遺訓。惟鄉人之善者。知歲計之有餘。高士胡君名仲堯。延慶簪纓。息機丘壑。師黃老之
術。以虛方寸。躬曾閱之行。以睦閭門。博施濟衆。斯謂智以爲集靈之館。祈福之場。陋而不度。民將安仰。于
是揆時屬役。卽舊謀新。詢謀僉同。脆信咸萃。增湫下爲爽塏。易卑室爲崇今上。棟宇之設。則因夫故基。制
度之中。則考于經法。凡殿堂門闕。居室廚廩。延袤周徧。殆且百區。三尊衆真。羽儀侍衛。精嚴肅穆。不可爲
狀。履端闡造。廣庭恍然。如從汗漫之游。卽瑤階。瞻玉座。竦然若奉武夷之會。旣而息徒已事。日吉辰良。明
祀以告成功。精意以荅真祐。舉紫旄之節。搖太霄之佩。然九華之燭。奏空洞之章。星斗迴光。煙雲改色。青
天白日。夫豈遠哉。于時胡君以姻睦之行。慈惠之澤。里閭稱舉。郡國升聞。詔書褒美。特加旌表。揭以雙闕。
獨其追胥。江楚之閒。以爲盛事。是知玄風之被俗。聖政之化人。變魯至道。見于今矣。夫如是則可以傳芳
金石。垂裕昆雲。俾乎好道之徒。益勵齊賢之志云爾。其銘曰。
大道無名。得之爲真。矯矯劉君。知幾其神。邈爾侯社。上爲帝賓。維梓之地。甘棠之人。峙此仙祠。章江之濱。
華表未歸。桑田已改。舊井誰深。高臺尙在。不見芝英。猶芳蘭茝。佳氣鬱蔥。如將有待。彼美胡君。州閭之英。
世味道腴。家傳義聲。歸誠玉闕。奉贄金籙。易此頽今上。化爲殊庭。乃眷福鄉。實維南楚。閉館相望。鸞輪交

午真圖秘錄。唯仁是與。刻頌貞珉。永歸終古。

洪州西山重建應聖宮碑銘并序

先儒有言曰。山者宣也。宣氣生萬物者也。然則崇岳巨鎮。蓋氣之雄者也。其閒靈峯奇岫。又氣之粹者也。是故帝以會昌。神以建福。感而生聖賢。宅而爲洞天。奇怪恍惚。非尋常所能測已。西山者。作鎮荆楚。雄視衡巫。勢靡迤而崇高。氣清虛而和暢。動植滋茂。樵隱閑安。昔邑人洪崖先生所居於此。洪井之右。澗水之濱。喬木森羅。古壇猶在。長阜回抱。是謂鸞岡。北隅特高。仍有伏龍之號。唐乾元初。山人申太芝上言。其地有異氣。詔于此立應聖之宮。抗玄元正殿於其前。塑肅宗聖容於其上。繚垣觀闕。仰法於紫宮。路門納階。取規于丹禁。光靈煥爛。薦獻精嚴。上士勤行。守臣涖職。秩祀之盛。莫之與京。廣明已還。三災在運。望拜之地。闕而莫修。遼東之鶴徒還。絳縣之人已老。甲辰歲。有道士王守玄者。緱山仙裔。茅嶺名流。受命藩侯。來膺道任。翦荆棘于高閎之址。今上御名茅茨於隆棟之基。不出焦光之廬。自化庚桑之俗。善言彌遠。馴致其功。二十許年。克甄舊制。入室弟子。劉德淳。氣冲貌肅。節苦行高。恪恭以居。次謙和以接物。既嗣其業。遂成厥終。又十餘年。締構云畢。凡內外殿宇。百有餘區。材用善良。工藝堅密。其藻飾也。不踰奢儉之節。其廣袤也。足展朝修之儀。秘殿深嚴。靈壇博敞。辟容穆若。列侍參然。鐘磬在懸。苾芬具薦。燦旭景于軒檻。延夕月于薨題。蕭寥空洞之音。希夷颺歔之御。邈哉真境。無得而名。鉉爰在弱齡。服膺至道。先君頃參戎乘。嘗泚斯邦。依然棠樹之人。自是桐鄉之邑。乃以庚申歲。遷奉松檟。卜兆于鸞岡之陽。敢言折臂之祥。願占維桑之地。明年復以王事。再至山中。祠虛皇于游帷之宮。投龍簡于天寶之洞。所經靈跡。實契幽尋。又是山有寶。

光初至之夕。卽見於中峯之上。下至山麓。倏忽聚散。狀如野燎。而精明眩目。不可正視。澗中有盤石。石有三藥。白歲端午日未曙前。常有擣藥之迹。餘滓在焉。水流至此。甘香如蜜。取以灌漱。心府瑩然。斯皆載于舊經。親所覆視者也。此山登晨之士。接武而洪崖爲之冠。列仙之墟。連屬而洪井爲之宗。然則闔風玄圃之在人間者也。宜其篆刻金石。永齊穹壤。鄙儒不佞。敢作銘曰。

江之右。楚之區。峙靈岳。爲仙都。洪井濱。鸞岡隅。建清宮。應真符。廢而興。神之扶。宮旣成。道旣行。校三官。朝百靈。集景福。薦皇明。復淳化。遂嘉生。億萬年。流頌聲。

驪山靈泉觀碑

蓋聞遂古洪荒。旣表大庭之庫。皇猷炳煥。亦尊軒后之臺。是知聖哲相因。比千年於旦暮。質文迭用。歷三正以循環。斯之謂至公。斯之謂不朽。頌聲所作。冊府存焉。若乃天地網緼。陰陽孕毓。神臯天府。奠爲王者之居。靈液甘泉。出奉聖人之用。丹甑不炊。而自熟。溫谷不爨。而自然。神妙無方。所以存而勿論。蕩袤難老。所以酌而不竭。矧夫西都舊國。東井垂芒。終南太乙。寓其精。洪河清渭。均其潤。湛然神井。冠此崇山。據九州之膏腴。備萬乘之湯沐。固可以蹄筌衆壑。吠澮百川。猗歟無得而稱已。在昔唐之方有德也。稟金壺之道訓。受羊角之禎符。奄四海而爲家。綿六葉而愈盛。教宗玄默。心寄窈冥。卷領結繩。幾致華胥之俗。鳴鑾弭節。常從汗漫之期。輿馬之音。朝行而夕至。玉帛之會。天動而雲臻。孝惟奉先。仁不忘本。乃于山之北址。建華清之宮。玄元之御。當陽而玉瑩。五聖之象。列侍而星環。別館離宮。連薨接棟。朝元長生。紀其號。霓裳羽衣。播其聲。至誠所通。純嘏來應。太平之運。五十斯年。三代已還。未始有也。及夏庭兆豐。戲水擬災。因室

之亂雖平。厭世之游遂往。金莖露掌。但有餘基。樂水雲謠。聊無嗣響。而巋然真宇。儼若清都。同光中初殄國讎。永懷舊物。載賡成制。肅奉玄科。因改命曰靈泉之觀。芝泥龍簡。時修精禱之儀。雲錦鳳羅。歲度勤行之士。是知豐功盛業。將歷運以有遷。道捷玄關。與虛元而共久。累朝寅奉。五紀于茲。素雲紫氣。以常霏白鶴。青牛而狎至。國家朱光繼統。綠字膺圖。受白環于龜山。得玄珠于赤水。雖三秦父老。猶牽望幸之心。而九服蒸黎。重覩開元之日。信皇天之輔德。諒百祿之咸宜。道士武又玄。沖氣內充。仙才外挺。紀綱道任。啓煥靈場。薦享惟嚴。羽儀若舊。琳房浴殿。如清蹕之時巡。絳節珠旛。想丹輿之下降。幢幢御路。奕奕宮墻。或乘輶建節之賓。或觀藝探書之客。陟瑤壇而增肅。瞻玉座以長懷。蓋仁風之所被者深。故遺德之所加者遠。是宜播爲雅頌。告於神明。敢摛紫素之文。恭鏤茗華之玉。其辭曰。

天地之氣。宣以名山。陰陽之英。融爲溫泉。聖人用之。益壽延年。同出於道。同謂之玄。逝矣伊唐。蒸哉六葉。河圖帝籙。鴻勳大業。天敍天秩。祀事孔明。眞符屢接。雲蓋亭亭。芝房燈燿。歸功聖祖。過享清宮。周垣繚野。反宇凌空。孝思不匱。道德惟公。希夷有象。肸蠁宣通。數有推移。世分今昔。屹爾雲御。今上依然聖迹。藹藹修林。湯湯神液。備物莊嚴。百祥繁錫。至哉坎德。效此坤珍。配靈上藥。薦祉真人。冥升自遠。遺烈長新。思玄之老。頌德之臣。冥懷靡所用。勒貞珉。

洪州延慶寺碑銘

若夫名區勝境。眞靈之所徘徊。通都大邑。游居之所走望。故其府朝之制度。里閭之延袤。宮廟壇壇之肅。禋祀薦享之嚴。無不及焉。必可觀也。豫章古郡。通楚要津。萬靈所宗。百寶攸集。龍劍之氣。炳燿于列星。金

冶之精。騰光于峻岳。飛錦帷于仙館。植鐵柱于重陰。方志所傳。奇蹤可見。而故老復言。晉元帝卽位之歲。郡人有耕于東湖之良隅者。獲璃像焉。其高三尺。其狀殊異。守臣上啓。詔立寺以處之。歲紀迭更。薦奉無絕。至唐大和三年。文宗皇帝以夢寐通感。特詔修崇。有僧普願者。率勵衆力。創造飛閣。極高明之制。盡臨觀之室。瞻仰之徒。勝賞仍在。會昌沙汰。旋更殄夷。時有寺主僧神確。供奉瑞容。瘞于堂下。大中改制。將復修完。像堙沈求。不可得。而靈迹所在。羣心未忘。咸通二年。連帥嚴譔。表請重建。因紀誕聖之節。署爲延慶之寺。子來之力。雲今上如初。廣明中。巢寇亂常。羣盜蜂起。三災所及。寺復焚如。光啓二年。廉使王師節。卽其故基。又加營繕。自時厥後。百載于茲。市朝屢更。興廢不及。名人上士。增飾相因。國家奄有寰區。普恢教法。人識修心之旨。家懷祈福之誠。此邦之人。素多尙信。千里之地。頻致豐穰。戶有餘貲。居多暇日。監寺僧智清。勤行其道。時省其庸。推誠以化人。節用以成務。峻其卑庫。緝其傾頽。改作正殿及廊廡。共七間。疎櫺廣廈。雕甍藻梲。瑣窗洞戶。珠網金鋪。蹇產鴻紛。深沈煥爛。闕政備矣。能事畢矣。觀其康莊旁達。閭伍綺分。西則崇山隱天。煙霞韜映。乎其上。前則平湖彌望。魚鳥翔泳。乎其中。雖復觀雉接連。車馬迴合。蕭然人外。自遠世紛。信乎棲息之場。習靜之地也。僧契緣攝贊其事。不朽是圖。伐石爲碑。以文求我。銘曰。

至哉玄貺。邈矣坤珍。凝爲異像。以祐斯民。靈心所格。精舍攸因。其神或隱。其迹寧淪。廢興在運。啓煥由人。有美清師。勤行其道。彼都人士。服義承教。率是衆力。完斯廟貌。祕殿穹窿。層軒窈窕。勝事精嚴。丹誠至到。名山雄雄。大江溶溶。五侯之國。千里之封。靈場隱軫。道氣明融。神明所相。有感必通。刊名法宇。永播無窮。

此
页
空
白

徐騎省集卷第二十七

洪州西山翠巖廣化院故澄源禪師碑銘

大宋舒州龍門山乾明禪院碑銘

大宋故天雄軍節度行軍司馬易府君神道碑

故唐大理司直鄂州漢陽令贈衛尉少卿樊公神道碑

洪州豐城縣李司空廟碣文

洪州道正倪君碣

洪州西山翠巖廣化院故澄源禪師碑銘

聖人設教。賢者學之。有能極深研幾。剖疑析滯。不背本以矯激。不沿波而流宕。世人宗仰。時君褒異。斯可
以爲君子矣。禪師名無殷。姓吳氏。閩連江人也。昔秦伯獲讓。肇啓南藩。至德所及。流光百代。子孫蕃衍。吳
越爲多。至今爲著姓焉。累世隱德。鄉曲推重。道氣鍾粹。而生禪師。幼異常童。不染俗態。年七歲。從晉安雪
峯真覺禪師出家。二十詣開元寺受度。真覺之道。見重於時。禪師默識微言。盡得要旨。而復博考。往行幽
尋勝迹。江浙諸郡。靡不經遊。先達推稱。後生請益。結轍連袂。虛往實歸。禪師以道貴。沖用性復虛靜。所止
之處。學徒俯千人。輒復捨去。晚歲止廬陵之禾山。其名益彰。季唐先主召見之。特加禮遇。俾居廣陵之祥
光院。嗣君踐祚。優禮有加。賜號澄源禪師。命移處豫章之上藍。西山之翠巖院。是皆都邑之勝槩。高人之
游集。自非密行淳德。不能鎮服羣情。我迭居之。綽有餘裕。雖身在巖谷。而恩注帷辰。存省問遺。使者相望。
享壽七十有七。建隆元年春二月五日。終于翠巖院。甘露被樹。數日不晞。皓鶴盤空。三周而去。門弟子用

西域之禮。葬于院之巽隅。封于其上。恩旨褒飾。名其丘曰大醫。道俗孺慕。會其葬者萬數。絃也。趣捨異術。聲塵致暎。于時釋氏方盛。師門互啓。嘗侍嗣君宴語。從容上言曰。古稱千里一賢。猶比肩也。今講長老者十數。無乃多乎。嗣君深以爲然。因曰。惟澄源禪師。其殆庶矣。無幾何。以家門情禮。請告至山。會師已沒。仰瞻遺像。參迹行事。乃信名不虛得。亦表君之知臣。今來京都。復與師弟子鑿琮相遇。琮師志性端慤。修習精勤。肅奉成規。博綜衆藝。慈惠救物。時人稱之。明詔賜號。慧覺大師。錫以紫服。朝恩浹于累世。實教門之榮觀也。于時禪師委順三十年矣。琮也。思廣銘頌。庶永遺風。以鉉嘗學舊史。見求直筆。若夫褒善稱伐。翰墨攸先。載瞻西山。實寄松槽。敢抽祕思。以告九原。銘曰。

芄芄東越。武夷之區。時生異人。與古爲徒。禪師出焉。俊邁且都。顯顯南楚。西山作鎮。真靈所宅。教法斯振。禪師居之。允矣令問。道無不在。法非可名。理超言象。俗仰風聲。豐碑載勒。勝氣長生。猗嗟來者。用此爲程。

大宋舒州龍門山乾明禪院碑銘并序

山岳極天。莫雄于濛霍。川瀆紀地。莫靈于江淮。盤薄縈帶。中畫郡國。幅員數千里。舒院居其陽。真聖之所躡次。景福之所興作。必有高士。來闢妙門。以導精粹之氣。以恢淳和之俗。則龍門山乾明禪院。所以建也。是山東去郡九十里。蓋濛岳之一峯。山有龍井。郡人雩禱之所。靈應昭哲。因以名焉。深巖洞岫。風雲之所畜泄。湧泉清池。瑤碧之所隱見。涼颼爽氣。五月可以披裘。修竹茂林。四時未嘗易葉。游方之士。至輒忘歸。有曉遵禪師者。家本宜春。幼捐俗累。從師訪道。歷抵湘沅。探幽洞微。得聖人之宗旨。清心鍊行。踵前作之風聲。向道之徒。靡不宗仰。乾德五載。始來此山。顧瞻林泉。有懷棲息。邑人宋仁瑗。輟其隴畝。以奉宴居。面

壑臨流。誅茅穿徑。遠擬關令草樓之觀。近同焦光蝸牛之廬。歲計有餘。善言來應。廬江人侯霸。大施資賄。以奉經營。數年之間。蔚然崇今上。複廟重屋。瑣牕洞戶。藻以丹雘。駢以璧璫。所以重威神也。饗堂講肄。疎櫺高坐。皓壁月皎。層軒霞舒。所以敷道義也。前則端闈瞰野。旁則修廊納陸。廚廩充牣。居室閑安。闕經籍。于巖房。息徒侶于奧寢。棟宇延袤。凡二百區。蓋精誠之所憑。實邑里之勝槩也。

今上嗣統。像法大興。禪師徒步神京。對揚雲陛。恩旨嘉賞。賜號曰乾明禪院。華題鳳篆。降自慶霄。聖日天光。煥乎幽谷。夫道之行也。時與地并。斯郡山水奇絕。動植茂遂。民情淳朴。聖迹迴環。非明主至仁。不能恢清淨之教。非禪師密行。不能化畏壘之人。示之以精修。佑之以馘穀。變魯至道。夫何遠哉。茲頃歲謫居此地。思過三載。閭里之見待也厚。風物之愜志也深。冥得喪之懷。無憔悴之色。及今三紀。未嘗忘諸。會禪師狀肇興之由。圖不朽之作。受簡秉筆。欣然紀焉。銘曰。

教必有象。待時而行。道無不在。因地而靈。瀟岳穹崇。皖川清冷。鬱鬱佳氣。宜爲福庭。有美遵師。爲人由己。人應物感。風行良止。闢此叢薄。化爲金地。雲今上。中開靈光四起。君恩啓煥。眞聖回翔。劉雷永遠。接軫齊芳。玄符靡測。福應無方。刊茲樂石。用配無疆。

大宋故天雄軍節度行軍司馬易府君神道碑并序

府君諱文贇。字廣美。豫章高安人也。在昔有晉春陵令雄。位不充量。忠以亡身。祚流子孫。繁衍荆楚。其世祿種德。則故老家牒詳焉。曾祖暇。祖崇。皆不仕。妣鄒氏。追封范陽縣太君。從子貴也。君符彩爽邁。質性深沈。少遭時亂。靜守家法。剛而無犯。勇而有節。鄉曲之譽。藹然于時。吳有功臣。劉公信。節制豫章。訓兵選士。

聞君名而召之。君謂所親。大丈夫當立功立事。以大家門。吾聞劉公剛毅倜儻。有英雄之量。必能申吾用也。乃杖策從之。甚見器重。委以禦侮。授之親兵。出爲爪牙。入參侍直。外捍封略。中清寇攘。十年之間。遂升右職。劉公物故。唐室中興。君于是策名周行。入典離衛。于時戎事俯定。國容載穆。君止于拊循士衆。恭守官常。時其寒燠。均其勞逸。勤愷微道。廉察何留。不矜出位之思。甚得爲將之體。自宣威軍裨將。累遷至左。右天威軍都虞候。自檢校右常侍。至檢校太保。及淮甸俶擾。都邑震驚。以君爲雄州刺史。充建武軍使。其理所。卽廣陵之天長縣也。據衝要之地。有士民之衆。綏懷訓練。其俗用和。會周世宗親搃六師。志平江右。于是濠泗攜叛。揚楚摧陷。君城小援絕。堅守累旬。世宗使降將郭廷謂。臨城招諭。君曰。棄命以苟生。不義勦民以全名。不仁。吾處中道而已。乃閒道表于本朝。備陳形勢。且論遠慮。還旨嘉納。諭以割地之謀。君卽開城請罪。世宗慰勞數四。錫賚加等。卽授衡州刺史。封太原縣子。充天雄軍節度行軍司馬。皇宋啓運。優獎有加。改道州刺史。進爵爲侯。君以俯絳老之年。有卻克之疾。表求致仕。優詔不許。勲懇固請。聽歸臨淮郡私第。春秋七十有五。開寶元年秋七月。考終命。三年九月。葬于盱眙縣義和鄉西嵩里北團山。禮也。夫人會稽縣君謝氏。亦江左之冠族。作合君子。克昭令儀。箴管之勤。夙彰于婦德。湯沐之邑。晚從于夫貴。訓導諸子。備全義方。鍾蓬首之痛。哀而知禮。受高堂之養。嚴而有慈。春秋七十有六。太平興國二年七月。終于臨淮私第。某年月日合祔焉。禮也。有子五人。曰延貴。延祚。延壽。延義。並克荷先業。勤修令名。或參藩郡。或幹內職。皆先夫人而沒。唯第四子延慶。獨稟粹和。服膺儒教。孝悌之至。稱于州閭。承顏先意。俸曾閔之行。居喪過哀。有二連之風。廬墓絕漿。義感生植。嘉木連理。玉芝成叢。遠近聞之。莫不驚嘆。由是自前臨淮。

令拜大理丞。及夫人卜葬。違制臨赴。爲有司所劾。有詔勿問。聽解秩家居。惟府君之生也。臨戎以恩信。理民以慈惠。事君全其節。處身由其道。故垂此家法。推爲慶門。是生孝子。以永世祀。美矣哉。茲聞風而悅之。故勒于神道。其辭曰。

於惟易氏。忠義之門。德厚流光。顯于後昆。後昆之賢。生我府君。體道自居。壯圖不羣。輟耕永嘆。負羽從軍。赳赳和門。勇爵斯設。靜則嚴重。動則奮發。臨難忘私。處危全節。名遂身泰。考終無闕。芄芄泗川。永闕佳城。哀哀孝子。載感坤靈。君恩賁寵。樂石刊銘。百代之下。常流淑聲。

故唐大理司直鄂州漢陽令贈衛尉少卿樊公神道碑

公諱潛。字仲明。京兆萬年人也。昔者虞仲垂孫。謀之慶肇。啓我封山。甫昭補職之勤。實大吾族。或則游聖門。而稱達者。或則冠仙籍。而號真人。豐沛功臣。經營于大業。南陽外戚。佐佑于中興。傳祀百世。流光萬國。而我之占籍。世茂西京。樊川之居。抗衡韋杜。曾祖澄。以七世同爨。孝德升聞。大中制恩。特加旌表。峨峨石闕。至今存焉。祖僞。濮州司戶參軍。考諭。光化中。補池州至德令。時天下已亂。因家池陽。終潤州金壇令。公中和稟粹。形器夙成。好學之勤。本由天賦。至孝之性。不墜家聲。始及弱冠。併違怙恃。絕漿泣血。哀感州閭。負土成墳。終喪廬墓。言子道者。以爲美談。于時唐祚淪胥。宗室稱制。江淮之地。不失舊章。公以射策高等。補潤州丹陽尉。試吏之課。書考爲優。廬陵之民。古稱多訟。加以畝籍違制。亂獄滋豐。守臣上言。求拯其弊。有命擇堪其事者。聞公之能。因而命之。公既至。乃相五土之沃瘠。察夫家之衆寡。采古之制。酌今之宜。創爲新規。衆皆悅服。而復出械繫之者。窮兩造之辭。雪當死者數十人。使還議賞。增秩進等。遷壽州壽春縣。

主簿。既而廬陵之政日理。南楚之人。聳觀久之。以公爲光州光山縣令。加大理評事。猶以前効也。于時南北分裂。縣臨敵境。有爭桑之女。多探丸之吏。比閭之衆。罕嘗寧居。公于是糾集義勇。分守要害。推以恩信。濟之彊民。三載之中。一邑用乂。遷池州石埭令。縣有大姓。侵撓細民。歲比不登。俗乃重困。公繩之以法。董之以威。豪右震悚。相與逃匿。于是啓請出官粟以賑乏絕。省力役以濟農功。慈撫仁薰。視之如子。歲豐俗阜。政用大成。就加大理司直。旌能政也。秩滿。遷鄂州漢陽令。未幾遇疾。壬子歲某月日。終于縣之正寢。享年五十有七。以丙辰歲某月日。葬于池州貴池縣永泰鄉保靜里之原。禮也。夫人王氏。鴻臚卿滔之女。軒冕之族。閨房之秀。室家垂訓。惠問風行。長子若訥。不事王侯。自全高尚。次子知古。才藝畢給。際會昌期。踐歷臺省。交修繁劇。今爲右諫議大夫。河北轉運使。揚名之業方茂。顯親之數遂優。公累贈祕書丞。戶部員外郎。衛尉少卿。夫人封琅琊縣太君。惟公生而岐嶷。長而學問。窮九經之奧旨。綜百代之微言。率是古道。施於爲政。行之以直。守之以廉。事親以孝。飾躬以禮。士元之器。命屈于生前。臧孫之忠。慶貽于身後。君恩飾壤。世祿傳家。咸京之舊表未堙。秋浦之豐碑復立。俗有遺愛。吾無媿辭。其銘曰。

南山崇崇。樊川溶溶。翦商之烈。補袞之功。百代之後。流光不窮。爰有孝德。克生我公。猗歟我公。顯允君子。投此利刃。行于百里。有惠于民。何必貴仕。垂慶于後。何必在己。慶霄之澤。白葉流根。歿垂中佃。生駕魚軒。二子殊志。俱大吾門。優優愚谷。英英諫垣。九峯之下。貴池之口。覆斧馬鬣。金雞玉狗。民卽桐鄉。碑如峴首。江水長流。令名同久。

洪州豐城縣李司空廟碑文

先王之制。以勞定國。以死勤事。皆得祀之。然則非通幽洞靈之士。有驚愚顯俗之迹。亦不能臻此也。李君諱承鼎。字大用。其先隴西人。中葉因官。遂家上黨。先君諱神福。避亂擇主。來適維揚。于時唐室崩離。諸侯角逐。吳武王奮桓文之舉。我先君効闕張之用。摧兇略地。所向無前。功加于時。慶鍾于後。終淮南節度副使。鄂岳招討使。君卽招討長子也。幼而爽俊。長而雄勇。年始志學。卽從義旗。善撫士卒。生知韜略。厲若鷹。作疾如風。電時稱虎子。敵畏馬兒。以功累檢校左僕射。爲橫衝裨將。天祐丙寅歲。從招討使秦裴。平豫章。敍功爲最新附之地。屬郡未賓。明年命君領偏師。平餘盜。戈船先進。卒帥後期。山越霧集。漢矢且盡。同玄冥之沒。若桂幾之沈。享年二十有三。諸將嗣事。逋穢克清。迎君之喪。窆于洪州豐城縣揚子洲。惟君夙齡挺秀。盡忠死節。識與不識。雜然推奇。而英靈胎鑿。若在左右。如鄭人之驚伯有。類吳俗之畏子文。于是蒼艾相率。啓求立祠于墓側。公議僉允。因贈司空。水旱禱祈。無不卽應。鄉邑之際。頻歲豐穰。湍瀨無虞。疾癘不作。而君之家門。亦康寧蕃衍焉。及今七十年矣。雖神道恍惚。不可備論。而忠誠報應。良足爲勸。猶恐年世綿邈。流俗失傳。或見揉于越巫。將受譏于淫祀。嫡孫仁昭。願以事實。勒于貞珉。鉉素與君諸子游。復連姻戚。披文相質。所不獲辭。初君之長弟諱承鼎。爲吳王之愛培。故人咸謂君爲伯氏。而忘其官稱焉。今用明白之銘曰。

嗚呼李君。勇且有仁。生殉國難。沒爲明神。南楚之郊。章江之濱。祠堂奕奕。像設僣僣。薦信以時。降祐于民。龍泉太阿。校靈比珍。衝斗之氣。終天不渝。

洪州道正倪君碣

君諱少通。字子明。其先千乘人也。末葉避地。徙居巴陵。濯洞庭之餘波。襲九嶷之秀氣。儒風繼世。貞節自持。垂慶炳靈。仙才是出。君風骨秀整。襟懷坦夷。幼挺高情。卽依道樵。弱冠遐舉。來遊九江。悅廬阜之名區。得董君之故靜。種杏之地。榛莽森如。慨然永懷。誓復靈御。今上誅茅築室。練行修身。闔然而章。千里斯應。于時唐蓮告謝。宗室代興。江左被玄元之風。二葉恢清淨之教。君以清心苦節。升聞于朝。癸丑歲。賜錢三百萬。卽所居建太乙之觀。于是疏鑿舊址。草創新規。悅以子來。戒之勿亟。十有餘歲。清宮煥然。凡建四殿。五堂。重門兩序。內外棟宇。總百三十區。像設儀衛。莫不稱是。力闢汙萊。爲良田者五百畝。而節費之費有餘。手植杉松。成茂林者千餘根。而甘露之祥再降。由是牧守嘉尚。道俗依憑。爲本州道正。仍知太乙觀事。享壽九十有一。體力康莊。淳化元年。秋八月八日子時。怡然而化。容貌如生。初君自擇葬地于蓮花峯下。卽以二年春正月。窆焉。君性質沖淡。不耀其光。表率教門。正身而已。喜賦詠。善鼓琴。龍鳳之形。皆由手製。山水之操。自洽天和。所居之觀。俯邇城郭。登山之客。必先造焉。君將迎接待。高卑如一。絕迹朝市。成樂林泉。六十餘年。慎終如始。門人弟子。先以慈孝爲訓。有若李延照。蔣守龍等。近四十餘人。皆以孝行爲時所稱。親弟德規。同學弟謝又能等。叶力同心。其復靈迹。並先早世。今謝君弟子王省昂。嗣膺道任。師孫錢知素。繼知太乙觀事。師門之盛。論者美之。茲頃歲扈從南巡。與師款接旬日。傾蓋之分。有如素交。錢君以論議見求。不當爲讓。其銘曰。

太乙董君。上帝之賓。遺方眇邈。奮迹荆榛。倪師慷慨。復來清塵。種杏之地。林光再新。異世神交。豈其後身。冥升自遠。代劍非淪。瞻言華表。誰見千春。刊銘翠琰。道契攸親。

徐騎省集卷第二十八

泗州重修文宣王廟記

邢州紫極宮老君殿記

洪州華山胡氏書堂記

江州新建尚書白公祠堂記

洪州始豐山興玄觀記

金陵寂樂塔院故玄寂禪師影堂記

撫州永安禪院記

潤州甘露寺新建舍利塔記

重建宓子賤碑陰記

邠州定平縣傳燈禪院記

泗州重修文宣王廟記

昔我先聖有周公之才。無文王之時。故憲章其道。以垂萬世。精神冥契。夕則夢之。是知千載旦暮。蓋其道同也。自時以降。鴻儒碩生。敷暢微言。佐佑大化。專一之志。通于神明。咸夢宣尼。以著名實。斯文閔作。來者不誣。國家彰灼神功。在宥天下。禮樂刑政。舉百王之中。典謨訓誥。用三代之式。文學之士。靡然向風。臨淮徐君。名某。字某。弱而好學。壯而有立。行敦乎族黨。名聞于州閭。修辭立誠。躬儒者之業。博施濟衆。秉義士之規。隨計春官。再不中選。會長子宗孟。郡亦舉秀才。君以爲名不可多取。卽欲退而求志。無何夢游淮上。條有淪胥之厄。衆君子拯之。而置于宣聖之堂。儼然逢掖之容。若奉緇帷之會。寤而神聳。益用兢懷。聞者奇之。勉以西上。明年春。冕旒臨御。親校羣才。崇朝之間。父子俱捷。蓋古今未之有也。君歎曰。天子廣孤平之路。杜請謁之門。先聖知之。是有敦勉。斯實至德感兆。鄙何有焉。思欲昭答靈心。丕顯玄貺。

惟茲泗上。雄視百城。學校之制。我不在後。王業伊始。天下初平。舟車輻湊之都。郵傳旁午之地。邦君承掾。日不暇給。弦誦之所。窺戶闐然。君白于公府。願補闕政。于是出家積鳩。鳩國工。卽舊謀新。瞻星揆日。乃建路寢。乃立應門。闢講論之堂。設東西之序。廣袤合度。奢儉中規。像設增嚴。繪素加煥。凡祭器制度。皆闔于垣。墉俾夫觀藝之徒。橫經之侶。居今識古。虛往實歸。三代之風。由斯而致也。錄事參軍張君濬。綱紀之任。夙夜惟寅。嘗與同僚。及斯而嘆曰。振舉廢闕。公力未遑。當屬于好事君子。非徐君不能也。及茲締今上御名。如宿契焉。是知善人之言。罔弗響答。夫聖人之教也。與天地常在。將陰陽並運。恍惚玄應。昧者不知。今徐君服之。而成大名。感之而臻介福。咨爾後學。可不勉歟。金石之銘。其無愧已。于時歲次乙酉。雍熙二年秋七月記。

邢州紫極宮老君殿記

昔者老君伯陽。憫大道之既隱。傷周室之既微。以爲清淨無爲。道之本也。非建言不能盡其意。安上治民。道之用也。非設教不能永其成。乃著書于函關。以明清心之要。授禮于仲尼。以開垂世之統。由是教義之被于民。如造化之漸于物。賢者識其大。不賢者識其小。出入戰國。經歷薄俗。君君臣臣。父子民到。于今受其賜。則二聖人是賴焉。故並享明祀。格于寓縣。雖百世不能易也。邢州紫極宮者。唐開元中所立。老君像。則琢玉石以爲之。眞靈所憑。功用殊絕。眸容奇表。儼然若存。瞻仰之徒。莫不增肅。王室剝亂。郡國崩離。三晉之郊。戎馬孔棘。崇堂墮落。乃移像于北極殿之西偏。數十年間。不絕如線。皇宋膺運。百度惟貞。道風載揚。眞侶咸萃。女道士陳體元。江左右族。夙挺玄符。不從象服之華。自結鳳羅之誓。勤行匪懈。眞氣日

滋乙亥歲伯氏從宦將之俱至畏壘知化汗漫與期郡守賢之授以宮任亦旣蒞止慨然永懷嗟崇今上名之傾頽嘆尊位之蹂雜程工度費卽舊謀新知州事段公思恭仙派分源諫垣舊德嘉其偉志助以俸金郡僚而下歎然風靡卽宮之西序建老君殿三間材用必良工藝必精廣袤中規奢儉合度旭景升而丹彩煥清風襲而爽氣生肅然仙都復覩靈境粵某年月奉玉像而處焉霓衣致虔羽蓋成列几筵嚴肅香燭必芬鐘磬咸和煙雲改色非至誠感召孰能臻此者乎鍊師之家奕葉從公清白垂訓仲兄前鹿邑令省躬秉直忤俗退而居貞季兄邢州書記長參學古入官和以接物積善之報宜生仙才鉉知二君歲久故美其事而紀于石某年十二月二日記

洪州華山胡氏書堂記

士君子承積善之慶服聖人之道治身修心義之本也風行于家德之充也教被于俗人之周也疇克具舉吾其與之豫章屬邑世雲舊里山水特秀英靈所躔安定胡君籍于是君名仲堯字光輔奕葉儒學蟬聯簪紱曾門標舉煥列宿之華祖德韜映戢少微之耀至于我先人少好左氏春秋之學研幾索隱儒者宗焉及君之長克揚其業言斯出矣身則踐之揖讓周旋之儀孝友姻睦之行修乎閨門之內形于羣從之間少長有禮總麻同爨鄉黨率義人無間然君以爲上古之風可以馴致由六經之旨可以成化也乃卽別墅華林山陽玄秀峯下今上御名書堂焉築室百區聚書五千卷子弟及遠方之士肄學者常數十人歲時討論講席無絕又以爲學者常存神閑曠之地游目清虛之境然後粹和內充道德來應于是列植松竹閒以葩華涌泉清池環流于其閒虛亭菌閣鼎峙于其上處者無斃游者忘歸蘭亭石室不能加也又

案圖牒云昔陶正公李八百皆修道于此。是知人境相得。其道乃光。勤而行之。古猶今也。鉉欽羨其事。道阻且躋。故述斯文。以垂不朽。年月日記。

洪州新建尚書白公詞堂記

大丈夫處厚居實。據德依仁。豈徒潔身。將以濟世。故著于事業。發于文詞。而後功績宣焉。聲名立焉。蓋有其實者。必有其名。是以君子恥沒世而名不聞也。若乃格于穹壤。漸于蠻夷。大則藏于金匱石室之書。細則誦于婦女稚孺之口。則古今已來。彰灼悠久。未有如白樂天者。不其異乎。故神明相之。攸居不傾。黎毗懷之。餘風不泯。士大夫神交道親。若且暮焉。尋陽古郡。昔公謫宦之所。綿祀二百。市朝屢變。而司馬聽事之室。歸然獨存。斯益異矣。聖運光啓。崇古尚文。三代之風。傳遠萬里。禮部郎中。江南轉運使張去華。述職按部。聿來是邦。弭節城闔。攝齊堂奧。以爲先賢所舍。邑里具瞻。與夫元規之樓。惠遠之社。崇飾祇薦。我何後焉。太子中允。知州事梁君翊善。大夫通判州事羅君彧。皆叶規同心。相視莫逆。政有餘裕。府多羨財。卽舊謀新。創爲祠宇。傳寫廬山之遺像。寘于北墉。棟宇深嚴。門序奧祕。肅然廟貌。想見其人。凡游居之徒。仰高山。聆遺韻。薦誠觀藝。結轍于斯。禮不云乎。禱祠古之卿士。有益于人者。觀樂天之文。主諷刺。垂教化。窮理本。達物情。後之學者。服膺研精。則去聖何遠。其爲益也。不亦多乎。尸而祝之。固其宜矣。某昔游廬岳。獲拜儀形。今塵騎省。遙聞繙今上御名。喜儒宗之不墜。嘉使者之得人。故作斯文。勒于貞石。年月某記。

洪州始豐山興玄觀記

聖人之言道無不在。若乃域中歸其大。萬物恃之生。鴻化玄造。無德而稱己。至于顯神道之教。挺方外之

朝反之于身。以固其本。清心鍊氣。保精齋神。餐霞茹芝。修用者殊軌。御風乘景。游集者無方。蓋眞階仙品之有差。故洞天福地而區別。奇篇所紀。靈境可尋。豫章始豐山者。案圖牒。第三十七之福地也。爾其穹窿蹇產。干霄蔽日。凌空瞰野之勢。嶽峯窈窕。蒸雲泄雨。儲神宅怪之奇。陰林脩幹。材用之所生也。周飛湍激。流利澤之所及者。遠紫煙白霧。隱映而紛霏。靈風爽氣。蕭寥而披靡。離亭之數。歷代相因。爰有興玄之觀。是爲薦誠之地。土德云季。三災迭興。市朝貿遷。堂今上墮頓。幾歎遼城之鶴。常棲楚幕之鳥。若夫眞氣所憑。神靈攸相。物無終否。道不遠人。道士聶紫庭。襲玉笏之地。英追九仙之夙契。以勤行爲志業。以於古爲師資。歲在玄枵。來游此觀。顧瞻祠宇。慷慨傷懷。徒侶敦請。遂膺其任。積行所應。至誠易通。游居之人。莫不信奉。以爲興作者。古人之所慎。因循者。前哲之所宗。足備制度。何必侈大。于是補其闕而葺其壞。窒其隙而扶其傾。雋瓴甃埴之工。加圻鎔丹牖之飾。瑣牕鏤檻。朱戶金鋪。深沉靡迤。虛明藻麗。百年舊制。一旦惟新。日就厥功。十稔而已。己不病于費。人不知其勞。用此修眞。眞其焉往。又以方志漏略。碑頌湮沉。使夫來者何所宗仰。謂余爲好道者。故求我以文。是用直書。以觀成績。淳化元年夏六月記。

金陵寂樂塔院故玄寂禪師影堂記

士有切問強記。以修其內。和光退節。以晦其外。而人自仰之。名自歸之。不知所以然而然。見之于玄寂禪師矣。師名澄玘。姓陳氏。番禺人。旣生而孤。天骨奇秀。岐嶷之態。有異常童。常端居靜念。如學道者。七歲復失所恃。母臨終。以託其姑曰。此兒幼有奇應。法當出家。倘果斯願。吾無恨矣。年十一歲。遂詣本郡從師。十七歲。韶州南華寺正度。于是造詣先達。請益質疑。歷游名山。無遠弗屆。不違類於顏子。起予同于卜商。丁

未歲來止舒州山谷寺。徧閱經論。師門之學。無所不通。然未嘗爲人言也。是時季唐二葉。像法大興。凡聚徒講學者。所在奉之。以爲長老。禪師狗狎鷗之志。慕爭席之風。雖衆人與居。而羣望自篤。道俗敦請。抗志不從。郡守周公。因人之心。封章上啓。嗣君嘉賞。以詔書命之。周公延至郡齋。親爲致禮。師不得已。乃攝齊卽坐。音詞宣朗。寮吏屬目。士庶咸歡。還處精廬。宴居如故。丁巳歲。避難南渡。止于廬山。嗣君召致建康。累徵乃至。迭處名寺。咸敷講席。恩禮優渥。賜號玄寂禪師。時之名流。無不景仰。至於誘進後學。開導真詮。激厲憤悱。皆得所欲。乾德五年冬十一月。終于建康龍光禪院。春秋六十有一。後主遣中使護葬。贈送甚優。葬于都城東南隅鳳臺鄉。門人弟子。廬于墓次。誅茅今上宇。遂成道場。儼設靈儀。式觀遺愛。鉉頃自禁掖。放逐舒庸。閉關卻掃。不豫人事。時游潛岳。因獲今上容貌閑暇。議論平淡。言意相得。有若舊交。雖暫方外之期。自叶忘形之契。一生一死。已隔于當年。谷變陵遷。復悲于陳迹。弟子嗣昭等。永懷遺範。願勒貞珉。因述斯文。庶申夙分。年月日記。

撫州永安禪院記

教之大者。其行遠。澤之博者。其報豐。自三代已還。百家並鶩。炎靈之後。釋氏特隆。經法之盛。參乎先聖。祠宇之設。廣于虞庠。不知所以然而然。非言象所及已。撫州郡署之左。里而近。有禪院焉。乾符中。署曰寶國。天祐中。改名永安。方志失傳。莫知肇興之始。高人迭處。咸爲宴坐之場。夫經像之所居。苾馨之所薦。必將據郡國之形勝。襲川原之氣象。斯郡也。撫楚越之都。會斯院也。浸章汝之清流。逸少康樂。江左名士。而墨池經臺。介乎比閭。麻姑南真。丹臺上列。而仙壇閑館。峙乎封域。閑閤相望。鐘磬交音。神靈之所依憑。煙霞

之所韜映。爾其棟宇之狀也。則赫赫乎顯敞。耽耽乎深嚴。黼藻成文。磨礪盡妙。層樓對峙。修廊四通。列講肆于崇堂。安衆士于奧室。動有擊蒙之益。靜有寧體之娛。儲峙必豐。器用必給。四方學者。至輒如歸。考績程功。則住持禪師義韜之力也。韜公道學精詣。慧心朗悟。以濟衆爲務。以興教爲懷。少游名都。歷訪先達。晚棲臨汝。自闢師門。甲申歲。詣京華。謁衣請見。對揚玉辰。躬奉天言。論難所及。辭義響答。恩嘉闕。賜以紫衣。登門之徒。莫不增肅。韜公以斯院制度崇麗。修奉精嚴。金石闕如。何以示後。惠然見顧。求我以文辭讓不獲。因爲之記。年月日記。

潤州甘露寺新建舍利塔記

維皇宋二葉。改元五祀。潤州丹徒縣令王紀。改築縣墻。掘地得石函。驗其刻文。梁大同五年。道人法序。瘞真身舍利于此。函中銅龕一。龕中銀合一。合中銀瓶二。舍利七粒存焉。而銅龕復有刻文。則唐貞觀十二年。再加營奉。掌役者張遇。獲之以獻。遇也。感貞應之在己。念妙道之可修。因投郡之慈雲寺。削髮爲沙門。易名閏。精心苦行。誓復前迹。廣募衆施。疇咨協心。數年之間。克果其願。卽以端拱元年。夏四月八日。遷致于郡之甘露寺東隅。建浮屠焉。獻狀而來。求志其績。粵

聖人在上。欽若靈心。政無不修。神靡不舉。玄貺交感。坤元效珍。用能使幽瘞之質。煥然景彰。鷲崩之迹。蔚然雲今上。然則澤及微隱。福被含生。其可知也。是郡也。揚州之都。會京口之重鎮。六代之風流人物。綜萃於斯。三吳之山川林泉。肇發于此。高深自改。氣象常存。是寺也。北固山之陰崖。贊皇公之遺迹。崢嶸飛閣。

迴闕滄江。邈迤巖房。周行數里。口植之作。遠邇雲臻。真師因人之心。相地之勝。獲此空隙。建茲崇封。材用

工役必求善良。規模制度。必據經法。其高七十尺。其周二十步。八隅瑩玉。五蓋凌霄。冠星珠于觚稜。海日先照。圖雲氣于焚燎。宿霧常棲。中嚴睟容。肅然月滿。旁績靈變。煥若霞舒。游居之徒。莫不稱歎。愚嘗見釋氏子。爲此役者多矣。如真師者。其涉道也高。其居處也卑。上無許史之託。下無猗陶之助。苦節以感物。績微而著功。不愆民。不愆素。而能事以立。亦可尙也。故嘉而志之。端拱二年二月一日記。

重建宓子賤碑陰記

單父縣宓子賤舊碑。賈至文。梁耿書。天寶十年四月四日。柳載建。始致于故縣北隅琴堂之上。光化二年。以縣爲郡署。縣令李知傑。移理於今所。碑亦隨徙。措置不謹。風雨所摧。因折爲數段。扶置垣墻之間。及今八十年矣。皇宋膺運。書軌大同。人文化成。清靜爲理。縣令毛君名庶幾。越自江左。來撫斯民。見賢思齊。好古博雅。以爲宓子之化。人猶不忘。賈君之文。世共稱賞。若棄之而不修。非所以訓民事神也。于是再建隆碣。重書舊詞。以鉉營學篆籀。見求運筆。梁氏之迹。本自非工。仍爲倒薤之勢。非八書之正也。而又字體譌俗。文詞舛誤。今以賈氏集按而正之。遠擬秦李斯。改爲玉箸。立于宓君之祠庭。事之宜也。以改作之意。附于碑陰云。太平興國五年正月二十日記。

邠州定平縣傳燈禪院記

乾維巨屏。實曰邠郊。其地險固。其氣剛勁。被宗周信厚之澤。詠王業艱難之風。是故人知徼福之方。俗嚴慈氏之教。精廬靜宇。隱嶙相望。定平縣傳燈禪院者。帶位署之左方。據郭邑之勝勢。□□環其址。湮水盪其胸。卻倚崇岡。爰標龍尾之號。上瀉寒澗。仍有天河之稱。藹爾鮮原。鬱然佳氣。昔居唐室之季。四海崩離。

中和四年。有禪師從一者。挺秀宗門。從師臨海。避難高舉。擇地遐征。萬里而來。稅駕於此。相其爽塏。有志盤桓。羣心翕然。助成其事。買地築室者咸集。橫經跪履者亦臻。十年之間。百堵斯建。守官嘉尚。請命于朝。景福二年。詔賜題署。天光所及。道譽彌高。一公化去。弟子佐範。克嗣其業。範之弟子。知信。復繼其任。守之以恪。加之以勤。感召益多。法事增廣。殿堂像設。靡不莊嚴。儲峙器用。無乏供億。而經典猶闕。講誦弗聞。以爲居今識古者。存乎書。觀象得意者。存乎言。金匱石室之宏規。名山京師之故事。此而不務。何以爲能。乾德四年秋。肇啓精誠。指期繕寫。邑人石遷等。聞風而悅。叶比其謀。日就月將。惟力是視。卷以緹帙。貯之琅函。邑人高玘。奉其家山。以備御今上室。采伐之備。夫役未充。俄而暴雨猥至。山溜奔激。屹然巨石。自至院前。取以給用。宛契心匠。雖廬岳神運之殿。石頭後渚之梁。感通冥符。無以過也。旣而信公復沒。以屬弟子。令熙熙也。遵行弗敢失墜。而民非兆萬。俗空猗陶。漸以化之。靜以俟之。二十餘年。猶未訖事。會中使王君名素。分權筦之職。督關梁之征。歸餘于終。率籲衆力。于是簡牘几閣。卽日僱工。俾下帷鑿壁者。得肆其勤。研精索隱者。不愆其義。眞風無泯。介福來臻。繫高士四世之勤。垂本宗百代之憲。宜其篆刻金石。永示方來。知余有好善之心。專舊史之學。求我是用。直書于時。歲次壬辰。淳化三年春三月記。

此
页
空
白

徐騎省集卷第二十九

大宋左千牛衛上將軍追封吳王隴西公墓誌銘

大宋右千牛衛上將軍隴西郡公李公墓誌銘

大宋故尙書戶部郎中王君墓誌銘

大宋故陳留縣主簿贈太子中允李府君墓誌銘

大宋左千牛衛上將軍追封吳王隴西公墓誌銘并序

大宋故處士贈太子少師李公墓誌銘
大宋故尙書兵部員外郎江君墓誌銘

盛德百世善繼者所以主其祀。聖人無外善守者不能固其存。蓋運歷之所推亦古今之一貫。其有享蕃錫之寵保克終之美殊恩飾壤懿範流光傳之金石斯不誣矣。王諱煜字重光隴西人也。昔庭堅贊九德伯陽恢至道皇天眷祐錫祚于唐祖文宗武世有顯德載祀三百龜玉淪胥宗子維城蕃衍萬國江淮之地獨奉長安故我顯祖用膺推戴瀄耀之烈載光舊吳二世承基克廣其業皇宋將啓玄貺冥符有周開先太廟歷試威德所及寰宇將同故我舊邦祇畏天命貶大號以稟剝獻地圖而請吏故得義動元后風行域中恩禮有加綏懷不世魯用天王之禮自越常鈞鄩存紀侯之國曾何足貴王以世嫡嗣服以古道馭民欽若彛倫率循先志奉蒸嘗恭色養必以孝賓大臣事耆老必以禮居處服御必以節言動施舍必以時至於荷全濟之恩謹藩國之度勤修九貢府無虛月祇奉百役知無不爲十五年閒天眷彌渥然而果於自信怠於周防西隣起釁南箕今上禍投杵致慈親之惑乞火無里婦之辭始勞因壘之師終後塗

山之會。太祖至仁之舉。大賚爲懷。錄勤王之前效。恢焚謗之廣度。位以上將。爵爲通侯。待遇如初。寵錫斯厚。

今上宣猷大麓。敷惠萬方。每侍論思。常存開釋。及飛天在運。麗澤推恩。擢進上公之封。仍加掌武之秩。侍從親禮。勉諭優容。方將度越等彝。登崇名數。嗚呼。闕川無捨。景命不融。太平興國三年秋七月八日。遘疾薨於京師里之第。享年四十有二。

皇上撫几興悼。投瓜軫悲。痛生之不逮。俾歿而加飾。特詔輟朝三日。贈太師。追封吳王。命中使蒞葬。凡喪祭所須。皆從官給。卽其年冬十月日。葬于河南府某縣某鄉某里禮也。夫人鄭國夫人周氏。勳舊之族。是生邦媛。肅雍之美。流詠國風。才實女師。言成闔則。子左千牛衛大將軍某。襟神俊茂。識度淹通。孝悌自表。于天資才略。靡由于師訓。日出之學。未易可量。惟王天骨秀異。神氣清粹。言動有則。容止可觀。精究六經。旁綜百氏。常以爲周孔之道。不可暫離。經國化民。發號施令。造次于是。終始不渝。酷好文辭。多所述作。一游一豫。必頌宣尼。載笑載言。不忘經義。洞曉音律。精別雅鄭。窮先王制作之意。審風俗清薄之原。爲文論之。以續樂記。所著文集三十卷。雜說百篇。味其文。知其道矣。於弧矢之善。筆札之工。天縱多能。必造精絕。本以惻隱之性。仍好竺乾之教。草木不殺。禽魚咸遂。賞人之善。常若不及。掩人之過。唯恐其聞。以至法不勝姦。威不克愛。以厭兵之俗。當用武之世。孔明罕應變之略。不成近功。假王躬仁義之行。終于亡國。道有所在。復何媿歟。嗚呼哀哉。二室南峙。三川東注。瞻上陽之宮闕。望北邙之雲樹。旁寂寂兮迴野。下冥冥兮長暮。寄不朽於金石。庶有傳於竹素。其銘曰。

天鑒九德。錫我唐祚。綿綿瓜瓞。茫茫商土。裔孫有慶。舊物重覩。開國承家。疆吳跨楚。喪亂孔棘。我恤疇依。聖人既作。我知所歸。終日靡俟。先天不違。惟藩惟輔。永言固之。道或汗隆。時有險易。蠅止于棘。虎游于市。明明大君。寬仁以濟。嘉爾前哲。釋茲後至。亦覲亦見。乃侯乃公。沐浴玄澤。徊翔景風。如松之茂。如山之崇。奈何不淑。運極化窮。舊國疏封。新阡啓室。人諗之謀。卜云其吉。龍章驥德。蘭言玉質。邈爾何往。此焉終畢。儼青蓋兮。袞袞驅素虬兮。遲遲卽隧。路兮。徒返望君門兮。永辭庶九原之可作。與緱嶺兮。相期垂斯文于億載。將樂石兮無虧。

大宋右千牛衛上將軍隴西郡公李公墓誌銘

公諱從善。字子師。隴西成紀人。唐室之諸孫。元和之近屬。譜牒詳悉。此不具陳。若夫天祚之德。大運有時。而極積慶之祀。百世無得而踰。必生克肖之賢。以承有後之應。保姓受氏。公實宜之。昔者士德既微。羣雄角立。維我顯祖。奄宅舊吳。延祚四紀。傳國三世。公以天屬之愛。膺寶玉之封。始在膠庠。已有名望。姿儀秀出。文學生知。仁孝極于事君。謙抑形于下士。中外之論。翕然稱之。由是受任六官。交修庶職。彌綸舊典。諮訪老成。恪居無違。所至皆理。于時聖人出于中土。正朔及于四方。維我先君。祇畏天命。受盟請吏。息民弭兵。玉帛交馳。冠蓋相望。公親則介弟。位則中台。獨奉絲綸。留參槐棘。元戎駟牡。分建節之權。玄冕九章。奉侍祠之列。朝獎既厚。臣誠益恭。後凋之節。無渝萬頃之陂。自若。故得全名節於危疑之際。保恩顧于終始之間。環衛迭遷。寄任增重。盤根必解。師律以貞。十有餘年。其志如一。嗚呼。修塗方騁。景命不融。春秋四十有八。雍熙四年秋九月九日。薨于通許護軍之廨。詔輟朝一日。賻絹百匹。卽其年冬十月十三日。葬于開

封府開封縣吹臺鄉蘇里。耐太夫人凌氏之塋禮也。前夫人徐氏。繼室周氏。並早卒。皆有肅雍之德。窈窕之華。宦家治內。盡其規。魚軒象服。昭其盛。子十四人。仲顛。仲翊。仲衍。仲華。仲雅。仲隸。仲寧。仲簡。仲彬。仲文。仲猷。仲玄。仲義。仲端。女十四人。慕英。懿卿。奉蘋。蘊蘭。正容。茂節。穉仙。惠昭。如賓。道崇。鳳兆。幼貞。閨秀。季真。或嬪于盛族。或待禮未行。惟公生于深宮。特稟異氣。謙而得禮。和而執中。容納直言。賓延素士。經歷夷險。雅度不渝。大年未登。終古同歎。鉉登門斯久。辱顧殊深。永惟知己之恩。願表爲陵之谷。其銘曰。

眞源引派。仙李垂芳。實生我公。金玉其相。非禮勿動。出言有章。忠信以濟。終然允臧。三代之姓。修焉爲庶。九萬之程。溘然中路。吹臺北峙。浚川東注。不植刺草。長瞻宰樹。大雅君子。隴西公之墓。

大宋故處士贈太子少師李公墓誌銘 并序

道之泰也。賢人振衣而濟物。時之否也。君子括囊以獨善。其有修之家而孚教于俗。無其位而博施于人。角立傑出。蓋亦難矣。公諱某。字某某。庭堅邁德。百世流光。源長派遠。蕃衍郡國。今爲常山眞定人也。祖某。贈太子少保。考某。贈太子少傅。公卽少傅第三子也。幼而岐嶷。長而純孝。承顏先意。實稟生知。七歲丁太夫人憂。泣血絕漿。殆于毀滅。宗族驚異。謂之神童。事兄弟人。莫能閒。先是唐之叔世。燕趙多虞。故我先人累世貞遯。公亦奉家法。咸樂正園。躬稼敦本。儉以足用。百年之業。是享素封。旣而天下兵興。生民益否。公盡出私積。以均有無。爲食以救饑歉。微嗟來之誚。焚券以賙乏絕。非市義之求。遠邇之人。全濟甚衆。懷仁向義者。撫之旣無矜色。背惠棄信者。接之亦無愠容。襟懷曠然。莫窺其際。慈愛惻隱。視人如傷。昆蟲草木。無所天闕。故閭里率化。風俗以和。崇儒遵道。墳籍未嘗釋手。喜酒好客。醒醉必與之同。常以爲芳華易凋。光

陰不駐。發于吟詠。以寄其情。藜杖角巾。所至皆適。是非擾擾。若蚊虻之過前。愚智憧憧。若蜾蠃之在側。至矣哉。古之達者也。開運末。有晉失御。獫狁孔棘。公挈家南度。居于胙城。伯氏飛龍府君。時在滎陽。召公同處。廣順三年夏六月日。終于鄭州私第。享年四十有三。夫人清河郡太夫人張氏。以謝女之淑德。狗萊妻之高節。宜家理內。令問藹然。威姑性嚴。諸婦皆聳。夫人順而得禮。勤而無怨。晨夕參侍。獨被深慈。凡飲食藥餌。須經夫人之手。然後卽御。長奴亦頗嚴厲。夫人事之如姑。或被誚責。怡聲致拜。由是閨門之內。不肅而成。及罹恭姜之哀。更全孟母之訓。諸孤稍長。教以學文。爲之擇師友。爲之致經籍。凡學舍賓館之所。須者。輟衣食。捐簪珥。以奉之。躬截髮之惠。俾其親仁。引斷織之言。誠其中廢。故諸子皆立門戶。如初。越建隆二年秋七月十日。終于鄭州私第。享年四十有五。長子格。大理評事。次子至。吏部侍郎。兼秘書監。吏部以文學冠時。擢高第于聖鑒。以才業膺世。參大政于中樞。以疾告罷。復爲少宰。天子秘御書于中禁。命我專掌。式恢文教。時人榮之。先是少師之葬也。世猶多故。禮或有闕。及夫人祔也。塋地逼隘。介于羣塚之間。君子曰。非安神之宅也。卽以端拱元年冬十二月十三日。改卜于鄭州管城縣某鄉里。原禮也。鉉鄉里遼復。聲塵致賤。竭來京師。獲與吏部游處。視于公高門之盛。知臧孫有後之由。公之行實。皆聞于輿論。或得于家老。梗槩而已。不能備舉也。金石之紀。宜在鴻儒。惠然見顧。辭不獲命。謹爲銘曰。

天生賢人。以佑生民。生民數奇。賢人隱淪。修之于家。富以其隣。里閭率化。宗族歸仁。樂天知命。全和保真。鳳凰于飛。以況嘉耦。伯鸞之妻。士行之母。婉淑宜家。嚴慈啓後。金鈎鵲印。魚軒紫綬。令問無已。流光不朽。刻此貞珉。高深共久。

大宋故尙書戶部郎中王君墓誌銘

君諱克貞字守節其先太原人也。緱山之胄本固源長。淮水旣微。枝分派別。所居占籍。吳楚爲多。今爲廬陵人也。曾祖某不仕。祖某贈吉州別駕。考某屯田郎中。君弱不好弄。幼善屬文。風骨峻整。器度閒雅。年未及冠。名聞于時。自唐室之季。詞場道喪。江左延祚。復覩舊章。翰林學士江君文蔚典司春官。詳求藝實。取人至寡。較文尤精。君一舉擢第。首冠諸子。時人以爲追蹤元和之際矣。明年以祕書省正字釋褐。寓直樞近。專掌文翰之任。措詞典雅。敍事詳審。守位以慎。當官以勤。由是二十餘年。累遷至中書舍人。樞密副使。未嘗佗任。求之前載。亦爲異矣。及末葉多故。時政浸衰。唯吾守道中立。不涉浮議。及宗國淪喪。蒙名天朝。自太子中允。歷戶部兵部二員外郎。禮部戶部二郎中。典漢滑襄梓四州事。皆以寬簡爲務。仁愛推誠。當時之不名臣僕。長孺之擇任丞史。是故民以之睦。政以之修。端拱二年秋。自梓潼還至京。九月十八日。遭疾終于輿州之傳舍。享年六十。明年某月日。葬于揚州某縣鄉里禮也。夫人隴西縣君李氏。早亡無子女。一人。許適鹽鐵使諫議陳某。惟君有文雅之用。有周慎之誠。言行相顧。光塵不異。奉職無廢舉。在私無愆容。歷夷險而不回。保始終而無吝。初君始從鄉薦。余已典綸誥。謬爲先達。屢辱請益。及余消長在速。而君金石不渝。古人之風。于是在矣。已悲深谷。更閱逝川。發爲哀詞。誌彼泉戶。銘曰。

猗嗟夫君。心冥氣純。英英達士。嚶嚶詞臣。不愆于位。有惠于民。無悔無咎。不緇不磷。吉往凶歸。道悠運促。旋自九折。復于左轂。駟馬悲鳴。市人行哭。邈矣彼蒼。云何不淑。悠悠邗水。隱隱崑岡。慈親臨奠。令季持喪。旁羅宰樹。下闕玄堂。郊原掩靄。雲日冥茫。痛光塵兮永已。念蘭菊兮徒芳。

大宋故尙書兵部員外郎江君墓誌銘

君諱直木。字子建。尋陽人也。廬九之地。時生俊才。忠壯之族。世著南國。末葉堙替。與時汗隆。儒墨退讓。垂爲家法。曾祖弢。祖蟻。考隲。皆不仕。父夢孫。與先君同隱廬山。以經學大義自娛。伯父後膺宰府之辟。自求弦歌之任。報政罷去。復隱舊山。孝友貞清。鄉里推服。先妣李氏。方娠。夢神人授以直木一本。寤而生君。故取名焉。幼而穎悟。生知經義。七歲以神童擢第。未幾。丁先君憂。至性孺慕。宗族稱嘆。孜孜色養。無復宦情。學古屬文。惟日不足。爰及弱冠。遂以詞藝知名。其爲文。清澹簡約。自爲品格。尤長于古風詩。家居凡二十五年。親友敦喻。乃從常調。釋褐太常寺奉禮郎。轉江都縣主簿。直以事。上不失其恭。勤以率下。畢舉其職。民從其化。吏服其能。府尹陳玄藻。縣令路儀。皆恃才傲物。獨推重于君。以爲不如也。改江夏令。其理如初。鄂帥何洙。武勳致位。性復曩桀。亦加優禮。異于餘人。嘗視君舉止迂緩。車服樸野。輒怡然而笑。每責諸寮屬曰。君輩稱爲儒生。不學江令也。秩滿。改蘄州黃梅令。議者以爲屈。君以鄉曲俯接。欣然而往。踰歲。遷歙州黟縣令。會宗屬封建。妙選府寮。授君記室之任。處平臺複道之地。列璫簪珠履之間。清節素風。凜然不改。正詞直道。動必盡規。府公甚重之。十有餘年。累遷至水部員外郎。賜緋。而記室如故。庚午歲。府公奉使天朝。留鎮兗海。授君泰寧節度判官。檢校金部員外郎。數年。遷司門員外郎。判刑部。今上元年。加朝奉郎。先君贈大理司直。先妣追封隴西縣太君。視事三載。求外任以自效。上以君恭勤詳慎。宜久其職。拜兵部員外郎。仍兼刑部。享年六十有四。居常康寧。微病數日。奄從物故。時太平興國五年冬十二月二十八日也。卽明年二月十日。葬于開封縣汴陽鄉豐臺里禮也。前夫人封氏。今夫人太原縣君王氏。皆有窈窕之

質幽閒之操。叶此貞節。蔚其門風。長子敏。京兆府醴泉縣主簿。次曰用成。用明。用澄。用康。用平。用文。用寧。女二人。曰慕昭。用貞。君生于季俗。世全素業。性純貌古。行潔文高。守道安貧。非禮不動。未嘗忤物。亦不隨流。真所謂鞠躬君子者矣。夙惠之性。稟于天資。年十餘歲。侍伯父食。不過園蔬而已。伯父戲之曰。薤之羹淡而無味。君應聲對曰。齧紫茄之蒂。鏗爾有聲。人知其當大成也。余始聞其名。晚乃識面。察言觀行。重其爲人。藩房見選。余所薦也。亦旣稱職。頗嘗自多。丙寅歲。與君俱年五十歲。日會飲酒。相與賦詩。君先就曰。學易寧無道。知非素有心。余遂不復作也。君有文集二十卷。嗚呼。契闊夷險。咨嗟年髮。一生一死。孰克忘情。聊存挂劍之期。故有刊銘之作。其詞曰。

嗚呼江君。世濟其名。生今之俗。爲古之人。閨門侃侃。鄉里恂恂。其實如秋。其華如春。握蘭有裕。伏閣惟勤。考終歸全。邈焉清塵。葬于所沒。古稱達者。浚水長源。夷門迴野。徒挂寶劍。空馳白馬。勝氣如存。逝川不舍。勒石垂芳。千載之下。

大宋故陳留縣主簿贈太子中允李府君墓誌銘 并序

府君諱某。字廣途。其先隴西狄道人。仙源帝系。蕃衍萬邦。隴西一族。獨爲鼎甲。中葉從宦。因家雍。今爲縣人。曾祖巢。祖禮。皆不仕。考洪。蔡州長史。府君清明稟氣。才智夙成。幼而屬文。已洽時譽。旣志學。通左氏春秋。未冠卽爲講說。橫經請益。虛往實歸。微言與義。別爲編錄。年二十三。舉進士。再不中第。後唐天成初。宗人璩爲大宗正。見而器之。曰。王室多故。吾道未光。得祿而已。何必是也。乃表爲屬吏。委以牋奏。丞相鄭公珣。奇君之能。特除蔡州汝陽主簿。奏課連最。改冀州南宮主簿。于時期運。告謝河朔。多虞。君內撫疲羸。

外給軍旅。民安事集。郡國稱之。澤潞節度侍中馬公存節。聞其名。辟爲管記。薦章連上。制命弗臨。君知命之不遭。乃謝病而退。閉門卻掃。以名教自娛。漢氏初基。羣心改屬。親友敦諭。復詣京師。直道而行。焉往無吝。又爲興平河東二主簿。秩滿以常調當遷。望令時皇運肇啓。多士狗名。君之次子巨源。已從鄉薦。獲知于尙書陶公。公時典選事。謂曰。丈人才高運否。遭迴下位。區區一宰。未足爲光。孰若復佐近畿。以便吾子之舉事。不亦可乎。乃除陳留主簿。乾德六年春三月四日。終于縣署。享年六十有八。夫人追封琅邪郡太君王氏。緱山仙派。河洲懿德。婦道以順。家人用嚴。陸族惟和。訓子由義。以乾德三年月日先逝。俱權殯于縣之乾明寺。至雍熙五年二月日。合葬于開封府開封縣吹臺鄉蘇村禮也。子五人。長巨舟。早亡。次巨源。擢進士第。今爲都官郎中。鹽鐵副使。次巨載。以疾家居。次巨川。巨卿。二女皆早夭。惟君懷恬淡之性。秉貞介之規。孝於奉親。仁以睦族。雅志宗道。餘力攻文。有孔墨之志。無管樂之遇。淹翔末路。從容自若。所至之處。輒御今上名茅齋。延高士。談宴終日。曾無倦容。嘗謂諸子曰。吾志在大名。非欲夸世。欲行吾道爾。時命不偶。古則皆然。汝輩宜勉成吾志也。而巨源果能奮奇藻。捷高科。際會聖明。鸞翔臺閣。長才利刃。應用忘疲。追遠之澤。漏于泉。卜宅之儀。由乎禮。積善之家。斯在大名之應。何慙仁人孝子。正當如是。鉉嚮風斯久。傾蓋甚歡。不朽之文。惠然見託。賢賢善善。翰墨之任也。故采家牒。勒于貞珉。其詞曰。

才高位下。古實有焉。積善餘慶。神寧舍旃。邈哉李君。一時之賢。其身則屈。其道斯全。餘慶伊何。實有令子。奉之以孝。葬之以禮。蜃輅同載。佳城雙啓。九原與歸。三廟而祀。遺愛被俗。沒而不忘。貞珉頌美。久而彌芳。阡如京兆。地卽桐鄉。綿綿瓜瓞。永永流光。

此
页
空
白

徐騎省集卷第三十

故唐慧悟大禪師墓誌銘

故唐衛尉卿保定郡公徐公墓誌銘

故唐水部郎中崔公墓誌銘

故汝南縣太君周氏夫人墓誌銘

大宋故亳州蒙城縣令曾君墓誌銘

故唐內客省使知忠義軍尙公羨道銘

故鄉貢進士劉君墓誌銘

故唐慧悟大禪師墓誌銘并序

士有佩服聖道。闡揚師訓。進不累于軒冕。退不滯于工樊。務勤身於濟衆。不養高以絕俗。其唯仁人矣。大禪師名冲煦。字大明。姓和氏。昔者帝堯光宅天下。我祖世掌天官。保姓受氏。冠冕百代。在漢則調鼎之重。在晉則專車之賢。末葉湮沉。徙居固始。先君從郡豪王氏。南據閩方。今爲晉安人也。大禪師生稟異氣。幼挺玄機。年十有五。詣鼓山興聖國師出家。卽具戒品。博覽經史。雅好文詞。郡多俊秀。咸見推抑。證無爲之理。演不言之教。綽爲先達。端然妙門。居城北之昇山。于時王氏衰淪。亂臣專恣。淫刑飛語。虐及善人。大禪師杖策去之。適臨川郡。中書令宋公齊王作鎮南楚。頗尙空玄。聞師之來。遠加延納。言意不合。拂衣而行。下至池陽。郡守王公繼勳。鄉國之舊。賓禮甚渥。時季唐二葉。像教方興。嗣君聞其名。召與之語。移晷而罷。眷矚殊優。命居光睦禪院。復遷長慶道場。俾與儲貳游處。實羽翼也。後主卽位。恩旨加隆。特賜法智禪師之號。廬山開先禪院者。嗣君所創。眞容在焉。命大禪師居之。精嚴修奉之儀。以申罔極之感。居數年。召還

建康止報恩禪院。加號慧悟大禪師。名其所化曰智度堂。精廬楹比。選勝而處。禮秩之數。有踰于前。出則居奉先道場。入則居淨德內寺。開寶七載夏六月。寢疾旬餘。乃大衆與論生死之理。十九日清旦。上疏告辭。後主遣使問之。至則化矣。享年五十有九。住法四十四年。卽其月二十五日。從西域之禮。收靈骨葬于鍾山之陽。禮物官給。中使監護。至某年月日。弟子省才。遷於廬山某所。遵理命也。大禪師風骨秀整。機神顯悟。博綜衆藝。綜以玄談。王公大人。咸所欽尚。鉉非學釋氏者。不能言其道業。徒以傾蓋之分。久要不忘。今京師復與才公胥會。才公以文藝精敏。見重於時。永惟嚴師之義。願刊不朽之迹。嘉其偉志。爲作斯銘。銘曰。

慧悟禪師。釋雄之奇。有文飾已。有道膺時。生延世寵。沒有遺思。歸舟翩翩。九江之湄。鑪峯勝境。蓮社餘基。門人稟訓。遷神于茲。衰翁懷舊。勒銘誌之。蘭菊無絕。高深與期。

故唐衛尉卿保定郡公徐公墓誌銘

公諱迪。字昭用。東海人也。仁義之胄。繁衍萬邦。別族于太史者十家。因封而占籍者四郡。而有郟之邑。鉅人實多。著于簡編。可以揚摧。唐室云季。天下崩離。江淮之間。獨爲漢守。惟我大父。首從義兵。受遺戡難。同伊尹之相太甲。字孤立後。如有虞之保少康。故得勳銘鼎鍾。世享茅土。連姻公族。與國存亡。考諱知詢。爲江西節度使。公生于郡。靡方孩而孤。四歲免喪。卽加五品之服。幼學就傳。遂疏百里之封。立朝侍祠。恩禮優渥。自太子中允。累遷至衛尉卿。天姿嚴肅。常持謙下之禮。世祿隆盛。每存恭儉之規。不讀非聖人之書。自爲保家之主。思不出位。時無閒言。始終一心。出入三紀。嗚呼。星迴日薄。棟折榱崩。命有所懸。義無苟免。

享年四十有六。開寶八年冬十有一月二十有八日沒于難。明年春三月權窆于大塋之側。至某年月始備大葬之禮卜祔焉。夫人王氏、張氏、劉氏皆早世。並南朝之名族。享小君之命數。壹儀婦順。彤史存焉。子太素、太初、太冲等皆修令名。不墜前訓。故能以淪胥之後。具飾終之禮。奉先之孝。時以爲難。宗人永懷。是有紀述。辭曰。

於惟我宗。昭時顯庸。積德垂範。爰生我公。出孝入悌。夷心直躬。生能棄官。沒不忘忠。是有慶靈。鍾于令子。不墜其訓。葬之以禮。謀卜謀筮。維桑維梓。神道永謐。流光不已。來者難誣。斯之用紀。

故唐朝散大夫尚書水部郎中崔君墓誌銘并序

公諱致堯。字用之。其先清河人也。周室大風。肇洪源于公望。漢庭明月。抗忠節于季珪。德厚流光。謀孫翼子。冠蓋之盛。莫之與京。我高祖翼亮有唐。四至丞相。曾祖蠡不仕。祖潯吏部員外郎。考億建州建陽令。值天下亂。因而家焉。今爲建安人也。君少而不羈。長而好學。介然如石。非禮不行。鄉曲之名。籍甚于世。季唐嗣業。博采時才。君以卿族之秀。獻書求試。補江州彭澤。滁州清流二主簿。改建州浦城軍判官。所至有聲。應用不暇。再爲建州將樂令。其地巖險。其民獷悍。寇攘亡匿。率以爲常。君厲以嚴明。信其刑賞。汙俗咸革。比戶安居。遂獲貞幹之稱。又遷紀綱之任。改常州錄事參軍。連考善最。擢拜殿中丞。遷虞部員外郎。郡國之政。多使案治。忘身殉節。綽有能名。無何都下受兵。羣師入援。以君爲水部郎中。實掌軍饋。旣而時運告謝。宗社淪胥。諸侯之師。莫不卷甲。君與其部將。南趣建安。中塗衆潰。遂沒于難。春秋若干。嗚呼。興亡之數。聖賢安能免。忠義之節。顛沛必於是。不然。何以見伯夷首陽之風。王蠋布衣之操也。夫人吳氏。克有婦德。

能緝素風。貌是流離。不墜門閥。子憲、寔、定、等皆稟庭訓。咸修詞業。憲在舊國。以進士擢第。入朝爲潁州沈
工尉。復從州里之舉。皇上臨軒親試。又擢高科。爲隨州觀察推官。所謂善人必有餘慶。某年月日。憲等
始備大葬之禮。號奉靈柩。窆於某州縣鄉里之原。禮也。鉉素熟君行學。因銘墓焉。銘曰。
嗚呼崔君。百世清芬。忘身殉國。斯爲貞臣。種德垂訓。斯爲慶門。芃芃故園。峨峨高墳。沒而不朽。用勒斯文。

故汝南縣太君周氏夫人墓誌銘并序

夫人諱某。字某。廬江舒人。三國時吳將公瑾之後。公瑾葬於舒之宿松。今裔孫奉祀者百餘家。雖降在畎
畝。而時生閒傑。烈考諱本。幼而遇亂。自奮從軍。吳王創基。功冠諸將。季唐建業。位列宗臣。官至中書令。封
西平王。夫人卽王之弟某女也。天姿玉瑩。淑性川淳。孝德內融。柔儀外映。旣笄。歸于徐氏。府君諱某。卽唐
相司徒公玠之弟某子也。于時江左方盛。二族齊榮。婚姻之貴。雄視王謝。而夫人雅性謙謹。率由禮經。至
于蘋藻之嚴。佩環之節。澣濯之儉。織紉之勤。必以身先。罔弗由道。宗族親睦。人無閒言。府君任爲閤門副
使。殿中少監。早卒。四子皆幼。夫人提攜教訓。親授經書。及其出就外傅。已通孝經論語矣。性曉音律。而尚
雅聲。善絲竹。而精琴瑟。習孝經。而宗玄言。齋居諷誦。未嘗懈怠。雖閨門之內。常以慈撫。而家人之節。有若
嚴君。故其門風肅然。先業不隕。豈非天和充已。而道氣感物者歟。春秋四十八。開寶九年正月二十一日。
終于建康瑞里官舍。其年二月。葬于江寧縣鳳臺鄉婁侯里。長子某。亦爲諸司副使。及入朝。爲京兆府醴
泉令。陝州錄事參軍。公府交薦。遂升閨籍。太子右贊善大夫。夫人始以子貴。授汝南縣太君。至是朝命復
追榮焉。次子繼宏。舉進士。次繼宇。次繼宗。初夫人之亡。會宗國淪覆。窀穸之事。不暇如儀。至太平

興國某年月日。繼崇等始改窆于某所。附大塋焉。禮也。鉉與西平諸子。辱爲交遊。及相府宗黨。復敦事舊。故得以門內之理。爲隧道之銘。傳于無窮。斯爲實錄。銘曰。

侯藩之子。相門之嬪。道高萊婦。德劭陶親。猗歟彤管。永世芳塵。生榮沒哀。何必眉壽。粉田啓邑。斯爲不朽。令子承家。斯爲有後。狐卻降替。二族依然。陵谷遷貿。松楸附焉。謂天蓋高。福善胡愆。勒銘泉戶。蘭菊綿綿。

大宋故亳州蒙城縣令賜緋魚袋曾君墓誌銘

君諱文照。字知章。其先魯人。百行之先。垂爲家法。子孫蕃衍。不隕其聲。末葉因官。徙居南楚。今爲廬陵新淦人也。祖朴。考福。皆不仕。君生稟異氣。卓然老成。六經奧旨。有若夙習。于時江表之地。唐室猶興。憲章文物。不失舊典。君年七歲。應州里之舉。以神童擢第。選滿補江州東流尉。遷靖安。句容。二尉。皆以清白敏惠。承上率下。和而有正。能不自矜。連考殊尤。擢爲吉州太和令。桑梓之地。瓜李多嫌。君閨門之行。素修童艾之情。已信。而復臨事。能斷盡公。無私。由是葦年政成。就賜朱紱。會宗國淪覆。舉族入朝。授亳州永城令。舟車輻湊之地。郵傳傍午之塗。盤根錯節。發硯靡滯。事無愆素。民不告勞。上疏論以一邑之衆。供列郡之賦。指引利害。較然可分。詔特許免其縣挽船夫。歲省萬計。改蒙城令。其理益精。頃之。河南大蝗。獨不入城之境。于是吏民相率詣闕。借留優詔。褒美許留三載。會王師北討。君督本縣運輸。深入虜庭。危而後濟。旣還。遇疾。以雍熙三年四月日。終于永城傳舍。享年若干。初君之赴選也。余遇之于建康。察言觀行。知爲良士。因以表甥女姜氏妻之。有子六人。女八人。君之從仕。世塗多故。王事靡盬。不遑顧私。雅志未申。中路早世。唯第三子乾度。再舉進士。名聞場中。有後之慶。當在于此。卽以某年月。號奉靈柩。歸葬于某鄉里。祔大塋。

焉。禮也。嗚呼。姻舊之故。豈無他人。援毫濡涕。識彼陵谷。其銘曰。

有惠于民。死事以勤。嗚呼曾君。永世清芬。仙山之陰。章江之濱。考終歸全。下從先人。刻茲琬琰。垂示後昆。

故唐內客省使知忠義軍檢校太傅尙公羨道銘

公諱全恭。字子初。其先清河人也。粵若天監代商。文王受命。渭濱卜獵。尙父膺期。實始華宗。誕彰餘慶。在漢則工園之盛德。在唐則藩屏之名臣。蕃衍孫謀。著之家牒。祖愨潤州館驛巡官。因家焉。考公迺爲昇州牙將。爲郡守。馮鐸使于淮甸。與吳武王議疆事。抗詞奮厲。誓不辱命。明年而馮氏兵敗。悉衆歸于廣陵。吳王得之甚喜。曰。汝爲馮公。託我真義士也。今事我無易爾心。即以右職處之。賜與甚厚。由是感激知己。竟死事于鄱陽。以故三子皆獲敘錄。累贈右千牛將軍。公卽第三子。質性端慤。容貌矜嚴。吉人寡詞。非禮不動。季唐有國。公仕爲客省承旨。先主器之。特加任使。凡所授職。皆與先達長者侔。勤以繼之。所至皆理。累遷至館驛副使。嗣君卽位。轉閣門副使。遷客省引進使。凡時務制獄。多命公與焉。循理持平。甚獲時譽。宣布詔命。出納必信。監護師旅。威惠得中。不從諛以取容。不矯激以忤旨。故考績無玷。而主恩益深。累遷內客省使。後主卽位。兼領閣門使。遙領婺州刺史。初國之戈船。皆屯于石頭城之後。盧龍鎮下。命曰龍安軍。旅之重任也。于是復兼龍安軍使。明年改潤州監軍使。權領州事。善於爲政。大洽民謠。逾歲徵還。遙領饒州觀察使。兼左龍衛神武護軍。公固辭兵柄。閩嶺之地。巖險遼遠。鎮守之寄。常以爲難。又命公知忠義軍。兼建州事。洎政三載。建人安之。會都下受兵。羽檄相望。公調發軍實。應接舟師。奔命之衆。道路相望。猶以不獲身先。憂憤成疾。朝廷方命公爲節度觀察等使。留後檢校太尉。使者未至。甲戌歲冬十一月二十五

日卒于公署。享年七十。以十二月二十三日。葬於建安縣某鄉某里。前夫人蘇氏。繼室安樂縣君孫氏。皆早卒。子三人。審元。審庸。審能。公以忠烈之風。處親近之職。守以周固。齊以法度。身貴而志遜。祿厚而持廉。凡同列者。使于諸侯。率多貪求。浸以成俗。公獨淡然無取。出入垂囊。士君子以此重之。及邦國淪胥。豪右降替。向聚斂者。翦焉無餘。唯公令嗣克家。門族如故。識者知有天道矣。鉉少參近密。與公常接笑言。道義相期。有若寮舊。聲塵永已。慷慨長悲。惜其風猷。思有論譏。昔裴子野之卒。湘東王爲誌矣。而邵陵王又銘于羨道。羨道有銘。自此始也。故仰前躅。追而銘云。

表海之慶。世載厥聲。展矣君子。心純道貞。恭職軒陛。申威禁營。將命四方。宣風百城。哀哉不淑。永矣忠誠。舊國禾黍。交情死生。濡毫頌美。愴愴霑纓。

故鄉貢進士劉君墓誌銘

君諱鶯。字仲翔。其先彭城人也。炎靈之裔。繁衍萬邦。占籍廬陵。蓋重世矣。高祖珍皆不仕。父雄。嘗從九江辟司兵掾。自免去職。閨門之教。不肅而成。有三子。君其仲也。質性純素。智識聰敏。年十有五。則知屬文。未及弱冠。馳名矣。至于事親孝。事長悌。與朋友信。接鄉黨讓。動不違禮。居常慎獨。故州里耆耄。與時之名輩。推重焉。郡舉茂才。擢升上第。明年而宗國淪覆。君慨然知時之不利也。于是閉門卻掃。爲學益勤。以爲今之文人。率以詞賦取高。先王之教化。蓋蔑如也。乃撫天下之務。論古今之變。著法語八十一篇。大抵宗尙周孔。以質百代之惑。視其書。知其人矣。皇宋二聖。崇古尙文。郡國孝秀。親臨考覆。君以詞場舊望。復爲本郡升聞。余與翰林學士賈公。承詔先考第于南宮。賈公重君之文。以爲古人之俊也。乃第爲高等。而君狗

難進易退之節。稟外敏內愚之容。及其敷庭。復不中選。退還鄉里。篤行如初。雍熙三年九月。卒于家。享年四十有三。嗚呼。有才有時。命不我與。自古同歎。可勝道哉。遺文累哀。不朽之謂也。卽某年月。葬于本縣化龍鄉折桂里之原。禮也。君娶郭氏。先十日而亡。子師望。文綺。皆得父風。其有後矣。二女。長適太原郭方。次適隴西李某。師望以余爲父之知己也。故千里號訴。求誌其墓。云。詞曰。

嗚呼劉生。江楚之英。才識兼茂。時命難并。沒于白屋。闕此泉扃。立言可法。何必浮榮。刻茲貞石。永爾高名。

徐集補遺

君臣論

君人者。推赤心以接下者也。臣人者。推赤心以事上者也。上下交感。政是以和。故大易之義。在上者其道下降。在下者其道上行。則曰天地交泰。上者自居其上。下者自居其下。則曰天地不交否。然則爲上而下降。甚易。爲下而上達。甚難。何者。君人者。其勢足以行人之道。其貴足以顯人之德。其富足以聚人。其義足以感人。賢人君子。望景而歸之。理自然也。苟不逆之可矣。又況於禮致之者哉。故齊桓之德薄也。猶能使管仲受執。甯戚扣角。況聖君乎。此易之效也。人臣者在貧賤之中。處疎遠之地。有上下之隔。有左右之蔽。自媒則有暗投之患。因人則無苟合之譽。禮秩之不足。則不肯進也。況不禮之哉。故以仲尼之聖。懷救世之心。歷聘七十。而不一遇。況常人乎。此難之效也。然則士之失君。所喪者富貴耳。莊老吏隱於陵。躬耕商皓采芝。君平賣卜。未失其所以爲士也。君之失士。或喪旣安之業。或敗垂成之功。紂踣于京。厲流於蕞。魯哀奔吳。項羽屠裂。則失其所以爲君也。聖帝明王。鑒其若此。故屈己以下士。推誠以接物。軒轅問道於下風。唐堯求賢於側陋。周公吐餐於白屋。漢祖輟洗於布衣。況朝廷之臣乎。夫朝廷之臣。位有前後。任有小大。至於君臣之分。誠心所感。其揆一也。詩曰。嗟我懷人。寘彼周行。卿士大夫各居其位。所謂周行也。言周行之中。皆所懷之人也。書曰。汝則有大疑。謀及乃心。謀及卿士。謀及民。孔彰按。民上當有庶字。大疑大政也。庶民猶與焉。況羣臣乎。此治世之主。至公之義也。世之衰也。疎公卿而親近習。憚君子而狎佞人。親而狎之也。以

爲腹心。疎而憚之也。以爲仇敵。於是政出於羣小。而責及於大臣。如此而不亂。未之有也。君子之事上也。近之不敢佞。遠之不敢怨。受命無二慮。臨難無苟免。小人之事上也。遠之則憾。近之則比。受命則願。望臨難則幸。生人君不能熟察也。以爲我之所親。彼亦盡忠。我之所疎。彼亦懷二。於是聽鑿惑於外。精神汨於中。及亂之來也。小人無忘生之節。君子非死難之所。楚靈殞於乾谿。二世弑於望夷。而莫之救也。其所由者。自私與自勝也。自私故慙與君子言。自勝故憚與君子言。此小人所以易見親。君子所以易見疎也。夫亡國非無賢臣。亂主非獨坐於堂上也。用心之不一也。書曰。一哉王心。詩曰。淑人君子。其儀一兮。人君用心一。則賢臣知所從矣。

持權論

天下所以奉者君也。君之所以尊者權也。權者非他也。賞罰而已矣。賞公則當善而爲善者進矣。罰公則當惡而爲惡者退矣。若然。則君子在位。小人在野。而權不在公室者。未之有也。中才之君。知賞罰之權。不可失。而不知所以守之之道。欲人之懷己也。則必賞自我出。欲人之畏己也。則必罰自我行。此亂之本也。老子曰。爲者敗之。執者失之。賞罰者。受之於先王。行之於有司。人君正其本。遏其淫而已。苟自爲之。而自執之。其與幾何。尙書數堯之德曰。聰明文思。及其舉舜也。則四岳師錫。堯曰。予聞如何。朕其試哉。夫堯旣聞舜之行賢。猶待四岳舉。然後登用。此則賞不必己出也。周公作萬代之典。設三聽之法。衆聽則殺之。衆疑則赦之。此則罰不必己出也。漢高祖氣吞羣雄。威振海外。然而不敢以私忿誅季布。不敢以私惠賞丁公。秦始皇親治庶務。以衡石自程。羣臣莫得專任。而秦漢之成敗。豈不明哉。然則賞罰在於公。不在於自

執必矣。魏晉已降，創業之君才略冠世，功勳震主，既當失政之代，遂踐數終之運。後世人君懲其若是，故憎疾勝己，誅鋤高名，所謂同歸於亂者也。昔楚莊王謀事而當羣臣，莫能及，退而有憂色，曰：「楚國之大，而羣臣莫吾及，吾國其亡乎？」此所以飲馬於河也。漢高祖自謂不如三傑，而能用之，所以有天下也。梁武在雍州時，破魏將王肅，得其中箱書，見魏帝手勅，曰：「吾聞蕭衍善用兵，勿與鬪，其威名如此，及其爲帝也，乃用臨川王宏、貞陽侯明爲將，在竟陵時，與謝朓、王融、之儔齊名，及其爲帝也，乃用陸驗、石珍爲心膂，何者？患其失權，貪其易制，曾不知亡國之憂，始基於此也。夫權者，非謂其強，臣專政，王命不行，前邀九錫，後徵殊禮也。蓋人君有偏聽焉，有偏好焉，偏聽則朋黨有所附矣，偏好則奸邪有所入矣。朋黨勢固，姦邪在側，人主以不聞過爲賢，不違命爲治，如是，則賞罰者，朋黨之所爲，而假手於人主矣。當時之人，知其如此，亦且棄正義而事朋黨，背公室而向私門，非徒競利，且以避害，然則權安在哉？後魏孝明時，衛士數千人，焚領軍張彝宅，殺其父子，朝廷懼以爲亂也，止誅八人，餘並釋之。高歡時在民間，聞而歎曰：「亂之始也。」乃散家財，招集亡命，卒移魏祚。魏人不知失權之始，在乎孝明，及高氏執政，方云祿去公室，不亦晚乎？誠令人君用法公共，接下均一，善善而能用之，惡惡而能去之，不以己之私妨天下之義，雖復體非賢，蓋亦思過半矣。嗚呼！斯道也，甚易知，甚易行，甚易效，而鮮能行者，蓋夫疑信之際，貪旦夕之使，因循僂俛，以至政墜勢敗，而自不之知也。傳曰：「失之毫釐，差以千里。」豈虛言哉！

師臣論

至大者天，必配以地。至明者日，必配以月。至剛者陽，必配以陰。至尊者君，必配以臣。君臣之義，與天地並

者也。君之有臣也。所以教其知。匡其不逮。扶危持顛。獻可替否。其任大矣。故君失之。臣得之。臣失之。君得之。上下相維。乃無敗事。非徒承其使令。供其喜怒而已。故曰。師臣者王。友臣者霸。書曰。能自得師者王。謂人莫己若者亡。自三皇以來。莫不由斯而致者也。衰世之君。闕於大道。嘉言美事。掠歸於己。諛臣佞妾。從而成其過。曰。生殺廢置。國之利器。必出自一人。不當爲人臣所教。嗚呼。斯甚不然也。夫往古之事。不可言已。其世近而昭然者。請以漢祖明之高祖。奮布衣。取天下。功侔三代。享祚四百。可謂盛矣。其舉事之始。駐軍於陳留。則酈食其之謀。破武關。入咸陽。則張良之策。遠定三秦。則韓信之計。爲義帝編素。則董公之說。出兵宛葉。則鄭忠之畫。破垓下。則三王之力。及其成功。則高祖享帝王之業。數子獲人臣之祿。豈爲人臣所教者。不能爲帝王乎。故高祖曰。吾不如三傑。而能用之。所以得天下也。及太宗文皇帝。力行王道。天下已平。喟然歎曰。魏徵教我。功業如此。夫二帝者。皆用忠賢之謀。以建三五之業。歸功臣下。而其道愈光。老子曰。功成而不居。夫唯不居。是以不去。此之謂也。昔魏武帝。使夏侯淵守漢中。蜀先主用法正之計。破漢中。殺淵等。魏武聞之曰。吾知玄德不辦此。必爲人之所教。言之失也。史論之備矣。魏武雄傑之主。猶有斯論。況常人哉。夫爲國警用兵焉。大將將十萬之衆。舉千乘之國。有坐籌制勝者。鋒摧孔彰按。鋒摧當作摧。上疑奪有字。殺敵者。有先登陷壘者。及其成功。則元帥之功也。今使元帥兼此數者。而獨論功可乎。夫君人出令。臣下唯知奉行。則役夫豎子。可爲卿相。何必勞於求賢哉。嗚呼。斯道之不明久乎。孔彰按。乎當作矣。明達君子。可無思乎。可無思乎。

余既采東萊文鑑。補錄論三首。惟所見文鑑。是明刻本。亦有脫誤。因在本文下。加注按焉。朱孔彰又記。

徐集補遺續編

述祖先生墓誌序

門生鼓泐登第。補本郡司倉掾。嘗與社祭。齋于郡之延慶院。獨處一室。既寢而精爽不寧。展轉至四鼓。乃得寐。夢一白衣書生。入戶謂泐曰。某嘗述少文詞在此室。司倉當見之也。泐辭以未見。書生曰。試爲讀之。言訖而去。及寤。四鼓。因呼僕秉燭。周視牆壁。閒意謂有留題者。而都無所見。惟戶扇下有石。方尺餘。塵土蒙之。視彷彿有賀監字。乃知此是也。祀事罷。移置廳前。以水滌之。文字依然。卽進士許鼎所撰祖先生墓誌也。問主僧云。十年前。院側數十步。官置瓦窰。掘地得之。而掌役者軍吏也。不曉其所自。但見有文。因惜不毀而置此。按賀監以天寶二年。始得還鄉。旣而天下多事。遂與世絕。止於吳越。故老亦不能知其所終。徵彭子之夢。則賀監輕舉之迹。與祖君高尚之節。皆湮沒矣。見孔延之會稽掇英集及紹興府志。

和送鄧王二十六弟牧宣城詩序

夫政成調鼎。寄重于蕃。蓋欲聖主之恩。均於遠邇。賢人之業。浹於中外。故所以命丞相鄧王從鎡。佩相印。被公袞。擁雙旌。統千騎。揚帆江寧之浦。弭節敬亭之區。若乃割友悌之懷。輟股肱之侍。所以示天下之至公也。夙駕已嚴。前騶將引。旣辭復召。重賜餞筵。所以極大君之恩也。敦睦之義。於斯有光。申詔侍臣。述敍

賦詩云爾。

見湖州陸氏舊鈔徐公文集。

廬山九天使者廟張靈官記

開元中尊崇至道。伸嚴祀典。詔置九天使者廟。於匡廬之山。真靈咸秩。率由科教。應門左右。圖五百靈官之像焉。天祐初。江西連帥南平王鍾公。遣道士沈太虛。設醮於廟。太虛醮罷。恍然若夢。見圖像一人前揖。太虛曰。我張懷武也。常爲軍將。有微功及物。帝命爲靈官。既寤。訪懷武之名。無能知者。歸以語進士沈彬。彬後二十年。遊醴陵。邑令陸生客之。方食。有軍吏許某後至。話及張懷武。彬因問之。許曰。懷武者。蔡之裨將。某之長吏也。頃甲辰歲大饑。開豫章獨稔。卽與一他將。各率其屬奔焉。旣卽路。兩軍稍不相見。進至武昌。釁隙大構。尅日將決戰。禁之不可。懷武乃攜劍上戍樓。去梯。謂其徒曰。吾與汝今日之行。非有他圖。直救性命耳。奈何不忍小忿。而相攻戰哉。夫戰必強者傷而弱者亡。如是。何爲去父母之國。而死於道路耶。凡兩軍所以致戰者。以有懷武故也。今我爲汝等死。兩軍爲一。無構難矣。遂自剄。於是士衆皆慟哭。乃與和親。比及豫章。無逃亡者。許某但懷其舊恩。不知靈官之事。沈君好道者也。常以此語人。鉉始在膠庠。預聞斯論。辛酉歲。扈從南幸。獲謁祠宮。道士童處明。出沈君所述傳。求潤色之。以刊貞石。嗚呼。古之君子。體至公。綜萬殊。虛心存誠。事至而應。道苟行矣。何必在己。物旣濟焉。何必享利。故有歸全以爲孝。殺身以成仁。此兩者。同出而異名。同謂之元。非清貞之氣。不能衛其義。非靈仙之位。不足寧其神。昭報動乎上。肝蠻應乎下。然則天之愛民甚矣。咨爾百代。高山仰之。於是歲次癸酉。上元日記。見陸氏舊鈔。徐公文集。

許長史井銘

長史含道。棲真九天。人非邑改。丹井存焉。射茲谷鮒。冽彼寒泉。分甘玉液。流潤芝田。我來自西。尋真紫陽。若愛邵樹。如升魯堂。敬刊翠琬。永識銀牀。噫。嗟後學。挹此餘光。

見海昌陳均唐駢體文鈔。陳又本建康志。

朱仲武孝廉。旣據呂東萊宋文鑑。補鈔徐公論文三篇。爲徐集補遺一卷。余因校勘徐集。稍涉典籍。復於孔延之會稽掇英集。及紹興府志。湖州陸氏舊鈔。徐公文集。并海昌陳均唐駢體文鈔等書。得序記銘凡四篇。補編朱君補遺之後。他日復有所見。仍當隨時甄錄之。癸巳季春。李英元記。

此
页
空
白

徐集附錄

玉壺清話三條

知不足齋刊本
長洲吳翌鳳校

宋 釋文瑩

徐騎省鉉事江南後主爲文館學士吳本作文口院隨煜納圖太宗苛責以不能諷煜早獻圖貢鉉對曰臣聞四郊多壘卿大夫之辱也爲人謀國當百世不傾諷主納疆得爲忠乎太宗神威方震曰今後事我亦當如是鉉不幸爲學士坐請求尹京張去華以一親故注重辟諷去華上言貫索星見請曲赦畿獄坐是削官爲靜難行軍司馬行字吳校增案當作後端居不出銘其齋以自箴曰爰有愚叟棲此陋室風雨可蔽庭戶不出知足爲富娛老以佚貂冠蟬冕虎皮羊質處之恬然永終爾吉竟卒於邠鉉晚年于詩愈工游木蘭亭云蘭舟破浪城陰直玉勒穿花苑樹深觀水戰云千帆日助陰山勢萬里風馳下瀨聲病中云向空咄咄頻書字與世滔滔莫問津謫居云野日蒼茫悲鷓舍水風陰溼敝貂裘陳祕監歸泉州云三朝恩澤馮唐老萬里江關賀監歸宿山寺云落月依樓角歸雲擁殿廊弟錯詞藻尤瞻年十歲羣從燕集令賦秋聲詩頃刻而就略云井梧分墮砌寒鴈遠橫空雨滴苔莓紫風歸薜荔紅盡見秋聲之意徐常侍得罪竄邠平日嘗走書託洪州永新都官胡克順曰僕必死於邠君有力他日可能致我完軀一云致海歸葬故國侍先子於泉下卽故人厚恩也木幾果遣計來告順感其預託創巨舟齋厚費親信往邠迎之舟出海隅一巨邑忘其名邑有東海大帝祠帳殿嚴盛禱享填委時索湘典邑舟未至鉉先謁之稱江南放叟徐鉉湘素聞其名悚敬迎拜冠服嚴偉笑談高逸曰僕待罪於邠幸免囚置放歸故里艤舟邑下

因得拜謁。仍有少懇拜聞。迨晚再謁。語訖失之。湘大駭。未久。津吏申有徐常侍靈柩船到岸。湘大感動。亟往舟撫其孤曰。先公有真容否。曰有。遂張之於津亭。果適之來謁者。湘設席感動。置醪俎再拜以奠。迨暝果至曰。適蒙厚饗。多謝。實己之幸。蓋少事一云有不得已。須至拜叩。僕在江南為學士日。一里舊吳校里齋一寶帶。託僕投執政。變一巨獄。巨字吳少事僕時頗有勢。欲執政不敢違。然事不枉法。以賊名累身。恐旅櫬過廟。帝所不容。君宰封社。廟籍鄉版。皆隸於君。君為吾禱之。帝必無難。吳校無難湘感其誠。告為之潔沐。過己事。吳校過下齋心冥禱。訖令解絆。過廟恬然無纖瀾之驚。薄暮果再至。飾小懷刺為謝。吳校小其刺題曰。鉉專謝別東坡索君賢者。含喜再拜。歛然而去。泊再開其刺。旋為灰飛。湘頗懷東坡之疑。後果為諫議大夫。

徐常侍鉉仕江南日。當直澄心堂。當一每襍被入直。至飛虹橋。馬留不進。吳本云馬裂鞍斷轡。筆之流血。掣韁卻立。鉉寓書於杭州沙門贊寧。答曰。下必有海馬骨。水火俱不能毀。惟瀉以腐糟。隨毀者乃是。鉉斲之。去土丈餘。果得巨獸骨。上脛可長五尺。膝而下長三尺。腦骨若段柱。積薪焚之。三日不動。以腐糟纒漚之。遂爛焉。

庶齋老學叢談卷下第五

元 盛如梓

徐常侍鉉自江南入汴。居五龍堂側。宣徽角觥士。遇內宴。必先習於其中。一日坐道齋。誦黃庭。聞外喧甚。遣童視之。回白。衆常侍習角觥。鉉笑曰。此諸同僚。難與接。權也。蓋鉉與角觥士。皆稱常侍。可發一笑。鉉至汴。市宅以居。後見宅主貧甚。鉉曰。得非售宅虧價而至是耶。余近撰碑。獲潤筆二百千。可償爾矣。其人堅

辭不受。亟命左右輦付之。

此
页
空
白

宋史文苑傳

徐鉉字鼎臣。揚州廣陵人。十歲能屬文。不妄游處。與韓熙載齊名。江東謂之韓徐。仕吳爲校書郎。又仕南唐。李昇父子試知制誥。與宰相宋齊丘不協。時有得軍中書檄者。鉉及弟鏞。評其援引不當。檄乃湯悅所作。悅與齊丘誣鉉。鏞洩機事。鉉坐貶泰州司戶掾。鏞貶爲烏江尉。俄復舊官。時璟命內臣車延規。傅宏營屯田於楚州。處事苛細。人不堪命。致盜賊羣起。命鉉乘傳巡撫。鉉至楚州。奏罷屯田。延規等懼逃。鼻。鉉捕之急。權近側目。及捕得賊首。卽斬之。不俟報。坐專殺。流舒州。周世宗南征。璟徙鉉饒州。俄召爲太子右諭德。復知制誥。遷中書舍人。璟死。事其子煜。爲禮部侍郎。通署中書省事。歷尙書右丞。兵部侍郎。翰林學士。御史大夫。吏部尙書。宋師圍金陵。煜遣鉉求緩兵。時煜將朱令贇。將兵十餘萬。自上江來援。煜以鉉旣行。欲止令贇。勿令東下。鉉曰。此行未保。必能濟艱。江南所恃者。援兵爾。奈何止之。煜曰。方求和解。而復決戰。豈利於汝乎。鉉曰。要以社稷爲計。豈顧一介之使。置之度外可也。煜泣而遣之。及至。雖不能緩兵。而入見辭歸。禮遇皆與常時同。及隨煜入覲。太祖責之。聲甚厲。鉉對曰。臣爲江南大臣。國亡。鼻當死。不當問其它。太祖歎曰。忠臣也。事我當如李氏。命爲太子率更令。太平興國初。李昉獨直翰林。鉉直學士院。從征太原。軍中書詔填委。鉉援筆無滯。辭理精當。時論能之。師還。加給事中。八年。出爲右散騎常侍。遷左常侍。淳化二年。廬州女僧道安。誣鉉姦私。下吏道安坐不實。抵鼻。鉉亦貶。靜難行軍司馬。初。鉉至京師。見被毛褐者。輒晒之。邠州苦寒。終不御毛褐。致冷疾。一日晨起。方冠帶。遽索筆手疏。約束後事。又別署曰。道者天地之

母書訖而卒。年七十六。鉉無子。門人鄭文寶護其喪。至汴。胡仲容歸其葬於南昌之西山。鉉性簡淡寡欲。質直無矯飾。不喜釋氏。而好神怪。有以此獻者。所求必如其請。鉉精小學。好李斯小篆。臻其妙。隸書亦工。嘗受詔與句中正。葛湍。王惟恭等。同校說文。序曰。許慎說文十四篇。并序目一篇。凡萬六百餘字。望人之旨。蓋云備矣。夫八卦既畫。萬象既分。則文字爲之大輅。載籍爲之六轡。先王教化。所以行於百代。及物之功。與造化均。不可忽也。雖五帝之後。改易殊體。六國之世。文字異形。然猶存篆籀之迹。不失形類之本。及暴秦苛政。散隸肆興。便於末俗。人競師法。古文既變。巧僞日滋。至漢宣帝時。始命諸儒。修倉頡之法。亦不能復。至光武時。馬援上疏。論文字之譌謬。其言詳矣。及和帝時。申命賈逵。修理舊文。於是許慎采史籀。李斯。揚雄之書。博訪通人。考之於達。作說文解字。至安帝十五年。始奏上之。而隸書之行已久。加以行草八分。紛然開出。反以篆籀爲奇怪之迹。不復經心。至於六籍舊文。相承傳寫。多求便俗。漸失本原。爾雅所載。草木魚鳥之名。肆志增益。不可觀矣。諸儒傳釋。亦非精究小學之徒。莫能矯正。唐大歷中。李陽冰篆迹殊絕。獨冠古今。於是刊定說文。修正筆法。學者師慕。篆籀中興。然頗排斥許氏。自爲臆說。夫以師心之獨見。破先儒之祖述。豈聖人之意乎。今之爲字學者。亦多陽冰之新義。所謂貴耳而賤目也。自唐末喪亂。經籍道息。有宋膺運。人文國典。粲然復興。以爲文字者。六藝之本。當由古法。乃詔取許慎說文解字。精加詳校。垂憲百代。臣等敢竭愚陋。備加詳考。有許慎注義。序例中所載。而諸部不見者。審知漏落。悉從補錄。復有經典相承傳寫。及時俗要用。而說文不載者。皆附益之。以廣篆籀之路。亦皆形聲相從。不違六書之義者。其間說文具有正體。而時俗譌變者。則具於注中。其有義理乖舛。違戾六書者。並列序於後。俾夫學者。無

或致疑。大抵此書務援古以正今。不徇今而違古。若乃高文大冊。則宜以篆籀著之。金石至於常行簡牘。則草隸足矣。又許慎注解詞簡義奧。不可周知。陽冰之後。諸儒箋述。有可取者。亦從附葉。猶有未盡。則臣等粗爲訓釋。以成一家之書。說文之時。未有反切。後人附益。互有異同。孫愐唐韻行之已久。今並以孫愐音切爲定。庶幾學者有所適從焉。錯亦善小學。嘗以許慎說文依四聲譜。次爲十卷。目曰說文解字韻譜。鉉序之曰。昔伏羲畫八卦。而文字之端見矣。蒼頡模鳥迹。而文字之形立矣。史籀作大篆。以潤色之。李斯變小篆。以簡易之。其美至矣。及程邈作隸。而人競趨省。古法一變。字義侵譌。先儒許慎。患其若此。故集倉雅之學。研六書之旨。博訪通識。考於賈逵。作說文解字十五篇。凡萬六千字。字書精博。莫過於此。篆籀之體。極於斯焉。其後賈魴以三春之書。皆爲隸字。隸字始廣。而篆籀轉微。後漢及今。千有餘歲。凡善書者。皆草隸焉。又隸書之法。有刪繁補闕之論。則其譌僞斷可知矣。故今字書之數。彙倍於前。夫聖人創制。皆有依據。不知而作。君子慎之。及史闕文。格言斯在。若草木魚鳥。形聲相從。觸類長之。良無窮極。苟不折之以古義。何足以觀。故叔重之後。玉篇切韻所載。習俗雖久。要不可施之於篆文。往者李陽冰。天縱其能。中興斯學。贊明許氏。奐焉英發。然古法背俗。易爲堙微。方今許李之書。僅存於世。學者殊寡。舊章罕存。秉筆操觚。要資校閱。而偏傍奧密。不可意知。尋求一字。往往終卷。力省功倍。思得其宜。舍弟鎔。特善小學。因命取叔重所記。以切韻次之。聲韻區分。開卷可觀。錯又集通釋四十篇。考先賢之微言。暢許氏之玄旨。正陽冰之新義。折流俗之異端。文字之學。善矣盡矣。今此書止欲便於檢討。無恤其它。故聊存古訓。以爲別識。其餘敷演。有通釋五音凡十卷。始諸同志云。鉉親爲之篆。鏤板以行於世。錯字楚金。四歲而孤。母方教鉉。未

暇及錯。能自知書。李璟見其文。以爲祕書省正字。桑官內史舍人。因鉉奉使入宋。憂懼而卒。年五十五。李穆使江南。見其兄弟文章。歎曰。二陸不能及也。鉉有文集三十卷。質疑論若干卷。所著稽神錄。多出於其客蒯亮錯所著。則有文集家傳。方輿記。古今國典。賦苑。歲時廣記云。

徐集題跋

吳門金高士鈔本跋

徐騎省文集近世鮮有刻者。此本係虞山錢宗伯於崇禎閒從史館印摹南宋本。字頗大。予縮以小字鈔存之。集中稱今上御名者。高宗名構也。太祖諱匡胤。太祖之父仁祖。諱殷弘。眞宗諱恆。仁宗諱禎。英宗諱曙。故其字皆闕一筆。太宗諱炆。神宗諱頊。欽宗諱桓。如敬、鏡、竟、貞、徵、暘、署、完、諸字亦闕一筆者。蓋諱嫌也。今悉仍之。但原鈔非出通人。故舛譌甚多。惜無善本校對錄。竟爲之悵然。迂齋金侃識。

王漁洋山人蠶尾續集跋文

徐公文集三十卷。南唐徐鉉鼎臣著。五代時中原喪亂。文獻放闕。唯南唐文物甲於諸邦。而鉉、鍇、兄弟與韓熙載爲之冠冕。常侍詩文都雅。有唐代承平之風。常侍入宋後。與湯悅卽殷崇義奉詔撰江南錄。至金陵亡國之際。不言其君之過。但以歷數爲言。誅後主文。尤極悱惻。讀者悲之。老學叢談記常侍入汴。市一宅居。後見其宅主貧甚。曰得毋市宅虧價而至是邪。吾近撰碑文。得潤筆二百千。可以相濟。其人堅辭。亟命左右輦致之。其厚德如此。集外又有稽神錄若干卷。予家有寫本。

南唐二徐鼎臣無子。楚金有後人。居攝山前。開茶肆。號徐十郎。家王銍性之。常訪之。鉉、鍇、告勅具在。又言常見鍇文集。有南唐宮人喬氏出家誥。今騎省集三十卷。尙完好。楚金集則不傳矣。新城王士禎。

小山叢桂書齋藏朱竹垞檢討校本跋

騎省集六冊。秀水朱太史故物。卷中丹黃。皆竹翁親自點勘。其手錄半帙。書法古雅。較之陋板惡鈔。真同霄壤。後歸花山馬寒中先生。甲辰乙巳閒。南樓圖籍。星離雲散。予乃得而有之。覽茲墨妙。不勝盛衰今昔之感。閒身猶作蠹書虫人識。

盧抱經學士校本跋

徐公文集三十卷。南唐舊臣。後入於宋。東海徐鉉鼎臣之詩若文也。前二十卷。在南唐所作。後十卷。入宋後所作。詩致清婉。在崑體未興之前。故無豐縟之習。其文儷體爲多。亦雅淡有餘。爲組織之學者。見之或不盡喜。然沖瀾演迤。自能成家。不可得而廢也。李文正稱其爲文敏速。不樂豫作。臨事立揮草。云速則意思壯敏。緩則體勢疎慢。今觀集中之文。則其言也信。亦唯其如是。故亦無濼澗滄蓄之趣。崩雲裂石之勢。此殆由人之才力。各有所偏勝。雖使自知之。而固無能相易者耳。余從鮑氏借得此集。乃虞山馮己倉舒手校本。余又爲正其所未盡者。錄成。復請江陰趙敬夫曦明覆審。又得十數條。其本脫者。尙無從補正之。然此已可信爲善本矣。東里盧文弨。

重校徐騎省集後序

先大夫晚年尤好流傳古書。庚寅秋假得南陵徐氏新得舊鈔本。徐騎省集三十卷。念宋元以來未見傳本。乃付梓於金陵書局。時舊交長洲朱仲武孝廉孔彰適館於彼。因浼就近爲之校勘。朱君以原鈔本脫譌頗多。又無別本參校。僅就已意及所見各書。有關此集者。據以校正。凡二百餘事。各爲札記。附於本集之後。辛卯季夏乃得完工。先大夫雖樂觀厥成。而終以不能精美爲憾。將欲廣覓舊槧。詳爲補校。務求盡善。未幾先大夫於九月十三夜半後無疾而終。今英元於讀禮之餘。檢點先大夫遺物。及所刊諸書。列架與櫝。各爲分藏。乃取徐公文集初印本。細閱之。知脫譌之字。各篇皆有。乃徧作字告諸同志。及江浙諸藏書家。先後假得桐城蕭氏文徵閣所藏。吳門高士金迂齋侃手鈔本。又藉諸暨孫問清太史廷翰假得江陰繆筱珊太史荃孫新得秀水朱竹垞先生手鈔本。又得烏程蔣氏維基所藏錢牧齋尙書影寫。明內閣宋本。最後又假得會稽章小雅處士善慶傳鈔本。並歸安陸存齋觀察心源校宋本。瑞安孫仲容部郎諱謙舊鈔本。互爲對勘。正譌補脫。先後刊改三千餘條。仲容部郎又爲詳考舊籍。並據所見。又爲校定三十餘條。大致完美。頃閱盧抱經學士文集。有徐公文集跋文。知盧氏當日亦曾校此。據其所述。從鮑氏借得此集。乃虞山馮已倉舒手校本。已又爲正其所未盡者。錄成。復請江陰趙敬夫曦明覆審。又得十數條。其本脫者。尙無從補正之。然此已可信爲善本云云。英元念徐公文集初刊於北宋天禧間。尙書都官員外郎胡公克順再刊於南宋紹興間。知明州軍州事提舉學事徐公琛。宋元以來。並未聞有三刊之

本。今各家舊鈔本。凡有宋高宗御名構字。均有小注。今上御名四字。知各家傳鈔本。皆據紹興刊本。遞相傳錄。以致互有譌脫。今抱經先生校本。已不可見。據其所述。其本脫者。尙無從補。今案盧公云。脫蓋卽指卷十。武烈帝廟碑銘。中閒所脫三百七十八字。筠州清江縣重修三清觀記。末脫五十七字。卷十二。唐故道門威儀玄博大師。貞素先生王君之碑。中閒所脫四十二字。此三文所脫字句。各舊鈔本皆同。惟歸安陸氏舊鈔本。獨爲完善。蓋諸家所鈔所影者。大抵皆據宋版最後所印。脫爛之本。陸氏舊鈔。所據所傳者。猶是宋版初印之本故耳。凡各本脫譌之字。互有同異。總由傳鈔屢經數本。衆手不一。且脫譌字句。各本皆同。又知兩宋刊本。亦固有之。不盡由傳鈔之謬。茲將新刊本誤字之顯見者。直就諸舊鈔本改刊之。不復一一詳注所出。其各本字句不同。可以兩通者。亦並標出。又脫落字句。不便挽版添補。則案各卷。及前後行。悉爲札記。附於本集之後。讀者可以擇而取之。又全集尙有十數處。不能明通。參考無由。姑仍其舊。儻宇內藏書家。有善本。及好古君子。有曾校勘此集者。見此刊本。爲之補正。尤爲藝林大幸矣。

光緒十八年秋七月。黟縣李英元謹識。

徐騎省集校勘記

彰縣李英元纂

故散騎常侍東海徐公文集序。諸本無文集二字。

一頁十五行 早諸本作且。

二頁二行 來下諸本有于字。

四行 霜雪諸本作雪霜。從諸本作縱。

十三行 論諸本作議。

十五行 詔一本作誥。

徐公年七十六行狀 一頁一行 靜諸本作靖。

二頁十一行 仲尼下空七格。朱本同。他本只空一格。或疑作歎鳳賦。

十五行 受一本作授。

十六行 始諸本作姑。

三頁八行 淒一本作悽。

十一行 途諸本作舟。

十三行 表章諸本作章表。

四頁七行

泣一本作涕。

五頁四行

不下脫及字。

八行

恤下脫孤字。

徐公墓誌銘

一頁一行 靜諸本作靖。七行靜同。

四行

帥諸本作率。

十一行

家下脫及字。

二頁一行

在上脫公字。妄下脫交字。

十一行

上江諸本作江上。

三頁十六行

伏一本作服。或疑當作服。英元案伏本有屈服之義。古通用。又案文選別賦。割慈忍

之。愛四句。李善注。引服虔通俗文。服宋本作伏。杜子美詩。有諸生老伏虔句。服亦是作伏。全集類此多有

祭文

四百十行

朔下脫越字。

十二行

渾諸本作混。

十三行

左一本作表。

卷一

一頁六行 惟上一本有伏字。

七行 支諸本作枝。

八行 應諸本作膺。

二頁八行 露竹垞先生校改作霧。非是。

十行 庭下脫樹字。

十二行 樹下脫有字。

十四行 綬諸本作組。

四頁八行 嬌饒諸本多作嬌饒。英元案錢遵王讀書敏求記卷一。毛晃增修禮部韻略條記云。

宋子侯董嬌饒詩。出玉臺新詠。少陵引用之。初非嬌饒字。按玉篇。嬌音奴了切。苛也。又擾戲弄也。廣韻上聲三十六小。嬌音而沼切。亂也。從無饒音作平聲也。毛晃取此字。增入宵韻。反引杜詩。佳人屢出董嬌饒句爲證。歷考古人所用嬌饒。並是食旁。無有從女者。藝文樂府及宋本杜集皆然。不知毛晃何據妄增。韻會遂承其譌。後人惘惘。并改嬌爲妖。舉世襲用已久。嬌饒字竟亡矣。書此以正歷來之謬。錢氏之說如是。今案嬌饒本字如是。杜公詩。宋本亦作嬌饒。今徐公集用此二字。舊本亦作嬌饒。錢氏所論已無疑義。究竟饒字。玉篇廣韻均作上聲。杜公詩用作平聲。今徐公詩亦作平聲。用二公用字則是用韻則謬矣。杜公精於用古。徐公又精通小學。不應一悞再悞。意杜公必有所本。故徐公相承用之。譬如漢書霍去病傳。爲粟姚校尉。顏師古注。粟音頻。妙反。姚音羊召反。是二字皆應作去聲用也。而唐人王

右丞及杜公詩用霍粟姚均作平聲飄遙音用亦以二字古音本有作平聲用者服虔之注可證也。嬌饒二字得毋類是附存所疑俟詳考古書以明之。

卷二

七頁十二行 歸諸本作還。英元案。還字佳。尤合音節。

一〇頁六行 轉一本作轉。

一一頁一行 閑一本作閑。

一三頁六行 虛一本作空。

十三行 注萬歲下空二格。悞。諸本不空是。

一四頁八行 驛閣一本作駟路。

十一行 瑟一本作颯。

十四行 驟一本作驢。

一六頁八行 州一本作洲。

十五行 漫諸本作幔。

一七頁四行 饒諸本作饒。

卷三

二〇頁十六行 風一本作春。

二一頁一行 逕一本作遠。

二二頁三行 注海陵上。一本有暮春二字。南江。一本作江面。

十五行 寺下一本有及字。瑟瑟一本作颯颯。

二三頁十一行 悟應作忤。諸本同。聚一本作裏。資一本作裝。

二四頁九行 和英元案。此詩全唐詩收入包穎下。題作和徐鼎臣見寄。宋詩鈔仍列徐作。

二五頁六行 漢一本作事。徹一本作澈。

二六頁十二行 潤一本作潤。

二八頁十五行 月窟下。脫仙籍第三人。時人故稱屈。昔余吏西省。傾蓋名籍籍。四句凡二十字。

十六行 刮一本作剖。

二九頁一行 四行 詘一本作緝。

七行 座一本作堂。案座字爲勝。

是豈一本作豈是。

十三行 咏一本作味。雲一本作風。宋詩鈔作旻。

三〇頁八行 方一本作戈。易一本作已。

三一頁一行 旗一本作旂。

三行 但下。諸本有平字小注。

卷四
九行 濛一本作濃。

三三頁四行

十三行

履一本作履。

三四頁八行

吏一本作史。

底一本作抵。

川郡舊有金柅園

籍諸本作藉。

金柅亭邊綠樹繁。英元案此詩結句下。全唐詩有注云。方輿勝覽。臨

園中瀛洲亭景物爲一州之冠。

十四行

在一本作倚。

十六行

君一本作德林。

三七頁十二行

奚一本作先。

十六行

送一本作逆。

三八頁十行

曉一本作繞。

三九頁七行

練諸本多悞作疎。英元案全唐詩注。練所於切。案說文新附。練布屬。从糸束聲。所菹

切。

四〇頁八行

同亭。英元案全唐詩注。幔亭亦號同亭。

四一頁一行

辰一本作宸。一本作衣。

四行

映一本作映。

五行 軍一本作童。

十行 栖栖。諸本作恹恹。開一本作空。

十四行 吾一本作共。哭一本作淚。

四二頁八行 便諸本作漸。

十二行 思諸本作夢。知諸本作思。

十三行 岐諸本作歧。

四四頁三行 織全唐詩作織。

四行 能一本作勞。

九行 復土一本作覆土。非是。復土見史記。

十行 濯龍。英元案此二字。本集凡三見。舊鈔本均作躍龍。非是。此蓋用後漢書。明德馬皇

后傳。帝幸濯龍中故事。

十三行 燠應作漫。

四五頁十六行 藉一本作籍。

四六頁一行 注金沙泉。一本作金沙泉。

卷五

五〇頁二行 踈一本作婉。全唐詩注。一作宛。

五一頁七行

相公上。全唐詩有右省僕射四字。

五三頁六行

同上。一本有時字。

五五頁四行

鬪。一本作斷。

五六頁十六行

王下。全唐詩有從謙二字。

卷六

五九頁十四行

攸先。全唐文作代宣。

六〇頁九行

義。一本作數。

十行

盛。一本作善。

六一頁四行

適。一本作通。

六四頁一行

克兼。諸本作推高。

八行

藩屏。一本作屏藩。

十六行

茲舊臣。一本作咨老成。

六五頁二行

輔。一本作賴。

十四行

邑下。一本有制字。

六六頁一行

享此。一本作阜政。

二行

階。一本作資。

六八頁三行

四行

井賦一本作寵祿。
寵一本作榮。臣一本作人。

卷七

七〇頁十六行

事下脫守字。

七四頁十行

怠當從一本作忘。

十二行

瞻當從一本作贍。十六行及七五
頁十六行並同。

七五頁二行

樹一本作嗣。

七七頁二行

論諸本作議。

六行

歷一本作履。

七行

而一本作以。

七八頁三行

煩諸本作繁。

五行

方下脫可字。

六行

茂一本作懋。

十六行

莫一本作何。

七九頁一行

誠一本作忱。

卷八

八一頁九行 特一本作時。

十一行 顧一本作顏。

八五頁四行 職一本作績。

七行 特一本作時。

九行 東一本作簡。

八六頁四行 顧一本作顏。五行 顧同。

十三行 蒲一本作苻。

八八頁十五行 揖一本作挹。

八九頁四行 忝予一本作替朕。

九行 認獄諸本作獄認。

十二行 任一本作仕。一本作事。

九〇頁一行 哉下脫夫字。

十六行 指麾一本作措之。

九一頁四行 競一本作執。

九二頁一行 電靈一本作靈電。

卷九

九三頁八行 穆下。一本有皇字。册下。一本有文字。

九四頁七行 非一本作匪。

十一行 纂一本作纘。

十三行 魂一本作魄。

十五行 威一本作風。

十六行 祉一本作祚。

九六頁一行 行一本作刑。

四行 瞻諸本作贍爲是。

十四行 兄諸本作先。

十五行 停一本作渟。

九七頁九行 大一本作太。

十二行 惠下。一本有皇字。

十三行 王一本作皇。

九八頁二行 誠諸本作誠。一本作戒。

卷十

九九頁九行 亂一本作難。

十五行

姓諸本作官。仲容云似用書平章百姓義。卽百官也。

一〇一頁五行

甌駱諸舊鈔本均作甌洛。英元案此專指平閩亂楚亂言之。南唐實未嘗用兵於伊洛也。徐公原本定作駱不作洛。此洛字均係鈔胥之悞。或亦宋本原悞。蓋駱爲西甌地名。越之別種。觀本文出車甌駱則係以長纓。鞠旅衡湘。則舉爲內地。再觀下文銘辭有三湘卽序百越來庭可知。

十四行

觀之句。仲容云有脫誤。

十六行

作一本作祚。

一〇二頁七行

張一本作彰。

十五行

渾一本作混。

璋邸諸本均作璋底。非是。見周禮典瑞玉人。

廢諸本均作履。非是。

廢縣見爾雅。

一〇三頁十三行

致一本作降。降一本作致。

十六行

儀一本作名。

一〇四頁十一行

夷一本作裔。

十五行

修下一本有飾字。

十六行

面一本作向。非是。面勢見考工記。

搏諸本作搏。非是。搏埴見考工記。

一〇六頁一行

威一本作威。

二行

運一本作命。

繼一本作維。

七行 疎一本作桑。

九行 武烈帝廟碑銘。全唐文。作册贈武烈帝碑。

十四行 屯一本作艱。

十六行 顯一本作駭。煥一本作爨。

一〇七頁二行 元后至十一行力之。凡三百七十八字。諸本均脫。惟歸安陸氏本完全。全唐文本同。

知所錄爲舊精本。

一一〇頁三行 不遠矣。至末行五十七字。諸本脫。惟陸氏本完全。全唐文同。

卷十一

一一二頁十二行 綏和。諸本多作接和。本集多見。

一一三頁一行 傅下脫使字。

一一四頁五行 遠一本作修。

十六行 銀一本作金。

一一五頁三行 莖一本作茶。 哲當作哲。

八行 怙一本作帖。 僖一本作禧。

十二行 觀一本作覩。

十四行 用一本作繩。

一一六頁九行

受一本作賜。

十行

介一本作莽。

十一行

裨應從一本作禕。昭一本作彰。

一一七頁一行

將下脫軍字。

三行

抑一本作仰。

五行

雄一本作推。綿祀一本作錦袍。均非是。

六行

師一本作帥。

七行

副下一本有都字。

十行

淝諸本作肥是。

十一行

堡一本作保。

一一八頁三行

闕一本作閒。慶一本作位。雲一本作茲。

八行

絃一本作弦。古絃俗。各本互用。

十行

疆一本作疆。非是。

十三行

子應作予。

卷十二

一一九頁七行

位一本作立。

八行 君一本作時。

十行 表一本作被。真一本作貞。

十一行 聽一本作德。

十二行 總一本作綜。

十三行 靈一本作雲。高下脫皇字。

十五行 原一本作源。

十六行 叩一本作扣。煉一本作鍊。

一一〇頁一行 先生一本作真人。

三行 靖一本作靜。

八行 孝下脫高字。有一本作肖。

九行 天中一本作中天。光一本作允。

十六行 賞諸本作察。洽一本作浹。常一本作嘗。以下一本有爲字。

一一一頁一行 至一本作致。

二行 岩應作巖。

三行 漫一本作鋤。

四行 瑩一本作熒。而陽一本作以陽。

七行

聿一本作之。

八行

已一本作聿。

鶴一本作鵠。古通用。

十一行

詞一本作銘。

十三行

峒山一本作崆峒。觀下句赤水似峒山爲是。

知有一本作有知非是。

降諸本作

垂。

十四行

明諸本作先。

十六行

寫一本作瀉。

一二二頁二行

克紹下全唐文有歲己未十二月一日建朝議郎守尙書祠部郎中知制誥武騎尉。

賜紫金魚袋徐鉉撰并書凡三十五字蓋當時立碑石本如是集本所無也。

六行

作一本作設。

十行

裨應從一本作裨。

十二行

綏諸本作接。

十三行

妣下脫一字未詳。

一二三頁二行

亭一本作庭。

十四行

致趣一本作志趨。

一二四頁一行

材一本作才。

二行 係一本作繫。契一本作氣。

三行 問一本作聞。日下脫有字。

四行 遐一本作邀。

六行 鷓一本作鶴。鷓鶴古通用。

八行 好下脫每字。

十行 機諸本作幾。

十一行 亮一本作諒。

十三行 棺一本作琯。藥一本作業。

十六行 月下脫丙申二字。

一二五頁一行 四川一本作泗水。

二行 懷下脫德字。極一本作祕。光一本作先。法預聞玄祕永懷在三之義。十一字。

諸本皆脫。從陸氏孫氏兩本補。

三行 德首座陳希聲並仰高山共十一字。諸本脫。從陸氏孫氏兩本補。義雖復仙凡異

蹟靜躁殊十字。諸本脫。從陸氏孫氏兩本補。

四行 徊祠宇邈若山河敬書峴十字。諸本脫。從陸氏孫氏本補。以上四條。全唐文本皆全。

所據舊本特精。俟一本作伺。

八行 戀一本作愛。

十四行 煉一本作鍊。

一二六頁五行 籥一本作鑰。

六行 序一本作文。

十五行 興一本作典。爲一本作參。

一二七頁一行 功一本作工。

卷十三

一二九頁九行 於人一本作於民。

十行 政一本作秦。

十一行 委頓一本作傾頹。勝一本作陳。

十二行 悽一本作恹。厥一本作廢。遂一本作墜。

十四行 瞻一本作觀。觀一本作矚。

十五行 築一本作度。由一本作有。

十六行 零一本作儒。仲容云。論語春服既成章。鄭康成注。以爲零祭之事。鼎臣或用彼義。

場下。一本有卽字。鯁一本作兒。歟下脫越字。

一三〇頁一行 得字當衍。里下。一本有其功業三字。

二行 企一本作跋。

九行 於入諸本作入於。

十三行 畏壘諸本作岷巖。英元案。岷巖山名。見莊子庚桑楚篇。但莊子本文。只作畏壘。宋元以來。刊本無異也。陸氏音義云。畏本或作岷。又作猥壘。崔本作壘。又漢晉人賦此二字。單用畏。均作岷。壘有作岷。又通作巖。巖。巖。然則後人用此二字。不必一定用莊子本文。從陸氏音義。及漢晉人辭賦。所用惟便可也。徐集此二字。凡數見。均作岷巖。今此本作畏壘。乃付梓時。照莊子本文校改。

一三一頁三行 月下脫日字。

七行 返朴一本作反樸。

九行 一一本作八。瀉一本作純。

十行 年下。一本有乃字。

十三行 亟下。一本有遂使二字。

一三二頁六行 險下。脫一心二字。

八行 乎一本作於。

九行 卞忠貞。英元案此三字。諸家本均作忠貞公。惟各本忠字多誤。且有作忘忌等字者。朱仲武孝廉當日校此。因原本忠字作忘字。不知本爲忠字之譌。遂改作卞忠貞。今以文法而論。實以卞忠貞爲佳。以諸本所載。仍以忠貞公爲著其實。

十一行 辰一本作答。

十二行 啓一本作有。

一三三頁五行 鹽監一本作監鹽。監一本作兼。

六行 晏一本作又。使一本作師。

七行 苑一本作苑。

八行 憫一本作閱。

九行 賄贈一本作贈賄。兼倍一本作倍兼。

十一行 軀一本作區。

十二行 耽一本作眈。

十三行 祐一本作佑。官一本作宦。

十六行 大一本作皇。

一三四頁二行 岐一本作歧。馱一本作馱。

三行 逮一本作遠。

四行 憫一本作閱。案此字全集頗多。諸本互用。

六行 喝一本作渴。肅肅一本作肅爾。案以上文依然句玩之。則此句作肅爾爲是。

十行 勝一本作勢。

卷十四

一三七頁十五行

罔一本作同。誤。全唐文作不。

一三八頁八行

陰一本作蔭。

十行

官一本作宦。案左官左宦。本集數見。諸本互用均通。

十一行

盼一本作眄。

十五行

豫一本作逸。

一三九頁六行

據一本作踞。

九行

樞一本作棐。黎一本作藜。其左其下。一本無兩其字。

十行

椅一本作碻。又作奇。非是。藁一本作渠。又一本作藥。非是。苔一本作蒼。是。

十四行

十下有日字。

十六行

旌一本作旒。

一四〇頁四行

照燭。一本作燭。照。怪一本作鬼。

六行

力下。一本有之字。將同。一本作混同。

九行

王一本作皇。既成。一本作斯成。

十行

亡一本作測。唯德。一本作德唯。輔一本作依。

十三行

國一本作節。節一本作烈。

十五行 輝一本作輝。唯下脫新字。

一四一頁一行 恍惚一本作惚况。

二行 三葉一本作王業。僭一本作僭。

五行 常一本作長。

九行 夫一本作乎。

十一行 大一本作太。拯一本作整。一本作振。

十三行 吁嗟一本另提行。天一本作夫。嘻一本作嗟。

一四二頁三行 古一本作石。非是。

九行 象一本作像。

十行 象一本作像。

十二行 某應從一本作其。

十四行 烈一本作德。

一四三頁五行 門一本作方。一本作時。非是。

六行 豎一本作侍。

七行 大一本作太。

十二行 駁一本作駁。均難通。仲容云。疑作較。

十六行 襟應從一本作襟。聞一本作問。

一四四頁二行 祐一本作佑。弟一本作悌。此字各本互用

四行 職一本作只。非是。

八行 禮一本作拜。

十行 臨凶以下有脫譌。諸本皆同。

十二行 時一本作年。

卷十五

一四五頁十行 秦一本作秦。

十二行 斥鷃。英元案二字。見莊子逍遙遊。本文作斥鷃。陸氏音義。斥本亦作尺。鷃字亦作鷃。

十四行 署下脫宣字。

十五行 也諸本無。當衍。

十六行 事下脫中字。會會。下會字衍。

一四六頁三行 義下脫方字。

十行 介一本作芥。蒸蒸。一本作烝烝。

十二行 寓上脫師子。死生。一本作生死。

十三行 嗚呼下。一本有哀哉二字。

十五行 獲一本作度。

一四七頁二行 矣一本作已。

九行 孫當從一本作孫。外下脫郎字。量一本作略。

十行 第一本作寺。寇一本作虜。

十一行 出下脫爲字。

十二行 解一本作懈。

一四八頁六行 軫一本作震。

十二行 身應從一本作行。

十四行 泉或疑當作樂。

十六行 封字衍。諸本亦無。

一四九頁一行 得字一本無。

二行 而字一本無。

十二行 郡下一本有守海陵爲膏腴六字。無旬服二字。仲容云。守字宜補。旬服句疑不誤。大

徐文好用四字句也。除秦州刺史五字一本無。

十五行 韻一本作律。

一五〇頁二行 妙絕。一本作絕妙。以上文用舊好東道何報等句。用韻推之。應作絕妙爲是。

四行 纓一本作襟。於韻不協。非是。

八行 穀一本作穀。全唐文作穀。

一五一頁二行 寅一本作辰。

五行 緡一本作摺。此字本集頗多。各本互用。

六行 伏枕。一本作枕席。

十五行 官下脫累官二字。

一五二頁七行 逼一本作迫。本集多見。一本均同。

九行 月下脫日字。

十二行 與一本作異。

十五行 肇一本作啓。

一五三頁八行 閑一本作閒。此二字多見。各本互用。

一五四頁五行 刑法。一本作申名。

七行 初下脫精心二字。

一五五頁一行 外下脫郎字。

四行 女也之也字衍。

卷十六

一五七頁十行 鈞一本作均。

十四行 怡一本作夷。

一五八頁六行 與一本作相。

七行 封一本作計。一本作封事。踐一本作卽。

八行 未下脫能字。

十二行 公復一本作因上。

十六行 一本無其過半聞聽者五字。

一五九頁三行 慧一本作惠。本集多見。一本均同。

四行 作下脫儷字。

七行 檢以一本作檢校。

十三行 韓公一本作哀哉。

十五行 請一本作議。

一六〇頁二行 京都一本作京師。

九行 疾一本作病。

十五行 正一本作甚。

十六行 然字諸本多無。

一六一頁十四行 勇一本作大。

十六行 之長之之字一本無。孫吳一本作韜鈴。

一六二頁八行 甫諸本多作俯。此字本集多見。知均出宋本。其義未詳。俟考。

十二行 翔下一本有軍字。

十三行 茲一本作此。

一六三頁一行 息下脫而字。

二行 幣一本作幣。

五行 與一本作予。

十三行 學一本無。

十四行 大一本作天。登一本作永。

一六四頁一行 程一本作型。逼一本作迫。

五行 卻應作郤。一作郟。

七行 旗鼓諸本作鼓旗。

八行 二靜字一本皆作靖。

十三行 授一本作受。

一六五頁七行 前下一本有知字。銘當從一本作誌。

九行 唐下脫爲字。

一六六頁三行 逝川一本作西州。

十一行 事一本作仕。

十三行 遷下脫至字。

十四行 入下脫其耳二字。動下脫其心二字。

十五行 長一本作刺。

一六七頁九行 薰蘭一本作蘭薰。感諸本作戚。

十二行 三一本作小。

十三行 松岡全唐文作崇岡。前一本作右。

一六八頁一行 難一本作亂。

二行 路一本作途。

五行 經一本作法。

十一行 泊一本作泊。

十五行 危一本作韓。諱一本作韓。

卷十七

一七一頁三行 昌下脫郡字。

九行 夏王一本作安平。

十行 輸一本作舒。質一本作機。

十三行 從一本作崇。

一七二頁二行 訓一本作誨。祇應作祇。諸本同。

五行 瞬一本作眴。索下脫或字。

六行 取字衍。

十行 謂一本作爲。之年。一本作其年。

一七三頁四行 始一本作惟。爲一本作有。

八行 岁一本作窆。

十行 曰一本作云。

十一行 藹一本作藹。

十六行 輔一本作府。

一七四頁一行 遣諸本作遺。非是。遣奠見儀禮。

二行 字下脫某字。陽一本作溪。

七行 殯一本作嬪。

十行 祖下脫某字。

一七五頁二行

瑞一本作善。

三行

善下脫也字。

哉一本作者。

五行

昭一本作裕。

章一本作漳。

六行

靈仙一本作仙靈。

九行

使下脫相字。

十一行

冥下脫符怡二字。

十三行

參一本作忝。

一七六頁五行

故一本作親。

六行

以一本作而。

而一本作以。

九行

黼一本作黻。

十行

秋一本作齡。

蛾一本作娥。

十四行

治下脫家字。

形一本作刑。

一七七頁一行

棄一本作忝。

八一本作五。

四行

俱一本作居。

卷十八

一七九頁八行

淫一本作搖。

鉉早奉世親。晚連姻好。一本作鉉本世親。更聯姻好。

十一行 蒸一本作烝。此二字本集多見。各本互用。

十三行 密諸本作竟。一本作暗。均未善。

十四行 躡一本作躡。躡一本作躡。

十五行 垂一本作冕。帑一本作變。一本作御。均非是。又一本誤作變。

一八〇頁二行 喬下脫匡字。案匡字。宋本避藝祖諱。或缺筆。或不用。後來諸鈔本亦不一。

四行 向一本作由。一本作面。由一本作向。一本作環。

八行 小注。一本無何妨二字。

十一行 弘一本作宏。

十二行 晨一本作辰。

十三行 踰一本作渝。萼一本作鄂。

十五行 焯一本作卓。

一八一頁六行 物一本作化。

八行 承一本作仍。

十行 民一本作方。機一本作幾。

十二行 爲學一本作學者。

十六行 煥一本作燿。

一八二頁二行 戲儒一本作賤儒。仲容云。戲儒見禮記儒行。徐公似用此。英元案。賤儒亦有所本。此處似以賤字爲佳。

四行 皎一本作皓。

六行 爲一本作以。

七行 措一本作錯。

八行 臣下諸本有之字。

十二行 北苑侍宴詩序。英元案。南唐北苑。在金陵城北。

十五行 晴一本作清。

十六行 天波。顧文莊公起元。客座贅語。引此作恩波。英元案。天波卻佳。與醉一本作並醉。

一本作共醉。

一八三頁六行 陳一本作成。

七行 衆作。一本作著作。一本作作述。舍一本作捨。

九行 則一本作刺。

十行 蔚于。一本作蔚乎。

十二行 雅正下並無脫文。誤空二格。

十六行 盼一本作眄。風教。一本作教化。編一本作篇。

一八四頁八行 絕韋一本作韋編。

十行 出下脫公字。

十二行 彌一本作稱。非是。

十六行 貞一本作珍。

一八五頁一行 分下脫凡字。

六行 或上諸本有其字。

八行 此夫一本作比夫。一本無此字。

九行 詩上一本有流字。苑作苑。精下有華字。皆非是。

十三行 懷一本作性。

卷十九

一八七頁八行 文諸本無。一本作開。英元案當從諸本衍。 毗一本作岷。

十一行 充一本作光。 我上諸本有昔字。

十二行 名一本作明。

一八八頁一行 宦則一本作官側。

三行 捨一本作舍。

四行 弘一本作宏。

八行

誠一本作戒。

九行

艱一本作難。

十行

陳下。一本有君字。

十二行

搖山。一本作瑤山。非是。搖山見山海經。

十五行

漱誤作漱。各卷均同。痾一本作疴。

一八九頁四行

參一本作忝。

六行

畿一本作圻。移一本作易。

八行

佞一本作幸。

十一行

施一本作時。

十二行

元揚。一本作陽元。

十三行

戢一本作輯。

一九〇頁二行

予於。一本作吾子。非是。

七行

辰一本作寅。

十行

珂閭。一本作軻里。

十三行

畿一本作圻。

十四行

骸一本作體。

十六行 等下。一本有所著二字。觀下。一本有夫字。蓋下。一本有亦字。也下。一本有吾字。

一九一頁一行 其下。一本有平字。一本有于此乎三字。溜。一本作澗。合上。一本有大字。合下。一本有則字。人下。一本有之字。山下。一本有向爲二字。也下。一本有乎字。其下。一本有未字。乎。一本作也。

二行 之下。一本有如此生其勉乎哉時八字。

四行 擔。一本作坦。

五行 水應從。一本作沐。沼。一本作池。奇下。一本有既字。樹下。一本有復字。

六行 臺下。一本有同字。嘗下。一本有共字。

八行 夫。一本作乎。

九行 雍。一本作官。

卷二十

一九三頁十四行 以。一本作已。正。一本作止。

十五行 憂。一本作優。一本作有。非是。

十六行 觀。一本作稽。載。一本作代。

一九四頁二行 塵。一本作列。

五行 製一本作制。音一本作言。

十一行 曼一本作麗。

十二行 玩珍一本作珍玩。飾一本作賜。一本作錫。

一九五頁一行 難一本作艱。守一本作行。盛明一本作明德。非是。

二行 順一本作盛。躍踊一本作踊躍。

四行 捧一本作奉。

五行 祐一本作佑。

十一行 玷一本作垢。司一本作斯。

十二行 非一本作菲。常一本作嘗。

十三行 心一本作忠。

十六行 稟一本作秉。觸一本作仕。

一九六頁三行 非一本作菲。貪饜一本作饜饜。非是。

六行 圯一本作暎。

九行 代一本作爲。

十四行 朝一本作宗。

十六行 胡一本作吳。非是。序一本作謝。

一九七頁一行 霑襟。一本作沾巾。

二行 宏一本作大。

三行 生一本作時。

五行 介一本作芥。

十一行 貴一本作貫。

十三行 要津。一本作津要。寤一本作悟。英元案。寤字佳。

十六行 以一本作而。

一九八頁一行 御一本作馭。狗應作徇。各卷均同。

三行 難一本作雖。

十行 知之一本作知爲。

十四行 趨一本作趣。

十五行 畜一本作蓄。

十六行 釋一本作適。

一九九頁一行 謝一本作遜。

三行 消一本作銷。

四行 發憤。一本作憤發。爾一本作乎。

七行 曾祖下脫某字。

九行 寬一本作宏。

十三行 疾一本作嫉。

十四行 機一本作幾。

十五行 詔一本作誥。

十六行 臣一本作官。

二〇〇頁三行 聞一本作問。

八行 人下脫工字。案人工一本作人貴。一本作時貴。均非是。

九行 名一本作譽。吟一本作咕。

十二行 善下。一本有其字。猶一本作凡。

十三行 木材應從一本作材木。

十六行 溺一本作汨。與一本作譽。

二〇一頁一行 詞一本作言。

二行 豫一本作預。

三行 册一本作策。

四行 渙一本作煥。

八行 慎下脫其字。

九行 祖一本作主。眈一本作氓。

十一行 弱下。一本有然字。

十二行 二以字衍。

十五行 閒一本作門。

二〇二頁五行 已一本作永。

六行 嘗一本作常。

七行 塵一本作埃。

十三行 眇眇一本作渺渺。

十五行 髻一本作髻。

二〇三頁二行 舊分一本作分舊。

三行 同族二字未詳。諸本皆同。疑有一誤。

四行 自諸本無。當衍。連一本作還。

十行 黎下。一本有韓字。真一本作貞。

十三行 印一本作劍。光容一本作先容。一本作光榮。

十五行 煦一本作煦。逾一本作逾。

二〇四頁三行 惟靈一本作惟公。

十二行 蘊一本作孕。弘一本作宏。

十四行 豫一本作預。險夷諸本作夷險。

十五行 醜一本作醜。

卷二十一

二〇五頁四行 月一本作照。

七行 習一本作講。

十三行 至下。一本有日字。又一本作奉和御製冬至。英元案。以前後奉和詩觀之。當以奉和

御製冬至爲是。

二〇六頁五行 二。一本作又七言均大字。

九行 爐一本作鑪。

十二行 冪冪應作羃羃。

十五行 新一本作清。非是。

二〇七頁二行 豫一本作御。非是。

三行 聞一本作閒。閒字佳。

八行 幹一本作榦。盤一本作蟠。

二〇八頁四行

无諸本作無。

五行

起一本作啓。

七行

織一本作繡。

八行

詠一本作韻。

十行

无諸本作無。

十二行

悽一本作恹。

煙一本作滄。

二〇九頁二行

乃一本作方。

材一本作才。

十一行

煢一本作瑩。

十五行

煦一本作煦。

二一〇頁三行

焰一本作燄。

二一一頁三行

送高秀才案此詩脫末二句諸本同。

四行

閑一本作閒。

幽尋一本作尋幽。

八行

閑一本作閒。

十行

衣錦一本作夜錦。

十二行

雲一本作青。

十四行

閑一本作閒此二字各卷互用不盡記。

二二二頁二行 有諸本作在。

十四行 生一本作身。

二二三頁八行 朱一本作周。

十六行 宿一本作星。

二二四頁二行 无諸本作無。

五行 遊一本作府。

十行 其二至下頁其九諸本多無細目。

十五行 潔心一本作結仙。宿一本作舊。

二二五頁三行 競一本作竟。

九行 閑一本作柴。

十二行 秦官一本作秦宮。盼一本作眇。

十三行 熒一本作瑩。

十五行 可一本作何。官一本作君。

十六行 壞一本作懷。眇一本作渺。悲一本作思。

卷二十二

二二七頁四行 鎖一本作瑣。

七行 旆應作旆。 漱應作漱。

八行 長一本作常。

十行 采一本作綵。

十三行 紆一本作紆。非是。

十五行 長一本作常。

二一八頁一行 第一本作地。非是。

三行 岐一本作歧。

九行 獨一本作欲。

十行 間當從一本作閑。

十四行 其二一本無此二字。

二一九頁二行 惠一本作連。

七行 桂一本作檜。長一本作常。

十二行 算一本作計。

二二〇頁二行 淦。陸氏本及宋詩鈔均作塗。

六行 旅一本作里。

八行 其二諸本無此二字。

九行 凡一本作閒。醒一本作醒。

二二二頁六行 霸一本作灞。

八行 良一本作賢。

十一行 情一本作清。酒一本作浦。

十二行 仍一本作誠。

十四行 榮一本作瑩。華一本作花。糒一本作揉。

二二二頁一行 州一本作舟。非是。

三行 塗一本作途。此字各卷多互用。

五行 罇一本作樽。此字各卷多互用。

十二行 其二至下頁其十。諸本多無此目。迴一本作回。此字各卷多互用。

二二三頁十一行 敖一本作瑯。

十四行 午下。一本有日字。

十五行 味一本作詠。祝慶一本作慶祝。

二二四頁一行 洪涯。諸本多作洪厓。前後各卷同。眇一本作渺。

六行 曠一本作放。

十一行 喜一本作許。

二二五頁一行 是榮朱君仲武校作思榮非是

六行 送陳使君之同州案此詩後有和元少卿雪詩一首徐氏元本脫今補刊卷末

八行 顧諸本多作類

二二六頁三行 賦下六字一本旁注

六行 我諸本作吾一本作君

卷二十三

二二七頁十行 書學諸本多作學士

十一行 稽一本作慨

十二行 物上宋文鑑有於字淵鑑類函有於萬二字

十三行 本淵鑑類函作文及淵鑑類函作乃苛政作戰攻

十五行 賈逵說文無賈字

十六行 返諸本作反

二二八頁一行 宋文鑑淵鑑類函均無之迹二字

二行 釋一本作說正下一本有至字中下一本有考字

四行 學者淵鑑類函無學字自唐淵鑑類函無自字

六行 爲文淵鑑類函無爲字

七行 淵鑑類函無凡傳至盡究十九字。

八行 見者淵鑑類函無者字。

九行 皆附淵鑑類函無皆字。

十行 具下脫有字。

十三行 取者一本無者字。從一本作復。書一本作學。又淵鑑類函無說文之三字。

二二九頁一行 端今本多作端。摸一本作摹。一本作模。

二行 趣一本作趨。訛一本作譌。

三行 凡篇六百字一本作凡萬六百字。仲容云此與說文字數不合。兩本並難通。英元案。

前重修說文序亦云凡萬六百餘字似舊本相傳如是。又此本凡篇六百字。篆韻譜所載原序作凡萬六千字。仲武云。叔重自敍五百四十部。九千三百五十三文。重一千一百六十三。則舉大數實九千字。十五篇。篇六百字。乃九千之數。安得萬六千之多。蓋篆韻譜傳譌。集本不誤也。今案朱君證篆韻譜原序作凡萬六千字之譌。其說極是。而云此舉大數實九千字。十五篇。篇六百字。乃九千之數。亦尙未協。今並存兩君之說。一俟他時詳考之。極于斯焉。一本作于斯極焉。

六行 慎篆韻譜作謹。蓋避宋孝宗諱。似篆韻譜作從。又淵鑑類函無相似二字。

八行 英一本作勃。方下篆韻譜及淵鑑類函有今字。檢一本作校。

九行 楚金淵鑑類函作錯。

十行 記一本作紀。聲韻區分。一本作區聲分類。覩一本作觀。一本作知。

十一行 詰一本作古。演一本作衍。

十二行 釋一本作識。非是。十卷。篆韻譜作五卷。仲武云。李昉撰騎省墓志銘。亦作十卷。疑當時有二本。或五卷各分上下。貽一本作詒。較古。

十四行 定一本作正。舟一本作丹。

十五行 漏脫。一本作脫漏。始一本作殆。

十六行 顛一本作灑。罷諸本作寵。今從篆韻譜作罷。

二三〇頁一行 己下諸本有之字。弟子諸本作子弟。摹一本作模。

二行 記一本作紀。

八行 時一本作人。

十行 僻一本作浮。調律。一本作律調。浮一本作泛。返一本作反。

二三一頁三行 文房四譜序。案此書瑞安孫君仲容藏有舊本。并有此序。

五行 袁伯業案袁諸本均作朱。惟文房四譜原序作袁。與魏志文帝典論合。今據改正。

七行 學之。文房四譜無之字。

八行 繼之。之一本作以。賦一本作雅。

十一行 期一本作斯。惠一本作慧。

十二行 興嘆。一本作恨遺。遺恨。一本作嘆興。忽恍。一本作恍惚。

十三行 茫。一本作玄。泊。一本作洵。

十四行 見之。一本無之字。

二三二頁一行 而下一本有子竟二字。特一本作獨。

二行 心。一本作性。

三行 爲序。一本作序之。

五行 父下一本有之字。爾一本作耳。著一本作紀。

八行 涂。一本作塗。慊。一本作歉。

十行 夫。一本作乎。

十四行 訓疑作詞。又訓下脫則字。

二三三頁一行 當一本作尙。

四行 爲子。諸本多作謂余。

五行 知下。諸本有貢字。亟。一本作丞。今案亟字是。

八行 篇于。一本作于篇。

卷二十四

二三五頁十二行 子下。一本有之字。

十三行 石下諸本有矣字。

十四行 才下諸本有之字。

十五行 吳氏諸本無氏字當衍。歡康一本作康樂。

一三六頁五行

絨一本作綬。

七行

宗一本作家。路下脫紆此茜三字。

八行

景一本作境。

十一行

慎夏一本作抑憂非是。又慎夏亦見後送葉元輔秀才序。

十四行

畜一本作蓄。

十五行

夫一本作大。

一三七頁四行

宦一本作官。

十一行

一本無序字。

一三八頁一行

盛夏本作慎夏。今從一本作盛夏。又前送刁桐廬序亦有慎夏自愛句。當是古書有

此二字連文俟考。

三行

返一本作反。

五行

渝一本作踰。

八行

拙一本作絀。

十行 弗一本作不。

十一行 象一本作像。又此字各本多互用。

二三九頁二行 里閭一本作閭里。

四行 均璫一本作灼爍。遇當從一本作寓。

六行 愷悌一本作豈弟。

十二行 竊一本作查。館一本作觀。

十四行 刊一本作刻。

十六行 理一本作禮。非是。摯一本作鷺。

二四〇頁三行 臨下脫後湖二字。

四行 長一本作常。今一本作令。隱下。一本有乃字。

七行 原一本作源。

十行 盞下脫錯字。

十二行 聞之下。一本有而字。遂下有反字。及字衍。

十三行 可下脫久可二字。一本家下無之字。

二四一頁五行 益下脫益字。

六行 故下脫伊字。

七行 責一本作貴。非是。

十三行 魯哀應作齊景。今諸本均作魯哀。或是徐公誤記。或為宋本之譌。今應存其舊。

二四二頁一行 之士。一本作其事。糝糠。一本作糠糝。祿稍。一本作爵祿。仲容云。稍即周禮之稍食。義兩通。不必改。

五行 知下。一本有夷齊二字。

九行 南一本作商。

十行 失下。一本有若夫二字。

十一行 響字衍。

十二行 南一本作商。焉一本作者。

卷二十五

二四三頁四行 蛾一本作峨。

五行 觀碑下。一本有銘字。

九行 則哲。一本作作哲。

十四行 焉一本作言。期志。一本作志斯。

二四四頁一行 校一本作較。

五行 桀一本作傑。

六行 悌一本作弟。

七行 殖一本作植。

八行 宴一本作燕。

九行 載一本作再。

十一行 簡一本作束。

二四五頁五行 藉一本作籍。案此字各本多互用。

六行 塵一本作庭。一本作城。

十二行 必諸本多作畢。位一本作定。

十三行 衛諸本多作惠。

十五行 返諸本多作反。

二四六頁五行 罔象。案此二字見莊子天地篇。但今本莊子均作象罔。而北宋以前本均作罔象。頃

見宋本祖庭事苑。及遵義黎公庶昌影宋本。唐西華法師成玄英莊子注疏。亦均作罔象。又張衡思玄賦。亦有罔象二字連文。彼雖非用求珠故事。而義實相同。徐公文集各舊鈔本多有脫譌。惟罔象二字各本皆同。蓋徐公所見尚爲唐代所傳精本也。當朱君仲武代爲校刊此書時。見原鈔本作罔象。而以爲傳鈔之譌。遂從今本莊子改爲象罔。今特據各舊鈔本更正之。並引宋本祖庭事苑。及影宋本莊子注疏。以爲之證。俾讀者無疑徐集之誤。且明古書之不可輕改焉。告一本作誥。

九行 隄諸本多作提。

十二行 受命一本作命受。

十三行 上清太平一本作太平上清。

十四行 極一本作聳。

二四七頁三行 佻一本作桃。

五行 恍惚一本作忽悅。遂一本作遂。

七行 祀一本作祊。

八行 膺一本作應。案此字諸本互用。

十行 藉諸本多作籍。此字各本多互用。隆諸本作鍾。荒諸本作方。

十三行 場一本作揚。

十四行 蛾一本作峨。

二四八頁一行 貫一本作冠。

二行 濟一本作渡。

九行 長一本作常。

十二行 鈕一本作鎮。一本作紐。

十三行 禍當從一本作褐。撓當從一本作撓。

十四行 階一本作陞。

十五行 比日一本作皆晝。

二四九頁一行 衛一本作惠。

三行 庶民句以下皇綱句以上有脫譌字句無從查考。心一本身。

四行 蛾一本作蛾。

六行 疇一本作誰。

八行 鍾應從一本作鐘。

十行 天一本作大。

十四行 記一本作紀。

十六行 蛾一本作蛾。

二五〇頁二行 歸一本作飯。遷一本作遭。

五行 圓一本作園。

六行 俱一本作得。終一本作千。

十六行 細大一本作大小。

二五一頁四行 喪一本作尙。非是。

五行 鄉一本作邦。

十行 泄一本作洩。林一本作陵。

十一行 牒一本作牒。案此二字各本多互用。靖一本作靜。二字古本通。各本互用。

十三行 晨一本作宸。

十六行 宋諸本多作朱。宰邑。應從一本作邑宰。

二五二頁三行 增一本作尊。隆一本作隆。

四行 回一本作迴。

五行 方一本作力。

七行 像一本作象。

卷二十六

二五三頁十四行 度一本作營。

十六行 階一本作陞。

二五四頁一行 洞一本作桐。

三行 藹一本作藹。

五行 獲一本作復。

七行 夫一本作天。仲容云。夫猶人也。

八行 魂魄一本作嵬嵬。非是。魂魄熊熊。本山海經。

十二行 楚一本作土。

十三行 道下脫之字。

十四行 之昭之之字衍。

二五五頁四行 形下無脫字。誤空格。

六行 斯謂以下有脫文。

七行 跪諸本多作詭。非是。

十行 然一本作焚。

二五六頁五行 閑一本作閒。閑安。一本作安閑。

六行 回諸本作迴。迴抱下。是謂鸞岡北隅特高。仍案此九字。諸本皆同。惟全唐文作滄。

波縈帶。奇峰橫翠。如虎踞之形。無是謂以下九字。文氣較爲完美。當從之。

七行 階一本作陞。

八行 秩祀。一本作職秩。一本秩上空一格。

十行 光一本作先。

十三行 參一本作森。

二五七頁二行 府一本作腑。

八行 庫諸本作車。非是。

九行 奠諸本作莫，非是。

十行 勿一本作不。

十二行 蹄筌一本作筌蹄，一本作筌題。

二五八頁二行 命一本作名，時一本作特，鳳一本作風。

三行 關一本作門。

六行 珠一本作朱。

十行 天敍□□祀事，諸本無此四字。

十二行 長一本作常。

二五九頁三行 通感一本作交感，一本作感通。

四行 供一本作恭，一本作躬。

五行 完像堙沈，一本作法像堙沈，又一本完作宅，像下有遂字。

十行 分一本作紛。

十一行 霞一本作雲。

十二行 文一本作銘。

十三行 祐一本作佑，此二字各卷諸本互用。

十四行 篠一本作窈。

卷二十七

二六一頁十三行

俯一本作甫。一本無此字。彰一本作章。祥一本作禪。

二六二頁三行

幾字當衍。或疑當在庶下。非是。仰瞻諸本多作瞻仰。

五行

綜一本作總。

六行

庶一本作以。

九行

生一本作存。非是。生協韻。嗟一本作與。

十一行

員一本作幘。

十二行

和一本作初。

十三行

哲應作哲。

十四行

泄一本作洩。颺一本作颺。

十五行

鍊一本作練。

二六三頁一行

樓應從一本作棲。

二行

璧一本作碧。

三行

壁一本作壁。

七行

人一本作民。佑一本作祐。

十六行

亂一本作變。

二六四頁一行 親下脫曰字。 申一本作伸。

三行 衆一本作庶。

十行 勲一本作勤。

十三行 年下一本有秋字。

十六行 木一本作禾。

二六五頁三行 勒下脫銘字。

六行 載感坤靈。一本作感戴神靈。

十五行 夫家一本作人家。非是。夫家本周禮。

二六六頁九行 代一本作氏。

十三行 中佃未詳。或有誤字。

十四行 優優一本作優優。

二六七頁五行 累下脫加字。

七行 桂一本作杜。 畿一本作圻。

九行 禱祈一本作祈禱。

十行 不作下。一本有與鄉人既受其庇七字。

十二行 故下。一本有國字。

十五行 校一本作較。前後各卷多同。

二六八頁二行 櫛一本作捷。是。

三行 故靜。一本作故境。一本作故井。均非。是。靜。道家齋舍之名。見陶弘景真誥。

五行 太乙。諸本多作太一。後三見均同。

七行 根一本作株。

八行 莊一本作壯。

卷二十八

二六九頁十行 生一本作士。咸一本作感。

十六行 是有一本作是以。兆一本作召。

二七〇頁二行 弦諸本多作絃。又此二字。各卷互用。弦古絃俗。

三行 增一本作尊。

五行 寅一本作蚤。

六行 響答。一本作響應。一本作嚮應。

十三行 寓應從一本作寓。

十六行 萃一本作在。

二七一頁一行 乙一本作已。

二行 蹂應作糶。

五行 鍊一本作練。又各卷此字多互用。作練較古。

九行 人之周應從一本作仁之周。

十行 雲一本作云。

十一行 煥一本作揚。

十二行 姻一本作嫻。

十三行 總一本作絲。閒下一本有言字。非是。成化諸本多作化成。

十四行 十一本作千。

二七二頁一行 牒一本作諜。案此二字各卷時有。諸本互用。

六行 眈一本作民。

七行 尋一本作潯。宦一本作官。聽一本作廳。

八行 歸一本作巍。益一本作蓋。

十行 善上脫贊字。叶一本作協。

十四行 石下一本有某字。月下有日字。

二七三頁二行 篇一本作編。

六行 筓一本作筓。放一本作訪。一本作倣。

二七四頁一行 九行 坊諸本作朽。制一本作製。
凡下一本有有字。

四行 致諸本作至。

五行 迭一本作徧。詮一本作筌。

六行 五一本作二。

八行 豫一本作預。今上御名。諸本作覲。

九行 谷變陵遷。一本作陵變谷遷。昭一本作照。

十行 分下一本有某字。

十三行 象一本作像。左下脫一字。

十四行 馨一本作芬。

十六行 丹臺一本作丹池。依憑一本作凭依。

二七五頁四行 歲下脫來字。

十一行 閨下脫眞字。誓一本作思。

十六行 里下各本空格。疑是動字。臻下諸本有故字。

二七六頁三行 高應從一本作淺。

六行 十下諸本有四字。

八行 膺一本作撫。靜一本作淨。

九行 君諸本作公。修一本作脩。此二字各本互用。建一本作進。

十行 書一本作分。仲容云。八書似用說文敘奏八體書。非八分也。

十一行 箸一本作筯。

十五行 勢下諸本有四面二字。不可。今姑空二格。址一本作趾。湮一本作烟。

十六行 瀉一本作寫。

二七七頁七行 之備。應從一本作未備。

九行 餘一本作許。

十二行 我下脫以文二字。

卷二十九

二七九頁十三行 鈞一本作均。

十四行 率一本作克。非是。恭一本作供。

二八〇頁四行 數一本作教。非是。

五行 里上有脫文。

九行 異一本作穎。

十行 綜一本作參。爲一本衍。

十一行 必頌宣尼。諸本均作必以頌宣。朱君因原鈔本必作心。遂改從宋文鑑。

十二行 矣下脫至字。

十三行 若一本作如。

二八一頁一行 鑒一本作眷。

十四行 之節一本作之葉。

二八二頁二行 隸一本作穎。

三行 義一本作羲。

十行 光一本作芳。

十六行 遵一本作尊。

二八三頁二行 度一本作渡。

六行 恭一本作共。

七行 衣一本作飲。

八行 理下一本有寺字。

十二行 皆一本衍。

二八四頁九行 睦一本作牧。

十四行 達一本作造。各一本作吝。

二八五頁二行 堙一本作湮。

三行 仕下脫伯字。

五行 君一本作公。

九行 嘗一本作常。 樸一本作朴。 責一本作謂。

寮一本作僚。此二字各本互用。

十一行 屬一本作室。

十二行 盡一本作進。

十四行 理下。一本有寺字。

二八六頁二行 物一本作俗。

三行 惠一本作慧。 稟一本作本。 曰下脫啜白二字。

十六行 時期。一本作是朝。

二八七頁二行 諭諸本作喻。

三行 客諸本作咎。

四行 典一本作與。

六行 乾德。一本作建隆。

八行 卿下脫及字。 天諸本作天。

十五行 忘諸本作亡。

卷三十

二八九頁八行

唯一本作眞。

九行

調上一本有有字。

二九〇頁二行

餘一本作日。乃下脫集字。

五行

綜一本作該。

八行

膺一本作應。

十四行

西一本作南。

十五行

人當從一本衍。

十六行

時一本作人。

二九一頁一行

某年月下有日字。

五行

出孝入悌。諸本作入孝出弟。

六行

斯之一本作斯文。

二九二頁十行

任一本作仕。

十一行

訓一本作誨。

十六行

繼字下。諸本無次繼□三字。是。

二九三頁一行

繼崇。諸本作繼宗。仲容云。繼崇似是長子名。英元案此文前云。殿中少監早卒四子。

皆幼及長子某。是長子之名已佚。此云次繼宏。次繼宇。次繼宗。至太平興國某年月日。繼宗等始改竅于某所。似前三子已亡。惟繼宗獨存故耳。姑記所疑於此。俟覓舊本論定之。

六行 隕一本作墜。

七行 奧一本作之。

十二行 入下脫蒙字。

十四行 行一本作色。

二九四頁四行 初一本作和。

五行 館一本作管。昇一本作并。

六行 武一本衍。厲一本作勵。

七行 與一本作予。

十行 閣應從一本作閣。此二字各本互用。

二九五頁四行 向下脫之字。矣一本作焉。

五行 思有諸本作思其非是。

六行 云一本作曰。

七行 恭一本作參。

十行 高祖下脫滉祖二字。

十一行 則諸本作卽。

十五行 代一本作氏。視一本作觀。

二九六頁一行 外敏內愚。諸本作內敏外愚。

五行 兼一本作並。

上海图书馆藏书



A541 212 0006 1587B



1650151